



মেমসাহেব

নিমাই ভট্টাচার্য

মেমসাহেব



নিম্নে উল্লিখিত

MEMSAHEB

A Bengali Novel by NIMAI BHATTACHARYYA

Published by Dey's Publishing

13 Bankim Chatterjee Street Calcutta 700073

Rs. 80.00

প্রথম দে'জ সংস্করণ : আশ্বিন ১৩৯২, অক্টোবর ১৯৮৫

চতুর্বিংশ সংস্করণ : শ্রাবণ ১৪০২, আগস্ট ১৯৯৫

প্রথম প্রকাশ : শ্রাবণ ১৩৭৩

প্রবন্ধ : অজিত গুপ্ত

মাম : ৮০ টাকা

ISBN-81-7079-690-3

প্রকাশক : সুধাংশুশেখর দে । দে'জ পাবলিশিং

১৩ বঙ্কিম চ্যাটার্জি স্ট্রিট কলকাতা ৭০০০৭৩

মুদ্রক : স্বপন কুমার দে । দে'জ অফসেট

১৩ বঙ্কিম চ্যাটার্জি স্ট্রিট কলকাতা ৭০০০৭৩

মেমসাহেব

“যারা কাছে আছে তারা কাছে থাকে
তারা তো পারে না জানিতে
তাহাদের চেয়ে তুমি কাছে আছ
আমার হৃদয়খানিতে।”

‘ওয়েস্টার্ন কোর্ট
জনপথ
নিউদিল্লী

দোনাবৌদি.

তোমার চিঠি পেলাম। অশেষ ধন্যবাদ। তুমি আমাকে ভালবাস, স্নেহ কর। তাই তো যুগু দেখ আমি ঘর বাঁধি, সুখী হই। একটা রাঙা টুকটুকে বৌ আসুক আমার ঘরে। আমাকে দেখাশুনা করুক, একটু ভালবাসুক, আমার একটা অবলম্বন হোক। তাই না? ভাবতে বেশ মজা লাগে। আমার এই ছনুছাড়া জীবনে একটা জুনিয়র দোলা এসে দোলা দিলে মন্দ হতো না। হয়ত তাঁর আবির্ভাব হলে নিজের জীবনটাকে নিয়ে এমন জুয়া খেলতাম না, ভবিষ্যৎ নিয়ে ছিনিমিনি করতাম না। হয়ত তাঁর ছোঁয়া পেলে বুকের ব্যথাটা সেরে যেত, হয়ত নিকট-ভবিষ্যত মুসৌরী বা নৈনিতালের কোন নার্সিংহোমে যাবার প্রয়োজন হতো না। হয়ত আরো অনেক কিছু হতো। নিজের কাছ থেকে নিজেকে এমনভাবে লুকিয়ে রেখে পালিয়ে বেড়াতাম না। তাই না দোনাবৌদি?

সত্যি কথা বলতে কি, বিয়ে করতে আমার সম্মতি না থাকলেও যদি কোন মেয়ে আমাকে বিয়ে করে তাতে আমার বিশেষ অসম্মতি নেই। বরং বেশ আগ্রহই আছে। আর তাছাড়া আগ্রহ না থাকার কি কারণ থাকতে পারে?

তুমি তো নিজেরই আঠারো কি উনিশ বছর বয়স থেকে। খোকনদাকে দোলা দিতে শুরু করেছিলে। ইউনিভার্সিটির দুই গেট দিয়ে দু’জনে বেরুতে। তুমি ইউনিভার্সিটির দোরগোড়া থেকে ২-বি বাসে চাপতে আর খোকনদা মেডিক্যাল কলেজের পিছন থেকে ন’নম্বর বাসে চাপত। দু’জনে দু’টি বাসে চাপলে কি? দু’জনেরই তো নেমে পড়তে লিভসে স্ট্রিট-এর মোড়ে। ডিসেম্বরের হাড়-কাঁপানো শীতে কাঁপা কাঁপা লিং উপভোগ করেছ তোমরা দু’জনে। এসব আমি আরো জানি তুমি নিজের হাতের কঙ্কন আর গলার মোটা হারটা বিক্রি করেছিলে বলেই খোকনদা অত দিন ধরে রিসার্চ করে পি-এইচ ডি. হতে পারল। এমন করে দোলা দিতে দিতে একদিন অকস্মাৎ নিজের দোলনায় তুলে নিলে খোকনদাকে।

এসবই তো নিজের চোখে দেখা। আরো অনেককেই তো দেখলাম। মঞ্জুরী, লিপি, কণিকারাই কি কম খেল দেখাল! আমার প্রথম যৌবনের সেই সবুজ কাঁচা দিনগুলিতে তোমরা সবাই আমাকে যথেষ্ট ইনফ্লুয়েন্স করেছিলে। হয়ত আজও সেই ইনফ্লুয়েন্স শেষ হয় নি। আর ঐ অনুরাধা? কত বড় বড় কথা, কত লেকচার, কত তর্ক-বিতর্ক! বিয়ে? সরি! শেষ পর্যন্ত একটা পুরুষের তৃষ্ণা মেটাবার জন্য আমাকে শিকার করবে? নেভার, নেভার, নেভার!

মনে পড়ে দোনাবৌদি? অনুরাধা শেষকালে চীৎকার করে হেনরি ফিভিং’কে কোর্ট করে বলত, ‘His designs were strictly honourable, as the saying is : that to rob a lady of her fortune by way of marriage.’

আমাদের সেই অনুরাধাও একদিন বর্ধমানের নীতিশের গলায় মালপত্র পরাল। আমি দিল্লীতে ছিলাম না। তাই অনুরাধার আমন্ত্রণ পেতে একটু দেরি হওয়ায় সে দৃশ্য দেখার সুযোগ আমার হয় নি। কিন্তু তার বৌভাত-ফুলশয্যার দিন আমি বর্ধমান না গিয়ে পারি নি। প্রাচীন কাব্যে আছে অনন্তযৌবনা উর্বশীর ক্যাবারে ডাকের ঠেলায় স্বর্গরাজ্যের ম্যানেজিং ডাইরেক্টরদের সব কাণ্ডজ্ঞান

লোপ পেয়েছিল। কিন্তু যুনি কবিসের নাচে উর্বশীর ধ্যানভঙ্গ্য না; পড়ি নি। তবে দেখলাম অনুরাধার বেলার। একটা ভাঙা জিপগাড়ি, দুটো কন্স্টেবল আর একটা পেটমোটা সাব-ইন্সপেক্টরের ঘাড়ে চড়ে আই-পি-এস নীতিশ এমন নাচই নাচল যে, অনুরাধাও ক্রিন বোস হয়ে গেল।

এই উৎসবের বাড়িতেই লোকজনের ভিড় একটু পাতলা হলে আমি কানে-কানে জিজ্ঞাসা করেছিলাম, অনু, এ কি হলো? ছিঃ ছিঃ, শেষ পর্যন্ত পুরস্কার তৃষ্ণা মেটাবার শিকার হলো?

তুমি তো অনুরাধাকে ভালভাবেই জান। ও ভাঙলে কিন্তু মচকাবে না। তাই শেখশিয়াদের 'অ্যান্টি অ্যান্ড ক্রিপেট্রা' থেকে কোট করে বলল, 'My salad days when I was green in judgement.'

চমৎকার! তোমাদের এইসব কাণ্ডকারখানা দেখে আমার বিয়ে করার ইচ্ছা হওয়া কি স্বাভাবিক নয়? মাঝে মাঝেই ভাবি আমিও যদি বোকনদা বা নীতিশের মত....।

যাক্গে ওসব। আচ্ছা দোলাবৌদি, তাছাড়া পাত্র হিসেবে কি আমি খুব খারাপ? খবরের কাগজের স্পেশাল করস্পনডেন্টের চাকরিটাও নেহাত মন্দ নয়। বেশ চটক আছে, মাইনেও নেহাত কম পাই না। বাড়ি না থাকলেও গাড়ি আছে, নায়েব না থাকলেও স্টেনো তো আছে! তাছাড়া এখনই আজকালকার মেয়েরা বিলেতফেরত দুই ছেলেদের বেশ পছন্দ করে। মেয়েদের বাপ-মা স্মার্ট-সফিসটিকেটেড বলে এইসব দুই ছেলেদের জামাই করতে আপত্তি করেন না। সেদিক থেকে আমি ওভার-কোয়ালিফায়েড। একবার নয়, বহুবার গেছি বিলেত। লোকে বলে দুইমিও নাকি করেছি।

আরো একটা ব্যাপার আছে। পটলডাঙার গোবিন্দ বিলেত ফেরত বলে বিয়েতে ফিলিস্টারদের যত ইনকাম-ট্যাক্স ফ্রি দশ হাজার টাকা ব্র্যাকমানি পেয়েছিল। সুতরাং আমার ভবিষ্যৎ বেশ উজ্জ্বল মনে হয়। আর তাছাড়া তোমার মত হাই ফার্স্ট ক্লাস পাওয়া এজেন্ট যখন আছে! পয়সাওয়াল। বোকা বোকা লোকের একটা উড়-উড় মেয়ে শিকার করা অধ্যাপিকা দোলা সরকারের পক্ষে নিশ্চয়ই খুব কষ্টকর নয়।

তবে তার আগে মেমসাহেব উপাখ্যানটা তোমাদের সবার জেনে নেবার দরকার। আমার ঐ কালো মেমসাহেবকে নিয়ে তোমরা অনেকদিন হাসি-ঠাট্টা করেছ; হয়ত কিছু ধারণাও করেছ মনে মনে। শুধু তুমি কেন, অনেকের মনেই আমার মেমসাহেবকে নিয়ে অনেক প্রশ্ন! কেউ-কেউ ভাবে মেমসাহেব বলে কেউ নেই। পুরোটাই গুল করেছি। নানা ধরনের নানা লোকজনের কাছ থেকে মেমসাহেব সম্পর্কে চিঠিপত্র কম পাই না।

যার সঙ্গে মতুন আলাপ হয়, তিনিই প্রশ্ন করেন, মেমসাহেব কে? ছেলেমেয়ে বুড়া-বুড়ি সবার ঐ এক প্রশ্ন। এই তো কদিন আগে দিল্লী ইউনিভার্সিটির এক তন্বী-শ্যামার সঙ্গে আলাপ হলো। বাড়িতে নিয়ে গেলেন। দুটো খিন-এরাকট বিস্কুট, একটা প্যাডা সন্দেশ আর এক কাপ চা দিয়েই মুচকি হেসে জিজ্ঞাসা করলেন, মা জানতে চাইছিলেন মেমসাহেবের আসল নাম কি?

বহুরথানেক আগে সিউড়ি থেকে এক বৃদ্ধা পার্শ্বল করে একটা লাল টুকটুকে সিঙ্কের শাড়ি পাঠিয়েছিলেন। সঙ্গে একটা ছোট চিঠি ছিল। লিখেছিলেন, তোমার মেমবৌকে এই শাড়িটা আশীর্বাদী পাঠাচ্ছি। বিদেশী মেমকে এই শাড়িটা পরালে ভাল লাগবে। মাতৃভুল্যা স্নেহাতুর বৃদ্ধাকে আমি লিখেছিলাম, মা, শাড়িটা আপনি সাবধানে রেখে দিন। সময় মত আপনার মেমবৌকে নিয়ে ওখানে গিয়েই শাড়িটা গ্রহণ করব।

মেমসাহেবকে নিয়ে আরো কত কি কাণ্ডই হয়! তাই তো এবার ভেবেছি তোমাদের সঙ্গে এমন করে আর লুকোচুরি না খেলে পুরো ব্যাপারটাই খুলে বলব। তাছাড়া আমার জীবনের এইসব ইতিহাস না জানলে তোমার পক্ষে ঘটকালি করারও অসুবিধা হতে পারে। তোমাকে সব কিছু লেখার আগে নৈতিক দিক থেকে মেমসাহেবের একটা অনুমতি নেওয়া দরকার। কিন্তু আজ সে এত দূরে চলে গেছে যে, তার অনুমতি যোগাড় করা প্রায় অসম্ভব। আর হ্যাঁ, তাছাড়া ওর ঠিকানাও আমার জানা নেই।

দুই

মনে হলো তুমি আমার চিঠি পড়ে ঘাবড়ে গেছ। গত চিঠিতে বিশেষ কিছুই লিখি নি, এমন কি পৌরচন্দ্রিকাও পূর্ণ হয় নি। সুতরাং এখনই নার্ভাস হবার কি আছে? তাছাড়া তুমি না মেয়ে? অন্যের

শ্রেমের ব্যাপারে তোমাদের তো আশাহের শেষ নেই। শিক্ষিতাই হোক আর অশিক্ষিতাই হোক, শ্রেমপত্র সেলর করতে মেয়েরা তো শিরোমণি। ইউনিভার্সিটির জীবনে তো দেখেছ লেকচার শোনা, কপিহাউসে আড্ডা দেবার মত অন্যদের শ্রেমপত্র হাত করাও প্রায় সব মেয়েদের নিত্যকার কাজ ছিল। গল্পগোমে যাও সেখানেও দেখবে পারুল-বৌদির চিঠি অনুপূর্ণা-ঠাকুরঝি না পড়ে কিছুতেই ছাড়বে না। শুনেছি কুল কলেজে মেয়েদের চিঠি এলে দিদিমণিরা একবার চোখ না কুলিয়ে ছাড়েন না। ছাত্রীদের অভিভাবকত্ব করবার অহিলায় চুরি করে শ্রেমপত্র পড়াকে কিছুটা আইসসঙ্গত করা যেতে পারে মাত্র; কিন্তু তার বেশি কিছু নয়।

তাছাড়া শ্রেমের কাহিনী জানতে মেয়েদের অরুচি? কলিকালে না জানি আরো কত কি দেখব, শুনব? মেয়ের বিয়ে হলে মা পর্যন্ত জানতে চান, হ্যারে খুকি, জামাই আদর-টাদর করেছিল তো? হাজার হোক মা তো! ঠিক খোলাখুলিভাবে সব কথা জিজ্ঞাসা করতে পারেন না। তাই ঘুরিয়ে আদর-টাদর করার খরব নেন। বাসরঘর তো মাসি-খুড়ি থেকে দিদিদের ভিড়ে গিজগিজ করে।

আর সেই সতী-সানিত্রী, সীতা-দয়মত্নী থেকে শুরু করে আমাদের মা-মাসিরা যে সত্যতা ও সংস্কৃতির ধ্বজা বহন করে এনেছেন, শত বাধা-বিপত্তি অগ্রাহ্য করে যে ঐতিহ্যের ধারা অমান রেখেছেন, আজ তুমি সেই মহান আদর্শ থেকে বিচ্যুত হবে, আমি ভাবতে পারিনি।

সর্বোপরি, আমি যখন নিজের স্বেচ্ছায় তোমাকে সব কথা বলছি, তখন তোমার লজ্জা বা সন্তোচের কি কারণ থাকতে পারে? আর তোমাকে ছাড়া আমার এই ইতিহাস কাকে জানাব বলতে পারো? তুমি আমার থেকে মাত্র এক বছরের সিনিয়র হলেও তোমাকে আমি সেই প্রথম পরিচয়ের দিন থেকেই ভালবেসেছি, শ্রদ্ধা করেছি। খোকনদার প্রতি তোমার শ্রদ্ধা, ভক্তি, ভালবাসা যেদিন থেকে আবিষ্কার করেছি সেইদিন থেকেই তুমি আমার দোলাবৌদি হয়েছ। ছাত্রজীবনের সেই শেষ দিনগুলিতে আর আমার কর্মজীবনের প্রথম অধ্যায়ে তুমি আর খোকনদা যেভাবে আমাকে সাহায্য করেছ, সহানুভূতি জানিয়েছ, তার তুলনা হয় না। তাই তো জীবনের সমস্ত সুখে-দুঃখে প্রথমেই মনে পড়ে তোমাদের।

মেমসাহেবের বাপারটা ইচ্ছা করেই জানাই নি। তোমরা অবশ্য কিছু কিছু আঁচ করেছিলে কিন্তু খুব বেশি জানতে পর নি। ভগবানের দয়ায় আমি দিল্লী চলে আসায় নাটকটা আরো বেশ জমে উঠেছিল। আমি ভেবেছিলাম, তোমাকে আর খোকনদাকে একটা সারপ্রাইজ দেব। তাই কিছু জানাই নি। কিন্তু আর দেরি করা ঠিক হবে না। তুমি যখন আমার বিয়ে দেবার জন্যে ব্যস্ত হয়ে উঠেছ তখন সবকিছু না জানান অন্যায় হবে।

আর শুধু মেমসাহেবের কথাই নয়, আমার জীবনে যেসব মেয়েরা এসেছে, তাদের সবার কথাই তোমাকে লিখব। সব কিছু তোমাকে জানাব। কিছু লুকাব না। আর কিছু না হোক, তোমাকে হালপ করে এইটুকু গ্যারান্টি দিতে পারি যে, আমার এই কাহিনী তোমার খুব খারাপ লাগবে না। যদি ভাষাটাকে একটু এডিট করো, তাহলে হয়তো ছাপা হয়ে বই বেরুতে পারে।

সুতরাং হে আমার দোলাবৌদি, ধৈর্য ধর! হে আমার খোকনদার প্রাণের প্রিয় 'দোলে দোদুল দোলে দোলনা' দোলা, তোমার ভ্রাতৃসম লক্ষণ দেবরের প্রতি কৃপা কর, তার ইচ্ছা পূর্ণ কর।

তিন

সেদিন কি তিথি, কি নক্ষত্র, কি লগ্ন ছিল, তা আমি জানি না। জীবন-নদীতে এত দীর্ঘদিন উজান বাইবার পর বেশ কুন্ডতে পারছি যে সেদিন বিশেষ শুভলগ্নে আমি পৃথিবীর প্রথম আলো দেখি নি। এই পৃথিবীর বিরাট স্টেজে বিচিত্র পরিবেশে অভিনয় করার জন্য আমার প্রবেশের কিছুকালের মধ্যেই মাতৃদেবী প্রস্থান করলেন। একমাত্র দিদিও আমার জীবননাট্যের প্রথম অঙ্কেই জামাইবাবুর হাত ধরে স্বত্বরবাড়ি কেটে পড়ল। আমার জীবনে সেই প্রাগৈতিহাসিক যুগ থেকে আমি নারী-ভূমিকা-বর্জিত নাটকে অভিনয় শুরু করেছি।

ছোটবেলায় আমি বোবা বা বিকলাঙ্গ ছিলাম না, কিন্তু মা বলে কোন শব্দ উচ্চারণ করতে সেদিনও পারি নি, আজও পারি না। ভবিষ্যতেও পারব বলে আশা করি না। শ্রদ্ধানন্দ পার্কে আমি যেসব ছেলেমেয়েদের সঙ্গে খেলা করতাম, তাদের বিচিত্র আচরণ দেখে স্তম্ভিত না হয়ে পারতাম না। পাঁচ-ছ'বছর বয়সে আমি নিজের গিয়ে বৈঠকখানা বাজারে 'বিরজা মিষ্টান্ন ভাণ্ডার' থেকে খাবার কিনে



এনে একলা একলা বেতাম কিন্তু আমার ঐ খেলার সঙ্গীরা সব সময় খায়ের বা সিদির হাতে খেতো । খেলতে-খেলতে একটু পড়ে গিরে যদি কারুর হাত-পা ছড়ে যেত তবে সঙ্গে সঙ্গে সে মার কোলে চড়ে বাড়ি চলে যেত । জ্যা মাকে জড়িয়ে ধরে কাঁদতে কিন্তু এক পাও হাঁটতে পারত না । অনেকদিন আমারও অমনি কেটে গেছে, রক্ত বেরিয়েছে, কিন্তু কই আমি তো কাঁদি নি । আমি তো কারুর কোলে চড়ে বাড়ি বাই নি । আমার নিচরই ব্যথা লাগত না । ছোটবেলার মাকে হারালে নিচরই শিশুদের ব্যথা-ট্যাখা লাগে না, তাই না সোলাবৌদি? বাবা পেটের দারে এক দীর্ঘ সময় বাইরে কাটাতেন যে আমার বেশ মজা হতো । আশপাশের বাড়িতে ঘুরে ঘুরে আমি অনেক মজা দেখতাম । সন্ধ্যার অন্ধকার একটু গাঢ় হলেই আশপাশের বাড়ির ওরা সবাই ঘুমে চলে পড়ত কিন্তু কই আমার তো ঘুম পেত না । আমি তো রোজ রাতি দশটা সাড়ে দশটা পর্যন্ত জেগে বসে থাকতাম বাবার জন্য ।

সব চাইতে মজা হতো স্কুলের পরীক্ষার সময় । আমার প্রায় সব বন্ধুদের মা এক হাতে এক গেলাস দুধ আর অন্য হাতে কিছু খাবার নিয়ে লোহার বড় গেটটার বাইরে দাঁড়িয়ে থাকতেন । ঘন্টা পড়ার সঙ্গে সঙ্গে ছেলেগুলো হুড়মুড় করে দৌড়ে গিয়ে দুধ মিষ্টি খেতো । কিন্তু কই, আমার জন্য তো কেউ কোনদিন দুধের গেলাস নিয়ে দাঁড়িয়ে থাকত না । ঘন্টা পড়লে আমি তো কোনদিন হুড়মুড় করে ছুটে গিয়ে দুধ মিষ্টি খেতে পেতাম না ।

পূজার সময় সবাই কত দামী দামী সুন্দর চক্চকে জামা পরত । সন্ধ্যার পর ওরা সবাই ঐনব জামাকাপড় পরে ফিটফাট সেজেগেজে মার হাত ধরে, সিদির কোলে চড়ে দুর্গাঠাকুর দেখতে বেরুত । আমি আগড়পাড়ার ইজের আর শাটটা পরে সকাল দুপুরে এত ঘুরাঘুরি করতাম যে সন্ধ্যার সময় বেশ আরামে ঘুমুতে পারতাম । বিজয়ার দিন ওদের সবাইকে কতজনে আশীর্বাদ করত, কত মিষ্টি দিত কিন্তু বাবা ছাড়া আমাকে আর কেউ আশীর্বাদ করত না, মিষ্টিও দিত না ।

এমনি করেই কেটেছে আমার শৈশব, কৈশোর । সেদিন বুঝি নি কিন্তু আজ বুঝেছি যে, গাছ থেকে ভাল ফুল, ফল পেতে হলে একটু সার দেবার দরকার । শৈশবে মা'র ভালবাসার ঐ একটু সার পেলে হয়ত আজ আমি নীরস শুষ্ক বাকলাগাছ হতাম না । আমার জীবনটাও হয়ত অনন্ত দিগন্তবিস্তৃত মরুপ্রান্তর হয়ে উঠত না ।

সব মানুষই মা'কে হারায় । কেউ শৈশবে, কেউ কৈশোরে, কেউ যৌবনে, কেউবা প্রৌঢ়ত্বে বা বার্ধক্যে । কৈশোর বা যৌবন, প্রৌঢ়ত্বে বা বার্ধক্যে মাকে হারালেও অল্পবিস্তর কিছু সান্ত্বনা আছে । কিন্তু আমার মত যে শৈশবে মাকে হারায়, মাতৃস্নেহের স্বাদ উপলব্ধি করার পর্যন্ত যার ক্ষমতা হয় নি সে যদি মাতৃহীন হয় তবে তার কি সান্ত্বনা!

অনেকে মাকে পায় না কিন্তু তাঁর স্মৃতির স্পর্শ পায় প্রতি পদক্ষেপে । মা'র ঘর, মা'র বিছানা, মা'র বাগ, মা'র ফার্নিচার, মা'র ফটো থাকলেও মা'র একটা আবছা ছবি মনের পর্দায় উঁকি দেবার অবকাশ পায় । আমার পোড়াকপালে তাও সম্ভব হয় নি । নিমতলা শুলানঘাটে মা'র একটা ফটো তোলা হয়েছিল । পাঁচ টাকা দিয়ে তিনটে কপিও পাওয়া গিয়েছিল । নিয়মিত বাসাবন্দলের দৌলতে দু'টি কপি নিরক্ষেশ হয়ে যায় । তৃতীয় কপিটি সিদির সংসারে ক্ষুধার্ত উইপোকার উদরের ছালা মেটাচ্ছে । মানুষের জীবনের প্রথমও প্রধান নারী হচ্ছে মা । তাঁর স্নেহ, তাঁর ভালবাসা, তাঁর চরিত্র, আদর্শ, প্রতি পুত্রের জীবনেই প্রথম ও প্রধান সম্পদ । আমি সেই স্নেহস্পর্শ, ভালবাসা ও সম্পদ থেকে চিরবঞ্চিত থেকে গেছি । তাই তো আমার জীবনে নারীর প্রয়োজন ও গুরুত্ব উপলব্ধিতে অনেক সময় লেগেছে ।

ছোটবেলার মাকে হারিয়ে ও আশপাশে কোন বোন বা অন্য কোন নারীচরিত্র না থাকায় মেয়েদের সম্পর্কে আমার শঙ্কা ও সঙ্কোচ বহুদিন কাটিয়ে ওঠা সম্ভব হয় নি । আমার কৈশোরের সেই সেদিনের কথা মনে হলে আজও হাসি পায় !.....

তখন ক্লাস নাইন থেকে টেন-এ উঠেছি । সবে পাখনা গজান শুরু হয়েছে । হাফ প্যান্ট ছেড়ে মালকোঁচা দিয়ে ধুতি পরা ধরছি । ফুল হাতা শার্টের হাতা না ওটিয়ে পরলে বোকা বোকা মনে হয় । প্রচ্যাসন পার্ক পাড়ার ছেলেদের সঙ্গে ফুটবল পেটাতে বেশ আড্ডাসম্বানে লাগে । বিকেলবেলার একমাত্র 'রিভিউশন' দু'চারজন বন্ধু মিলে পাড়ার এনিক-ওদিক ঘুরেফিরে আড্ডা দেওয়া । মনুদের বাড়িতে আমার যাতায়াত ছিল, হুল্যতা ছিল । দু'একবার পৌষ-সংক্রান্তির দিন মনুদার মা আমাকে

আপন করে গিঠে-পায়েসও খাইয়েছেন। ওনেছি দিদির বিয়ের সময় মনুদাদের বাড়ির সবাই খুব সাহায্য করেছিলেন। ঐ বাড়ির সবার সঙ্গেই আমার পরিচয় ছিল, ওদের পরিবারের অনেক খবরই আমি জানতাম। জানতাম না শুধু নন্দিনীর কথা। ছোটনাগপুরের মালভূমি থেকে মনুদার এই চঞ্চলা কিশোরী ভাইঝি কবে অকস্মাৎ মহানগরীতে আবির্ভূতা হয়েছিলেন সে খবর আমি রাখি নি। তিনিও নাইন থেকে টেন-এ উঠে মীর্জাপুরের বীণাপাণি বালিকা বিদ্যালয় ধন্য করার জন্য কলকাতা এসেছেন তাও জানতাম না। জানতাম না আরো অনেক কিছু। জানতে পারি নি যে চোদ্দ বছর বয়সেই তিনি তাঁর জীবননাট্যের নায়ক খুঁজতে বেরিয়েছেন। এসব কিছু জানতাম না।

একদিন মনুদাদের বাড়ি থেকে দু'একটা গল্পের বই নিয়ে বেরুবার সময় মাথার উপর একটা কাগজের প্যাকেট এসে পড়ায় চমকে গেলাম। কুড়িয়ে নিয়ে দেখলাম একটা খাম। নাম-ঠিকানা কিছুই লেখা ছিল না, শুধু লেখা ছিল 'তোমার চিঠি।' তোমার চিঠি! মানে আমার চিঠি! মুহূর্তের জন্য ঘাবড়ে গেলাম। দু'এক মিনিট বোধহয় থমকে দাঁড়িয়েছিলাম। আর একটু হলেই চীৎকার করে মনুদাকে ডাক দিতাম। কিন্তু হঠাৎ যেন কে আমার মাথায় বুদ্ধি জোগাল। চারপাশটা এক নজরে দেখে নিলাম। শুধু বুড়ো কাকাতুয়া পাখিটা ছাড়া আর কাউকে দেখতে পেলাম না। খামটা নিয়ে একটু নড়াচড়া করলাম। উপরের লেখাটা বারকয়েক পড়লাম, 'তোমার চিঠি।' তারপর দৃষ্টিটা তেতলার দিকে ঘুরিয়ে নিতেই কে যবের জানলায় হাসিখুশিভরা একটা সুন্দরী কিশোরীকে দেখলাম।

অনেকদিন আগেও কথা, সবকিছু ঠিক মনে নেই। তবে আবছা আবছা মনে পড়ে, কি যেন একটা ইশারা করে নন্দিনী লুকিয়েছিল। নারী চরিত্র সম্পর্কে কোন অভিজ্ঞতা না থাকলেও আমার বুঝতে কষ্ট হয় নি চিঠিটা নন্দিনীরই লেখা।

প্রায় ছুটতে ছুটতে বাসায় এলাম। ঘরের খিল বন্ধ করে চিঠিটা একবার নয়, অনেকবার পড়লাম। চিঠির ভাষাটা আজ আর মনে নেই কিন্তু ভাবটা একটু একটু মনে পড়ে। কিছুটা উত্থাস, কিছুটা আবেগ ছিল চপলা কিশোরী নন্দিনীর ঐ চিঠিতে। চিঠিটা পেয়ে ভালও লেগেছিল, ভয়ও লেগেছিল। তার চাইতে আরো বেশি লেগেছিল অবাক। ধনী দুলালীর জীবন-উৎসবে আমার আমন্ত্রণ! আমার মত একটা ভাঙা ডিঙি নৌকা চড়ে নন্দিনী জীবন-সাগর পাড়ি দেবে? আমি কল্পনাও করতে পারি নি।

নন্দিনী চিঠির উত্তর চেয়েছিল কিন্তু আমার সাহস হয় নি। উৎসাহও আসে নি। উত্তর দিই নি, তবুও আবার চিঠি পেয়েছিলাম। ইঙ্গিত পেয়েছিলাম, আমি নাকি তার মানসরাজ্যের রাজপুত্র! পক্ষীরাজ ঘোড়ায় চড়ে নন্দিনীকে নিয়ে অভিষেক করব আমার জীবন-সঙ্গিনীরূপে। আরো অনেক স্বপ্ন দেখেছিল সে। জীবন যার প্রাচুর্যে ভরা, বিনাসিতা করা যার স্বভাব, তার পক্ষে এমন অহেতুক স্বপ্ন দেখা হয়ত স্বাভাবিক। কিন্তু আমার মত দৈন্যভরা কিশোরীর পক্ষে এমন স্বপ্ন দেখা সম্ভব ছিল না। তাই তো তার সেই আমন্ত্রণ আমি গ্রহণ করতে পারি নি। সে আমন্ত্রণ গ্রহণ করার ক্ষমতা বা সাহসও আমার ছিল না।

নন্দিনীকে আমি ভালবাসি নি। কিন্তু প্রাণচঞ্চলা এই কিশোরীকে ভালব না কোনদিন। সে আমার জীবনযজ্ঞের উদ্বোধন-সঙ্গীত গেয়েছিল। এই কিশোরী আমার জীবন-নাট্যক্ষেত্রে শুধু একটু উঁকি দিয়েই সরে গিয়েছিল, বিশেষ কোন গুরুত্বপূর্ণ ভূমিকায় অভিনয় করার অবকাশ পায় নি, কিন্তু তবু তার এক অনন্য ভূমিকা রয়ে গেছে আমার কাছে। বি-এ, বা এম-এ, পাস করার পর জীবনের বৃহত্তর পটভূমিকায় অতীতের অনেক স্মৃতি হারিয়ে যায়, কিন্তু হারিয়ে যায় না পাঠশালার গুরুশায়ের স্মৃতি। নন্দিনী আমার তেমনি একটি অমূল্য স্মৃতি। সে আমার ভোরের আকাশের একটি তারা। সে তারার জ্যোতিতে আমি আমার জীবন-পথ চলতে পারি নি বা তার প্রয়োজন হয়নি? তা না হোক। তবুও সে আমার জীবন দিগ্‌দর্শনে সাহায্য করেছিল। সর্বোপরি সে আমাকে আমার অমিত্র আবিষ্কারে সাহায্য করেছিল।

ভালবাসা কি এবং তার কি প্রয়োজন, সেদিন আমি বুঝি নি, জানি নি। নন্দিনী কেন আমাকে ভালবেসেছিল, কি সে চেয়েছিল, কি পেয়েছিল—কিছুই আমি জ্ঞানি না। শুধু এইটুকুই জানি আমার সুখে সে সুখী হতো, আমার দুঃখে সে লুকিয়ে চোখের জলও ফেলেছে। ছন্দাবদ্ধভাবে এইসব অনুভূতির প্রকাশ করবার সুযোগ কোনদিনই সে পায় নি। কিন্তু যখনই সে সুযোগ এসেছে, নন্দিনী

তার পূর্ণ সম্ভবহার করেছে।

সব্বর্ষী পূজার আগের কদিন মরবার অবকাশ থাকত না। খাওয়া-দাওয়া তো দূরের কথা, ঘুমবার পর্যন্ত সময় পেতাম না। সারা দিন-রাত্তিরই রিগন কুলে কাটাতাম। নন্দিনী ঠিক জানত আমি কোন গরম জামা নিরে বাই নি। সন্ধ্যার পর এক কাঁকে একটা আলোয়ান নিয়ে লুকিয়ে লুকিয়ে আমাকে নিরে আসত। বলত, জোয়ার কি ঠাণ্ড লাগে না? যদি ছুরে পড়, তাহলে কি হবে বল তো।

একবার সত্যি সত্যিই আমি খুব অসুস্থ হয়েছিলাম। নটা বাজতে না বাজতেই বাবা বিদায় নিতেন। কিরতে কিরতে সেই রাত দশটা। অখিল মিস্রি লেনের ঐ বিখ্যাত ভাড়া বাড়িটার অঙ্ককার কক্ষে আমি একলা থেকেছি। মন্টুদাদের বাড়ি থেকে আমার পথ্য সরবরাহের ব্যবস্থা হয়েছিল নন্দিনীর আগ্রহেই। দু'বেলা কুলে যাতায়াতের পথে নন্দিনী আমাকে দেখে যেত। হয়ত একটু সেবা-যত্নও করত।

এসব অস্তিত্বটা আমার ছিল না। শুধু আমার জন্য একজন পথ চেয়ে বসে থাকবে, আমাকে ভালবেসে, সেবা করে, যত্ন করে, কেউ মনে মনে ভুলি পাবে, আমি ভাবতে পারতাম না। নন্দিনী আমার জীবনে সেই অন্তর্ভুক্ত অধ্যায়ের সূচনা করে। ম্যাট্রিক পাস করার পরই নন্দিনী বোধে চলে গেল। আমার জীবনে সেই ঋণহারা অধ্যায়ের পরিসমাপ্তি ঘটল। কিন্তু তবুও সে আমার জীবন থেকে একেবারে বিদায় নিল না। চিঠিপত্র নিয়মিত আসত। আসত আমার জন্মদিনে একটা শুভেচ্ছা। আমি রবীন্দ্রনাথ ঠাকুর বা নেতাজী নই। আমার মত সাধারণ মানুষের জন্মদিনে যে কোন উৎসব বা অনুষ্ঠান হতে পারে, তা আমার কল্পনার বাইরে ছিল। আমার জন্মদিন বাবা ধান-দুর্বা দিয়ে আশীর্বাদ করেই অফিসে দৌড় দিতেন। সেবারেও এই নিয়মের ব্যতিক্রম হয় নি। বিকেল বেলায় নন্দিনী টিফিনের পয়সা বাঁচিয়ে আমার জন্য সামান্য কিছু উপহার এনে চমকে দিয়েছিল।

নন্দিনী আজ অনেক দূরে চলে গেছে। সুখ-শান্তিতে স্বামী-পুত্র নিয়ে ঘর-সংসার করছে। তার আজ কত কাজ, কত দায়িত্ব। কিন্তু তবুও একটা গ্রীটিংস টেলিগ্রাম পাঠাতে ভোলে না আমার জন্মদিনে।

কলকাতা থেকে বিদায় নেবার পর আমার সঙ্গে নন্দিনীর আর দেখা হয় নি। এম-এ পড়ার সময় ওর বিয়ে হলো এক আই-এ-এস পাত্রের সঙ্গে। নিমন্ত্রণপত্রের সঙ্গে একটা ব্যক্তিগত অনুরোধপত্রও এসেছিল। কিন্তু আমার পক্ষে তখন বোধে যাওয়া আদৌ সম্ভব ছিল না। টিউশনির টাকা আগাম নিয়ে পনের টাকা দামের একটা তাঁতের শাড়ি পাঠিয়েছিলাম। ইতিমধ্যে আমি আমার জীবনযুদ্ধে এমন মেতে উঠেছিলাম যে নন্দিনীকে মনে করার পর্যন্ত ফুরসত পেতাম না।

প্রায় বছর দশেক পরে আমি গ্যাংটক গিয়েছিলাম কি-একটা কাজে। তিন-চারদিন পরে কলকাতার পথে শিলিগুড়ি কিরছিলাম। পথে আটকে পড়লাম। সেবক ব্রীজের কাছে কিছুটা ধস নেমে রাস্তা বন্ধ হয়েছিল। কুলি-মজুরের দল রাস্তা পরিষ্কারে ব্যস্ত। আমার মত অনেকেই প্রকৃতির এই খামখেয়ালীপনায় বিরক্ত হয়ে এদিক-ওদিক ঘোরাঘুরি করছিলেন। রাস্তা পরিষ্কার হতে আরো ঘণ্টা দুয়েক লাগবে। তাই দীর্ঘ অবসরে অনেকের সঙ্গে আলাপ-পরিচয় হলো। কাশিয়াং-এর তরুণ এস-ডি-ও'র সঙ্গেও বেশ ভাব হয়ে গেল।

মাসকয়েক পর আবার কর্মব্যপদেশে দার্জিলিং যাচ্ছিলাম। পথে কাশিয়াং পড়বে। মনে মনে ঠিক করেছিলাম এস-ডি ও সাহেবের সঙ্গে দেখা করব। শিলিগুড়ি থেকে কাশিয়াং এলাম। হঠাৎ অফিসে গিয়ে হাজির হওয়ার এস-ডি-ও সাহেব চমকে গেলেন। পর পর দু'কাপ কফি গিলেই পালাবার উপক্রম করছিলাম কিন্তু এস-ডি-ও সাহেব বললেন, তা কি হয়! আমার কোয়ার্টারে যাবেন, লাঞ্চ খাবেন। তারপর বিকেলের দিকে দার্জিলিং যাবেন। আমার কোন উত্তরের অপেক্ষা না করেই এস-ডি-ও সাহেব কোয়ার্টারে টেলিকোনে গ্রীকে জানালেন, নন্দা, আমার এক বন্ধু এসেছেন কলকাতা থেকে। লাঞ্চে নিয়ে আসছি। তুমি একটু ব্যবস্থা করো।.....

গোটা বারো নাগাদ এস-ডি -ও সাহেব আমাকে নিয়ে কোয়ার্টারে গেলেন। ড্রইংরুমে আমাকে বসিয়ে রেখে স্বান করার জন্য বিদায় নিলেন। মিনিট কয়েক পরে আর কেউ নয়, স্বয়ং নন্দিনী কফির কাপ হাতে নিরে আমার সামনে হাজির হলো। দু'জনেই একসঙ্গে বলেছিলাম, 'তুমি!'

সেদিন কাশিয়াং পাহাড়ের সমস্ত কুয়াশা ভেদ করেও নন্দিনীর চোখেমুখে যে উজ্জ্বলতা, যে

আনন্দ দেখেছিলাম তা কোনদিন ভুলব না। এস-ডি-ও সাহেবকে বলেছিলাম, আপনি যে মকুদাদের বাড়ির জামাই, তা তো জানতাম না। সংক্ষেপে জানলাম ওর স্বত্ত্বরবাড়ির সঙ্গে আমাদের হৃদয়তার কথা। গোপন করি নি, যে তাঁর স্ত্রীর সঙ্গে ছোটবেলায় খেলাধুলো করেছি।

এস-ডি-ও আমাকে স্বত্ত্বরবাড়ির দূত মনে করে আনন্দে মেতে উঠলেন। ব্যঙ্গের টেবিলে এক গেলাস স্কোয়াস হাতে নিয়ে আমার হেলথ-এর জন্য প্রপোজ করতে গিয়ে ঘোষণা করলেন, মিষ্টির জার্নালিষ্ট আজ রাতে এক স্পেশাল ডিনারে চীফ গেস্ট হবেন এবং কার্শিয়াং-এ বাসিন্দা করবেন। আমি বললাম, তা কি হয়! এস-ডি-ও সাহেব বললেন, ভুলে যাবেন না, আমি শুধু অ্যাডমিনিস্ট্রেশন চলাই তা নয়, বিচারও করি। আমি কার্শিয়াং-এর স্ট্রিক জাস্টিস কাথ প্রাইম মিনিটার।

নন্দিনী বলল, 'এতদিন পর যখন দেখা হলো, একটা দিন থাকবে কি তোমার খুব ক্ষতি বা কষ্ট হবে?'

সত্যি খুব আনন্দ করে সেই দিনটি কাটিয়েছিলাম। নন্দিনী স্ট্রিক এতটা আদর-মত্ন করবে ভাবতে পারি নি।

কর্মজীবনের পাকচক্রে আমি ছিটকে পড়েছি বহুদূরে। নন্দিনীর সঙ্গে আমার আর দেখা হয় নি। ভবিষ্যতে কোনদিন দেখা হবে কিনা তাও জানি না। তবে ভুলব না তার স্মৃতি।

জান দোলাবৌদি, আমি কার্শিয়াং ত্যাগের আগে নন্দিনী বলেছিল, 'একটা অনুরোধ করব?'

আমি বলেছিলাম, 'তার জন্য কি অনুমতির প্রয়োজন?'

'না, তা নয়। তবে বলো আমার অনুরোধটা কি হবে?'

বিদায় নেবার প্রাক্কালে মনটা নরম হয়েছিল। কোনকিছু তর্ক করার প্রবৃত্তি ছিল না। বললাম, 'নিশ্চয় রাখব।'

'তোমার পুত্রদ্বুর নাম রেখো নন্দিতা! রাখবে তো?'

আমি স্তম্ভিত হয়েছিলাম ওর ঐ বিচিত্র অনুরোধ করার জন্য। ঠোঁটটা কামড়াতে কামড়াতে কথা বলতে পারি নি। শুধু মাথা নেড়ে সম্মতি জানিয়েছিলাম।

এই চিঠি আর দীর্ঘ করব না। তাছাড়া তুমি হো আমার চিঠি একবার পড়ে ক্ষান্ত হও না। আর যাই কর আমার এসব চিঠি তুমি কলেজে নিয়ে ক্লাসে বসে পড়ো না। তিন-চারদিনের জন্য এলাহাবাদে যাচ্ছি। ফিরে এসে আবার চিঠি দেব।

চার

ভেবেছিলাম তিন-চার দিনের মধ্যেই এলাহাবাদ-বাস শেষ হবে। আশা করেছিলাম এই ক'দিনের মধ্যেই ভারতবর্ষের ভাষা সংস্কার একটা হিলে হবে। দেশটা এমন একটা স্তরে এসে পৌঁচেছে যে আমাদের কোন আশাই যেন আর কোনদিন পূর্ণ হবে মনে হয় না। ভাষা নিয়েও তাই আমাদের আশা পূর্ণ হলো না এবং আমার এলাহাবাদ ত্যাগ করাও সম্ভব হয় নি। আমি আজও এলাহাবাদে আছি; অগামীকাল ও পরশুও আছি। হয়ত আরো অনেক দিন থাকতে পারি।

ক'দিন শুধু টাইপরাইটার খটখট করে প্রায় অ্যালার্জি হবার উপক্রম হয়েছে। তাই তো একটু মুখ পাল্টে নেবার জন্য তোমাকে আমার মেমসাহেব কাহিনী লিখতে শুরু করলাম।

নন্দিনীর বিদায়ের প্রায় সঙ্গে সঙ্গে আমার জীবন সংগ্রাম শুরু হলো। তুমি তো জান বাংলাদেশটা দু'টুকরো হবার সঙ্গে সঙ্গে আমার মত লক্ষ লক্ষ বাঙালী যুবক-যুবতীদের অদৃষ্টও টুকরো টুকরো হয়ে গেল। কোনদিন স্বপ্নেও ভাবি নি কৈশোর-যৌবনের সঙ্কীর্ণে এমন করে কালবৈশাখী দেখা দেবে। ভাবি নি জীবনের সমস্ত দিগন্ত এমনভাবে অন্ধকারে ডরে যাবে।

রিপন স্কুল ত্যাগ করে রিপন কলেজে ভর্তি হলাম। সবার মুখেই শুনেছিলাম আর্টস পড়লে কোন ভবিষ্যৎ নেই; সায়েন্স না পড়লে দেশ ও দেশের যুবকদের মুক্তির কোন উপায় নেই। বাপ-ঠাকুরদার সঙ্গে জ্ঞানের পরিচয় থাকলেও চোদ্দপুরুষের সঙ্গে বিজ্ঞানের কোন সম্পর্ক ছিল না। কিন্তু তবুও আমি বিজ্ঞান সাধনা শুরু করলুম। তবে দেশের অবস্থা এমন অদ্ভুত জটিল হয়েছিল যে শুধু বিজ্ঞান-সাধনা করেই দিন কাটানো সম্ভব ছিল না, লক্ষ্যীয় সাধনাও শুরু করলাম।

কলেজে গিয়ে লেখাপড়া-সাহিত্য-মুখ্য হলেও সকাল-সন্ধ্যায় টিউশনি করে রসদ যোগাড় করার

কাছটাও কম গুরুত্বপূর্ণ ছিল না। এই দোটার মধ্যে প্রাণান্ত হবার উপক্রম হয়েছিল। নিজের দিকে ফিরে তাকাবার অবকাশ পান্ছিলাম না। ছোটবেলায় কলেজ-জীবন সম্পর্কে অনেক রূপকথার কাহিনী শুনতাম, কুলে পড়ার সময় তাই স্বপ্ন দেখেছিলাম। স্বপ্ন দেখতাম, ধুতি-পাজ্জাবি পরে হাতে খাতা দোলাতে-দোলাতে কলেজে ঘুরে বেড়াচ্ছি, মাষ্টার মশাইদের মত প্রফেসররা অথবা ছাত্রদের বকাবকি করছে না, ক্লাস ফাঁকি দেবার অবাধ স্বাধীনতা এবং আরো অনেক কিছু। আশা করেছিলাম কলেজ-জীবন সাফল্যপূর্ণ বৃহত্তর জীবনের পাসপোর্ট তুলে দেবে আমার হাতে। এই ক'বছরে শিক্ষা-দীক্ষা ও সর্বোপরি অভিজ্ঞতা আমার চোখে নতুন স্বপ্ন, নতুন আশা এনে দেবে, সম্ভব করে তুলবে তাদের বাস্তব রূপায়ণ। লুকিয়ে লুকিয়ে মনে মনে হয়ত এ আশাও করেছিলাম আমি সার্থক সাফল্যপূর্ণ ও পূর্ণাঙ্গ মানুষ হয়ে সগর্বে এগিয়ে যাব আগামী দিনের দিকে।

সেদিন জানতাম না বাংলাদেশের সব যুবকই কলেজ-জীবনের শুরুতে এমনি অনেক স্বপ্ন দেখে এবং সে স্বপ্ন চিরকাল শুধু স্বপ্নই থেকে যায়। বোধহয় একজনের জীবনেও এসব স্বপ্ন বাস্তব হয়ে দেখা দেয় নি। তবুও বাঙালীর ছেলে স্বপ্ন দেখে; স্বপ্ন দেখে হাসিতে গানে ভরে উঠবে তার জীবন। জীবনপথের চড়াই-উতরাই পার করতে সাহায্য করবে আদর্শবতী জীবন-সঙ্গিনী এবং আরো অনেক কিছু।

লক্ষ লক্ষ কোটি কোটি বাঙালী যুবকদের মত হয়ত আমিও এমনি স্বপ্ন দেখেছিলাম কোন দুর্বল মুহূর্তে। অতীতের ব্যর্থতার ইতিহাস থেকে শিক্ষা নিই নি, পূর্বসূরীদের অভিজ্ঞতা আমাকে শাসন করতে পারে নি, সংযত করতে পারে নি।

তবে আমি আমার কচনার উড়োজাহাজ উড়িয়ে বেশিদূর উড়ে যাই নি। রিপন কলেজের এয়ারপোর্ট থেকে টেক অফ করার পরপরই ক্রাশ ল্যান্ড করে সম্বিত ফিরে পেয়েছিলাম।

একদিকে অর্থ চিন্তা ও অন্যদিকে ভবিষ্যতের চিন্তায় আমি এমন প্রমত্ত থাকতাম যে আশেপাশে কোন ভ্রমর আমার মধু খাবার জন্য উড়ছে কিনা, সে খেয়াল করার সুযোগ পেতাম না। জীবনটার সঙ্গে সঙ্গে মনটাও কেমন যেন সংকুচিত হয়ে গিয়েছিল। আমার সীমিত জীবনের মধ্যে যে ক'টি নারী-পুরুষের আনাগোনা ছিল তাদের দিকে ফিরে তাকাবারও কোন আগ্রহ বা উৎসাহ ছিল না।

কিন্তু কি আশ্চর্য, কিছুকাল পর হঠাৎ আবিষ্কার করলাম কে যেন আমার মনোবীণার তারে মাঝে মাঝে ঝঙ্কার দিচ্ছে। চোখের দৃষ্টিটা কেমন যেন একটু রঙিন মনে হলো। ক'দিন আগে পর্যন্ত যে আমার মুহূর্তের ফুরসত ছিল না নিজের দিকে তাকাবার, সেই আমি নিজের দিকে ফিরে তাকাতে শুরু করলাম। আরও একটা গেরুয়া পাজ্জাবি তৈরি করলাম। কায়দা করে ধুতি পরাও ধরলাম। পড়ার সেলুনে চুল কাটা কুচিসংযত মনে হলো না। পরের মাসে টিউশনির মাইনে পাবার পর একজোড়া হাল ফ্যাশানের কোলাপুরী চটিও কিনলাম।

এমনি আরো অনেক ছোটখাটো পরিবর্তন এলো আমার দৈনন্দিন জীবনে। আগে দুটো একটা বই আর খাতা নিয়ে কলেজে যেতাম। এখন বই হাতে করে কলেজে যেতে আত্মসম্মানে বাধতে লাগল। বই নেওয়া ত্যাগ করে শুধু খাতা হাতে করে কলেজে যাওয়ার নিয়মটা পাকাপাকি করে নিলাম। মোদা কথা আমি এক নতুন ধর্মে দীক্ষিত হলাম। বাসাংসি জীর্ণানি করে আমি নতুন আমি হলাম।

অনুষ্ঠ নেহাতই ভাল। বেশিদূর এগুতে হলো না। হেঁচট খেয়ে পড়ে গেলাম। আজ আত্মজীবনী'র সেই রঙিন দিনগুলোর কথা মনে হলে হাসি পায়। সেদিন কিন্তু হাসি পায় নি। মরীচিকাকেই সেদিন জীবনের চরম সত্য বলে মনে করে ছুটেছিলাম। ঘটনাটা নেহাতই মরীচিকাকেই সেদিন জীবনের চরম সত্য বলে মনে করে ছুটেছিলাম। ঘটনাটা নেহাতই সামান্য।

বারাকপুর-টিটাগড় বা খিদিরপুরের বড় বড় কলকারখানার মত তখন আমাদের কলেজেও তিন শিফট-এ হতো। সকালে মেয়েদের, দুপুরে ছেলেদের, রাত্তিরে শ্রৌড়দের ক্লাস হতো। বেধুন বা লেডী ব্রাবোর্নের ছাত্রীদের মধ্যে যুবতী কুমারীদের মেজরিটি থাকলেও আমাদের কলেজের মর্নিং সেক্সনের চেহারা ছিল আলাদা। নীলিমা সরকারের মত সদ্য প্রস্কুচিত গোলাপের সংখ্যা খুব বেশি ছিল না। দেশটা স্বাধীন হবার পর অনেকের সংসারেই আগুন লাগল। এক টুকরো বস্ত্র আর এক মুঠি অন্নের জন্য, রুগ্ন পিতার একটু পথ্যের জন্য, জীবনধারণের নিত্যপ্রয়োজনীয় দাবি মেটাবার জন্য

বাংলাদেশের হাজার হাজার লক্ষ লক্ষ গৃহস্থ বধুদের ডালহৌসী স্কোয়ারের রাসমঞ্চে আসবার পাসপোর্ট যোগাড় করার জন্য অনেক বৌদি আর ছোট মাসীমারই আবার কলেজে পড়া শুরু করলেন। তাছাড়া আর একদল মেয়েরা নতুন করে উচ্চ শিক্ষা নিতে সে সময় শুরু করলেন। দেশটা স্বাধীন হবার পর অনেক অন্ধকার ঘরেই হঠাৎ বিংশ শতাব্দীর আলো ছড়িয়ে পড়ল। আমাদের কলেজের বীণামাসীর মত যারা কোন অন্যান্য না করেও স্বামী ও স্বস্তরবাড়ির অকথ্য অভ্যাসের দিনের পর দিন, বছরের পর বছর সহ্য করেছেন, যারা বিবাহিতা হয়েও স্ত্রীর মর্যাদা পান নি, স্বামীর ভালবাসা পান নি, সন্তানের জননী হয়েও যারা মা হবার গৌরব থেকে বঞ্চিত হয়েছিলেন, তাদের অনেকেই বন্দীশালার অন্ধকূপ থেকে ছিটকে বেরিয়ে এলেন। অজানা, অজ্ঞাত, ভবিষ্যতের সঙ্গে মোকাবিলা করার জন্য এদের অনেকেই আবার কলেজে ভর্তি হলেন। আমাদের কলেজেও অনেকে ভর্তি হয়েছিলেন।

দিনের বেলায় হাফ আদর্শবাদ, হাফ ভাবুক হাফ পলিটিসিয়ান, হা অভিনেতা, হাফ গায়ক, হাফ খেলোয়াড়দেরই সংখ্যা ছিল বেশি। সন্ধ্যার পর যারা আসতেন তাঁদের অধিকাংশই ডালহৌসী-ক্যানিং স্ট্রীট ক্লাইভ স্ট্রীট থেকে অর্ধ অর্ধ অবস্থায় ছুটে ছুটে কলেজে আসতেন।

সওয়া দশটার মেয়েদের ক্লাস শেষ হতো আর ছেলের ক্লাস শুরু হতো। আমার ক্লাস কোনদিন সওয়া দশটায়, কোনদিন এগারোটায় শুরু হতো। সওয়া দশটায় ক্লাস থাকলেও ছেলেরা কোন দিন লেট করত না। বরং দশটা বাজতে বাজতেই কমনরুম ছেড়ে দোতলা-তিনতলার দিকে পা বাড়াত। সওয়া দশটার সন্ধিলগ্নের প্রতি অন্যান্য ছাত্রদের মত আমার আকর্ষণ ছিল কিন্তু সকালবেলায় দুটো টিউশনি করে কলেজে আসতে আসতে প্রায় সাড়ে দশটা হয়ে যেত, তাই তো সওয়া দশটার ফরমিক বসন্তের হাওয়া আমার উপভোগ করার সুযোগ নিয়মিত হতো না।

বীণামাসীর সঙ্গে প্রায়ই পূরবী সিনেমার কাছাকাছি দেখা হতো। বীণামাসী বিবাহিতা যুবতী কিন্তু সিঁদুর পরত না। বীণামাসী বলত, বিয়ে করেও যখন স্বামীকে পেলাম না, স্বস্তরবাড়িতেও স্থান পেলাম না তখন সিঁদুর পরব কার জন্য? ফুটপাথের একপাশে দাঁড়িয়ে দাঁড়িয়ে আমরা দু'চার মিনিট কথাবার্তা বলতাম। কলেজের ছোকরা অধ্যাপক ও ছাত্রদের কেউ কেউ পাশ দিয়ে যাবার সময় একটু সরস দৃষ্টি দিয়ে চাইতেন। বীণামাসী ও আমি দু'জনেই তা লক্ষ্য করতাম কিন্তু গ্রাহ্য করতাম না।

পর পর ক'দিন বীণামাসীর সঙ্গে দেখা হলো না। প্রথম ক'দিন বিশেষ কিছু ভাবি নি। পুরো একটা সপ্তাহ দেখা না হবার পর একটু চিন্তিত না হয়ে পারলাম না। অর্ধচ বীণামাসীদের বাড়ি গিয়ে খোঁজ করব সে সময়ও হয় না। কলেজ শেষ হতে না হতে আবার টিউশনি করতে ছুটেতে হয়।

সেদিন ও কলেজে আসবার পথে বীণামাসীর দেখা পেলাম না। কিন্তু ঐ পূরবী সিনেমার কাছাকাছি হঠাৎ একটা জীবন্ম বারুদের স্থূপ আমার সামনে থমকে দাঁড়াল। বললো, 'তুনুন, বীণাদির খুব অসুখ। আপনাকে যেতে বলেছেন।'

সকাল সাড়ে দশটার সময় হ্যারিসন রোডের উপর পূরবী সিনেমার পাশে এমনভাবে একজন সুন্দরী আমাকে বীণামাসীর সমন জারি করবে কল্পনাও করতে পারি নি। মূর্ত্তের জন্য চমকে গিয়েছিলাম। একটু সামলে নেবার পর অনেক প্রশ্ন মনে এনেছিল কিন্তু গলা দিয়ে সেসব প্রশ্ন বেরুতে সাহস পায় নি। শুধু বলেছিলাম, 'আপনি জানলেন কি করে?'

'-আমি বীণাদির বাড়ি গিয়েছিলাম।'

সেইদিনই বিকেলবেলা বীণামাসীকে দেখতে গিয়েছিলাম। আমি যেতেই বীণামাসী আমাকে প্রশ্ন করল, 'নীলিমার কাছে খবর পেয়েছিস বুঝি?'

আমি বললাম, 'কোন নীলিমা?'

'ঐ যে আমাদের সঙ্গে পড়ে নীলিমা সরকার.....'

'তা জানিনে, তবে আজ সকালেই পূরবীর কাছে একটা সুন্দরী ধরনের মেয়ে.....'

বীণামাসী আর এগুতে দিল না। বললো 'হ্যা, হ্যা, ঐ তো নীলিমা।'

আমি বললাম, 'তাই বুঝি?'

বীণামাসীর কাছে আমি আমার চিত্রচাঞ্চল্যের বিন্দুমাত্র আভাস দিলাম না। নিজেকে সংযত করে নিলাম। কিছুক্ষণ গল্পওজব করে সেদিনের মত বিদায় নেবার আগে বীণামাসীকে জিজ্ঞাসা করলাম, 'কলেজ থেকে কেউ তোমাকে দেখতে আসেন নি?'

‘হ্যা, অনেকেই আসে।’

তিন-চারদিন পরে আবার বীণামাসীকে দেখতে গেলাম। গিয়ে দেখি সেদিনের সেই নীলিমা সরকারও বসে আছেন। নয়ভার বিনিময় করে আমি পাশের মোড়াটায় বসলাম। বীণামাসী চাদরটা গলা পর্যন্ত টেনে নিয়ে পাশ কিয়ে বললে, ‘জানিস নীলিমা, বাবু আগে আমাদের পাড়াতেই থাকত। আমাদের এই পাড়ার থাকবার সময়ই ওর মা মারা যান.....’

নীলিমা, বলল, ‘তাই নাকি?’

আমি বললাম, ‘আমার জীবন-কাহিনী শোনার অনেক অবকাশ পাবেন, আজ থাক। যদি লিখতে পারত তবে বীণামাসী আমার জীবন নিয়ে একটা রামায়ণ লিখত। ভাগ্য ভাল বীণামাসীর কলম চলে না, শুধু মুখ চলে। কিন্তু তার ঠেলাতেই আমি অস্থির।’

নীলিমার সঙ্গে সেই আমার প্রথম আলাপ-পরিচয় হলো। দশ-বারো দিন পরে বীণামাসীর ওখানেই আমাদের আবার দেখা। সেদিন দু’জনেই একসঙ্গে বেরুলাম। তারপর কলেজ ছোয়ার পর্যন্ত একসঙ্গে হেঁটে গিয়ে দু’জনে দু’দিকে চলে গেলাম।

ঐ সামান্য আলাপ-পরিচয়তেই আমি যেন কেমন পাল্টে গেলাম। সকালবেলার টিউশনিতে একটু একটু কাঁকি দিয়ে ও স্নান-আহারের পর্ব কিঞ্চিৎ ত্বরান্বিত করে দৌড়ে দৌড়ে সওয়া দশটার আগেই কলেজে আসা শুরু করলাম। কোনদিন দেখা হয়, কোনদিন হয় না; কোনদিন কথা হয়, কোনদিন হয় না। কোনদিন আবার দূর থেকে একটু তির্যক দৃষ্টি আর মুচকি হাসি বিনিময়। তার বেশি আর কিছু নয় কিন্তু তবুও আমি কেমন বগ্নাতুর হয়ে পড়লাম। নীলিমাকে কো-পাইলট করে আমি আমার কল্পনার উড়োজাহাজ নিয়ে টেক্ অফ করলাম। ভাব-সমুদ্র ভেসে বেড়লাম।

ঐ শুধু একটু মুচকি হাসি ও কণিকের দৃষ্টি-বিনিময়কে মূলধন করে আমি অনেক অনেক দূর এগিয়ে গেলাম। টোপের মাথায় দিয়ে নীলিমার গলায় মালা পরিয়েছিলাম, পাশে বসে বাসর জেগেছিলাম। বৌভাত ফুলশয্যার দিন গভীর রাতে অতিথিদের বিদায় জানিয়ে আমি নীলিমার ঘরে এসে দরজাটা বন্ধ করলাম। নীলিমার পাশে বসে একটু আদর করলাম। তারপর ধীরে ধীরে উঠে গিয়ে সুইচটা অফ করতে গিয়েই দারুন শক্ লাগল। আমার কল্পনার জাহাজ ক্রাশ ল্যান্ড করল। কো-পাইলট নীলিমাকে আর কোথাও খুঁজে পেলাম না। সাহস করে কাউকে জিজ্ঞাসা করতে পারি নি। মহা উৎকর্ষার দিন কাটছিল নীলিমা-বিহীন জীবন প্রায় অসহ্য উঠল। বৈরাগ্যের ভাব মনের মধ্যে মাকে মাকেই ঝঁকি দিতে লাগল। আর কয়েকদিনের মধ্যেই খবর না পেলে হয়ত কেন্দারবন্দীর পথেই পা বাড়াতাম। তপবান করণাময়। তাই সে যাত্রায় আর সংসার ত্যাগ করতে হলো না, নীলিমার দেখা পেয়ে গেলাম।

দেখা পেলাম বীণামাসীর বাড়িতেই। নীলিমার কপালে অন্তর্ভুক্ত একটা সিঁদুরের টিপ দেখে বেশ আঘাত পেয়েছিলাম মনে মনে। প্রথমে ঠিক সহজ হয়ে কথাবার্তাও বলতে পারি নি। নীলিমা বোধ হয় আমার মানসিক ধাক্কের অধা বুঝেছিল। তাই সে নিজেই বেশ সহজ সরল হয়েছিল আমার সঙ্গে।

জান দোলাবোদি, নীলিমার বিয়ে হবার পরই আমাদের দু’জনের বন্ধুত্ব হলো। কোন কাজে-কর্মে সাঁজখে গেলেই কালীঘাটে নীলিমার সঙ্গে দেখা করে এসেছি। নীলিমার স্বামী সন্তোষবাবু আজ আমার অন্যতম বিশেষ বন্ধু ও শুভাকাঙ্ক্ষী। ওরা এখন আমেদাবাদে আছেন। সন্তোষবাবু একটা কিরাট টেক্সটাইল মিলের চীক অ্যাকাউন্ট্যান্ট। একগাদা টাকা মাইনে পান। নীলিমা আমেদাবাদ টেগোর সোসাইটির সেক্রেটারি। ভোমার বোধহয় মনে আছে সেবার গোয়া অপারেশনস্ কর্তার করে দিল্লী ফেরার পথে দমন গিয়েছিল এবং আমি অসুস্থ হয়ে পড়ি। গভ্যস্তর না পেয়ে সন্তোষ বাবুকেই একটা আর্জেস্ট টেলিগ্রাম পাঠাই। স্বামী-স্ত্রী দু’জনেই ছুটে এসেছিলেন আমাকে নিয়ে যাবার জন্য। দু’সপ্তাহ ওদের সেবা-যত্নে আমি সুস্থ হবার পর নীলিমা মেমসাহেবকে আমেদাবাদে আনিয়েছিলেন। দু’সপ্তাহ অসুস্থ থাকা সত্ত্বেও কোন খবর না দেবার জন্য মেমসাহেব জীবন রেগে গিয়েছিল। আমি কিছু জবাব দিতে পারি নি। নীলিমা ওর দুটি হাত ধরে বলেছিল, ‘ভোমার সেবা পাবার যত অসুখ হলে নিশ্চয়ই খবর দিতাম।’ ডাক্তার মৈত্রকে জিজ্ঞাসাও করেছিলাম। উনি বললেন, ‘তাড়াছড়ো করে ওকে আদবার কোন কারণ দেখি না। একটু সুস্থ হলেই খবর দেবেন।’

একটু খেমে দু’হাত দিয়ে মেমসাহেবের মুখটি তুলে ধরে নীলিমা বলেছিল, ‘তাছাড়া তাই, আমি’

বা তোমার দাদাও বাবুকে ভালবাসি। তোমার অভাব আমাদের দ্বারা না মিটলেও ওর সেবা-যত্নের কোন ক্রটি করি নি আমরা।

মেমসাহেব তাড়াতাড়ি চোখের জল মুছে হাসিতে ভরিয়ে তুললো নিজের মুখটা। বললো, 'নীলিমা, আমি তো আপনাদের দুঃখ চাই নি। তবে আগে এলে হয়ত নিজে মনে মনে একটু শান্তি পেতাম, তাই আর কি.....'

নীলিমা আর এগুতে দেয় নি। ঐ অধ্যায়ের ঐখানেই সমাপ্তি হলো।

তারপর আরও এক সপ্তাহ ছিলাম আমেদাবাদে। কাকারিয়ার লোকের ধারে রোজ বেড়িয়েছি আমরা। কত আনন্দ, কত হেঁচ করেছি আমরা। যাক্গে সে সব কথা।

নন্দিনী যখন আমার জীবনে উঁকি দিয়েছিল, তখন আমি চমকে গিয়েছিলাম। ভাবতে পরি নি, ভাববার সাহস হয় নি যে একটি মেয়ে আমার জীবনে আসতে পারে বা আমাকে কোন মেয়ে তার জীবনরথের সারথী করতে পারে। যেদিন নীলিমার দেখা পেলাম, সেদিন কি করে এই সংশয়ের মেঘ কেটে গেল জানি না। তবে একথা সত্য যে, রূপকণ্ঠার রাজকুমারীর মত নীলিমার ছোঁয়ায় আমার ঘুম ভেঙেছিল, আমি কৈশোর থেকে সত্যি-সত্যিই যৌবনের সিংহদ্বারে এসে উপস্থিত ছিলাম।

নীলিমার কথা আজ পর্যন্ত কাউকে জানাই নি। এসব জানাবার নয়। এ আমার একান্তই নিজস্ব ব্যাপার। এমনকি নীলিমাও জানে না, হয়ত ভবিষ্যতেও জানতে পারবে না। তবে মেমসাহেব কি বলেছিলেন জান? বলেছিলেন, 'সুন্দরী মেয়ে দেখলে যে তোমার মাথাটা ঘুরে যায়, তা আমি জানি। আমার মত কালো কুষ্টিত মেয়েকে যে তোমার পছন্দ হয় নি কথাটা অত ঘুরিয়ে বলার কি দরকার?

আমি শুধু বলেছিলাম :

"প্রহর শেষের আলোয় রাঙা সেদিন চৈত্র মাস-

তোমার চোখে দেখেছিলাম আমার সর্বনাশ।

এ সংসারে নিত্য খেলায় প্রতিদিনের প্রাণের মেলায়

বাটে যাটে হাজার লোকের হাস্য-পরিহাস-

মাঝখানে তার তোমার চোখে আমার সর্বনাশ।"

একটা চাপা দীর্ঘনিঃশ্বাস ছেড়ে বলেছিল, 'তোমার পোড়া কপাল। কি করবে বল! যদি পার পাল্টে নেবার চেষ্টা কর।'

আলোচনায় আর দীর্ঘ না করে মেমসাহেব মুচকি হেসে জিভ ভেংচি কেটে পালিয়ে গিয়েছিল।

পাঁচ

আমি দিল্লী ফিরে এসেছি, কিন্তু ক'দিন এমন অপ্রত্যাশিত ব্যস্ততার মধ্যে দিন কাটলাম যে, কিছুতেই তোমার চিঠি লেখার সময় পাই নি। তাছাড়া ইতিমধ্যে দু'দিনের জন্য তোমাদের বন্ধু মাধুরী চ্যাটার্জী আর তাঁর স্বামী এসেছিলেন। মাধুরীকে মনে পড়ছে তোমার? প্রেসিডেন্সীতে ফিলজফি নিয়ে পড়ত। পার্ক সার্কাস-বেগবাগানের মোড়ে থাকত।

দিল্লীতে আসার পর নিত্য-নৈমিত্তিক পরিচিত আধা-পরিচিত অনেকেই আসেন আমার আন্তানায়। কেউ ইন্টারভিউ দিতে, কেই অফিসের কাজে, কেউ বা আবার ডেরাডুন-মুসৌরী-হরিদ্বারের পথে লালাকেদা-কুতুবমিনার আর রাজঘাট-শান্তিবন দেখার অভিপ্রায়ে। মাধুরী চালাক মেয়ে। হাজার হোক আমাদেরই বন্ধু তো! স্বামী এসেছিলেন অফিসের কাজে আর উনি এসেছিলেন স্বামীকে অনুপ্রেরণা দিতে। এখনও সেই আগের মতনই হে-হুয়োড় করে। স্বামীকে সকালবেলায় অফিসে রওনা করিয়ে দিয়ে সারাদিন নিজে হে-হে করে চকর কেটে বেড়াতে আমার সঙ্গে। আমি ক্লান্ত হয়ে পড়তাম। কিন্তু মাধুরী হতো না। বিকেলবেলায় স্বামী এলে আমাদের সেকেন্ড ইনিংস শুরু হতো।

যাই হোক বেশ কাটল দুটো দিন। মাধুরীর কাছে তোমার একটা শাড়ী আর পেটুক খোকনদার জন্য খানিকটা পোকা পাঠিয়েছি। শাড়ীটা তোমার পছন্দ হলো কিনা জানিও।

এদিকে আমাদের ওপর দিয়ে নীলিমার ঝড় বয়ে যাবার পরই হঠাৎ সাংবাদিকতা শুরু করলাম। আমার জীবনের সে এক মাহেন্দ্রক্ষণ। জীবনের সমস্ত হিসাব-নিকাশ গুলট-পালট হয়ে

শেষ। মধ্যাংক বাঙালী ঘরের ছেলে। ম্যাট্রিক পাস করে আই-এ. পড়ে, আই-এ. পাস করে বি-এ পড়ে। তারপর ইউনিভার্সিটির সেগুরা পাসপোর্ট নিয়ে চোদ্দ আনা ছেলে নেমে পড়ত জীবনযুদ্ধের পাওয়ার লীগ খেলতে। বাকি দু'আনা আরো এগিয়ে যেত। তাদের মধ্যে কেউ ফার্স্টি ডিভিশনে আই-এফ-এ শীর্ষ বা রোবার্স খেলত। কেউ কেউ আবার আরো এগিয়ে যেত।

আমি পাওয়ার লীগে খেলবার জন্যেই জন্মেছিলাম ও তারই প্রতীতি করছিলাম। মাঝে মাঝে অবশ্য স্বপ্ন দেখতাম ডাক্তার হবো, ইঞ্জিনিয়ার হবো অথবা অধ্যাপক হয়ে কোঁচা দুলিয়ে কলেজে আসব, মেয়েদের পড়াব, ছেলেদের পড়াব। ছাত্রীদের ঘনিষ্ঠ সান্নিধ্য পাবার জন্য মন আকুল-ব্যকুল হলেও আমি কিছুতেই তার প্রকাশ করব না। কিন্তু তবু ছাত্রীরা আমার কাছে ছুটে আসবে নানা কারণে নানা প্রয়োজনে। ইলোরাদের বাড়ি একদিন চায়ের নিমন্ত্রণ রক্ষা করায় অনেক সরস কাহিনী ছড়াবে সমগ্র নারীজগতের মধ্যে। তারপর ইত্যাদি ইত্যাদি আর কি!

আমাদের আত্মীয়-বন্ধুদের মধ্যে কেউ কোনদিন খবরের কাগজে চাকরি করা তো দূরের কথা, খবরের কাগজের অফিসে পর্যন্ত যান নি। তাই তো কেউ কল্পনা করেননি তাদের বংশের এই কুলাঙ্গার খবরের কাগজে চাকরি করবে। দেশটা দু'টুকরো হবার আগে আমাদের সমাজ জীবন কয়েকটা পরিচিত ধারায় বয়ে গেছে। পরিচিত সীমানার বাইরে যাবার প্রয়োজন বা তাগিদ বিশেষ কেউই বোধহয় করেন নি। দেশটা স্বাধীন হবার সঙ্গে সঙ্গেই অতীত দিনের সে সব রীতিনীতি, নিয়ম-কানুন, প্রয়োজন কোথায় যেন তলিয়ে গেল। এই শাস্ত-ব্রহ্ম পৃথিবীটা যেন কোটি কোটি বছর পেরিয়ে অগ্নি-বলয়ে পরিণত হলো। জৈব প্রয়োজনটা চরম নগ্নভাবে প্রকাশ করল। ইতিহাসের বলি হয়ে মানুষগুলো বাঁচার প্রয়োজনে উন্নাদের মত ছুটে বেড়াল চারদিকে। সেদিনের সে অগ্নি-বলয় পৃথিবীর যে যেখানে পাবল আস্তানা করে নিল। লক্ষপতির ছেলে কলেজ স্ট্রীটে হকার হলো, আমার-তোমার চাইতেও বনেদী ঘরের অনেক মেয়ে-বৌ বৌবাজার আর লিডসে স্ট্রীটের ম্যাসেজ-বাথে গিয়ে দেহ বিক্রয় করতে বাধ্য হলো।

বৌবাজারের রথের মেলায় বা বিজয়া দশমীর দিন কুমারটুলীর ঘাটে লক্ষ লক্ষ লোকের ভিড়ে হারিয়ে যাওয়া ছোট বাচ্চাদের দেখেছ? দেখেছ, কেমন হাউমাউ করে কাঁদে? লক্ষ্য করেছ বাবা-মা'কে হারিয়ে অসহায় হয়ে, ব্যাকুল হয়ে অর্ধহীন ভাষায় সবার দিকেই কেমন তাকায়? আমিও সেদিন এমনি করে অর্ধহীন ভাষায় চারদিকে তাকাছিলাম একটু ভবিষ্যতের আশায়। কোনটা ভাল, কোনটা মন্দ, কোনটা সহজ, কোনটা কঠিন—তা জবাবের সময় বা ক্ষমতা কোনটাই সেদিন আমার ছিল না। তাই তো অপ্রত্যাশিতভাবে খবরের কাগজের রিপোর্টার হবার সুযোগ পেয়ে আমি আর দ্বিধা না করে এগিয়ে গেলাম। রামায়ণে পরেছি সতীত্বের প্রমাণ দেবার জন্য সীতাকে অগ্নি-পরীক্ষা দি' হয়েছিল। অগ্নি-পরীক্ষায় উত্তীর্ণ হয়েও স্বামীর পাশে সীতার স্থান হয় নি। রাজরাজেশ্বরী সন্তানসন্তবা সীতাকে প্রিয়হীন, বন্ধুহীন নিঃস্ব হয়ে গভীর অরণ্যে আশ্রয় নিতে হয়েছিল। জান দোলাবৌদি, আমার মাঝে মাঝেই মনে হয়, সীতার গর্ভেই বোধ হয় বাঙালীর পূর্বপুরুষদের জন্ম। তা না হলে সমগ্র বাঙালী জাতিটা এমন অতিশাপগ্রস্ত কেন হলো? স্বাধীনতা সংগ্রামের জন্য চরম অগ্নি-পরীক্ষা দেবার পরও কেন তার রাহমুক্তি হলো না? স্বাধীন সার্বভৌম ভারতবর্ষের নাগরিক হয়েও কেন তাদের চোখের জল পড়া বন্ধ হলো না?

সত্যি দোলাবৌদি, সেদিনের কথা মনে হলে আজও শরীরটা শিউরে ওঠে, মাথাটা ঘুরে যায়, দুটিটা ঝাপসা হয়। সেই দুর্দিনের মধ্যেই আমি নতুন পথে যাত্রা শুরু করলাম। সকালবেলার টিউশনি দুটো ছাড়লাম না; কিন্তু বিকেলের ছাত্র পড়ানো বন্ধ করলাম। দুপুরে কলেজ করে সাড়ে-তিনটে কি চারটে বাজতে বাজতেই নোট-বই পেমিল নিয়ে চলে যেতাম সভা-সমিতি বা কোন প্রেস কনফারেন্স। তারপর অফিস। রাত বারোটা-একটা পর্যন্ত রোজই কাজ হতো। কোন-কোনদিন আবার বাড়ি কিয়তে কিয়তে রাত তিনটে-চারটে হয়ে যেত।

দিনের পর দিন, মাসের পর মাস, বছরের পর বছর এমনি করে চালিয়েছি। বিনিময়ে কি পেয়েছি? প্রথম বছর একটি পরস্রাও পাই নি। নিজের টিউশনির রোজগার দিয়ে ট্রাম-বাসেরু' খরচ চালিয়েছি। পরের বছর থেকে মাসিক দশ টাকা রোজগার শুরু করলাম। ইতিমধ্যে বিজ্ঞান-সাধনার প্রথম পর্ব শেষ করলাম। পিতৃদেব ফতোরা জারী করলেন, সাংবাদিকতার খেলা শেষ করে একটা

রাস্তা ধর। সত্যি, তখন অর্থনৈতিক অবস্থা ও সামাজিক পরিস্থিতি এমন সঙ্কটাপন্ন ছিল যে, কিছু-একটা না করলে চলছিল না। আমার বন্ধু-বান্ধবরাও ওই একই সমস্যার সম্মুখীন হলো। সবাই উপলব্ধি করছিল কিছু-একটা করতেই হবে। কিন্তু কি করতে হবে কোথায় যেতে হবে তা কেউই জানত না। ডাক্তারী-ইঞ্জিনিয়ারিং পড়ার মত রসদ কারুরই ছিল না। তাই ওদিকে আর কেউ পা বাড়াল না। আমি রিক্রুটিং অফিস থেকে শুরু করে খিদিরপুর-বারাকপুরের সমস্ত কলকারখানার দরজায় দরজায় ঘুরে বেড়লাম একটা পঞ্চাশ টাকার অ্যাথ্রেনটিসশিপের জন্যে। জুটল না। তাই এবার বিজ্ঞান-সাধনায় ইস্তফা দিয়ে সাহিত্য-সাধনা আর সাংবাদিকতা নিয়েই পরবর্তী অধ্যায় শুরু করলাম।

তোমাকে এত কথা লিখতাম না। তাছাড়া হয়ত কিছু কিছু তুমি শুনেছ বা জেনেছ। কিন্তু এই জন্যই এসব জানাচ্ছি যে, আমার জীবনের কোন বিশেষ পরিস্থিতিতে মেমসাহেবকে পেয়েছিলাম, তা না জানালে তুমি ঠিক গুরুত্বটা উপলব্ধি করবে না। যৌবনে প্রায় সব ছেলেমেয়েই প্রেমে পড়ে। এটা তাদের ধর্ম, কর্ম। প্রয়োজনও বটে কিছুটা। তাছাড়া শৈশব-কৈশোর পেরিয়ে পূর্ণতা লাভ করার এটা সব চাইতে বড় প্রমাণ। কলেজের কমনরুমে বা থিয়েটারে গ্রীনরুমে অনেক প্রেমের কাহিনীরই আদি-পর্ব রচিত হয়। কিন্তু অধিকাংশ ক্ষেত্রেই তার মেয়াদ ক্ষণস্থায়ী; সামান্য একটু হাসি, সামান্য একটু গল্প, একটা মেলায় পক্ষি অনেক ছেলেমেয়েই প্রেমের নেশায় মশগুল হয়ে ওঠে। জীবনকে উপলব্ধি না করে ঘাত-প্রতিঘাতের মধ্য দিয়ে জীবনের অগ্নি-পরীক্ষায় উত্তীর্ণ না হয়ে যারা প্রেম করে বলে দাবি করে, তারা হয় বোকা, নয় মিথ্যাবাদী। দুটি মন, প্রাণ, দুটি ধারা, দুটি অপরিচিত মানুষ একই সঙ্গে কোরাস গাইবে অথচ তার পরিবেশ থাকবে না, প্রস্তুতি থাকবে না, তা হতে পারে না। এই পরিবেশ আর প্রস্তুতি থাকে না বলেই আমাদের দেশের কলেজে রেস্তোরার প্রেম প্রায়ই ব্যর্থ হয়। দুখ জমিয়ে ভাল মিষ্টি দই খেতে হলে অনেক তদ্বির, তদারক ও প্রস্তুতির প্রয়োজন। একটু হিসাব-নিকাশ বা তদ্বির-তদারকের গভগোলে হয় দই জমে না অথবা জমলেও দইটা টক হয়ে যায়।

দুটি নারী-পুরুষকে নিয়ে একটা সুন্দর ছন্দোবদ্ধ জীবন গড়ে তুলতে হলে শুধু চোখের নেশা আর দেহের ক্ষুধাই যথেষ্ট নয়। আরো অনেক কিছু চাই। তাছাড়া জীবনে এই পরম চাওয়া চাইবারও একটা সময় আছে। কিছু পেতে হলেও সে পাওয়ার অধিকার অর্জন করতে হয়।

বিশেষ বিশেষ পরিস্থিতিতে ও পরিবেশে অনেককেই অনেক সময় ভুল লাগে। হাসপাতালে হাসিখুশি ভরা নার্সদের কত আপন, কত প্রিয় মনে হয়। কিন্তু হাসপাতালের বাইরে? সমাজ জীবনের বৃহত্তর পরিবেশে? ক'জন পারে তাদের আপন জ্ঞানে সমাদর করতে?

আমার জীবনটা যদি সুন্দর, স্বাভাবিক ও ছন্দময় হয়ে এগিয়ে যেত তাহলে হয়ত যে কোন মেয়েকে দিয়েই আমার জীবনের প্রয়োজন মিটত। কিন্তু আমি জীবনের প্রতিটি মুহূর্তের জন্যে তিলে তিলে দৃঢ় হচ্ছিলাম। একটু সঙ্কমের সংগে বাঁচাবার জন্যে অসংখ্য মানুষের দ্বারে দ্বারে ঘুরে ঘুরেও কোন ফল হয় নি। মাত্র একশ'পঁচিশ টাকার একটা সামান্য রিপোর্টারের চাকরির জন্যে কতজনকে যে দিনের পর দিন তৈল-মর্দন করেছি, তার ইয়ত্তা নেই। তবুও বিদ্যাসাগর বিবেকানন্দের যোগ্য বংশধরদের মন গলে নি।

কেন, আত্মীয়-বন্ধুর দল? পঁচিশ বা পঞ্চাশ টাকা মাইনের রিপোর্টারের সঙ্গে আবার আত্মীয়তা কিসের! নিতান্ত দু'চারজন মূর্খ বন্ধু ছাড়া আর সবার কাছেই আমি অস্পৃশ্য হয়ে গেলাম।

দোলাবৌদি আমার সে চরম দুর্দিনের ইতিহাস তোমাকে আর বেশি লিখব না। তুমি দুঃখ পাবে। তবে জেনে রাখ তোমাদের ঐ কলকাতার রাজপথে আমি দীর্ঘদিন ধরে উন্মাদের মত ঘুরে বেড়িয়েছি। একটি পয়সার অভাবে সেকেন্ড ক্লাস ট্রামে পর্যন্ত চড়তে পারি নি। দু'চারজন নিকট-আত্মীয়ের প্রতি কর্তব্য পালন করে বহুদিন নিজের অদৃষ্টে দু'বেলা অনু জোটাতে পারি নি। কিন্তু কি আশ্চর্য! বিধাতাপুরুষ যত নিষ্ঠুর হয়েছেন আমার প্রতিজ্ঞাও তত প্রবল হয়েছে। বিধাতার কাছে কিছুতেই হার মানতে চায় নি আমার মন।

এমনি করে বিধাতা পুরুষের সঙ্গে লুকোচুরি খেলতে খেলতে প্রায় সাত-আট বছর কেটে গেল। তবুও কোন কূল-কিনারা নজরে পড়ল না। এই সাত-আট বছরে আমার দৃষ্টিভঙ্গির অনেক পরিবর্তন হয়েছিল। সাত-আট বছর আগে শুধু বেঁচে থাকার জন্যে আমি কর্মজীবন শুরু করেছিলাম, কিন্তু সাত-নিম্নাট শেষ্ঠ

আট বছর আমি শুধু বাঁচতে চাই নি, লক্ষ লক্ষ মানুষের অরণ্যের মধ্যে আমি হারিয়ে যেতে চাই নি, চাই নি শুধু অনু-কল্প-বাসস্থানের সমস্যার সমাধান করতে, মনে মনে আরো কিছু আশা করেছিলাম।

কিছু আশা করলেই তো আর সব কিছু পাওয়া যায় না। তাছাড়া শুধু আশা করে আর কতদিন নিরবচ্ছিন্নভাবে সঞ্চায় করা যায়? আমি হাঁপিয়ে উঠলাম। মনের শক্তি, দেহের তেজ যেন আস্তে আস্তে শুষ্ক করলাম। হাজার হোক ধৈর্যেরও তো একটা সীমা আছে।

কাজকর্মে ফাঁকি দিতে শুরু করলাম। ঘুরে-ফিরে নিত্য নতুন খবর যোগাড় করার চাইতে নিউজ ডিপার্টমেন্টে সাব-এডিটরদের সঙ্গে আড্ডা দেওয়াই আমার কাছে বেশি আকর্ষণীয় হলো। শুধু আমাদের অফিসে নয়, আরো অনেক আড্ডাখানায় যাতায়াত শুরু করলাম। ভবিষ্যৎ সম্পর্কে কেমন যেন দার্শনিকসুলভ ঔদাসীন্য দেখা দিল। মোক্ষা কথা, আমি বেশ পাশ্টাতে শুরু করলাম।

বেশিদিন নয়, আর কিছুকাল এমনি করে চললে আমি নিশ্চয় চিরকালের মত চিরদিনের জন্য হারিয়ে যেতাম। ঠিক এমনি এক চরম মুহূর্তে ঘটে গেল সেই অঘটন।

শান্তিনিকেতন থেকে ফিরছিলাম কলকাতা। বোলপুর স্টেশনে দানাপুর প্যাসেঞ্জারে আমার কামরায় আরো অনেকে উঠলেন। ভিড়ের মধ্যে কোনমতে এক পাশে জায়গা করে আমি বসে পড়লাম। জানালার পাশে মাথাটা রেখে আনমনা হয়ে কিছুক্ষণ কি যেন দেখছিলাম। দু'চারটে স্টেশনও পার হয়ে গেল। বীরভূমের লাগমাটি আর তালগাছ কখন যে পিছনে ফেলে এসেছি তাও খেয়াল করলাম না। বাইরে অন্ধকার নেমে এলো। উদাস দৃষ্টিটাকে ঘুরিয়ে কামরার মধ্যে নিয়ে এলাম। ভাবছিলাম কামরাটাকে একটু ভাল করে দেখে নেব। কিন্তু পারলাম না। দৃষ্টিটা সামনের দিকে এগুতে গিয়েই আটকে পড়ল। এমন বুদ্ধিদীপ্ত উজ্জ্বল গভীর ঘন কালো টানা-টানা দুটি চোখ আগে কখনও দেখি নি। একবার নয়, দু'বার নয় বার বার দেখলাম। লুকিয়ে লুকিয়ে আবার দেখলাম। আপাদমস্তক ভাল করে দেখলাম। অসন্তোষের মত, হ্যাংলার মত আমি শুধু ঐ দিকেই চেয়ে রইলাম।

আমি যদি খোকনদার মত সাহিত্যের ভাল ছাত্র হতাম ও সংস্কৃত সাহিত্য পড়া থাকত, তাহলে হয়ত কালিদাসের মেঘদূতের উত্তরমেঘ থেকে 'কোট' করে বলতাম-'ভবী শ্যামা শিখরদশনা পকুবিবাহরোষ্ঠী, মধ্যে কমা চকিতহরিণীশ্রেফলা নিম্ননাভি'। কালিদাসের মত আমি আর এগিয়ে যেতে পারি নি। এইখানেই আটকে গেলাম। তাছাড়া দানাপুর প্যাসেঞ্জারের ঐ কামরায় অতগুলো প্যাসেঞ্জারের দৃষ্টিকে ফাঁকি দিয়ে এর চাইতে বেশি কি এগুতে পারা যায়?

পরে অবশ্য মেমসাহেবকে আমি আমার সেদিনের মনের ইচ্ছার কথা বলেছিলাম। ক'মাস পরে আমি আর মেমসাহেব দানাপুর প্যাসেঞ্জারেই শান্তি নিকেতন থেকে কলকাতা ফিরছিলাম। বর্ধমানে এসে কামরাটা খালি হয়ে গেল। ওপাশের বেঞ্চিতে শুধু এক বৃদ্ধ-বৃদ্ধা ছাড়া আর কোন যাত্রী ছিল না। মেমসাহেব আমার হাতের 'পর মুখটা রেখে জানালা দিয়ে বাইরের দিকে তাকিয়েছিল। আমিও যেন কি ভাবছিলাম। হঠাৎ মেমসাহেব আমাকে একটু নাড়া দিয়ে বলল, 'শোন।'

আমি ঠিক খেয়াল করি নি। মেমসাহেব আবার আমাকে ডাক দিল। শোন না।;

'কিছু বলছ?'

মেমসাহেব হাত দিয়ে আমার মুখটাকে নিজের দিকে ঘুরিয়ে নিল। আঙুল দিয়ে আমার কপালের ওপর থেকে চুলগুলো সরিয়ে দিল। দু'চার মিনিট শুধু চেয়ে রইল আমার দিকে। একটু হাসল। সলজ্জ দৃষ্টিটা একটু ঘুরিয়ে নিল নিজের দিকে। এবার আমি ওর মুখট ঘুরিয়ে নিলাম আমার দিকে। জিজ্ঞাসা করলাম, 'তুমি কিছু বলবে?'

আমার দিকে তাকাতে পারল না। ট্রেনের কামরায় ঐ বয়স আলোয় ঠিক বুঝতে পারলাম না, কিন্তু মনে হলো যেন লজ্জার ওর মুখটা লাল হয়ে গেছে, দেখতে বেশ লাগছিল। দু'চার মিনিট আমি শুকে প্রাণভরে দেখে নিলাম। তারপর কানে কানে কিসকিস করে বললাম, 'লজ্জা করছে?'

মেমসাহেব জবাব দিল না। শুধু হাসল। একটু পরে আমার কানে কানে বললো, 'একটা কথা বলবো?'

'বল।'

'প্রথম বেসিন তুমি আমাকে এমনি ট্রেনে যাবার সময় দেখেছিল সেদিন আমাকে তোমার ভাল

লেগেছিল?’

মনে হয়েছিল-

‘তনুী শ্যামা শিখরদশনা পকুবিন্ধাধরোষ্ঠী,
মধ্যে ক্ষমা চকিতহরিণীশ্রেক্ষণা নিম্ননাভিঃ।

শ্রোণীভারাদলসগমনা স্তোকনম্রা স্তনাভ্যাং,
যা তত্র স্যাদ্যুবতীবিষয়ে সৃষ্টিরাদ্যেব্ ধাতুঃ।।’

মেমসাহেব ঠাস করে আমার গালে একটা চর মেরে বললো, ‘অসভ্য কোথাকার!’

‘ছি. ছি. মেমসাহেব তুমি আমাকে অসভ্য বললে? অসভ্য বলতে হলে কালিদাসকে অসভ্য
বলো।’

আমি একটু খেমে জিজ্ঞাসা করলাম, ‘তুমি রামায়ণ পড়েছ?’

‘কেন? এবার বুঝি রামায়ণের একটা কোটেশন শোনাবে?’

‘আগে আমার প্রশ্নের উত্তর দাও।’

‘পড়েছি।’

‘মূল রামায়ণ না তার অনুবাদ পড়েছ?’

‘মূল সংস্কৃত রামায়ণ পড়ি নি, কিন্তু অনুবাদ পড়েছি।’

‘ভেরী শুভ? দণ্ডকারণ্যে সীতাকে প্রথম দেখার পর রাবণ কি বলেছিলেন জান?’

‘সীতার রূপের তারিফ করেছিলেন, কিন্তু ঠিক কি বলেছিলেন, তা মনে নেই।’

‘বেশ তো আমি মনে করিয়ে দিচ্ছি। রাবণ সীতাকে বলেছিলেন—’

মেমসাহেব বাধা দিয়ে বললো, ‘তোমায় আর শোনাতে হবে না। ঠিক লাইনগুলো মনে না
থাকলেও আমি জানি রাবণ কি ধরনের সাংঘাতিক বর্ণনা করেছিলেন।’

একটু খেমে দৃষ্টিটা একবার ঘুরিয়ে নিয়ে আমার মুখের কাছে মুখটা এনে বললো, ‘তুমিও তো
এক রাবণ! ডাকাত কোথাকার! দিনে-দুপুরে কলকাতা শহরের মধ্যে আমাকে চুরি করলে।’

যাকগে সেসব কথা। সেদিন শেষ পর্যন্ত ধরা পড়েছিলাম। চুরি করে দেখতে দেখতে একবার
ধরা পড়লাম। চোখে চোখ পড়তেই আমি দৃষ্টিটা ঘুরিয়ে নিলাম। মিনিটখানেক পরেই আবার
চেয়েছি। আবার ধরা পড়েছি। আবার চেয়েছি আবার ধরা পড়েছি।

মেমসাহেবের দুটি বন্ধু কিছু ধরতে না পারলেও হাওড়া স্টেশন পৌঁছাবার পর কামরা থেকে
বেকরবার সময় আমার মনটা যে খারাপ হয়ে গিয়েছিল, তা ও বেশ বুঝতে পেরেছিল। কিন্তু কি করা
যাবে? দু’জনের কেউই কিছু বলতে পারি নি। জীবনের বর্ষণমুখর পথ চলতে গিয়ে এমনি একটু-আধটু
বিদ্যুতের চমকানি তো সবার জীবনেই দেখা দিতে পারে। তাতে আশ্চর্য হবার কিছু নেই।
অস্বাভাবিকতাও কিছু নেই!

ওরা তিন বন্ধুরা কামরা থেকে নামবার বেশ কিছুক্ষণ পরে আমি নামলাম। ধীর পদক্ষেপে
এগিয়ে চলেছিলাম গেটের দিকে। আরেকবার তাকিয়ে নিলাম ওর দিকে। মনে মনে ভাবছিলাম, এই
তো একুনি গেট পার হলেই হারিয়ে যাব কলকাতা শহরের জনারণ্যের মধ্যে। আর হয়ত জীবনেও
কোনদিন দেখা হবে না। হয়ত কেন, নিশ্চয়ই কোনদিন দেখা হবে না। হঠাৎ গেটের দিকে তাকাতে
নজর পড়ল, মেমসাহেব এবার মুহূর্তের জন্য থমকে দাঁড়িয়ে পিছন ফিরল। আমি দূর থেকে হাত
নেড়ে বিদায় জানালাম। কেউ বুঝল না, কেউ জানল না, কি ঘটে গেল। এমন কি আমিও ঠিক বুঝতে
পারি নি কি হয়ে গেল। আমি তো এর আগে কোনদিন কোন মেয়ের দিকে অমন করে দেখি নি, কোন
মেয়েও তো অমন করে আমাকে মাতাল করে তোলে নি। কেন এমন হলো? শুধু বুঝেছিলাম,
বিধাতাপুরুষের নিশ্চয়ই কোন ইঙ্গিত আছে। আর মনে মনে জেনেছিলাম দেখা আমাদের হবেই।

বিশ্বাস কর দোলাবৌদি, শুধু আমার চোখের নেশা নয়, শুধু মেমসাহেবেরও দেহের আকর্ষণও
নয়, আরো কি যেন একটা আশ্চর্য টান অনুভব করেছিলাম মনের মধ্যে। মনে মনে বেশ উপলক্ষি
করলাম যে, আমার জীবনযুদ্ধের নতুন সেনাপতি হাজির! এই নতুন সেনাপতি আমাকে সহজে
পরাজিত হতে দেবে না, আমাকে পিছিয়ে যেতে দেবে না। আমাকে হারিয়ে যেতে দেবে না
ভবিষ্যতের অন্ধকারে।



অনুষ্ঠ যে মানুষকে কোথায় নিয়ে যেতে পারে, কি আশ্চর্যভাবে দু'টি অপরিচিত মানুষকে নিবিড় করে একসূত্রে বেঁধে দেয়, তা ভাবলে চমকে উঠি।

পরের দিন বেশ দেরি করে অফিসে গেলাম। চীফ রিপোর্টার আশা করেন নি আমি অফিসে আসব। তাই ওয়েলিংটন কোয়ার্টারের মিটিং আর গোটা কয়েক প্রেস কনফারেন্স কভার করার ব্যবস্থা আগেই করেছিলেন। তবুও আমি যেতেই উনি লাফিয়ে উঠলেন দেখে আশ্চর্য হলাম। জিজ্ঞাসা করলাম, 'কি ব্যাপার!'

'তুমি দৌড়ে একবার পার্ক স্ট্রীট আর্ট ইন্সটিটিউটে গিয়ে যামিনী রায়ের একজিভিশনটা দেখে এসো। আজই শেষ দিন। ওর একটা রিভিউ না বেরুলে দোতলায় উঠতে পারছি না।

বুঝলাম উপরওয়ালারা বার-বার সবুও একজিভিশনটার রিভিউ ছাপা হয় নি এবং এডিটর সাহেব বেশ অসন্তুষ্ট।

কলকাতার অন্যান্য রিপোর্টারদের মত আমিও নৃত্য-গীত বা শিল্প-কলা বুঝতাম না, কিন্তু প্রয়োজনবোধে কলমের পর কলম রিপোর্ট লিখতে পারতাম ওসব নিয়ে। কেন তানসেন-সদারঙও তো কভার করেছি। বড় গোলাম আলি খাঁ সাহেব গাইবার আগে স্টেজের পাশে ব্ল্যাকবোর্ডে 'রাগ' ইত্যাদি লিখে দিত। আমার মত সংগীত বিশারদ রিপোর্টারের দল সেই ফর্মুলা ভাঙিয়েই বেশ এক প্যারা লিখে দিতাম। শেষে আবার বাহাদুরি করে হয়ত মস্তব্য ফর্মুলা ভাঙিয়েই বেশ এক প্যারা লিখে দিতাম। শেষে আবার বাহাদুরি করে হয়ত মস্তব্য লিখতাম, গতবারের চাইতেও এবারের খাঁ সাহেবের গান অনেক বেশি মেজাজী হয়েছিল। অথবা লিখেছি, রাগ-রাগেশ্বরীতে সেতার বাজিয়ে মুগ্ধ করলেন রবিশঙ্কর। অনেকে ভিনু মত পোষণ করলেও আমার মনে হয় রাগ-রাগেশ্বরীতেই রবিশঙ্কর তাঁর শিল্পীসত্তাকে সব চাইতে বেশি প্রকাশ করতে পারেন।

কেন মহাজাতি সদনের বরীন্দ্র-সংগীত সম্মেলনে? রোজ অস্তিত্ব এক কলম লিখতেই হতো। লিখেছি, আজকের অধিবেশনের সব চাইতে উল্লেখযোগ্য শিল্পী ছিলেন দ্বিজেন মুখার্জি। বিশেষ করে তার শেষ গানখানি 'ভরা থাক, ভরা থাক স্মৃতি-সুখায় বিধায়ের পত্রখানি' বহুদিন ভুলতে পারব না। গত বছরের সম্মেলনে এই গানখানিই আর একজন খ্যাতনামা শিল্পী গেয়েছিলেন। ভালোই গেয়েছিলেন। কিন্তু তবুও যেন এত ভালো লাগে নি। বোধ করি দরদের অভাব ছিল। তাছাড়া কিছু কিছু গান আছে যা বিশেষ বিশেষ শিল্পীর কাছেই ভালো-লাগে। চৈত্র দিনের ঝরা পাতার পথে' অনেকেই গাইতে পারেন, কিন্তু 'তোমায় যত' বা কানন দেবীর 'সেদিন দু'জনে দু'লেহিনু বনে'.....?

এমনি করে কিছুটা কমনসেন্স আর কলমের জোরে রিপোর্টারের দল বেশ কাজ চালিয়ে যান। খবরের কাগজের রিপোর্টারেরা অনেকটা মক্কেলের ডাক্তারবাবুদের মত। কিছুতেই বিশেষজ্ঞ নন অথচ সব রোগেরই চিকিৎসা করেন। প্রয়োজনবোধে ছুরি-কাঁচি নিয়ে একটা ছেঁড়া অ্যাপ্রন গায়ে ছাপিয়ে পঞ্চানন চট্টোপাধ্যায় বা মুরবী মুখার্জির ভূমিকায় অবতীর্ণ হতেও ষিধা করেন না।

সুতরাং আমিও ষিধা না করে চলে গেলাম যামিনী রায়ের একজিভিশন রিভিউ করতে।

একেই একজিভিশনের শেষ দিন, তারপর আর্ট ইন্সটিটিউটের ছোট ঘর। বেশ ভিড় হয়েছিল। তবুও আমি ঘুরে ঘুরে দেখতে দেখতে কিছু কিছু নোট নিচ্ছিলাম। একটা হলের দেখা শেষ করে পাশের হলটার যাবার মুখে অকস্মাৎ দেখা গেলাম মেমসাহেবের। ভাবলে আশ্চর্য লাগে, কিন্তু হাজার হোক Truth is stranger than fiction, তাই না দোলাবৌদি?

প্রায় দু'জনেই একসঙ্গে বললাম, 'আরে আপনি?'

'আপনি বুঝি যামিনী রায়ের ভক্ত?'-আমাকে প্রশ্ন করে মেমসাহেব।

'পঞ্চাশ টাকা মাইনের রিপোর্টারী করি বলে এই আধ ঘন্টার জন্য ভক্ত হয়েছি।'

'আপনি বুঝি রিপোর্টার?'

'নির্লজ্জ আর বেহায়াপনা দেখে এখনও বুঝতে কষ্ট হচ্ছে?'

'হি, হি, ওকথা কেন বলছেন?' পাশের পেন্টিংটা এক নজর দেখে মেমসাহেব মস্তব্য করল

'রিপোর্টারদের তো ভারী মজা।'

আমি দীর্ঘনিশ্বাস ফেলে বললাম, 'নদীর এপার কহে ছড়িয়া নিশ্বাস.....'

শেষ করতে চান না। তার আগেই বললো, 'আপনি দেখছি রবীন্দ্রনাথেরও ভক্ত।'

হঠাৎ মুখ দিয়ে বেরিয়ে গেল 'আর একটু পরে দেখবেন আমি আপনারও ভক্ত।'
লোকের ভিড়ের মধ্যে আর কথা হলো না। এই দু'এক মিনিটের মধ্যেই কিছু কিছু কলা-রসিক
বেশ একঝলক আমাদের দেখে নিলেন।

পাশের হলটা চটপট ঘুরে দেখে নিয়ে আমরা দু'জনেই একসঙ্গে বেরিয়ে এলাম।
এখন রাত প্রায় দেড়টা বাজে। তাই আজ আর লিখছি না। কালকে সকাল সকাল উঠতে হবে।
ন'টার সময় প্রাই মিনিটারের মাসুলি প্রেস কনফারেন্স। সুতরাং তুমি বেশ বুঝতে পারছ কাল সকালে
আমার দুর্ভোগ আছে।

কাল তো তোমাদের দু'জনেরই ছুটি। তোমরা নিশ্চয়ই এখনও ঘুমোও নি। বেশ কল্পনা করতে
পারছি খোকনদা তোমার কোলের 'পর মাথা দিয়ে শুয়ে আছে আর তুমি তোমার ঐ বিখ্যাত বেসুরো
গলায় তাঁকে একটা প্রেমের গান শোনাচ্ছ। তাই না?

ছয়

তুমি যেদিন প্রথম খোকনদার দেখা পেয়েছিলে সেদিন খোকনদা তোমাকে কি বলে সম্বোধন
করেছিল, কি ভাষায় কথা বলেছিল, কি সে বলেছিল, আমি সেসব কিছুই জানি না। সেদিন তুমি
কিভাবে গ্রহণ করেছিলে তাও জানি না। তবে বেশ কল্পনা করে নিতে পারি তুমিই আগে খোকনদার
মাথাটা খেয়েছ। কিন্তু কবচ-মাদুলি ধারণ করেছিলে কিনা জানি না; তবে কিছু না কিছু একটা নিশ্চয়ই
করেছিলে। নয়ত খোকনদার মত ছেলে.....

তুমি রাগ করছ? রাগ করো না! তবে তোমাদের ব্যাপারটার ঐ রহস্যভরা আদি পর্বটা জানা
থাকলে আমার অনেক সুবিধে হতো। তাই তো সেদিন আর্ট ইন্ ইন্ডাস্ট্রি থেকে বেরুবার পর কি বলব,
কি করব, কোথায় যাব, তাই ভেবে পাচ্ছিলাম না। পার্ক স্ট্রীট ছেড়ে চৌরঙ্গী ধরে এসপ্যান্ডেডের
দিকে এগুতে এগুতে শুধু মনেছিলাম, 'আমি জানতাম আপনার সঙ্গে আমার দেখা হবে!'

'সত্যি?'

'সত্যি।'

'আজই দেখা হবে, একথা জানতেন?'

'না, তা জানতাম না। তবে জানতাম দেখা হবেই।'

মেমসাহেব ধম্কে দাঁড়িয়ে পড়ল। ঘাড় বেঁকিয়ে আমার দিকে ফিরে বেশ একটু আশ্চর্য হয়ে
প্রশ্ন করল, 'কি করে জানতেন যে আমাদের দেখা হবেই?'

আমি সরাসরি উত্তর না দিয়ে পান্টা প্রশ্ন করি 'আপনার বাবা কি লিগ্যাল প্র্যাকটিশনার?'

'হঠাৎ একথা জিজ্ঞাসা করলেন?' সন্দেহের রেখা ফুটে উঠল মেমসাহেবের কপালে।

'ভয় পাবেন না, আমি দস্যু মোহন বা ডিটেকটিভ কিরীটি রায় নই।'

কিড স্ট্রীট পার হলাম। বেশ বুঝতে পারলাম মেমসাহেবের মন থেকে সন্দেহের মেঘ কেটে যায়
নি। তাই তো বললাম, 'আপনি যে 'ল' পড়েন নি সে বিষয়ে কোন সন্দেহ নেই। তবে যেভাবে জেরা
করতে শুরু করেছিলেন, তাতেই মনে হলো আপনি বোধহয় ল-ইয়ারের মেয়ে!'

মেমসাহেব এখানে হেসে ফেললো। বোধহয় মনটা একটু হালকা হলো।

মিনিট কয়েক দু'জনেই চুপচাপ। মিউজিয়াম পার হয়ে এলাম, ওয়াই-এম-সি-এ পিছনে
ফেললাম। লিভসে স্ট্রীটের মোড়ে এসে পড়লাম। আরো এগিয়ে গেলাম। ফিরপো স্ট্রীটের মোড়ে এসে
না গিয়ে রব্বীর দিকে ঘুরলাম। মৌনতা ভাঙলাম আমি, 'চা খাবেন?'

'চা? বিশেষ খাই না, তবে চলুন খাওয়া যাক!'

পাশের রেস্তোরাঁয় একটা কেবিনে বসলাম। বেয়ারা এলো। হাতের তোয়ালে দিয়ে পরিষ্কার
টেবিলটা আর একধার মুছে দিল। নোংরা মেনু-কার্ডটা আমার সামনে দিয়ে এক নজরে দেখে নিল
মেমসাহেবকে।

'দুটো ফিস ফ্রাই, দুটো চা।'

বেয়ারা বিদায় নিল। কিছু বলব বলব ভেবেই ক'মিনিট কেটে গেল। ইতিমধ্যে বেয়ারা দুটো
ফর্ক আর ছুরি এনে আমাদের দু'জনের সামনে সাজিয়ে দিয়ে চলে গেল। আবার ভাবছি কিছু বলব।

কিন্তু বলা হলো না। বেয়ারাটা আবার এলো। এক শিপি সস্ আর দু' গেলাস জল দিয়ে গেল। বেয়ারাটা বুকেছে নতুন জুড়ী এবং সে জন্য ইন্টলমেন্টে কাজ করছে! ফিস ফ্রাই-এর প্রেট দুটো বেয়ারাটা আনবার আগেই জিজ্ঞাসা করলাম, 'কিন্তু ভাবছেন?'

আঁচলটা টেনে দিয়ে মেমসাহেব বললো, 'না, তেমন কিছু না।'

'তেমন কিছু না হলেও কিছু তো ভাবছেন?'

ফিস ফ্রাই এসে গেল। আমি একটা টুকরো মুখে পুরলাম কিন্তু ফর্কটা হাতে নিয়ে মেমসাহেব কি যেন ভাবছিল। জিজ্ঞাসা করলাম, 'কিন্তু বলবেন?'

'একটা কথা বলবেন?'

নিশ্চয়ই।'

'আমাদের দেখা হবে, একথা আপনি জানলেন কি করে?'

'কি করে জানলাম তা জানি না, তবে মনের মধ্যে স্থির বিশ্বাস ছিল যে আপনার সঙ্গে দেখা হবেই।'

'শুধু মনের বিশ্বাস?'

'হ্যাঁ।'

সেদিন একে প্রথম সাক্ষাৎকার তারপর ছোকরা বেয়ারাটার অতিরিক্ত কর্তব্যপরায়ণতার জন্য আর বিশেষ কথা হলো না। তবে ঐ কেবিন থেকে বেরুবার আগে আমার নোটবই-এর একটা পাতা ছিড়ে অফিসের টেলিফোন নম্বরটা লিখে দিলাম। শুধু বলেছিলাম, 'সম্ভব হলে টেলিফোন করবেন।'

কিন্তুটা লজ্জায়, কিন্তুটা ইচ্ছা করেই আমি ওর নাম-খাম ঠিকানা কিছুই জানতে চাইলাম না। মনে মনে অনেক কিছু ইচ্ছা করছিল। ইচ্ছা করছিল বলি, 'তুমি মুখাতিব ভী হো, করিব ভী হো, তুমকো দেখু কী তুমসে বাত কর্ণ।'-তুমি আমার কাছে বসে আছ কথা বলছ। তুমিই বল, তোমাকে দেখব না তোমার সঙ্গে কথা বলব।

আবার ভাবছিলাম, না, না! তার চাইতে বরং প্রশ্ন করি 'আঁখো মে হিরহে হো, দিলসে নেহি গ্যায়ে হো, হায়রান হঁ এ সফী আই তুহে কাঁহাসে?'- সব সময় তুমি আমার চোখে, তুমি আমার হৃদয়ে রয়েছে। ভাবতে পারি না কিভাবে তুমি আমার হৃদয়-মাঝে এমনভাবে নিজের আসন বিছিয়ে নিলে।

সত্যি বলছি দোলাবৌদি, ওকে কাছে পেয়ে, পাশে দেখে বেশ অনুভব করছিলাম, এ তো সেই, যার দেখা পাবার জন্য আমি এত দীর্ঘ পথ অতিক্রম করেছি, এত দীর্ঘদিন সংগ্রাম করেছি। মনে মনে বেশ অনুভব করছিলাম এবার আমার দিন আগত ঐ।

আরো অনেক অনেক কিছু ভেবেছিলাম। সেসব কথা আজ আর লিখে এই চিঠি অযথা দীর্ঘ করব না। তবে শুধু জেনে রাখ মেমসাহেব এক এবং অদ্বিতীয়া। এই পৃথিবীতে আরো অসংখ্য কোটি কোটি মেয়ে আছেন, তাঁদের প্রেম-ভালোবাসায় কোটি কোটি পুরুষের জীবন ধন্য হয়েছে। তাঁদের স্পর্শে অনেকেই মুম ভেঙেছে। আমি তাঁদের সবার উদ্দেশে আমার শ্রদ্ধা জানাই, কৃতজ্ঞতা জানাই। আমি জানি আমার কালো মেমসাহেবের চাইতে অনেক মেয়ে সুন্দরী, অনেকেই ওর চাইতে অনেক অনেক বেশি শিক্ষিতা। তবে একথাও জানি আমার জন্য এই পৃথিবীতে একটিমাত্র মেয়েই এসেছে এবং সে আমার ঐ মেমসাহেব। মেমসাহেব ছাড়া আর কেউ পারত না আমাকে এমন করে গড়ে তুলতে। মাটি দিয়ে তো সব শিল্পীই পুতুল গড়ে, কিন্তু সব শিল্প-নৈপুণ্য কি সমান? মেমসাহেব আমার সেই অনন্য জীবন শিল্পী যে কাদামাটি দিয়ে আমার থেকে আজ একটা প্রাণবন্ত পুতুল গড়ে তুলেছে।

তুমি শুনে অবাক হবে, আমি সেদিন ওর বাসে পর্যন্ত ওঠার অপেক্ষা করলাম না। আমি আগেই একটা বাসে চড়ে অফিসে চলে এলাম। মনে মনে ভাবলাম, আমি তো ওর জন্য অনেক ভেবেছি, ভাবছি। এবার না হয় রেকর্ডের উল্টো দিকটা দেখা যাক। দেখা যাক না ও আমার জন্য ভাবে কিনা!

রাত্রে অফিসে ফিরেই দেখি বেশ চাঞ্চল্য। সন্ধ্যার পরই টেলিগ্রাফারে নিউজ এজেন্সীর খবর এসেছে পূর্ব-পাকিস্তানের বাগেরহাটে খুব গণ্ডগোল হয়েছে। কি ধরনের গণ্ডগোল হলো এবং কলকাতায় কি প্রতিক্রিয়া দেখা দেয়, সেই চিন্তায় সবাই উৎকণ্ঠিত। পরের দিন আমার ডিউটি পড়ল শিয়ালদহ স্টেশনে। পূর্ব-পাকিস্তানের ট্রেনের যাত্রীদের সঙ্গে দেখা করে সেখানকার পরিস্থিতি জানতে হবে। রিপোর্ট করতে হবে। পরের দিন খুলনার ট্রেনটি এসেছিল, তবে অনেক দেরি করে। প্ল্যাটফর্ম

থেকে আজোবাজে লোক আগে থেকে সরিয়ে দেওয়া হয়েছিল। কিছু সরকারী কর্মচারীও উপস্থিত ছিলেন। বাগেরহাটের পরিস্থিতি জানবার পর ওরা সবাই আগত যাত্রীদের হুঁশিয়ার করে দিলেন, অথবা বা মিথ্যা গুজব ছড়াবেন না।

যাত্রীদের কথাবার্তা শুনে বেশ বুঝতে পারলাম অবস্থা বেশ গুরুতর। কোথা থেকে কিভাবে যে গওগোল হলো সে কথা কেউ বলতে পারলেন না। তবে যাত্রাপুরের এক ভদ্রলোক জানালেন যে, বাগেরহাটের এক জনসভায় পশ্চিম-পাকিস্তানের এক নেতা বক্তৃতা দেবার পরই ওখানে প্রথমে কিছু লুট-পাট শুরু হয়। দু'তিন দিন পরে ছুরির খেলা শুরু হলো। গুণাদের হাতে প্রথম দিনেই প্রাণ দিলেন লুৎফর রহমান।

শিয়ালদহ স্টেশনের বুকিং অফিসের সামনে দুটো ট্রাকের 'পর বসে দু'জনে কথা বলছিলাম। কথা বলছিলাম নয়, কথা শুনছিলাম। ভদ্রলোক আগে একটা ছোট্ট স্কুলে মাস্টারী করতেন। অনেকদিন মাস্টারী করেছেন ঐ একই স্কুলে। বাগেরহাটের সবাই ওঁকে চিনতেন, ভালোবাসতেন। অধিকাংশ ছাত্রই মুসলমান ছিল কিন্তু তা হোক, ওরা ওঁকে বেশ শ্রদ্ধা করত। লুৎফর সাহেব যখন ঐ স্কুলের সেক্রেটারী ছিলেন, তখন স্কুলবাড়ি দোতলা হলো। ছেলেদের ভলিবল খেলার ব্যবস্থা হলো, দশ-পনের টাকা করে মাস্টার মশাইদের মাইনেও বাড়ল। কি জানি কি কারণে পরের বছর সরকার স্কুল-কমিটি বাতিল করে দিলেন। ক'মাস পরে স্কুলের তহবিল তহরুরে অভিযোগে লুৎফর সাহেবকে গ্রেফতার করা হয়, কিন্তু কোর্টে সেসব কিছুই প্রামাণিত হলো না।

ইতিমধ্যে স্কুলের নতুন কর্তৃপক্ষ ভদ্রলোকের চাকরি খতম করে দিলেন অযোগ্যতার অভিযোগে। অনন্যাপায় হয়ে একটা দোকান খুললেন। প্রথম প্রথম বিশী লাগতো দোকানদারী করতে! কিন্তু কি করবেন? পরে অবশ্য মন লেগেছিল ব্যবসায়। ব্যবসাটাও বেশ জমে উঠেছিল। পোড়াকপালে তাও টিকল না। এবারের গওগোলে দোকানটা পুড়ে ছাই হয়ে গেল।

এসব কাহিনী আমার না জানলেও চলত, কিন্তু কি করব আর কোন যাত্রী পেলাম না যার কথায় ভরসা করে রিপোর্ট লেখা যায়। তাই চুপচাপ বসে শুনছিলাম। তবে এতক্ষণ ধৈর্য ধরে এত কথা শোনার পুরস্কার পেলাম পরে।

লুৎফর সাহেব ছাত্রজীবনে ছাত্র-কংগ্রেসে ছিলেন। পরে ওকালতি করার সময় রাজনীতি প্রায় ছেড়ে দিয়েছিলেন কিন্তু পূর্ব-পাকিস্তানের রাজনৈতিক আবহাওয়া জটিল হবার সঙ্গে সঙ্গে লুৎফর সাহেব আবার রাজনীতি শুরু করলেন। সারা খুলনা জেলা লুৎফর সাহেবের কথায় উঠত বসত। সারা জেলার মধ্যে কোন অন্যায় অবিচারের কথা শুনেই গর্জে উঠেছেন। খুলনা ডকের কয়েক হাজার বাঙালী মুসলমান শ্রমিক অনেকদিন অনেক অত্যাচার আর অপমানের বিরুদ্ধে প্রথম গর্জে উঠেছিল লুৎফর সাহেবেরই নেতৃত্বে।

পূর্ব-পাকিস্তানের মসনদ থেকে ফজলুল হক সাহেবের অপসারিত করে ইক্কান্দার মির্জা পূর্ব বাংলাকে শায়েস্তা করবার জন্য ঢাকায় আসার কিছুকালের মধ্যেই লুৎফর সাহেবকে ডেকে পাঠান। লুৎফর সাহেব লাটসাহেবের নেমস্তন্ন খেতে ঢাকা গিয়েছিলেন, তবে একবেলা বুড়ীগঙ্গার ইলশ খাইয়েও সে নেমস্তন্ন খাওয়া শেষ হয় নি। দুটি বছর ঢাকা সেন্ট্রাল জেলে বিশ্রাম নেবার পর লুৎফর সাহেব খুলনা আসার অনুমতি পান।

খুলনা ফেরার পর লুৎফর সাহেব খুলনা আরো বেশি রুখে দাঁড়ালেন।

আমার অফিসে ফিরে রিপোর্ট লিখতে হবে। এত দীর্ঘ কাহিনী শোনবার অবসর ছিল না। তাই ভদ্রলোককে জিজ্ঞাসা করলাম, 'লুৎফর সাহেব আজকাল কি করেন?'

'-লুৎফর সাহেব আর নেই। এই দাঙ্গায় বাগেরহাটের প্রথম বলি হলেন লুৎফর।'

'সে কি বলছেন?'

'আমাদের তো একই প্রশ্ন।'

'তবু কি মনে হয়?'

'বাগেরহাটের লাহোর কটন মিলে অনেকদিন ধরেই শ্রমিক ধর্মঘট চলছে। লুৎফর সাহেব ওদের লীডার। কিছুদিন ধরেই আমরা শুনছিলাম লুৎফর সাহেবকে শায়েস্তা করার জন্য শহরে নাকি বাইরের অনেক গুণা এসেছে। আমরা কেউ বিশ্বাস কিরি নি-কারণ বাগেরহাট শহরে লুৎফর সাহেবের গায়ে

হাত দেবার সাহস স্বয়ং ইকান্দার মির্জারও হয় নি। কিন্তু এরই মধ্যে সর্বনাশা দাঙ্গা শুরু হলো বুধবার সন্ধ্যার দিকে। পরের দিন বাড়ি থেকে বাইরে যাই নি। শুক্রবার সকালে দোকানটা দেখতে গিয়ে শুনি লুৎফর সাহেব শেষ।’

আমি বেশ বুঝতে পারলাম লুৎফর সাহেবকে সরাবার জন্যই লাহোর কটন মিলের মালিকদের চক্রান্তে বাণেশ্বরহাটে গণ্ডগোল বাধানো হয়েছে। কেননা শহরের অবস্থা স্বাভাবিক থাকলে লুৎফর সাহেবকে শেষ করা যেত না।

অফিসে ফিরতে ফিরতে বেশ রাত হলো। বেশ ক্লান্ত বোধ করছিলাম। তবুও চটপট করে বাণেশ্বরহাটের দাঙ্গার নেপথ্য কাহিনী লিখে ফেললাম।

তাই সারাদিন মেমসাহেবের কথা ভাববার সময় পেলাম না।

পরের দিন আমার উইকলি অফ ছিল। অফিসে গেলাম না। তার পরের দিন আমার টেলিফোন ডিউটি ছিল। তাই একটু দেরি করে অফিসে গেলাম।

এখনকার মত তখন ডায়াল ঘুরালেই নম্বর পাওয়া যেত না। অপারেটরের ওপর নির্ভর করতে হতো। খবরের কাগজের রিপোর্টারের নাইট’ টেলিফোন ডিউটি একটা বিচিত্র ব্যাপার। পুলিশ, হাসপাতাল, অ্যাম্বুলেন্স, ডক, রেল-পুলিশ, রেল-স্টেশন, দমদম এয়ারপোর্ট ইত্যাদি জায়গা থেকে দৈনন্দিন টুকটাক ‘লোক্যাল’ নিউজ পাবার জন্যে প্রায় টেলিফোন করতে হতো। আমাদের কাগজের পাড়াতে এবং একই টেলিফোন এক্সচেঞ্জে আরো চার-পাঁচটি কাগজের অফিস ছিল। এক্সচেঞ্জের অপারেটররা প্রতি রাতে এই লাইন দিতে দিতে প্রায় রিপোর্টার হয়ে উঠেছিলেন। নাথার বলবার প্রয়োজনও হতো না; শুধু বললেই হতো রিভার পুলিশ দেবেন নাকি?

উত্তর আসত, রিভার পুলিশ এনগেজ টাইমস্ অফ ইন্ডিয়া কথা বলছে।

এখনকার মত তখন এয়ারপোর্ট রিপোর্টার বলে কিছু ছিল না। তাই সাধারণ ছোটখাটো খবরের জন্য এয়ারপোর্ট পুলিশ-সিকিউরিটিতে রোজ রাত্তিরে ফোন করতে হতো। তাই তো রিভার পুলিশ না পেয়ে বলতাম এয়ারপোর্ট দিন।

অপারেটর সঙ্গে সঙ্গে জানিয়ে দিতেন, সিকিমের মহারাজার অ্যারাইভ্যাল ছাড়া আর কিছু নেই। সঙ্গে সঙ্গেই আবার হয়ত বলতেন, এবার নীলরতনের সঙ্গে কথা বলুন। কি একটা সিরিয়াস অ্যাকসিডেন্টের খবর আছে।

সব অপারেটরই যে এইরকম সাহায্য করতেন, তা নয়। তবে অধিকাংশ মেয়েই সহযোগিতা করতেন। রাতে টেলিফোন ডিউটি করতে করতে বহু অপারেটরের সঙ্গে অনেক রিপোর্টারেরই বেশ মধুর সম্পর্ক গড়ে উঠেছিল। নানা অবস্থায় রিপোর্টাররাও যেমন অপারেটরদের সাহায্য করতেন তেমনি অপারেটররাও রিপোর্টারদের যথেষ্ট উপকার করতেন।

কোন কোনদিন খবরের চাপ বিশেষ না থাকলে অনেক সময় আমরা নিজেদের সুখ-দুঃখের কথা বলতাম। এই রকম কথাবার্তা বলতে বলতেই আমরা টেলিফোন এক্সচেঞ্জের অনেক কাহিনী শুনেছিলাম। জাতনে পেরেছিলাম অনেক অফিসারের ‘আনটোস্ট স্টোরি’। কিছু কিছু কাগজে ছাপিয়ে ফাঁস করেও দেওয়া হয়েছিল। অপারেটরদের উপর অফিসারের খামখেয়ালিপনা বন্ধ হয়েছিল।

অপারেটাররাও আমাদের কম উপকার করতেন না! কৈলাসনাথ কাটজু তখন পশ্চিম বাংলার গভর্নর আর ডাঃ রায় মুখ্যমন্ত্রী। কতকগুলো গুরুত্বপূর্ণ ব্যাপারে দু’জনের মধ্যে তীব্র মতবিরোধ দেখা দিয়েছে বলে নানা মহলে গুঞ্জন শোনা গিয়েছিল, কিন্তু অনেক চেষ্টা করেও মতবিরোধের সঠিক কারণগুলো কেউই জানতে পারছিলাম না। শেষে একদিন অকস্মাৎ এক টেলিফোন অপারেটর জানালে, ‘আনেন, আজ একটু আগে টেলিফোন গভর্নরের সঙ্গে চীফ মিনিষ্টারের খুব একচোট’

দু’দিন বাদে এই ঝগড়ার কাহিনীই আমাদের কাগজের ব্যানার স্টোরি হলো। মোটা মোটা অক্ষরে চার-কলাম সামারিতে লেখা হলো। রাজভবনের সহিত সংশ্লিষ্ট অভ্যন্তর নির্ভরযোগ্য মহলের সিকিউরিটি হাইতে জানা গিয়েছে যে রাজ্য পরিচালনার কয়েকটি গুরুত্বপূর্ণ প্রশ্নে রাজ্যপালের সহিত মুখ্যমন্ত্রীর মতবিরোধ দেখা দিয়েছে!

শুধু বাংলাদেশের জনসাধারণ বা রাইটস বিল্ডিংস-এর কিছু অফিসার নয়, স্বয়ং ডাঃ রায় ও কাটজু সাহেব পর্যন্ত চমকে গিয়েছিলেন এই খবরে। অনেক তদন্ত করেও তাঁরা জানতে পারেন নি কি

করে এই চরম গোপনীয় খবর ফাঁস হয়ে গলে। আমরা অফিসে বসে শুধু হেসেছিলাম। আর ভাবছিলাম ইচ্ছা করলে আরো কত কি আমরা ছাপতে পারতাম কিন্তু ছাপি নি!

এই রকম আরো অনেক চমকপ্রদ খবর পেতাম আমাদের অপারেটর বাস্কবীদের মারফত ও মাঝে-মাঝেই বাজার গরম করে তোলা হতো; মন্ত্রী আর অফিসারের দল কানামাছি ভেঁ-ভেঁ করে মিছেই হাতড়ে বেড়াতেন, আর আমরা মুচকি হাসতে হাসতে ঐ মন্ত্রী ও অফিসারদের ঘরে বসে ওদের পয়সায় কফি খেয়ে বেড়াতাম। সেদিন রাতে অফিসে এসে যথারীতি টেলিফোনটা তুলে জিজ্ঞাসা করলাম- 'কে কথা বলছেন?'

কণ্ঠস্বর অপরিচিত নয়। তাই উত্তর আসে, 'আমি গার্মি।'

এক মুহূর্ত পরেই আমাকে প্রশ্ন করেন মিস গার্মি চক্রবর্তী, অনেকদিন পর আজ আপনার টেলিফোন ডিউটি পড়ল, তাই না?

উত্তর দিই, 'না অনেক দিন কোথায় 'গার্মি' নামপথে থামিয়ে দিয়ে জানতে চায়, 'কাল আর পরশু আপনি অফিসে আসেন নি?'

'কেন বলুন তো?'

'আগে বনুন কোথায় ছিলেন দু'দিন?'

'কোথায় আবার থাকব, কলকাতাতেই ছিলাম। তবে কালকে আমার অফ ছিল। আর পরশু অনেক রাতে অফিসে এসেছিলাম।'

'তাই বুঝি?'

'আজ্ঞে হ্যাঁ।'

গার্মি চক্রবর্তী টেলিফোন ছাড়ে না। ইনিয়-বিনিয় দু'চারটে আলতু-ফালতু কথা পর জিজ্ঞাসা করল, 'তারপর আপনি কেমন আছেন?'

'হঠাৎ আজ পঞ্চাশ টাকা মাইনের রিপোর্টারের এত খবর নিচ্ছেন, কি ব্যাপার?'

'জ্যাস্ট এ মিনিট' বলে গার্মি অন্য কাউকে লাইন দিতে গেল। আমি টেলিফোন ধরে রইলাম। একটু পরেই ফিরে এলো আমার লাইনে। বললো, 'কাল-পরশু আপনার অনেক টেলিফোন এসেছিল।'

আমি গার্মিকে দেখতে পাই না কিন্তু বেশ অনুভব করতে পারছিলাম ওর হাসিখুশী ডরা মুখখানা। আমি একবার একটু ঠাট্টা করে বললাম, 'আমি তো মিস গার্মি চক্রবর্তী নই যে আমার অনেক টেলিফোন আসবে!'

'তাই বুঝি?'

'আজ্ঞে হ্যাঁ।'

গলার স্বরে একটু অভিনবত্ব এনে গার্মি বলে, 'অনেক না হোক, একজনও তো অনেকবার টেলিফোন করতে পারে জ্যাস্ট এ মিনিট ...'

গার্মি আবার লাইন দিতে চলে যায়।

আমি ভাবি কে আমাকে অনেকবার টেলিফোন করতে পারে! মেমসাহেব হয়ত একবার টেলিফোন করতে পারে কিন্তু অনেকবার কে করল?

গার্মি এবার ফিরে এসে বললো, 'সত্যি বলছি একজন আপনাকে অনেকবার

'কিন্তু তাতে আপনার এত ...

'কিছুই না। তবে এতদিন আপনার এই ধরনের টেলিফোন আসত না বলেই আর কি ...

এবারে আমার মনে সন্দেহ দেখা দিল। তবে কি মেমসাহেবই-

গার্মি বললো, 'ধরুন, আমি তার সঙ্গে কানেশন করে দিচ্ছি।'

'আপনি বুঝি নম্বরটাও জেনে নিয়েছেন?'

ওদিক থেকে গার্মির গলার স্বর শুনে পেলাম না। একটু পরেই বললো, 'নিম স্পীক হিয়ার।'

আমি বেশ সংযত হয়ে শুধু সন্দেহন করলাম, 'নমস্কার।'

'নমস্কার!'

'কি খবর বলুন?'

'কি আর খবর, আপনারই তো দু'দিন পাস্তা নেই।'

মেমসাহেব দু'দিন ধরে আমাকে খোঁজ করেছে জেনে বেশ খুশী হলাম। তবুও ন্যাকামি করে প্রশ্ন করলাম, 'আপনি কি টেলিফোন করেছিলেন?'

'কি আশ্চর্য! আপনাকে কেউ বলেন নি?'

আমাদের অফিস আর হরি ঘোষের গোয়ালের মধ্যে যে কোন পার্থক্য নেই সে কথা মেমসাহেবকে কি করে বোঝাই। তাই বললাম, 'বরের কাগজের অফিসে এত টেলিফোন আসে যে কারুর পক্ষেই মনে রাখা সম্ভব নয়। তাছাড়া রোজই তো ডিউটি বদলে যাচ্ছে।'

মেমসাহেব সঙ্গে সঙ্গে বললো, 'কেন ঐ অপারেটর ভদ্রমহিলা আপনাকে বলেন নি?'

গার্মী হঠাৎ আমাদের দু'জনের লাইনে এসে বলে গেল, 'বলেছি।'

মেমসাহেব চমকে গেল। আমি কিন্তু জানতাম গার্মী আমাদের লাইন ছেড়ে পালাবার পাত্রী নয়। মেমসাহেব ঘাবড়ে প্রশ্ন করল, 'কেন উনি?'

'গার্মী চক্রবর্তী।'

হাজার হোক মেয়ে তো! গার্মীর নাম শুনেই মেমসাহেবের মনটা সন্দ্বিষ্ট হয়ে ওঠে। হয়ত বা ইর্ষাও। তাই হেঁয়ালি করে জানতে চায়, 'আপনার সঙ্গে কুন্সি মিস চক্রবর্তীর বিশেষ পরিচয় আছে?'

আমি আপন মনেই একটু হেসে নিই। আর বলি, 'অধিকাংশ অপারেটরের সঙ্গেই আমাদের প্রায় সব রিপোর্টারদের যথেষ্ট পরিচয় আছে।'

আমি আবার টিপ্পনী কেটে জিজ্ঞাসা করি, 'কোন ছোট প্রেমের গল্পের পুট এলো নাকি আপনার মাথায়?'

বোধ করি মেমসাহেব বুঝেছিল, গার্মীর বিষয়ে আর প্রশ্ন করার প্রয়োজন নেই। বললো, 'কালকে আপনার সঙ্গে দেখা করে পুটটা ঠিক করব।'

আমি সঙ্গে সঙ্গে প্রশ্ন করি, 'কাল দেখা হবে?'

'বিকেল পাঁচটার লিভসে স্ট্রীটের মোড়ে আমি আপনার জন্য অপেক্ষা করব। আসবেন।'

'হ্যাঁ, আসব।'

দোলাবৌদি তুমি তো জান কলকাতা শহরে মধ্যবিত্ত ছেলেমেয়েদের একটু প্রেম করা কি দুর্কর ব্যাপার। প্রেম করা তো দূরের কথা, একটা গোপন কথা বলবার পর্যন্ত জায়গা নেই কলকাতায়। আমাদের শৈশবে লেকে গিয়ে প্রেম করার প্রথা চালু ছিল, কিন্তু পরে লেকের জলে এতগুলো ব্যর্থ প্রেমিক-প্রেমিকা আত্মহত্যা করল যে লেকে গিয়ে প্রেম করা তো দূরের কথা, একটু বেড়ানোও অসম্ভব হলো।

এমন একটা আশ্চর্য শহর তুমি দুনিয়াতে কোথাও পাবে না। শুধু কলকাতা বাদ দিয়ে পৃথিবীর সমস্ত শহরে নগরে কত সুন্দর সুন্দর বেড়াবার জায়গা আছে। নিত্য-নতুন আরো সুন্দর সুন্দর বেড়াবার জায়গা তৈরি হচ্ছে-কিন্তু আমাদের কলকাতা? সেই জব চার্নক আর ক্লাইভ সাহেবের গুভারসিয়ারবাবুরা যা করে গেছেন, আমাদের আমলে তাও টিকল না। কলকাতার মানুষগুলোকে যেন একটা অন্ধকূপের মধ্যে ভরে চাবুক লাগানো হচ্ছে অথচ তাদের চোখের জল ফেলার একটু সুযোগ বা অবকাশ নেই।

সমস্ত যুগে সমস্ত দেশের মানুষই যৌবনে প্রেম করেছে ও করবে। যৌবনে সেই রঙিন দিনগুলোতে তারা সবার থেকে একটু দূরে থাকবে, একটু আড়াল দিয়ে চলবে। কিন্তু কলকাতায় তা কি সম্ভব? নতুন বিয়ে করার পর স্বামী-স্ত্রীতে একটু নিষ্ঠুর মনের কথা কইবার জায়গা কোথায়? মাতৃহারা শিশু বা সন্তানহারা পিতামাতা গলা ফাটিয়ে শ্রাণ ছেড়ে কাঁদতে পারে না কলকাতায়। এর চাইতে আর কি বড় ট্রাজেডী থাকতে পারে মানুষের জীবনে?

কেতাবে পড়েছি ও নেতাদের বক্তৃতায় শুনেছি বাঙালী নাকি সৌন্দর্যের পূজারী, কালচারের ম্যানেজিং এজেন্টস। রুচিবোধ নাকি শুধু বাঙালীরই আছে। কিন্তু হালফ করে বলতে পারি কোন নিরপেক্ষ বিচারক কলকাতা শহর দেখে বাঙালীকে এ অপবাদ নিশ্চয়ই দেবেন না। রবীন্দ্রনাথ যে কিতাবে চিংপুর-জোড়াসাঁকোয় বসে কবিতা লিখলেন, তা ভেবে কুলকিনারা পাই না। শেখরপিয়ার বা বায়রন বা অধুনাকালের টি. এস. ইন্সটিটুটকে চিংপুরে ছেড়ে দিলে কাব্য করা তো দূরের কথা একটা পোস্টকার্ডও লিখতে পরতেন না।

আশ্চর্য তবুও বাঙালীর ছেলেমেয়েরা আজও প্রেম করে, কাব্যচর্চা করে, শিল্প-সাধনা করে। যেখানে কৃষ্ণচূড়ার গাছ নেই, যেখানে একটা কোকিলের ডাক শোনা যায় না, দিগন্তের দিকে তাকালে যেখানে শুধু পাটকলের চিমনি আর ধোঁয়া চোখে পড়ে সেই বিশ্বকর্মার তীর্থক্ষেত্রে আমি আর মেমসাহেব নতুন জীবন শুরু করলাম।

সাত

আমি ভাবছি চিঠিগুলো বড় বড় হয়ে যাচ্ছে। আর তুমি লিখেছ আরো অনেক বড় করে লিখতে। অথবা ক'দিন ছুটি নিয়ে কলকাতায় গিয়ে মুখোমুখি সব কিছু বলতে প্রস্তাব করেছ। প্রথম কথা, এখন পার্লামেন্টের বাজেট সেশন চলছে। ছুটি নিয়ে কলকাতা যাবার কোন প্রশ্নই ওঠে না। তাছাড়া নিজের মুখে তোমাকে এ কাহিনী আমি শোনাতে পারব না। মেমসাহেব আমাকে কত ভালবাসত, কত আদর করত, কত রকম করে আদর করত, কেমন করে দু'জনে রাত জেগেছি, সে সব কথা তোমাকে বলিব কেমন করে? লজ্জায় আমার গলা দিয়ে স্বর বের হবে না। ভগবান সবাইকে কঠোর দিয়েছেন। কিন্তু তুমি জানতেই কি সুর আছে? আছে মিষ্টিত্ব? নেই। কঠ থাকলেই কি সব কথা বলা যায়? সুখ-দুঃখ, হাসি-শ্রদ্ধা, আনন্দ-বেদনার সব অনুভূতিই কি বলা যায়? হয়ত অন্যেরা বলতে পারে কিন্তু আমার সে ক্ষমতা নেই। তুমি আমাকে ক্ষমা করো।

সময় থাকলে চিঠিগুলো আরো দীর্ঘ হতো। তাছাড়া চিঠি লিখতে বসেও কলম খেমে যায় মাঝে মাঝেই। আমাকে ফাঁকি দিয়ে মনটা কখন যে অতীত দিনের স্বর্ণীর্ণ স্মৃতির অরণ্যে লুকিয়ে পড়ে বুঝতে পারি না। অনেকক্ষণ ধরে খোঁজাখুঁজির পরে দেখি মেমসাহেবের আঁচলের তলায় মন লুকিয়ে আছে। তোমাকে এই চিঠিগুলো লিখতে বসে বারবার মনে পড়ে সেসব দিনের স্মৃতি। আপন মনে কখনো হাসি, কখনো লজ্জা পাই। কখনো আবার মনে হয় মেমসাহেব গান গাইছে এবং বেসুরো গলায় আমি কোরাস গাইতে চেষ্টা করছি। এই চিঠি লিখতে বসেই আমার মনের রিভলবিং স্টেজ ঘুরে যায়, দৃশ্য বদলে যায়। আমার চোখটা ঝাপসা হয়ে ওঠে। কলমটা খেমে যায়। একটু পরে দু'চোখ বেয়ে জল নেমে আসে।

দোলাবৌদি, তোমাকে চিঠি লিখতে বসে এমনি করে প্রতি পদক্ষেপে নিজেকে হারিয়ে ফেলি। নিজেকেই নিজে হারিয়ে ফেলি। কিন্তু তবুও অনেক কষ্টে ফিরে যাই অতীতে এবং আবার তোমাকে চিঠি লিখতে বসি।

আগে থেকে তোমাকে দুঃখ দেবার ইচ্ছা আমার নেই। যথা সময়ে তুমি আমার চোখের জলের ইতিহাস জানবে। তবে জেনে রেখো, আজ সোজা হয়ে দাঁড়াবার ক্ষমতাটুকু পর্যন্ত আমার নেই। হাঁটবার সাহস নেই, কোনমতে যেন হামাগুড়ি দিয়ে গড়িয়ে চলেছি।

তোমার নিশ্চয়ই এসব পড়তে ভাল লাগছে না। মনটা ছটফট করছে আমাদের প্রথম অ্যাপয়েন্টমেন্টের কথা শুনতে। তাই না? শুধু প্রথম দিনের কথাই নয়, আরো অনেক কিছুই তোমাকে বলব। তবে অনেকদিন হয়ে গেল। কিছু কথা, কিছু স্মৃতি অস্পষ্ট হয়ে গেছে।

সেদিন দুপুরের দিকে অফিসে গিয়ে কিছুক্ষণ কাজ করে জুরুরি কাজের অফিসে বাসায় চলে এলাম। ভাল করে সাবান দিয়ে স্নান করলাম। ধোপাবাড়ির কাচানো ধুতি-পাঞ্জাবি পরলাম। বোধহয় মুখে একটু পাউডারও বুলিয়েছিলাম। তারপর মা কালীর ফটোয় বারকয়েক প্রাণায় করে বেরিয়ে পড়লাম। দেরি হয়ে যাবার ভয়ে আগে আগেই বেরিয়ে পড়লাম।

সাড়ে পাঁচটার মধ্যেই এসপ্লানেডে পৌঁছে গেলাম। অফিস ছুটির সময় অনেক পরিচিত মানুষের সঙ্গে দেখা হবার সম্ভাবনা। তাই চৌরঙ্গী ছেড়ে রব্বী সিনেমার পাশ দিয়ে ঘুরে ফিরে নিউ মার্কেট চলে গেলাম। মার্কেটের সামনের কিছু স্টলের সামনে কয়েক মিনিট ঘোরাঘুরি করে এলাম লিভসে স্ট্রীটের মোড়ে।

দেরি করতে হলো না। মেমসাহেবও প্রায় সঙ্গে সঙ্গে এলো। একঝলক দেখে মিলাম। চমৎকার লাগল। বড় পবিত্র মনে হলো আমার মেমসাহেবকে। খুব সাধারণ সাজগোজ করে এসেছিল। ঐ বিরাট গোছা-ডরা চুলগুলোকে দিয়ে নিছকই একটা সাধারণ খোঁপা বেঁধেছিল। মুখে কোথাও প্রসাধনের ছোঁওয়া ছিল না। পরনে সাধা খোলার একটা মাঝারি ধরনের তাঁতের শাড়ি। গায়ে একটা

শব্দে টিকনের ব্লাউজ। ডান হাতে একটা কঙ্কন, বাঁ হাতে স্টেনলেস স্টীলের ব্যান্ড দিয়ে বাঁধা একটা ঘড়ি। হাতে দুটো-একটা খাতা বই আর ছোট্ট একটা পার্স।

প্রথমে কে কথা বলেছিল তা আর আজ মনে নেই। ঠিক কি কথা হয়েছিল তাও মনে নেই! তবে মনে আছে আমি জিজ্ঞাসা করেছিলাম, 'চা খাবেন?'

মেমসাহেব বলেছিল, 'চা আর খাব না। তার চাইতে চলুন একটু বসনা যাক।'

রাস্তা পার হয়ে ময়দানের দিকে এলাম। তারপর কিছুদূর হেঁটে ময়দানের এক কোণায় বসলাম দু'জনে। বেশ কিছুক্ষণ চুপচাপ থাকলাম দু'জনেই। মাঝে মাঝে একবার ওর দিকে তাকিয়েছি আর ভুক্তিতে ভরে গেছে মন। মেমসাহেবও মাঝে মাঝে আমাকে দেখছিল। কয়েকবার দু'জনের দৃষ্টিতে খান্না লেগেছে। হেসেছি দু'জনেই।

এক সেকেন্ড পরে আবার আমি তাকিয়েছি, মেমসাহেবের দিকে। এবার আর মেমসাহেব চুপ করে থাকতে পারে না। প্রশ্ন করে, 'কি দেখছেন?'

প্রথমে আমি উত্তর দিতে পারি নি! লজ্জা করেছে, দ্বিধা এসেছে। মেমসাহেব একটু পরে আবার প্রশ্ন করে 'কি হলো? উত্তর দিচ্ছেন না যে?'

'সব সময় কি সব প্রশ্নের উত্তর দেওয়া যায়, না দেবার ক্ষমতা থাকে?'

'আমার প্রশ্ন কি খুব কঠিন?'

'ক'দিন বাদে হয়ত এ প্রশ্ন কঠিন থাকবে না, তবে আজ বেশ কঠিন মনে হচ্ছে।'

'দু'জনের, দৃষ্টিই চারপাশ ঘুরে যায়। আমি আবার চুরি করে মেমসাহেবকে দেখে নিই। ধরা পড়লাম না। কিন্তু শেখরকা করতে পারলাম না, ধরা পড়ে গেলাম।

একটু হাসতে হাসতে মেমসাহেব আবার জানতে চায়, 'অমন করে কি দেখছেন?'

আমি কয়েকবার আত্মবাহু অপ্রয়োজনীয় কথা বলে ওর প্রশ্ন এড়িয়ে যেতে চেষ্টা করলাম, পারলাম না।

আমি বললাম, 'আপনি জানেন না আমি কি দেখছি?'

'না।'

'সত্যি?'

মেমসাহেব আবার হাসে। বলে, 'প্রথম দিনেই কিভাবে বুঝলেন আমি মিথ্যা কথা বলি?'

'না, তা ঠিক না।'

'তবে বলুন কি দেখছেন?' মেমসাহেব যেন দাবি জানাল।

আমি আর দেয়ি করি না। মেমসাহেবকে দেখতে দেখতেই বললাম, 'আপনার চোখ দুটি বড় সুন্দর...'

ঠোঁটটা কামড়াতে কামড়াতে মুখ ঘুরিয়ে নেয় মেমসাহেব। একটু নীচু গলায় বললো, 'ঘোড়ার ডিম সুন্দর।'

আবার কয়েক মুহূর্ত দু'জনেই চুপচাপ থাকি। তারপর মেমসাহেব আবার বলে, 'আমি কালো কুঞ্চিত বলে আমাকে নিয়ে ঠাট্টা করছেন?'

জ্ঞান দোলার্বৌদি, কোন কারণ ছিল না কিন্তু তবুও দু'জনে মুচকি হাসতে হাসতে বেশ কিছুক্ষণ তর্ক করলাম। প্রথম প্রথম প্রেমে পড়লে এমন অকারণ অনেক কিছুই করতে হয়, তাই না? তবে শেষে আমি বলেছিলাম, 'সত্যি আপনার চোখ দুটি বড় সুন্দর।'

পরে বিদায় নেবার আগে বলেছিলাম, 'প্রথম পরিচয়ের দিনই আপনার সৌন্দর্য নিয়ে আলোচনার জন্য যদি কোন অন্যান্য হয়ে থাকে তো মাপ করবেন।'

তুমি তো মেমসাহেবকে দেখেছ। সত্যি করে বল তো, ওর চোখ দুটো সুন্দর কিনা! অত কালো টানা-টানা ঘন গভীর বুদ্ধিদীপ্ত চোখ আমি জীবনে কোথাও দেখি নি। ঐ চোখ দুটো আমাকে চুপকের মত টেনে নিয়েছিল। সেই সেদিন দানাপুর প্যাসেঞ্জারের কামরায় মেমসাহেবের প্রথম দেখা পাবার সঙ্গে সঙ্গে আমি উপলব্ধি করেছিলাম। আমার নিঃসঙ্গ জীবনের শেষ হতে চলেছে। ময়দানে মেমসাহেবের পাশে বসে আমার সে উপলব্ধি আরো দৃঢ় হলো। বেশ বুঝতে পারলাম জীবনদেবতা আমাকে জনারণ্যের মধ্যে হারিয়ে যেতে দেবেন না। নিঃশব্দে নিঃশব্দে তিনি আমার কাছে

মেমসাহেবকে পাঠিয়েছেন আমার জীবনযুদ্ধের সেনাপতিরূপে।

আমার নতুন সেনাপতিও বোধহয় বুঝতে পেরেছিল যে বিধাতা শুধু একটু হাসি, একটু গান, একটু সুখ, এটুকু আনন্দ, একটু ভাল লাগার জন্য তাকে আমার কাছে টেনে আনেন নি।

দু'চারদিন আরো দেখাশোনা হবার পর একদিন সন্ধ্যায় পার্কসার্কাস ময়দানের এক কোণায় বসে মেমসাহেবকে আমার জীবন কাহিনী শোনালাম। সব কিছু শুনে মেমসাহেব বলেছিল, 'খাতুটা ভাল তবে খাদ মিশে গেছে। গহনা গড়বার জন্য একটু বেশি পোড়াতে হবে, একটু বেশি পেটাতে হবে।'

'কাকে পোড়াবেন? কাকে পেটাবেন?'

'বুঝতে পারছেন না?'

'বুদ্ধি থাকলে তো বুঝব।'

এবার একটু জোর গলায় বললো, 'আপনাকে।'

আমি অবাক হয়ে বলি, 'সেকি সর্বনাশের কথা!'

প্রায় তোৎলামি করে জিজ্ঞাসা করলাম, 'আপনি আমাকে পোড়াবেন, পেটাবেন?'

মেমসাহেব গাষ্টীয় আনার ব্যর্থ চেষ্টা করতে করতে বললো, 'তবে কি আপনাকে পূজা করব?'

একটু পরে বলেছিল, 'দেখবেন আপনাকে কেমন জন্ম করি, কেমন শাসন করি।'

'সত্যি?'

'নিশ্চয়।'

'পারবেন?'

'নিশ্চয়।' বেশ আত্মপ্রত্যয়ের সঙ্গে মেমসাহেব জবাব দেয়।

'পাছে হেরে যান, সেই ভয়ে যা পর্যন্ত আগেই পালিয়েছেন, সুতরাং আপনি কি....।'

আরো কয়েক সপ্তাহ কেটে গেল। ইতিমধ্যে মেমসাহেব নিশ্চয়ই বুঝতে পেরেছিল আমি পরীক্ষা দিয়ে কোনমতে পাস করেছি কিন্তু ঠিক লেখাপড়া বিশেষ কিছু করি নি। তাই বললো, 'রোজ একটু পড়াশুনা করবেন।'

'সে কি? এই বুড়ো বয়সে আবার পড়াশুনা করব?'

সোজা জবাব আসে, 'বাজে তর্ক করবেন না। নিশ্চয়ই রোজ একটু পড়াশুনা করবেন।'

'ডজনখানেক খবরের কাগজ আর ডজনখানেক জার্নাল তো রেগুলার পড়ি।'

'খবরের কাগজে কাজ করতে হলে শুধু খবরের কাগজ পড়লে চলে না, আরো কিছু পড়া দরকার।'

আমি চুপ করে থাকি। বসে বসে ভাবি মেমসাহেবের কথা। মেমসাহেব বলে, 'একটা কথা বলবেন?'

'বলব।'

'আপনি আমার কথায় বিরক্ত হচ্ছেন, তাই না?'

'না, না, বিরক্ত হবো কেন?'

'তবে এত গম্ভীর হয়ে ভাবছেন কি?'

দৃষ্টিটা উদাস হয়ে যায়। মনটা উড়ে বেড়ায় অতীত-বর্তমানের সমস্ত আকাশ জুড়ে। শুধু বলি, 'একটুও বিরক্ত হচ্ছি না। শুধু ভাবছি কেউ তো আমাকে এসব কথা আগে বলে নি.....!'

'তাতে কি হলো?'

এমন করে এগিয়ে চলে আমাদের কথা। শেষে মেমসাহেব বলে, 'চিরকালই কি আপনি একটা অর্ডিনারী রিপোর্টার থাকবেন?'

'মাত্র একশ'পঁচিশ টাকা মাইনের সেই রিপোর্টার হবার সুযোগ আজ পর্যন্ত পেলাম না: সুতরাং কল্পনা করে আর কতদূর যাব?'

স্পষ্ট জ্ঞানিয়ে দেয় মেমসাহেব, ওসব কথা বাদ দিন। অতীত আর বর্তমান নিয়েই তো জীবন নয়, ভবিষ্যতেই জীবন।'

'অতীত আর বর্তমানের ক্ষয়রোগে ভুগতে ভুগতে মেরুদণ্ডটা গেছে। তাই ভবিষ্যতে সোজা হয়ে দাঁড়াতে পারব বলে ভরসা পাই না।'

‘কথাটা ঠিক হলো না। অতীত-বর্তমান হচ্ছে ক্যানভাস আর ব্যাকগ্রাউন্ড মাত্র, ছবিটা এখনও আঁকা বাকি।’

যাই হোক শেষে মেমসাহেব বললো, ‘অতীত বর্তমান নিয়ে অত মাথা ঘামাবেন না, ভবিষ্যতের জন্য নিজেকে তৈরি করুন। ক্লাসিকস্ পড়ুন, ভাল ভাল লিটারেচার পড়ুন।’

সাধারণ ছেলেমেয়েরা ছাত্রজীবনে পড়াশুনা করে। প্রথম কথা, আমাকে গাইড করার কেউ ছিল না। দ্বিতীয়ত, ছাত্রজীবনে সে সুযোগ বা অবসরও পাই নি। পরীক্ষায় পাস করার জন্য কিছু ইংরেজি-বাংলা সাহিত্য পড়তে বাধ্য হয়েছি। তাছাড়া বঙ্কিমচন্দ্র-রবীন্দ্রনাথ-শরৎচন্দ্র ইত্যাদি কোন কারণে বা উপলক্ষে পড়েছি। কদাচিৎ কখনও কোন দুর্ঘটনার জন্য জনসন বা টি এস ইলিয়টও হয়তো পড়েছি। কিন্তু ঠিক পড়াশুনা বলতে যা বুঝায় তা আমি করতে পারি নি। মেমসাহেবের পাল্লায় পড়ে এবার আমি সত্যি-সত্যিই একটু পড়াশুনা করা শুরু করলাম।

কোনদিন নিজের বাড়ি থেকে কোনদিন আবার ইউনিভার্সিটি লাইব্রেরী থেকে মেমসাহেব আমার জন্য বই আনা শুরু করল। আমিও ধীরে ধীরে পড়াশুনা শুরু করলাম। ইংরেজি-বাংলা দুই-ই পড়লাম। বিদ্যাসাগর, হেমচন্দ্র, নবীনচন্দ্র, মাইকেল আবার পড়লাম। রমেশচন্দ্র, শিবনাথ শাস্ত্রী প্রভৃতিও বাদ পড়লেন না, তারপর মোহিতলাল জীবনানন্দও মেমসাহেব প্রেসক্রিপশন করল। ওদিকে ডরোথী পার্কারকে পড়লাম, পড়লাম রবার্ট ফ্রস্ট, টি এস ইলিয়ট, এঞ্জরা পাউন্ডের কবিতা। আমার মন ছটফট করে ওঠে। মেমসাহেবকে বললাম, মেমসাহেব, এবার তোমার পাঠশালা বন্ধ কর।

মেমসাহেব কি বললো জান? বললো, ‘বাজে বকো না। কিছু লেখাপড়া না করে জার্নালিজম করতে তোমার লজ্জা করে না?’

‘লজ্জা? জার্নালিষ্টদের লজ্জা! তুমি হাসালে মেমসাহেব!!’

মেমসাহেবের দাবড় খেয়ে হান্নলে, হেনরি গ্রীন, হেমিংওয়ে, লরেন্স ডুরেল, অ্যানি পটার্গার মেরী ম্যাকার্থির একগাদা বই পড়লাম।

এরপর একদিন আমাকে গীতবিতান প্রজেক্ট করল। আবাক হয়ে গেলাম। ডাবলাম, মেমসাহেব কি এবার আমাকে গানের স্কুলে ভর্তি করবে? জিজ্ঞাসা করলাম, ‘তানপুরা পাব না?’

মেমসাহেব রেগে গেল। আমার মুণ্ডু পাবে।’

পরে বলেছিল, যখন হাতে কাজ থাকবে না চুপচাপ গীতবিতানের পাতা উলটিয়ে যেও। খুবল ভাল লাগবে। দেখবে তুমি অনেক কিছু ভাবতে পারছ, কল্পনা করতে পারছ।

ইতিমধ্যে এম, এ. পাস করে মেমসাহেব একটা গার্লস কলেজে অস্থায়ীভাবে অধ্যাপনা শুরু করে দিয়েছে। এদিকে আরো অনেক কিছু হয়ে গেছে। মেমসাহেব উপলব্ধি করল আমার অন্তরের শূন্যতা, জীবনের ব্যর্থতা, ভবিষ্যতের আশঙ্কা। উপলব্ধি করল আমার জীবনযুদ্ধে তাঁর অনন্য প্রয়োজনীয়তা। আমি নিজেই একদিন বললাম, জান মেমসাহেব, প্রথমে শুধু বাঁচতে চেয়েছিলাম কিন্তু পরে এক দুর্বল মুহূর্তে স্বপ্ন দেখলাম আমি এগিয়ে চলেছি। দশজনের একজন হবার স্বপ্ন দেখলাম। সেই স্বপ্নের ঘোরে বেশ কিছুকাল কেটে গেল। যখন সখিত ফিরে পেলাম, তখন নিজের দুরবস্থা দেখে নিজেই চমকে গেলাম, ঘাবড়ে গেলাম, হতাশ হলাম।

একটু থামি।

আবার বলি, সমস্ত আশা-আকাঙ্ক্ষা, স্বপ্ন-সাধনা বিসর্জন দিয়ে নিজেকে তুলে দিলাম অদৃষ্টের হাতে। কিন্তু তোমাকে দেখে আমার সব হিসাব-নিকাশ ওলট-পালট হয়ে গেল। মুহূর্তের মধ্যে আবার সমস্ত স্বপ্ন উড়ে এসে জড়ো হলো মনের আকাশে।

মেমসাহেবের হাতটা চেপে ধরে বললাম, ‘ভগবানের নাম শপথ করে বলছি মেমসাহেব, তোমাকে দেখেই যেন মনে হলো, ‘তুমি তো আমারই। এই অন্ধকূপ থেকে আমাকে মুক্তি দেবার জন্যই যেন ভগবান তোমাকে পাঠিয়েছেন।’

আমার মত মেমসাহেব কোনদিনই বেশি কথা বলত না। শুধু বললো, ‘হয়ত তাই। তা না হলে তোমার সঙ্গে অমন অপ্রত্যাশিতভাবে পরের দিনই আবার দেখা হবে কেন?’

অদৃষ্টের ইচ্ছিত, নিয়তির নির্দেশ মেমসাহেবও বুঝতে পেরেছিল। আমি অনেক কথা বলার পরই দু’হাত তুলে মেমসাহেবের কাছে আত্মসমর্পণ করেছিলাম। মেমসাহেবের অনুষ্ঠান অত্যন্ত সংক্ষিপ্ত

হয়েছিল।

প্রতিদিনের মত সেদিন বেলা দেড়টা-দুটোর সময় অফিসে গিয়েছিলাম। টেলি-প্রিন্টারে কয়েকটা লোক্যাল কপি দেখতে দেখতেই টেলিফোন বেজে উঠল। রিসিভার তুলে অভ্যাস মত বললাম, রিপোর্টার্স!

'কখন অফিসে এলে?'

'এই তো একটু আগে।'

'একটা কথা বলব?'

'বলো।'

'শুনবে?'

'নিশ্চয়ই।'

'চলো না একটু বেড়িয়ে আসি!'

আমি অবাক হয়ে জানতে চাই, 'এখন!'

আমি অবাক হয়ে জানতে চাই, 'এখন?'

'হ্যাঁ।'

'কি ব্যাপার বল তো?'

'বল না যাবে কিনা?'

চীফ রিপোর্টার বা নিউজ এডিটর তখনও অফিসে আসেনি। কি করব ভাবছিলাম। মেমসাহেব টেলিফোন ধরে থাকল; আমি ডায়েরীতে দেখে নিলাম দুটো প্রেস কনফারেন্স ছাড়া আর কিছু নেই। একটা চারটের সময় আর দ্বিতীয়টা সন্ধ্যা সাতটায়।

মেমসাহেবকে জিজ্ঞাসা করলাম, 'সাতটার মধ্যে ফিরতে পারব?'

'সাতটা? বোধহয় না।'

'কখন ফিরবে?'

'আটটা-সড়ে আটটার মধ্যে নিশ্চয় ফিরব।'

চীফ রিপোর্টারকে একটা স্লিপ লিখে রেখে গেলাম, একটা জরুরি নিউজের লোভে বেরিয়ে যাচ্ছি। রাগে ফিরে টেলিফোন ডিউটি দেব। অফিস থেকে বেরিয়ে পড়লাম। এসপ্লানেডের মোড়ে দু'জনে মীট করে সোজা চলে গেলাম দক্ষিণেশ্বর। মন্দিরের দরজা বন্ধ ছিল। তাই এদিক-ওদিক ঘুরে পঞ্চাবটি ছাড়িয়ে আরো খানিকটা উত্তরে গঙ্গার ধারে একটা গাছের ছায়ায় বসলাম দু'জনে।

মেমসাহেব বললো, 'চোখ বন্ধ কর।'

'কেন?'

'আঃ! সব সময় কেন কেন করো না। বলছি চোখ বন্ধ কর।'

'পুরোটা না আর্ধেকটা বন্ধ করব।'

'তুমি-বড্ড তর্ক কর।' মেমসাহেব এবার কড়া হুকুম দেয়, 'আই সে, ক্রোজ ইওর আইজ।'

সত্যি সত্যিই চোখ বন্ধ করলাম। মুহূর্তের মধ্যে অনুভব করলাম মেমসাহেব আমার দুটি পায়ে হাত দিয়ে প্রণাম করছে। চমকে গিয়ে চোখ খুলে প্রশ্ন করলাম, 'একি ব্যাপার?'

দেখি মেমসাহেবের মুখে অনির্বাক্ত আনন্দের বন্যা, দুটি চোখে পরম তপ্তির দীপশিখা জ্বলছে। দুটি হাত দিয়ে মেমসাহেবের মুখটা তুলে ধরে আবার প্রশ্ন করলাম, 'হঠাৎ প্রণাম করলে কেন মেমসাহেব?'

কোন উত্তর দিল না মেমসাহেব। আত্মসমর্পণের ভাষায় চাইল আমার দিকে। আমিও ওর দিকে চেয়ে রইলাম অনেকক্ষণ। তারপর আবার জানতে চাইলাম, 'বলবে না, প্রণাম করলে কেন?'

এবার মেমসাহেব কথা বলল, 'আমি তোমাকে প্রণাম করলাম, তুমি আমাকে আশীর্বাদ করবে না?'

আমি অবাক হয়ে যাই। নিজের দৈন্য এত স্পষ্ট হলো যে নিজেকে বেশ ছোট মনে হলো। মেমসাহেব প্রণাম করার পর কৈফিয়ত তলব না করে আমার আশীর্বাদ করা প্রথম কাজ ছিল। যাই হোক তাড়াতাড়ি মেমসাহেবকে কাছে টেনে নিলাম। দুটি হাত দিয়ে ওর মুখখানা তুলে ধরে বললাম,

‘ভগবান যেন তোমাকে সুখী করেন।’

মেমসাহেব হঠাৎ মাথাটা ছাড়িয়ে নিয়ে দু’হাত দিয়ে আমাকে চেপে ধরে বললো, ‘ভগবান কি করবেন, তা ভগবানই জানেন। কিন্তু তুমি কি আমাকে সুখী করবে?’

‘কি মনে হয়?’

‘মনে মনে তো ভয়ই হয়।’

‘কিসের ভয়?’

কানে কানে ফিসফিস করে মেমসাহেব বললো, ‘হাজার হোক খবরের কাগজের রিপোর্টার! কবে, কখন, কোথায় হয়ত কোন সুন্দরী এসে তোমাকে ঝড়ের বেগে উড়িয়ে নিয়ে যাবে.....!’

‘তাই নাকি?’

‘তবে আবার কি! পুরুষদের বিশ্বাস নেই.....’

‘জ্ঞান মেমসাহেব, তোমাকে নিয়ে আমারও অনেক ভয়।’

আমার বাহুবল্লন থেকে নিজেকে মুক্ত করে নিয়ে আঙুল দিয়ে নিজেকে দেখিয়ে মেমসাহেব অবাক হয়ে বললো, ‘আমাকে নিয়ে তোমার ভয়?’

‘জি মেমসাহেব।’

‘বাজে বকো না।’

‘বাজে না মেমসাহেব। জীবনে সুপ্রতিষ্ঠিত কোন মানুষের আমন্ত্রণ এলে পঞ্চাশ টাকার এই রিপোর্টারকে নিশ্চয়ই তোমার ভুলে যেতে কষ্ট হবে না।’

দৃঢ় করে ছলে উঠল মেমসাহেব, ‘তুমি সব সময় পঞ্চাশ টাকার রিপোর্টার পঞ্চাশ টাকার রিপোর্টার বলবে না তো! সারা জীবন কি তুমি পঞ্চাশ টাকার রিপোর্টার থাকবে?’

‘থাকব না?’

‘না না না।’

‘তাহলে কি হবো?’

‘কি আর হবে? জীবনে মানুষ হবে, বড় হবে, মাথা উঁচু করে দাঁড়াবে।’

‘পারব?’

‘একশ’ বার পারবে। তাছাড়া আমি আছি না!’

মেমসাহেব আমাকে একটু কাছে টেনে নেয়। একটু আদর করে। মাথার চুলগুলো নিয়ে নাড়াচাড়া করে। আবার বলে, ‘তুমি ভাব কেন যে তুমি হেরে গেছ?’

‘কি করব বল মেমসাহেব? অকূল সমুদ্র জাহাজ ভেসে বেড়ায় কিন্তু লাইট-হাউসের ঐ ছোট্ট একটা আলোর ইস্তিত না পেলে তো সে বন্দরে ভিড়তে পারে না।’

‘আমি তো এসেছি, আর ভয় কি? কিন্তু কথা দিতে পার আমার বন্দর ছেড়ে তুমি তোমার জাহাজ নিয়ে অন্য বন্দরে বন্দরে ঘুরে বেড়াবে না?’

আল্লা দোলাবৌদি, সব মেয়েদের মনেই ঐ এক ভয়, এক সন্দেহ, কেন বলতে পার? পৃথিবীর ইতিহাস কি শুধু পুরুষদের বিশ্বাসঘাতকতার কাহিনীতেই ভরা? যাই হোক, মেমসাহেবের কথা আমার বেশ লাগত। অন্তত ঐ ভেবে আমি তৃপ্তি পেতাম যে সে আমাকে সম্পূর্ণভাবে কামনা করে।

সেদিন কথায় কথায় সন্ধ্যা নেমে এলো, মন্দিরের মঙ্গলদীপের আলোর প্রতিবিম্ব পড়ল গঙ্গায়। স্রোতবিনী গঙ্গা সে আলো ভাসিয়ে নিয়ে গেল দূর-দূরান্তের শহরে, নগরে, জনপদে আর অসংখ্য মানুষের মনের অন্ধকার গহন অরণ্যে।

মেমসাহেব শেষকালে প্রশ্ন করল, ‘কই তুমি তো জানতে চাইলে না তোমাকে আজ এখানে নিয়ে এলাম কেন? তুমি তো জানতে চাইলে না তোমাকে প্রণাম করে আশীর্বাদ চাইলাম কেন?’

‘কোন বিশেষ কারণ আছে নাকি?’

‘তবে কি,’ এই বলে মেমসাহেব ব্যাগ থেকে একটা কাগজ বের করে আমাকে পড়তে দিল।

পড়ে দেখি হাওড়া গার্লস কলেজের অ্যাপয়েন্টমেন্ট লেটার। মেমসাহেবের দুটি হাত ধরে বললাম, ‘কনগ্রাচুলেশনস। এই অন্নমারু, আনন্দ ঐশ্বর্যে ভগবান নিশ্চয়ই তোমাকে ভরিয়ে তুলবেন।’

একটু থেকে প্রশ্ন করি, ‘মাসে মাসে আড়াইশ? টাকা দিয়ে কি করবে মেমসাহেব?’

'কেন? দু'জনে মিলেও ওড়াতে পারব না?'

দু'জনেই হেসে উঠি।

মেমসাহেব অধ্যাপনা শুরু করায় গর্বে আমার বুকটা ভরে উঠল। ক'দিন পরে অফিস থেকে পঁচিশটা টাকা অ্যাডভান্স নিলাম। চিত্তরঞ্জন এভিনিউর সেলস্ এম্পারিয়াম থেকে আঠারো টাকা দিয়ে একটা তাঁতের শাড়ি কিনলাম। বিকেল বেলায় মেমসাহেবকে প্যাকেটটা দিয়ে বললাম, 'কালকে শাড়িটা পরে কলেজে যেও।'

পরের দিন ঐ শাড়িটা পরে কলেজে গিয়েছিল, কিন্তু তারপর আর পরত না। একদিন জিজ্ঞাসা করলাম, 'শাড়িটা বুঝি তোমার পছন্দ হয় নি?'

'খুব পছন্দ হয়েছে।'

'সেই জন্যেই বুঝি পরতে লজ্জা করে?'

কানে কানে বললো, 'না গো না। ওটা তোমার প্রথম প্রেজেন্টেশন। যখন-তখন পরে নষ্ট করব নাকি?'

প্রথম মাসে মাইনে পাবার পর মেমসাহেব আমাকে কি দিয়েছিল জান? একটা গরদের পাঞ্জাবি আর একটা চমৎকার তাঁতের ধুতি।

ধুতি কেনার সময় ভারী মজা হয়েছিল।

মেমসাহেব আমাকে জিজ্ঞাসা করল, 'জরিপাড় নেবে, না প্লেনপাড় নেবে?'

দোকানের আর কেউ শুনতে না পারে তাই কানে কানে বললাম, 'যদি টোপেরটাও কিনে দাও তাহলে জরিপাড় ধুতি আর যদি এখন টোপের না কিনতে চাও তবে প্লেনপাড়ই.....।'

'অসভ্য কাথাক্যুর।'

ধুতি কিনে দোকান থেকে বেরুতে বেরুতে মেমসাহেব বললো, 'তুমি ভারী অসভ্য।'

'কি আশ্চর্য? তোমার ও ফ্রাঙ্কলি কথা বলব না?'

'এই তোমার ফ্রাঙ্কলি বলার ঢং?'

সে-সব দিনের কথা আজ তোমাকে লিখতে বসে আমি নিজেই অবাক হয়ে যাচ্ছি। কি কারণে ও কেমন করে আমরা দু'জনে এত দ্রুততালে এগিয়ে চলেছিলাম তা আমি জানি না। কোন যুক্তিতর্ক দিয়ে এসব বোঝান সম্ভব নয়। মানুষের মন লজিকের প্রফেসর বা বিচারকের পরামর্শ বা উপদেশ মেনে চলে না। মুক্ত বিহঙ্গের মত সে আপন গতিতে উড়ে বেড়ায়, ঘুরে বেড়ায়। মানুষের মন যদি বিচার-বিবেচনা মেনে চলতে জানত তাহলে শুধু আমার মেমসাহেবের কাহিনী নয়, পৃথিবীর ইতিহাসও একেবারে অন্যরকম হতো।

মাতৃগর্ভ থেকে ভূমিষ্ঠ হবার পর থেকেই মানুষ একজনকে অবলম্বন করে বড় হয়, ভবিষ্যতের পথে এগিয়ে চলে। একটি মুখের হাসি, দুটি চোখের জলের জন্য মানুষ কত কি করে। আমি বড় হয়েছি, ভবিষ্যতের দিকে এগিয়ে গেছি নিভাতাই প্রকৃতির নিয়মে। মানুষের মুখের হাসি না প্রিয়জনের চোখের জলের কোন ভূমিকা ছিল না আমার জীবনে। তাই তো মেমসাহেবকে পাওয়ার মধ্যেও কোন ফাঁকি থাকতে পারে নি। স্কুল-কলেজ-ইউনিভার্সিটির বাইশটি বসন্ত অতিক্রম করতে মেমসাহেবের জীবনে নিশ্চয়ই কিছু কিছু মাছি বা মৌমাছি ভন্ডন্ড করেছে চারপাশে। হয়ত বা কারুর গুন মনে একটু রং লাগিয়েছে কিন্তু ঠিক আমার মত কেউ সমস্ত জীবনের দাবি নিয়ে এগিয়ে আসতে পারে নি। তাই তো মেমসাহেবের জীবনের সব বাঁধন খুলে গিয়েছিল, সংযম আর সংস্কার ভেসে গিয়েছিল।

আমার মত মেমসাহেবের জীবনেও অনেক অনেক পরিবর্তন এলো। আমার পছন্দ-অপছন্দ মতামত ছাড়া কোন কিছুই করতে পারত না। আমি সঙ্গে গিয়ে পছন্দ না করলে শাড়ি-ব্লাউজ পর্যন্ত কেনা হতো না। আমি জিজ্ঞাসা করতাম, 'এতদিন কার পছন্দ মত কিনতে?'

'মা বা দিদির.....।'

'এখন কি ওঁদের রুচি খারাপ হয়ে গেছে?'

'না, তা হবে কেন? তাই বলে কি ওঁরা চিরকালই পছন্দ করবেন?'

'তা তো বটেই!'

মেমসাহেব অভিমান করত। 'বেশ তো আমার সঙ্গে দোকানে যেতে অপমান হলে যেও না।'

আমি কথার মোড় ঘুরিয়ে দিই। 'না জানি এরপর আরো কত কি কিনে দিতে বলবে!' মেমসাহেব আমার ইঙ্গিত বোঝে। প্রথমে বলে, 'আমার অসভ্যতা করছ!' একটু পরে একটু কাছে এসে, একটু আশ্বে বলে, 'দরকার হলে নিশ্চয়ই কিনবে। তুমি ছাড়া কে কিনে দেবে বল?'

দোলাবৌদি, ভাবতে পারছ আমাদের অবস্থা?

নিত্য কর্মপদ্ধতির বাইরে এক ধাপ নড়তে-চড়তে গেলেই মেমসাহেব আমার কাছে আবেদনপত্র নিয়ে হাজির হতো।

'জান রবিবার কলেজের একদল প্রফেসর শান্তিনিকেতন যাচ্ছেন! আমাকেও ভীষণ ধরেছেন। কি করি বলতো?'

'কি আবার করবে, যাবে।' তারপর জেনে নিই, 'কবে ফিরবে?'

'সোমবার রায়েই। মঙ্গলবার তো কলেজ আছে।'

কোনদিন আবার দেখা হবার সঙ্গে সঙ্গেই বলতো, 'দেখ, কালকে ভ্রমরের জন্মদিন। কি দেন বলতো?'

আমি মেমসাহেবের কথা শুনে মনে মনে হাসতাম। ভ্রমর ওর বাল্যবন্ধু স্কুল-কলেজ ইউনিভার্সিটি এক সঙ্গে পার হয়েছে। প্রতি-বছরই জন্মদিনে যেতে হয়েছে, কিন্তু-না-কিছু প্রেজেন্টেশনও দিয়েছে। আজ এই সামান্য ব্যাপারটা এত বড় সমস্যা হয়ে দেখা দিল যে, মেমসাহেব নিজের বুদ্ধি দিয়ে কোন কুলকিনারা পেল না। ডাক পড়ল আমার।

আমার ওপর মেমসাহেবের নির্ভরতার খবর আমাদের আশপাশের সবাই জানত। মেমসাহেবের মেজদি হয়ত সিনেমার টিকিট কেটেছে কিন্তু তবুও ছোট বোনের সঙ্গে মজা করার জন্য জিজ্ঞাসা করত, 'হ্যারে, রিপোর্টারকে জিজ্ঞাসা করিস তুই রবিবার ম্যাটিনীতে সিনেমা যেতে পারবি কিনা।'

মেমসাহেব দৌড়ে গিয়ে মেজদির মুখটা চেপে ধরে বলত, 'ভাল হচ্ছে না কিন্তু!'

মুচকি হাসি লুকোবার ব্যর্থ চেষ্টা করতে করতে মেজদি বলত, 'আচ্ছা ঠিক আছে আমিই রিপোর্টারকে ফোন করে জেনে নেব।'

মেমসাহেব হকার দিত, 'মা! মেজদি কি করছে।'

কোনদিন আবার মেজদি মেমসাহেবকে বলত, 'হ্যারে, রিপোর্টারকে একবার ফোন করবি?'

'কেন?'

'জিজ্ঞাসা কর তো তুই আজকে মাছের ঝোল খাবি না ঝাল খাবি?'

মেমসাহেব মেজদিকে ধরতে যেত আর মেজদি দৌড়ে পালিয়ে যেত।

অনেক রাত হয়ে গেছে। কত রাত জান? পৌনে-তিনটে বাজে। আশপাশের বাড়ির সবাই সারাদিন কাজকর্ম করে কত নিশ্চিন্তে, কত শান্তিতে এখন ঘুমোচ্ছে। আর আমি?

যখনই দেহলড়ির একটা 'শের; মনে পড়ছে—

মহববত জিসকো দেতে হ্যার,

উসে ফির কুছ নেই দেতে,

উসে সব কুছ দিয়া হ্যার,

জিসকো ইস্ কাবিল নেহি সমঝা।

-জীবনে যে ভালবাসা পায়, সে আর কিছু পায় না; যে জীবনে আর সব কিছু পায়, সে ভালবাসা পায় না।

তোমাদের জীবনে নয়, কিন্তু আমার জীবনে কথাটা বর্ণে বর্ণে মিলে গেছে।

আট

ইতিহাসের সে এক প্রাগৈতিহাসিক অধ্যায়ে কক্ষচ্যুত গ্রহের আকারে পৃথিবী মহাশূন্যে ঘুরপাক খাচ্ছিল। উদ্দেশ্যহীন হয়ে পৃথিবী কতদিন ঘুরপাক খেয়েছিল, তা আমার জানা নেই। জানা নেই কতদিন পর সে সূর্যকে কেন্দ্র করে আপন কক্ষপথ আবিষ্কার করেছিল। তবে জানি, প্রতিটি মানুষকেও এমনি উদ্দেশ্যহীন হয়ে মহাশূন্যে ঘুরপাক খেতে হয়। সময় কম-বেশি হতে পারে কিন্তু কালের এই

নির্মম রসিকতার হাত থেকে মুক্তি পায় নি। আমিও পাই নি। তোমরাও পাও নি।

মেমসাহেবকে পাবার পথ আমার সে অকারণ ঘুরপাক খাওয়া বন্ধ হলো। ঠিকনাহীন চলার শেষ হলো। আপন কক্ষপথ দেখতে পেলাম। দীর্ঘনিশ্বাস পড়া বন্ধ হলো: দুনিয়াটাকে, জীবনটাকে বড় ভাল লাগল। তুমি তো জান আমি সব কিছু পারি: পারি না শুধু কবিতা লিখতে। তাই কাব্য করে ঠিক বোঝাতে পারছি না। বড়বাজার বা চিৎপুরের মোড়ে ফুলের দোকান দেখেছ? দেখেছ তো কত অজস্র সুন্দর ফুল বোঝাই করা থাকে দোকানগুলিতে? ঐ ভিড়ের মধ্যে এক-একটি ফুলের সৌন্দর্য, বৈশিষ্ট্য যেন খুঁজে পাওয়া যায় না। কিন্তু ঐ দোকান থেকে সামান্য ক'টি ফুল কিনে একটু সাজিয়ে-গুছিয়ে ফ্লাওয়ারভাস-এ রাখলে সারা ড্রাইংরুমটা যেন আনোয় ভরে যায়। তাই না? হাওড়া ব্রীজের তলায়, জগন্নাথঘাটের পাশে মণ নরে ঝড়ি বোঝাই করে রজনীগন্ধা বিক্রি হয় কিন্তু সে দৃশ্য দেখা যায় না। তার চাইতে অর্গানের ওপর একটা লম্বা ফ্লাওয়ারভাসের মধ্যে মাত্র দু'চারটে স্টিক দেখতে অনেক ভাল লাগে, অনেক ভূঁপ্তি পাওয়া যায় মনে।

জগন্নাথঘাটে রজনীগন্ধার পাইকারী বাজার দেখতে নিশ্চয়ই কোন কবি'র কাব্যচেতনা জাগবে না। কিন্তু প্রেয়সীর অঙ্গে একটু রজনীগন্ধার সজ্জা অনেকের মনে দোলা দেবে।

আমি রজনীগন্ধা না হতে পারি কিন্তু ক্যাকটাস তো হতে পারি! মেমসাহেব সেই ক্যাকটাস দিয়ে জাপানীদের চং-এ চমৎকার গৃহসজ্জা করেছিল। আমি আমিই থেকে গেলাম। শুধু পরিবেশ পরিবর্তনে আমার জীবন সৌন্দর্যের প্রকাশ পেল।

ইডেন গার্ডেনের ধার দিয়ে সন্ধ্যার অন্ধকারে আমরা দু'জনে গঙ্গার ধারে হারিয়ে গেলাম। কয়েকটা বড় জাহাজ পৃথিবীর নানা প্রান্ত ঘুরে ক্রান্ত হয়ে গঙ্গাবক্ষে বিশ্রাম করছিল। ক্রান্ত আমিও মেমসাহেবের কাঁধে মাথা রেখে একটু বিশ্রাম করছিলাম।

মেমসাহেব আমার মাথায় হাত বুলোতে বুলোতে প্রশ্ন করল, 'এমনি করে আর কতদিন কাটাবে?'
'তুমি কি ঘর বাঁধার কথা বলছ?'
'সব সময় স্বার্থপরের মত শুধু ঐ এক চিন্তা, 'মেমসাহেব মিহি সুরে আমাকে একটু টিপ্তনী কাটল।

'তুমি অন্য কিছু বলছ?' আমি জানতে চাইলাম।
এবার মেমসাহেবের পালা। 'তুমি কি জীবন সম্পর্কে একটুও ভাববে না? শুধু মেমসাহেবকে ভালবাসলেই কি জীবনের সব কিছু মিটবে?'
'নিজের কথা ভাবতে ভাবতে কিছু হৃদিস না পেয়েই তো তোমার ঘাটে এই ডিঙি ভিড়িয়েছি!
এখন তোমার দায়িত্ব।'

'তাই বুঝি?'
'আজ্ঞে হ্যাঁ।'
অন্ধকারটা একটু গাঢ় হলো। আমরা আরো একটু নিবিড় হলাম। ঠিক সেই মুহূর্তে কোথা থেকে একটা চীনা বাদামওয়ালা হাজির হলো আমাদের পাশে। লজ্জায় একটু সঙ্কোচবোধ করলাম দু'জনেই। বাদাম চিবুবার কোন ইচ্ছা না থাকলেও ওর উপস্থিতিটা অসহ্য মনে হচ্ছিল বলে তাড়াতাড়ি দু'প্যাকেট বাদাম কিনলাম।

আমি আবার একটু নিবিড় হলাম। বললাম, 'মেমসাহেব, একটা গান শোনাবে?'
'এখানে নয়।'
'এখানে নয় তো তোমার কলেজের কমনরুমে বসে গান শোনাবে?'
নির্বিকার হয়ে মেমসাহেব বলে, 'যখন আমরা কলকাতার বাইরে যাব তখন তোমাকে গান শোনাব।'

সেদিন মেমসাহেবের এই কথায় কোন গুরুত্ব দিই নি। ভেবেছিলাম এড়িয়ে যাবার জন্য ঐ কথা বলছে।

সপ্তাহখানেক পরের কথা। দু'জনে সন্ধ্যার পর বেলেভেড়িয়ারের ধার দিয়ে ঘুরে বেড়াচ্ছি। মেমসাহেব হঠাৎ আমাকে প্রশ্ন করল, 'বেড়াতে যাবে?'

'কোথায়?'

‘কলকাতার বাইরে?’

‘কার সঙ্গে?’

‘আমার সঙ্গে।’

‘সত্যি?’

‘সত্যি।’

আমি আর ধৈর্য ধরতে পারি না। সঙ্গে সঙ্গে জানতে চাইলাম, ‘আজই যাবে?’

‘তুমি কি কোনদিন সিরিয়াস হবে না?’

‘তুমি কি চাও? আমি তোমার সঙ্গে ডিয়ারনেস এলাউল বা বাড়ি ভাড়া নিয়ে আলোচনা করি?’
মেমসাহেব হাসে। দু’জনে হাত ধরে হাঁটতে হাঁটতে আরো এগিয়ে যাই।

সেদিন সন্ধ্যাতেই আমার প্যান হয়ে গেল। মেমসাহেবের কলেজ থেকে তিন-চার দল ছাত্রী আর অধ্যাপিকা তিন-চার দিকে যাবেন এডুকেশন্যাল ট্যুরে। মেমসাহেবের যাবার কথা ঠিক থাকবে কিন্তু যাবে না। বাড়িতে জানবে মেমসাহেব কলেজের ছাত্রী আর সহকর্মীদের সঙ্গে বাইরে গেছে, কিন্তু আসলে—

মেমসাহেব শুধু ইলাদিকে একটু টিপে দেবে। ইলাদি মেজদির ক্লাস-ফ্রেন্ড। সুতরাং ভবিষ্যতের জন্য একটু সতর্ক থাকাই ভাল।

কবে, কখনও, কোথায় আমরা গিয়েছিলাম, সে সব কথা খুলে না বলাই ভাল। জেনে রাখ, আমরা বাইরে গিয়েছিলাম, নগর কলকাতায় লক্ষ লক্ষ মানুষের ভিড়ের বাইরে মেমসাহেবকে পেয়ে আমি ধায় উন্মাদ হয়ে উঠেছিলাম।

তুমি হয়ত ভাবছ ফার্স্ট ক্লাস কম্পার্টমেন্টের কুপেতে করে আমরা দু’জনে হানিমুন করতে বেরিয়েছিলাম। তা নয়। অত টাকা কোথায়? আমি তো মাত্র পনের টাকা নিয়ে বেরিয়েছিলাম তবে আমার মেমসাহেব করুণাসাগর বিদ্যাসাগরের চাইতেও উদার ছিল। সেকেন্ড ক্লাসেরই টিকিট কেটেছিল। গেস্টহাউসে দুটো ঘর ভাড়া নিয়েছিল। আমি বলেছিলাম, ‘অথবা কেন খরচ করছ? একটা ঘর নিলেই তো হয়।’

মুচকি মুচকি হাসতে হাসতে মেমসাহেব বলেছিল, ‘তুমি কি লাউঞ্জের রাত কাটাবে?’

‘লাউঞ্জ? না তার চাইতে বরং ডাইনিং-রুমের টেবিলে রাত কাটাব। কি বল?’

আচ্ছা ওসব পরে বলব। ট্রেনের কম্পার্টমেন্টে মেমসাহেবকে পাশে পেয়ে আমি যেন স্থির থাকতে পারছিলাম না। ইচ্ছা করছিল জড়িয়ে ধরি, আদর করি। তা সম্ভব ছিল না। যাত্রীদের সতর্ক দৃষ্টিকে যতদূর সম্ভব ফাঁকি দিয়ে মেমসাহেবকে পাশে পাবার দুর্লভ সুযোগ উপভোগ করার চেষ্টা করেছি। ও কখনো হেসেছে, কখনো চোখ টিপে ইশারা করেছে।

যখন একটু বাড়িবাড়ি করেছি, তখন বলেছে, ‘আঃ! কি করছ?’

আমি অবাক হয়ে প্রশ্ন করছি, ‘এক্সকিউজ মী, আপনি আমাকে কিছু বলছেন?’

‘আজ্ঞে আপনাকে? না না, আপনাকে কি বলব?’

‘ধ্যাত্ব ইউ।’

‘নো মেনশন।’

আশপাশের ঘর-বাড়ি, বন-জঙ্গল, নদী-নালা পিছনে ফেলে ট্রেনটা ছুলে চলে সামনের দিকে। আমাদের দু’জনের মনটাও দৌড়তে থাকে ভবিষ্যতের দিকে। কত শত অসংখ্য স্বপ্ন উঁকি দেয় মনের মধ্যে। কত আশা, কত আকাঙ্ক্ষা রূপ নিতে চায় ভবিষ্যতের সেই সব স্বপ্নকে ঘিরে।

‘নতুন কোন স্বপ্ন, নতুন কোন আশা আমার মনে আসে নি। চিরকাল মানুষ যা স্বপ্ন দেখেছে, যা আশা করেছে, আমি তার বেশি একটুও ভাবি নি। ভাবছিলাম, একদিন অনিশ্চয়তা নিশ্চয়ই শেষ হবে। মেমসাহেব কল্যাণীরূপে আমার ঘরে আসবে, আলো জ্বলে উঠবে আমার অন্ধকার ঘরে।

তারপর?

উপভোগ?

নিশ্চয়ই।

সঙ্গে?

নিশ্চয়ই।

তবে ঐ সম্বোধনের মধ্যেই দ্বৈতজীবনের যবনিকা টানব না। দু'জনে হাত ধরে এগিয়ে যাব। অনেক অনেক এগিয়ে যাব। দশজনের কল্যাণের মধ্য দিয়ে নিজেদের কল্যাণ করব। দশজনের আশীর্বাদ কুড়িয়ে আমরা ধন্য হব।

ময়নার হাত সুর করে মেমসাহেব ডাক দিল, 'শোন।'

আমি ওর ডাক শুনেছিলাম কিন্তু উত্তর দিলাম না। কেন? ওর ঐ 'শোন' ডাকটা আমার বড্ড ভাল লাগত, বড্ড মিষ্টি লাগত। আমি মুখটা ঘুরিয়ে অন্যদিকে চাইলাম।

আবার সেই ময়নার ডাক, 'শোন।'

'ডাকছ?'

'হ্যাঁ।'

মেমসাহেব কি যেন ভাবে, দৃষ্টিটা যেন একটু ভেসে বেড়ায় ভবিষ্যতের মহাকাশে। আমি ওকে ফিরিয়ে নিয়ে আসি আমার কাছে। ডাক দিই, 'মেমসাহেব!'

মেমসাহেব সংক্ষিপ্ত সাড়া দেয়, 'কি?'

'আমাকে কিছু বলবে?'

মেমসাহেব এবার ফিরে তাকায় আমার দিকে। যেন গভীর মিষ্টি দৃষ্টি দিয়ে দেখে আমাকে।

আবার দু'চার মিনিট কেটে যায়। শুধু দু'জনে দুজনকে দেখি। 'একটা সত্যি কথা বলবে?'

মেমসাহেব এতক্ষণে প্রশ্ন করে।

'বলব।'

আবার মুহূর্তের জন্য মেমসাহেব চুপ করে। দৃষ্টিটা একটু সরিয়ে নিয়ে জানতে চায়, 'একদিন যখন আমরা দু'জনে এক হব, সংসার করব, তখনও তুমি আমাকে আজকের মত ভালবাসবে?'

ইচ্ছা করল মেমসাহেবকে টেনে নিই বুকের মধ্যে। ইচ্ছা করল আদর-ভালবাসায় ওকে স্নান করিয়ে দিয়ে বলি, 'সেদিন তোমাকে হাজার-গুণ বেশি ভালবাসব কিন্তু পারলাম না। কম্পার্টমেন্টে আরো ক'জন যাত্রী ছিলেন। তাই শুধু মেমসাহেবের হাত টেনে নিয়ে বললাম, 'আমাকে নিয়ে কি আজও তোমার দৃষ্টিভঙ্গি হয়?'

মেমসাহেব তাড়াতাড়ি দু'হাত দিয়ে আমার হাতটা চেপে ধরে বললো, 'না, না। আমি জানি, তুমি আমাকে অনেক অনেক বেশি ভালবাসবে। আমি জানি, তুমি আমাকে সুখী করবে।?'

'সত্যি?'

'সত্যি।'

দোলাবৌদি, সে ক'দিনের কাহিনী আমার জীবনের অবিস্মরণীয় স্মৃতি। সে স্মৃতি শুধু অনুভবের জন্য, লেখার জন্য নয়। তাছাড়া অনেক দিন হয়ে গেছে। প্রতিটি দিনের প্রতিটি মুহূর্তের ইতিহাস মনে নেই। মনে আছে-

হঠাৎ ঘুমটা ভেঙে গেল। কিসের যেন আওয়াজ ভেসে এলো কানে। প্রথমে ঠিক বুঝতে পারি না। পরে বুঝলাম মেমসাহেব দরজা নক করে ডাকছে, 'শোন।' সেই ময়না পাখির ডাক, 'শোন।'

আমি শুনি কিন্তু জবাব দিই না। বেশ লাগে ঐ ডাকটা। কেমন যে আদর-ভালবাসা, আবেদন-নিবেদন, দাবি ইত্যাদি-ইত্যাদি কক্টেল থাকত ঐ ডাকে। তাই তো আমি ভগ্নামি করে ঘুমের ভান করে শুয়ে থাকি। বেশ বুঝতে পারছি ঘুমুবার সময় একলাই ঘুমিয়েছে কিন্তু আর পারছে না। এবার একটু ছুটে আসতে চাইছে আমার কাছে। হয়ত একটু আদর করতে চায়, হয়ত একটু আদর পেতে চায়, হয়ত আমার পাশে শুয়ে আমার হৃদয়ের একটু নিবিড় উষ্ণতা উপভোগ করতে চায়। হয়ত.....

আবার দরজা আওয়াজ! সঙ্গে সঙ্গে..... 'শোন'..... 'শুনছ?'

আমি চীৎকার করে জবাব দিই, 'কে?'

'আমি। দরজা...'

বেশ জড়িয়ে জড়িয়ে উত্তর দিলাম, 'খুলছি।'

একটু পরে গায়ে চামরটা জড়িয়ে চোখ দুটো প্রায় বন্ধ করা অবস্থা দরজাটা খুলে দিলাম। চোখ

দুটো বন্ধ করা অবস্থাতেই আবার এসে ঝপাং করে খাটের ওপর গুয়ে পড়লাম।

মেমসাহেব দরজার পর্দাটা বেশ ভাল করে টেনে দিয়ে আমার দিকে এগিয়ে আসতে আসতে বললো, 'বাগরে বাগ! কি ঘুম ঘুমুতে পার তুমি!'

আমি ঘুমের ভান করে গুয়ে থাকায় উত্তর দিলাম না। দেখলাম মেমসাহেব আন্তে আন্তে আমার কাছে এগিয়ে এলো। আমার চোখ দুটো বন্ধ ছিল কিন্তু ওর নিশ্বাস পড়া দেখে বেশ বুঝতে পারছিলাম যে কত নিবিড় হয়ে আমাকে দেখছিল। মুখে, কপালে হাত দিয়ে আদর করতে করতে জিজ্ঞাসা করল, 'ঘুমুচ্ছ?'

আমি তবুও নিরন্তর রইলাম। সজোরে একটা দীর্ঘশ্বাস ছেড়ে পাশ ফিরে গুলাম। মেমসাহেব আমার পাশে বসে বসে অনেকক্ষণ আমাকে আদর করল। আমি আবার একটা দীর্ঘনিশ্বাস ছেড়ে পাশ ফিরে ডান হাত দিয়ে মেমসাহেবকে জড়িয়ে ধরলাম। একটু অস্পষ্টভাবে ডাক দিলাম, 'মেমসাহেব।'
'এই তো।'

আমি আর কোন কথা বলি না।

মেমসাহেব বলে, 'তনছ? কিছু বলবে?'

আমি তবু কোন জবাব দিই না।

এমনি করে আরো কিছুক্ষণ কেটে যায়। তারপর মেমসাহেব একটু অভিমান করে বলে, 'তুমি কি জাগবে না? উঠবে না?'

আমি হঠাৎ চোখ দুটো খুলে স্বাভাবিকভাবে বলি, 'জাগব কিন্তু উঠব না।'

মেমসাহেব আমার গালে একটা চড় মেরে বলে, 'অসভ্য কোথাকার! জেগে থেকেও কথার উত্তর দেয় না।'

আমি শুধু বলি, 'আমি জেগে আছি জানলে কি অমন করে তুমি আমাকে আদর করত?'

'আবার অসভ্যতা!'

আমি আন্তে আন্তে মেমসাহেবকে কাছে আনি, বুকের মধ্যে টেনে নিই। একটু আদর করি, একটু ভালবাসি মেমসাহেবকে একটু দেখে নিই। আদর-ভালবাসায় ওর চোখ দুটো যেন আরো উজ্জ্বল হয়, গাল দুটো যেন আরো একটু ফুলে ওঠে, চোঁট দুটো যেন কথা বলে।

তারপর? বলতে পার দোলাবৌদি, তারপর কি হলো? দুইমি? হ্যাঁ, একটু করেছিলাম। বেশি নয়। শুধু ওর দুটি ওঠের ভাষা, ইঙ্গিত জেনেছিলাম, আর কিছু নয়। মেমসাহেব মুখে কিছু বলে নি। চোখ বুজে মুখ টিপে হাসছিল।

তারপর?

তারপর মেমসাহেব আমাকে জিজ্ঞাসা করল, 'গান শুনবে?'

আমি বললাম, 'না।'

'বেশ করব আমি গান গাইব, তোমায় শুনতে হবে না।'

মেমসাহেব ঘুরে বসল। কনুই-এর ভর দিয়ে হাতের উপর মুখটা রেখে প্রায় আমার মুখের উপর হুড়ি খেয়ে পড়ল। তারপর খুব আন্তে আন্তে গাইল—'মন যে কেমন করে মনে মনে, তাহা মনই জানে।'

এমনি করেই শুরু হতো আমাদের সকাল। স্নান সেরে নটার মধ্যে ডাইনিং হলে গিয়ে মেমসাহেব ব্রেকফাস্ট খেয়ে আসত কিন্তু আমি তখনও উঠতাম না। ডাইনিং হল থেকে ফিরে এসে মেমসাহেব আমাকে একটা দাবড় দিত, 'ছি, ছি, তুমি এখনও ওঠ নি?'

'একবার কাছে এস, তবে উঠব।'

একটু দূরে দাঁড়িয়ে মেমসাহেব বলে, 'না, আমি আর কাছে আসব না।'

'কেন?'

'কাছে গেলেই তুমি—'

মেমসাহেব আর বলে না। আমিই জিজ্ঞাসা করি, 'তুমি কি?' 'কি আবার? কাছে গেলেই তো আবার দুইমি করবে।'

'তাতে কি হলো?'

ঐ টানা টানা জু দুটো উপরে উঠিয়ে ও বলে, 'কি হলো? তোমার ঐ দাড়ির খোঁচা খেয়ে আমার সারা মুখটা এখনো জ্বলে যাচ্ছে।'

আমি তিড়িং করে এক লাফে বিছানা ছেড়ে উঠে পড়ে মেমসাহেবকে দু'হাতে দিয়ে জড়িয়ে ধরি। বলি, 'জ্বলে যাচ্ছে?'

'তবে কি!'

'বিষ দিয়ে বিষক্রয় করে দিচ্ছি?'

'তুমি আবার অসভ্যতা?'

'আমি বাথরুম থেকে বেরতে বেরতেই মেমসাহেব আমার ব্রেকফাস্ট নিয়ে আসে। আমি বলি, 'কি আশ্চর্য? একটা বেয়ান বসতে পারলে না?'

'আজ্ঞে, বেয়ান চাকর নয়। ন'টার পর ওরা ব্রেকফাস্ট সার্ভ করে না।'

'তাই বলে তুমি? যাক দেখল, তারা কি ভাবল বল তো?'

ট্রে-টা নামিয়ে রেখে টোপে মাখন মাখাতে মাখাতে বললো, 'ভাবব আমার কপালে একটা অপদার্থ কুঁড়ে জুটেছে।'

বল দোলাবৌদি, এ কথার কি জবাব দেব? আমি জবাব দিতাম না। চুপটি করে ব্রেকফাস্ট খেয়ে নিতাম।

তারপর বারান্দায় দুটো সোফায় বসে আমরা গল্প করতাম কিছুক্ষণ। কিছুক্ষণের জন্য একটু ঘুরেফিরেও আসতাম। দুপুরবেলা লাঞ্চ খাবার পর মেমসাহেব জিজ্ঞাসা করত, 'এখন একটু ঘুমোও।'

'কেন আজকে কি রাত্রি জাগবে?'

আবার সেই গালে একটা চড়। আবার সেই মন্তব্য, অসভ্য কোথাকার!

দুপুরে ঘুমুতাম না। শুয়ে থাকতাম। আমার হাতটা ভুল করে একটু অবাধ্যতা করলে মেমসাহেব বলত, দয়া করে তোমার হাতটাকে একটু সংযত কর।

'কেন? আমি কি না বলিয়া পরের দ্রব্যে হাত দিতেছি?'

'পরের দ্রব্য না হইলেও আমি এখনও আপনার দ্রব্য হই নাই বলিয়া আপনি হাত দিবেন না।'

আমি চট করে উঠে পড়ে গায়ে জামাটা চাপিয়ে বেরতে যাই। মেমসাহেব জানতে চায়, 'কোথায় যাচ্ছে?'

'বাজারে।'

'কেন?'

'মালা কিনতে, টোপর কিনতে।'

মেমসাহেব হাসতে হাসতে আমাকে জড়িয়ে ধরে বলে, 'তাই বলে এই দুপুরে যেও না।'

আমাকে টেনে এনে বিছানায় শুইয়ে দেয়। আমার পাশে কাত হয়ে শুয়ে শুয়ে বলে, এখনই যদি আমার জন্য এত পাগলামি কর, তবে ভবিষ্যতে কি করবে?'

'দেখ মেমসাহেব, বেশনের হিসাব মত চাল-গম বিক্রি করা চলতে পারে কিন্তু ভালবাসা চলতে পারে না।'

আমার কথা শুনে ও মুচকি মুচকি হাসে।

জান দোলাবৌদি, সমাজ-সংসার থেকে ক'টি দিনের জন্য আমরা দূরে চলে গিয়েছিলাম। ইচ্ছা করলে মুক্ত বিহঙ্গের মত সন্ধ্যার মহাকাশে আমরা উড়ে বেড়াতে পারতাম কিন্তু তা করি নি। মেমসাহেবকে অত কাছে পেয়ে, নিবিড় করে পেয়ে, স্বাধীনভাবে পেয়ে মাঝে মাঝে আমার চিন্তা চঞ্চল হয়েছে, শিরার মধ্যে দিয়ে উত্তেজনার বন্যা বয়ে গেছে, ন্যায়-অন্যায়ের সূক্ষ্ম বিচারবুদ্ধি কখনও কখনও হারিয়ে গেছে কিন্তু তবুও শাস্ত-স্নিগ্ধ ভালবাসার ছোঁয়ায় মেমসাহেব আমাকে সংযত করে রেখেছে। প্রথম ক'দিন শুকে কাছে পাবার সময় ওর এই সংযম, সংযত আচরণ আমাকে মুগ্ধ করেছিল। আমি হয়ত ওকে শ্রদ্ধাও করতে আরম্ভ করেছিলাম।

ভবিষ্যতের জন্য আমরা অনেক কিছু গচ্ছিত রাখলেও এই ক'টি দিনে অনেক কিছু পেয়েছিলাম। দেহের ক্ষুধা মিটাই নি কিন্তু চোখের তৃষ্ণা, প্রাণের হাহাকার, মনের দৈন্য দূর হয়েছিল। আর? আর দূর হয়েছিল চিন্তাচঞ্চল্য ও মানসিক অস্থিরতা। আমার চোখের সামনে একটা সুন্দর শান্ত ভবিষ্যৎ

জীবনের ছবি ফুটে উঠেছিল।

আর মেমসাহেব? আমার অনেক দুর্বলতার মধ্যেও মেমসাহেব আমার ভালবাসার গভীরতা উপলব্ধি করেছিল। অন্ধের যষ্টির মত আমার জীবনে তার অনন্য গুরুত্ব ও প্রয়োজনীয়তা নিশ্চয়ই বুঝতে পেরেছিল। শিক্ষিতাই হোক আর সুন্দরীই হোক, গরিব হোক বা ধনী হোক, মেয়েদের জীবনে এর চাইতে বড় পাওয়া আর কি হতে পারে?

তাই তো হাসি, খেলা, গান ও রাত্রি জাগরণের মধ্যে দিয়েও আমরা ভবিষ্যতের রাস্তা ঠিক করে নিয়েছিলাম। দু'জনে মিলে প্রতিজ্ঞা করেছিলাম, শুধু কিছু হাসি আর খেলা করে জীবনটাকে নষ্ট করব না।

কলকাতায় ফেরার আগেই দিন রাত্রিতে মেমসাহেব সেই আমার দেওয়া শাড়িটা পরেছিল। তারপর মাথায় কাপড় দিয়ে গলায় আঁচল জড়িয়ে আমাকে প্রণাম করেছিল। সেদিন আমার জীবন-উৎসবের পরম মুহূর্তে কোন পুরোহিত মন্ত্র পড়েন নি, কোন কুলবধু শীখ বাজান নি, আত্মীয়-বন্ধু সাক্ষী রেখে মালা বদল করি নি কিন্তু তবুও আমরা দু'জনে জেনেছিলাম আমাদের দুটি জীবনের গ্রন্থিতে অচ্ছেদ্য বন্ধন পড়ল।

নয়

তোমার চিঠি পেয়েছি। একবার নয়, অনেকবার পড়েছি। তুমি হয়ত আমার মনের খবর ঠিকই পেয়েছ। কিন্তু আমার মনে অনেক দুঃখ থাকলেও আক্ষেপ নেই, বেদনা থাকলেও ব্যর্থতার গ্লানি নেই। তার দীর্ঘ কারণ আজ বলব না, হয়ত তুমিও বুঝবে না। আমার এই কাহিনী যখন লেখা শেষ হবে, সেদিন আশা করি সবকিছু দিনের আলোর মত স্পষ্ট হবে।

তবে হ্যাঁ, আজ এইটুকু জেনে রাখ আমি জীবনে যে প্রেম-ভালবাসার ঐশ্বর্য পেয়েছি, তার তুলনা হয় না। হয়ত আরো অনেকে এই ঐশ্বর্য পেয়েছেন। তাঁর সঙ্গে আমার ঐশ্বর্যের কোন তুলনা করার মাপকাঠি আমার জানা নেই, প্রয়োজনও নেই। তবে এইটুকু নিশ্চয়ই জানি আমি পূর্ণ পরিপূর্ণ হয়েছি। আর জানি আমার ঐশ্বর্যের সঙ্গে পৃথিবীর কোন ধনীর কোন ঐশ্বর্যের তুলনা হয় না। ধনী একদিন সমস্ত কিছু হারিয়ে দরিদ্র, ডিখারী হতে পারে, সে ঐশ্বর্যের হস্তান্তর হতে পারে, অপব্যয়, অপব্যবহার হতে পারে কিন্তু আমার প্রাণ-মনের এই অতুলনীয় সম্পদ হারাতে পারে না, হারাতে পারে না। যতদিন আমি এই পৃথিবীতে থাকব, ততদিন ঐ ঘন কালো টানা টানা গভীর দুটি চোখ আমার জীবন-আকাশে প্রবলতার মত উজ্জ্বল ডায়ের হয়ে থাকবে। এই পৃথিবীর পঞ্চভূতের মাটিতে একদিন আমি মিশে যাব, আমার সমস্ত খেলা একদিন শুষ্ক হয়ে যাবে, সবার কাছ থেকে আমি চিরতরে হারিয়ে যাব, কিন্তু আমার মেমসাহেব কোনদিন হারিয়ে যাবে না। আমার এই চিঠিগুলি যতদিন থাকবে মেমসাহেবও ততদিন থাকবে। তারপর সে রইবে তোমার ও আরো অনেক অনেকের স্মৃতিতে। তারপরও ভারতবর্ষের অনেক শহরে-নগরে-গ্রামে গেলে মেমসাহেবের স্মৃতির স্পর্শ পাওয়া যাবে। উত্তরবঙ্গের বনানীতে, বোম্বাই-এর সমুদ্রসৈকতে, বরফে-ঢাকা গুলমার্গের আশেপাশে নিস্তব্ধ রাত্রে কান পাতলে হয়ত মেমসাহেবের গান আরো অনেকদিন শোনা যাবে।

দোলাবৌদি, তোমাকে আমি বোঝাতে পারব না, লিখতে পারব না, আমার মেমসাহেবের সবকিছু। জানাতে পারব না আমার মনের ভাব, ভাষা, অনুভূতি। পৃথিবীর কত দেশদেশান্তর ঘুরেছি, কত অসংখ্য উৎসবে কত অগনিত মেয়ে দেখেছি, তাঁদের অনেকেকে কাছে পেয়েছি, নিবিড় করে দেখেছি। কতজনকে ভালও লেগেছে। কিন্তু একজনকেও পেলাম না যে আমার কাছে আমার মেমসাহেবের স্মৃতি স্নান করে দিতে পারে।

তুমি তো জান, আমি বাছ-বিচার না করেই সবার সঙ্গে মেলামেশা করি। সমাজ-সংসারের নিয়মকানুনের তোয়াক্কা না করেই মিশেছি অনেক মেয়ের সঙ্গে। রক্তকরবীর মত তাঁদের অনেকেই আমার দৃষ্টি আকর্ষণ করেছেন। অনেকের রূপ-লাবণ্য আমাকে মুগ্ধ করেছে, শিক্ষা-দীক্ষা-আদর্শ ভাল লেগেছে কিন্তু মুহূর্তের জন্যও আমার প্রাণের মন্দিরে নতুন কিছাই প্রতিষ্ঠানরা স্থপ্ন দেখি নি। হেসেছি-খেলেছি ঘুরেছিও অনেক মেয়ের সঙ্গে। আমার এই হাসি-খেলা নিয়ে তুমি হয়ত অনেকের কাছে অনেক কাহিনী শুনবে। দিল্লী ইউনিভার্সিটির বনানী রায়কে নিয়ে আজও ডিফেন্স কলোনীর অনেক

ড্রইংরুমে আমার অসাক্ষাতে সরস আলোচনা হয়, আমি তা জানি। আমি জানি, আমাদের মন্ডন হাই কমিশনের থার্ড সেক্রেটারি অতসীকে নিয়ে আমার ব্রাইটন ভ্রমণকে কেন্দ্র করে অনেক আরব্য উপন্যাসের কাহিনী বিলেত থেকে কলকাতার কপি হাউস পর্যন্ত গড়িয়েছে।

আমি কি করব বল? আমাদের দেশের সমাজ ব্যবস্থাই যে স্বামী-স্ত্রীর একটু স্বাধীন আচরণ আজও বহুজনে বরদাস্ত করতে পারেন না। সমাজ অনেক এগিয়েছে। সারা পৃথিবীর বৃহত্তর সমাজের সঙ্গে আমরা অনেকেই মেলামেশা করেছি কিন্তু রক্তের মধ্যে আজও অতীত দিনের সংস্কারের বীজ রয়ে গেছে। তাই তো ডাটপাড়ার কুপমণ্ডুক সমাজ থেকে হাজার মাইল দূরে বসেও দিল্লীর সফিসটিকেটেড বাঙালী গৃহিনীরা বনানীকে দুর্গা পূজার প্যাভেলে দেখলে আলোচনা না করে থাকতে পারেন না।

একটু কান পাতলে শোনা যাবে মিসেস দত্ত বলাছেন, 'এই চন্দ্রিমা দ্যাখ দ্যাখ বনানী এসেছে।'

'কই? কই?'

'ঐ তো।'

একলা?'

'তাই তো দেখছি।'

চন্দ্রিমা একটু এদিক-ওদিক দেখে বলে, 'এ তো সাদা হেরল্ড। রিপোর্টার সাহেব নিশ্চয়ই এসেছে।'

'অনেক্ষণ দেখেছি।'

বনানী এগিয়ে যত্নে প্রতিমার দিকে। হাত জোড় করে প্রণাম করে। ইতিমধ্যে আমি পাশে এসে দাঁড়াই। বনানী গাড়িতে পা রেখে এসেছে; আমার কাছ থেকে একটা টাকা চেয়ে প্রণামী দেয়।

বলাকা, চন্দ্রিমা নিজে আরো অনেকে তা দেখেন। আরো অনেক নবীন প্রবীণা দেখেন আমাদের।

বলাকা বলে, 'যাই বলিস ভাই, দু'জনকে বেশ ম্যাচ করে কিন্তু।'

মিসেস দত্ত বলেন, 'ম্যাচ করলে কি হবে! ওরা তো আর বিয়ে করছে না, শুধু খেলা করছে।'

চন্দ্রিমা বলে, 'না, না। নিশ্চয়ই বিয়ে করবে। তা না হলে দু'জনে মিলে এমনি করে ঘোরাঘুরি করে।'

আমরা দু'জনে প্যাভেল থেকে বেরবার জন্য এগিয়ে চলি। বনানীর সাইড-ভিউ বোধহয় বলাকার দৃষ্টি এড়াতে পারে না। তাই তো চন্দ্রিমাকে ফিসফিস করে বলে, 'যাই বলিস, শী হ্যাজ এ ভেরী অ্যাট্রাকটিভ ফিগার।'

বনানীর প্রশংসায় মিসেস দত্ত মুহূর্তের জন্য নিজের সম্পর্কে সচেতন হয়ে পড়েন। শাড়ির আঁচলটা আর একটু বেশি নিবিড় করে জড়িয়ে নেন। মনে মনে বোধহয় একটু ঈর্ষাও দেখা দেয়। তাইতো বনানীকে ছোট করার জন্য একটু বেশি মর্যাদা দেন। বলেন, 'রিপোর্টারও তো কম হ্যান্ডসাম নয়।'

দূরে এক পুরোনো বন্ধুকে দেখে বনানী নজর না করেই ডান দিকে ঘুরতে গিয়ে এক ভদ্রলোককে প্রায় ধাক্কা দিতে গিয়েছিল। আমি ওর হাত ধরে চট করে টেনে নিলাম।

বনানী শুধু বললো, 'থ্যাঙ্কস।'

সানগ্যাসের মধ্যে দিয়ে দৃষ্টিটা একটু ঐ কোনার দিকে নিতেই বেশ বুঝতে পারলাম বনানীর হাত ধরার জন্যে অনেকের হার্ট অ্যাটাক হতে হতে হয়নি।

এসব আমি জানি। কি করি বল? সবার সঙ্গে আমি মিশতে পারি না। কিন্তু যাদের সঙ্গে মেলামেশা করি তাদের সবার সঙ্গেই এমনি সহজ সরল, স্বাভাবিকভাবেই মিশে থাকি। বনানী অতসী ও আরো অনেকেই একথা জানে। মেমসাহেব তো জানেই।

এই যে অতসী! যারা জানেন তা তাঁর কত কি কল্পনা করেন আমাদের দু'জনকে নিয়ে।

তুমি কি অতসীর কথা শুনেছ? ও যে জাস্টিস রায়ের একমাত্র কন্যা সে কথা নিশ্চয়ই জান। তারপর ওর মা হচ্ছেন অভ্যর্থনায়, আইরিশ মহিলা। নৃতরাং সংস্কারের বলাই নেই, নেই অর্থের অভাব। লেখাপড়া শিখেছে পাবলিক স্কুলে, পরে বি.এ. পাস করেছে অক্সফোর্ড থেকে। এখন তো

করেন সার্ভিসে।

অতসী যখন অক্সফোর্ডে পড়ে তখনই আমার সঙ্গে গুর প্রথম পরিচয়। তার পরের বছর ও যখন দেশে ফেরে, তখন আমিও ইউরোপ ঘুরে দেশে ফিরেছি। একই প্লেনে দু'জনে লন্ডন থেকে রওনা হই। পথে দু'দিন বেইরুটে ছিলাম।

সেই দুটি দিন আমরা প্রাণভরে আড্ডা দিয়েছি। দিনের বেলায় বীচ্-এ বসে সন্ধ্যার পর সেন্ট জর্জ হোটেলের বার বা লাউঞ্জ বসে একটু-আধটু ফ্রেঞ্চ ওয়াইন খেতে খেতে গল্প করেছি। দিল্লী রওনা হবার ঠিক আগের দিন গভীর রাতে অতসীর মাথায় ভূত চাপল। বললো, 'চলুন, নাইট ক্লাবে ঘুরে আসি।'

'এত রাতে?'

'হোয়াটস্ রঙ ইন দ্যাট?'

'কাল সকালেই তো আবার রওনা হতে হবে। তাই আর কি!'

'নাইট ক্লাবগুলো তো গভর্ণমেন্ট অব ইন্ডিয়া'র অফিস নয় যে দশটা-পাঁচটায় খোলা নাইট ক্লাব তো রাতেই খোলা থাকে।'

অতসী আর একটি মুহূর্তও নষ্ট করতে রাজী নয়—বলে, 'কাম অন। ফিনিশ ইওর গ্রাস।'

চক্ষের নিমেষে বাকি শ্যাম্পেনটুকু গলা দিয়ে ঢেলে দিল অস্তরের অজানা গহ্বরে। ইচ্ছা ছিল না, কিন্তু বাধ্য হয়ে আমিও শেষ করে উঠলাম। চলে গেলাম 'ব্ল্যাক এলিক্যান্ট'!

পালামে মেমসাহেব এসেছিল আমাদের রিসিভ করতে। অতসী ওকে কি বলেছিল জান? বলেছিল, 'টোন্টিয়েথ সেঞ্চুরির একজন জার্নালিস্ট যে এত কনজারভেটিভ হয়, তা আমি ভাবতে পারি নি।'

মেমসাহেব একটু হাসতে হাসতে জিজ্ঞাসা করল, 'কেন কি হয়েছিল?'

'মাই গড! কি হয় নি তা জিজ্ঞাসা কর। অতসী রায়ে'র ইনভিটেশনে নাইট ক্লাবে যেতে চায় না!'

মেমসাহেব হাসতে হাসতে একবার আমাকে দেখে নেয়। অতসী বলে, 'তুমি আর হাসবে না! যে অতসী রায়ে'র সঙ্গে লন্ডনের ছোকরা ব্যারিস্টাররা এক কাপ কফি খেতে পেলে ধন্য হয়; সেই আমার সঙ্গে বেইরুটের 'ব্ল্যাক এলিক্যান্টে' বসে শ্যাম্পেন খেতে বিধা করে তোমার এই অপদার্থ প্রসপেকটিভ পার্টিয়ান!'

মেমসাহেব বাঁকা চোখে একঝলক আমাকে দেখে নিয়ে বলে, 'আই অ্যাম সুরি অতসী। আই প্রীড গিস্টি.....'

মেমসাহেবের গাল টিপে দিয়ে অতসী বলে, 'অত ভালোবেসো না। ছোকরাটার মাথাটা খেলে।'

যাই হোক সেবার ঢাকা থেকে লন্ডন যাবার পথে প্রথমে কলকাতা পরে দিল্লী এলো। কলকাতা থেকে সে যে মেমসাহেবকে নিয়ে এসেছে তা জানতাম না। দিল্লী আসার খবরটাও আগে পাই নি। হঠাৎ একদিন সকালবেলায় অতসীর টেলিফোন পেয়ে চমকে গেলাম।

'কি আশ্চর্য! আসার আগে একটা খবর দিলে না?'

অতসী দুঃখ প্রকাশ করে, 'কমা চায়। শেষে একবার জরুরি কারণে তক্ষুনি হোটেল তলব করে।'

আমি কয়েক মিনিটের মধ্যে 'ক্লারিজে' হাজির হই। দোতলায় উঠে করিডোর দিয়ে একেবারে কোণার দিকে চলে যাই। দরজা নক্ করি।

কোন জবাব পেলাম না। আবার নক্ করলাম।

এবার উত্তর পাই, 'জাস্ট এ মিনিট।'

দু' এক মিনিটের মধ্যেই অতসী দরজা খুলে অভ্যর্থনা করে। আদর করে ভিতরে নিয়ে যায়।

'কি ব্যাপার? এবার যে একটা খবর দিলে না?'

বিলম্বিত মি. ইট অল হ্যাপেন্‌ড্ সাডেনলী। তাছাড়া কলকাতা থেকে বুকিং করতেই বড় ব্যামেলা পোহাতে হলো।

'ক'দিন কলকাতায় ছিলো?'

'তিন দিন।'

‘ভিউ ইউ মীট মেমসাহেব?’

‘মাই গড! মেমসাহেব ছাড়া কি কোন চিন্তা নেই আপনার মনে? নিশ্চয়ই আছে। তবে আপটার মেমসাহেব।’

হাত দিয়ে আমার মুখটা নিজের দিকে ঘুরিয়ে নিয়ে অতসী জানতে চায়, ‘আমিও তাই?’

‘তুমি তো অন্য ক্যাটাগরির।’

অতসী কেমন যেন একটা অদ্ভুত দৃষ্টিতে আমার দিকে তাকায়। বলে, ‘কেন, আমি কি আপনার মেমসাহেবের জায়গায়—’

আমি সোফা ছেড়ে উঠে দাঁড়াই। শুধু বলি, ‘অতসী, আমার অনেক কাজ আছে। এখন চলি, পরে দেখা হবে।’

অতসী সঙ্গে সঙ্গে উঠে দাঁড়ায়। দু’হাত দিয়ে আমার দুটো হাত চেপে ধরে। বলে, ‘না, তা হবে না। আপনি এখন আমার কাছেই থাকবেন।’

আমি অবাক হয়ে যাই। ভেবে কুলকিনারা পাই না অতসীর এই বিচিত্র পরিবর্তনের কারণ। মুহূর্তের মধ্যে নারী-চরিত্রের বিচিত্র ধারার নানা সম্ভাবনার কথা চিন্তা করে নিলাম। ভাবলাম, মনের টান না দেহের দাবি? বড়লোকের মনের খামখেয়ালি নাকি....

অতসীকে নিয়ে আমার অতশত চিন্তা করার প্রয়োজনীয়তা বোধ করলাম না। যা ইচ্ছে তাই হোক। আমি ফালতো কামেলায় জড়িয়ে না পড়লেই হলো

আরো একটি চিন্তা করি ডিপ্লোম্যাট হয়ে ডিপ্লোম্যাসি করছে না তো?

আমি বললাম, ‘অতসী, ঘোড়ার গাড়ির একটা কোচোয়ানের হাতে ইম্পালা দিয়ে খেলা করতে তোমার ভয় হচ্ছে না?’

‘ওসব হেঁয়ালি ছাড়ুন। আমি অ্যাম ফিলিং লোনলি, উড ইউ গিভ মী কোম্পানী অর নট?’

‘হোয়াই নট হ্যাভ বেটার কোম্পানী?’

‘আমার খুশী।’

‘কিন্তু আমার তো খুশী নাও হতে পারে?’

একঝলক অতসীকে দেখে নিলাম। দু’হাত দিয়ে অতসীর ডান হাতটা টেনে নিয়ে হ্যান্ডসেক করে বললাম, ‘গুড বাই।’

আমি ঝড়ের বেগে ঘর থেকে বেরিয়ে করিডোর দিয়ে হনহন করে এগিয়ে যাচ্ছিলাম সিঁড়ির দিকে। হঠাৎ পিছন থেকে কানে ভেসে এলো, ‘শোন।’

থমকে দাঁড়ালাম কিন্তু স্বপ্ন ভেঙে যাবার ভয়ে পিছন ফিরলাম না। মনের ভুল?

‘শোন।’

আমার জীবন-রাগিনীর সুরকারের ঐ কণ্ঠস্বর দ্বিতীয়বার শোনার পর আর নিজেকে সংযত রাখতে পারলাম না। পিছন ফিরলাম।

কি আশ্চর্য! মেমসাহেব!

অতসীর ঘরের দরজার সামনে দাঁড়িয়ে মুচকি হাসতে হাসতে মেমসাহেব ডাক দিল, ‘এই শোন।.....’

আমি প্রায় দৌড়ে গেলাম। মেমসাহেব আমাকে অভ্যর্থনা করার জন্য স্থির হয়ে দাঁড়িয়েই রইল। আমি অবাক বিশ্বয়ে বললাম, ‘তুমি!’

সেই শান্ত স্নিদ্ধ, মিষ্টি গলায় মেমসাহেব বললো, ‘কি করব বল, অতসী জোর করে নিয়ে এলো।’

তুমি বেশ কল্পনা করতে পারছ তারপর ক্লারিঞ্জ হোটেলের ঐ কোনার ঘরে কি কাণ্ড হলো! প্রথম আনন্দে ও কৃতজ্ঞতায় আমি অতসীকে জড়িয়ে ধরে বললাম, ‘টেল মী অতসী, হোয়াট ক্যান আই ডু ফর ইউ?’

অতসী বললো, ‘বেশি কিছু চাইব না। শুধু অনুরোধ করব, আগামী সাত দিন এদিকে এসে দুটি যুবতীকে বিরক্ত করবেন না।’

‘প্রতিজ্ঞা করছি বিরক্ত করব না, তবে তোমাদের আনন্দ দেবার জন্য সুখী করবার জন্য নিশ্চয়ই আসব।’

মেমসাহেব টিপ্পনী কেটে বললো, 'অতসী ওসব কল্পনাও করিস না। পুরুষদের যদি অত সংযম থাকত তাহলে পৃথিবীটা সত্যি পাশ্টে যেত।'

আমি মেমসাহেবকে বলি, 'বিশ্বমিত্রের মত কাজকর্ম নিয়ে আমি তো বেশ ধ্যানমগ্ন ছিলাম কিন্তু তুমি মেনকা দেবী এক হাজার মাইল দূরে নাচতে এলে কেন?'

তারপর ঐ ঘরে বসেই তিনজনে ব্রেকফাস্ট খাচ্ছিলাম। মেমসাহেব বললো, 'জান, অতসীর সঙ্গে আমার কি বাজি হয়েছে?'

'কি?'

অতসী বলে, 'না, না, কিছু না।'

আমি বলি, 'শাক মেমসাহেব, এখন বলো না। অতসী ঘাবড়ে গেছে।'

অতসী কফির পেয়ালা নামিয়ে রেখে বললো, 'তাহলে আমিই বলি শুনুন, বাজী হয়েছিল যে আমি যদি আপনাকে ভোলাতে পারি তাহলে কাজলদি আমাকে একটা শাড়ি প্রেজেন্ট করবে। আর আমি হেরে গেলে আমি কাজলদিকে একটা শাড়ি প্রেজেন্ট করব।'

এতক্ষণে বুঝলাম অতসী কেন আমার সঙ্গে অভিনয় করেছিল।

আমি বললাম, 'অতসী তোমার কাজলদিকে তোমার শাড়ি কিনে দিতে হবে না। তুমি যে তোমার কাজলদিকে টেনে আনতে পেরেছ, সে জন্য তুমিই তো প্রথমে শাড়ি পাবে।'

আমি দু'জনকেই শাড়ি কিনে দিয়েছিলাম। দু'জনেই খুশী হয়েছিল। আমিও খুশী হয়েছিলাম। একটা সন্ধ্যা যেন স্বপ্নের মধ্যে দিয়ে কেটে গেল।

অতসী আমাদের দু'জনকে সত্যিই ভালবাসে। ও মেমসাহেবকে কাজলদি বলে কেন, জান? অতসী বলত, মেমসাহেবের চোখ দুটিতে স্বয়ং ডগবান সযস্তে কাজল মাখিয়ে দিয়েছেন। সেইজন্যই অতসী মেমসাহেবকে কাজলদি বলত। ভারী চমৎকার নাম, তাই না? যাই হোক এদের আমি ভালবাসি, আমি এদের কল্যাণ কামনা করি। ওরাও আমার মঙ্গল কামনা করে। আমি ওদের প্রতি কৃতজ্ঞ কিন্তু মেমসাহেবের স্মৃতিকে ম্লান করতে পারে না কেউ। পারবে কেন বল? আমার ভবিষ্যতের জন্য মেমসাহেব যে মূলধন বিনিয়োগ করেছিল, তার কি কোন তুলনা হয়? হয় না।

তাছাড়া আরো একটা ব্যাপার আছে। আমার জীবনের সেই অমাবস্যার রাতে শুধু মেমসাহেবই এসেছিল আমার পাশে। প্রেম দিয়েছিল, ভালবাসা দিয়েছিল, অভয় দিয়েছিল আমাকে। নিজের প্রাণের প্রদীপের মঙ্গল-আলো দিয়ে আমাকে তিমির রাত্রি থেকে প্রভাতের দ্বারদেশে এনে দিয়েছে আমার সেই মেমসাহেব। তাই তো তার সে স্মৃতিকে ম্লান করার ক্ষমতা শত সহস্র বনানী বা অতসীর নেই। সেবার বাইরে থেকে ঘুরে আসার পর মেমসাহেব আমাকে বললো, 'তোমার কাজকর্ম সম্পর্কে নতুন কিছু ভাব নি?'

'ভেবেছি বৈকি।'

'কি ভেবেছ?'

'ভেবেছি যে, কলকাতার মাল্লা কাটিয়ে একটু বাইরে চেষ্টা করব।'

'তবে করছ না কেন?'

'কিছু অসুবিধা আছে বলে।'

মেমসাহেব ছাড়ার পাত্রী নয়। তাছাড়া আমার জীবন সম্পর্কে উদাসীন থাকা আজ আর তার পক্ষে সম্ভব নয়। তাইতো একদিন অপ্রত্যাশিতভাবে মেমসাহেব আমার হাতে দু'শো টাকা গুঁজে দিয়ে বললো, 'একবার দিল্লী বা বোম্বে থেকে ঘুরে এসো। হয়ত একটা কিছু জুটেও যেতে পারে।'

প্রথমে টাকাটা নিতে বেশ সঙ্কোচ বোধ হচ্ছিল কিন্তু শেষ পর্যন্ত নিয়েছিলাম। কারণ আমি জানতাম আমার কল্যাণই ওর কল্যাণ। সুতরাং আমার জন্য শুধু দু'শো টাকা কেন, আরো অনেক কিছু সে হাসিমুখে দিতে পারে। তাছাড়া আমার কল্যাণযজ্ঞে তার আহুতি প্রত্যাখ্যান করার সাহস আমার ছিল না। তবুও টাকাটা হাতে করে বেশ কিছুক্ষণ বসে রইলাম। কিছুক্ষণ পরে মেমসাহেব জিজ্ঞাসা করল, 'কি ভাবছ?'

'না, কিছু না।'

'তবে এমন চূপ করে রইলে?'

‘এমনি।’

মেমসাহেব আমার হাতটা টেনে নিয়ে একটু নাড়াচাড়া করে বললো, ‘আমি বলব, তুমি কি ভাবছ।’

‘বল’

‘সত্যি বলব?’

‘নিশ্চয়ই।’

‘আমার টাকা নিতে তোমার লজ্জা করছে, অপমানবোধ হচ্ছে। তাই না?’

‘না, না, তা কেন হবে।’ আমি উড়িয়ে দেবার চেষ্টা করি।

মেয়েদের মন আমাদের চাইতে অনেক সতর্ক, অনেক হুঁশিয়ার। মেমসাহেব বলে, ‘স্বীকার করতে লজ্জা করছে?’

আমি কোন উত্তর দিই না, চুপ করে বসে থাকি। মেমসাহেবও অনেকক্ষণ চুপ করে থাকে। বেশ কিছুক্ষণ গেল।

মেমসাহেব আবার শুরু করে, ‘তুমি এখনও আমাকে ঠিক আপন বলে ভাবতে পার না, তাই না? আমি তাড়াতাড়ি মেমসাহেবের কাছে এগিয়ে যাই। ওর মাথায় হাত বুলাতে বুলাতে বলি, ‘ছি, ছি, মেমসাহেব, একথা কেন বলছ?’ একটু থামি।

আবার বলি, ‘তোমার চাইতে আপন করে আর কাউকেই তো পাই নি!’

‘আপন ভাবলে আজ তোমার মনে এই দ্বিধা আসত না!’

আমি আরো কিছু সান্ত্বনা দিলাম। কিন্তু একটু পরে খেয়াল করলাম মেমসাহেবের চোখে জল। তাড়াতাড়ি মেমসাহেবকে বুকের মধ্যে টেনে নিলাম। চোখের জল মুছিয়ে দিলাম। একটু আদরও করলাম। শেষে ওর ফোলা ফোলা গাল দুটো চেপে বললাম, ‘পাগলী কোথাকার!’

মেমসাহেব আমার কোলের মধ্যে গুয়ে রইল কিন্তু তবুও স্বাভাবিক হতে পারল না। কিছুক্ষণ পরে একটা দীর্ঘনিশ্বাস ছেড়ে বললো, তোমার এত কাছে এসেও তোমাকে পাব না তা কল্পনা করতে পারি নি।’

‘লক্ষীটি, মেমসাহেব আমার! তুমি দুঃখ করো না।

মেমসাহেব উঠে বসল। একটু স্থির দৃষ্টিতে চাইল আমার দিকে। মুহূর্তের জন্য চিন্তার সাগরে ডুব দিয়ে কোথায় যেন ডুলিয়ে গেল। তারপর বললো, ‘আমাদের জীবনে সংস্কারের একটা বিরাট ভূমিকা আছে, তাই না?’

‘হঠাৎ একথা বলছ?’

ঠোঁটের কোণে একটু বিদ্রূপের হাসি এনে মেমসাহেব বলে, ‘অপরিচিত দুটি ছেলে-মেয়েকে কলাতলায় বসিয়ে একটু মন্ত্র পড়লেই তারা কত আপন হয়। ঐ সংস্কারটুকু ছাড়া যত কাছেই আসুক না কেন, দুটি ছেলে-মেয়ে ঠিক আপন হতে পারে না।

তারপর আমার দিকে ইশারা করে জিজ্ঞাসা করে, ‘তাই না?’

‘তুমি আমাকে সন্দেহ করছ? আমাকে অপমান করছ?’

‘ছি, ছি, তোমাকে অপমান করব? শুধু বলছিল যে, আমি যদি তোমার বিবাহিতা স্ত্রী হতাম তাহলে আমার গয়না বিক্রি করে তোমার মদ্যপান বা যত্রতত্র গমনের অধিকার থাকত, কিন্তু.....।

আমি তাড়াতাড়ি ওর মুখটা চেপে ধরে বলি, ‘আর বলো না। মন্ত্র না পড়লেও তুমি আমার স্ত্রী, আমি তোমার স্বামী।’

মেমসাহেব আমার বুকের মধ্যে লুটিয়ে পড়ল। একটু পরে গলায় আঁচল দিয়ে আমার পায়ে মাথা রেখে প্রণাম করল।

চাঁদটা হঠাৎ একটু মেঘে ঢাকা পড়ল। আর সেই অন্ধকারের সুযোগে আমি-

মেমসাহেব সঙ্গে সঙ্গে দাবড় দিয়ে বললো, ‘আবার অসভ্যতা?’

হেষ্টিংস থেকে এগিয়ে এসে আউট্রাম ঘাটের পাশ দিয়ে আশু আশু আমরা আবার বিশেষ গেলাম নগর কলকাতার জনসমুদ্রে।

কিন্তু জ্ঞান দোলাবৌদি, সে রাত্রে আনন্দে আর আত্মতৃপ্তিতে ঘুমুতে পারি নি। তোমার জীবনেও

তা এমনি দিন এসেছিল। এবার কলকাতা গেলে সেদিনের কাহিনী না শোনালে তোমার মুক্তি নেই।

দশ

তুমি তা জান, জীবনের এক-একটা বিশেষ বিশেষ পরিস্থিতিতে মানুষেরও এক-একটা রূপ, চরিত্র দেখা দেয় যে ছেলেমেয়েরা রাত ন'টার পর ঘুমে ঢুলতে থাকে, পরীক্ষার আগে তারাই নির্বিবাদে রাত দেড়টা-দুটো অবধি পড়াশুনা করে। বিয়ের আগে যে মেয়েরা রাত জাগতে পারে না, শুনেছি বিয়ের পরে তারা নাকি ঘুমুতে চায় না। তাই না? কেন সম্ভানের মা হবার পর ঘুমিয়ে ঘুমিয়েও মায়ের দল জেগে থাকেন। দেহটা ঘুমের কোলে লুটিয়ে পড়ে কিন্তু মন অতদ্রুত প্রহরীর মত সারারাত সে সম্ভানকে পাহারা দেয়। সামান্য ক'টি মাসের ব্যবধানে কিভাবে একটা প্রমত্তা কুমারী, শান্ত-স্বিচ্ছা কল্যাণী জননী হয় সে কথা ভাবতেও আশ্চর্য লাগে!

মানুষের চরিত্রের আরো কত বিচিত্র পরিবর্তন হয়। সে পরিবর্তনের ফিরিস্তি দিতে গেলে মানব-সভ্যতার একটা ছোটখাটো ইতিহাস লিখতে হবে। তাছাড়া মনুষ্য-চরিত্রের এসব মামুলি কথা তোমাকে লেখার কোন প্রয়োজনও নেই। সেদিন গঙ্গার ধারে মেমসাহেবের কথা শুনে আর চোখের জল দেখে আমারও এক আশ্চর্য পরিবর্তন হলো। ঘুরকুনো মধ্যবিস্তৃত বাঙালীর ছেলে হয়ে কলকাতার ঐ গতিবদ্ধ জীবনের মধ্যে বেশ ছিলাম। মেমসাহেবের প্রেমের নেশায় নিজের কর্মজীবন সম্পর্কে বেশ উদাসীন হয়ে পড়েছিলাম।

সেদিন অকস্মাৎ মেমসাহেবের ভালবাসার চাবুক খেয়ে আমি চিত্তিত না হয়ে পারলাম না। ধুতি, পাঞ্জাবি আর কোলাপুরী চটি পরে জামাই সেজে মেমসাহেবের সঙ্গে প্রেম করলেই যে জীবনের সব কিছু প্রয়োজন মিটবে না, মিটতে পারে না সে কথা বোধহয় সেদিন প্রথম উপলব্ধি করলাম। তাছাড়া আর একটা উপলব্ধি হলো আমার। মেমসাহেব আমাকে ভালবাসে, আমাকে প্রাণ দিয়ে কামনা করে। সে জানে একদিন আমারই হাতে তার সিঁথিতে সীমস্তিনী সিঁদুর উঠবে, আমার দীর্ঘায়ু কামনায় হাতে শাঁখা পরবে; সে জানত আরো অনেক কিছু। জানত, সে একদিন আমার সম্ভানের জননী হয়ে সগর্বে পৃথিবীর সামনে দাঁড়াবে।

সারা দুনিয়ার সমস্ত মেয়ের মত সেও ভবিষ্যৎ জীবনের স্বপ্ন দেখেছিল তার স্বামীকে কেন্দ্র করে। কিন্তু যৌবনের কালবৈশাখীর ধূলি ঝড়ে মেমসাহেবের স্বচ্ছ দৃষ্টি হারিয়ে যায় নি, ভবিষ্যতের স্বপ্ন বাস্তবের মাটি ছেড়ে আরব্য উপন্যাসের অলীক অরণ্যে পালিয়ে যায় নি। তাই তো সে চেয়েছিল তার ভালবাসায় আমার জীবন ভরে উঠুক। সে চায় নি পৃথিবীর অসংখ্য কোটি কোটি স্বামী-স্ত্রীর দীর্ঘ তালিকায় শুধু মাত্র আর দুটি নামের সংযোজন।

তাই তো সেদিন ফেরার পথে মেমসাহেব আমাকে অন্যমনস্ক দেখে ডাকল, 'শোন।' আমি নিরন্তর রইলাম। মেমসাহেব আমার পাশে এসে হাতটা ধরে ডাকল, 'শোন।'

'বল।'

'রাগ করেছে?'

'রাগ করব কেন?'

'আমাকে ছেড়ে তোমাকে বাইরে যেতে বললাম বলে!'

'না, না।'

আমরা দু'জনের পাশপাশ হাঁটতে হাঁটতে এগিয়ে চললাম।

মেমসাহেব আবার শুরু করে, 'আমার সর্বস্ব কিছু দিয়েও যদি তোমার সত্যিকার কল্যাণ করতে না পারি তাহলে আমি কী করলাম বল?'

একটু থামে। আবার বলে, 'তুমি শুধু আমার স্বামী হবে, শুধু আমিই তোমাকে মর্যাদা দেব, ভালবাসব, তা আমি চাই না। আমি চাই তুমি আমাদের দু'জনের গতির বাইরেও অসংখ্য মানুষের ভালবাসা পাও, তাঁদের আশীর্বাদ পাও।'

আবার একটু থামে, একটু হাসে। তারপর ফিসফিস করে বলে, 'কত মেয়ে তোমাকে চাইবে অথচ শুধু আমি ছাড়া আর কেউ তোমাকে পাবে না।'

হাত দিয়ে আমার মুখটা ঘুরিয়ে জিজ্ঞাসা করল, 'ভাবতে পার, তখন আমার কি গর্ব, কি আনন্দ, কি আনন্দ হবে?'

কি উত্তর দেব? আমি শুধু হাসি।

বাসায় ফিরে অনেক রাত অবধি অনেক কিছু ভাবলাম। পরের ক'টা দিন নানা জায়গায় ঘুরেফিরে নিজেও কিছু কিছু খবর জেনে নিলাম।

তারপর একদিন সত্যি-সত্যিই আমি মাদ্রাজ মেলে চড়লাম। মেমসাহেব আমাকে বিদায় জানাতে এসেছিল। বললো, 'আমার মনে হয় তোমার নিশ্চয়ই কিছু হবে। তবে না হলেও ঘাবড়ে যেও না। সারা দেশে তো কম কাগজ মেই। আরো দু'চার জায়গায় ঘোরাঘুরি করলেও কোথাও না কোথাও চাপ পাবেই।'

আমি নিরুত্তর রইলাম। সামনের লাল আলো সবুজ হলো, গার্ড সাহেবের বাঁশি বেজে উঠল।

মেমসাহেব বললো, 'সাবধানে পেকো। যেখানে-সেখানে যা-তা খেও না।..... চিঠি দিও।'

আমি মুখে কিছু বললাম না। শুধু মেমসাহেবের মাথায় হাত দিয়ে আশীর্বাদ করলাম। মাদ্রাজ মেলের কামরায় বসে হঠাৎ পুরনো দিনের কথা মনে হলো.....।

রবিবার সকাল। আটটা কি সাড়ে আটটা বাজে। ঘুম ভেঙে গেলেও তন্দ্রাচ্ছন্ন হয়ে তখনো চাদর বুড়ি দিয়ে শুয়েছিলাম। আমাদের সিনিয়র সাব-এডিটর শিবুদা এসে হাজির। ঘরে ঢুকেই নির্বিবাদে, চাদরটা টান ঘেরে বললেন, 'ছি, ছি, এখনও ঘুমুচ্ছিস?'

আমি বললাম, 'না, না, ঘুমুচ্ছি কোথায়? এমনি শুয়ে আছি।'

শিবুদা উপদেশ দেন, 'এত বেলা অবধি ঘুমুলে কি জীবনে কিছু করা যায়!,

তবে রে! আমি প্রায় লাফ দিয়ে উঠে পড়ি। বলি, 'আচ্ছা, শিবুদা, কর্পোরেশনের যেসব কর্মচারীরা শেষ রাত্তিরে উঠে গ্যাস-পোস্টের আলো নিবিয়ে বেড়ায় আর রাস্তায় জল দেয় তাদের ভবিষ্যৎ কি খুব উজ্জ্বল?'

শিবুদা দাবড় দেয়, 'তুই বড্ড বাজে বকিস। এই জন্যই তোর কিছু হচ্ছে না।'

একটু আগে বললে, বেলা করে ঘুমবার জন্য, এখন বলছ বেশি কথা বলার জন্য আমার কিছু.....

'আঃ! তুই থামবি, না শুধু তর্ক করবি?'

উঠে পড়লাম। কিছুক্ষণের মধ্যে তৈরি হয়ে খোকার দোকান থেকে দু'কাপ চা নিয়ে শিবুদার সম্মুখে হাজির হলাম। জিজ্ঞাসা করলাম, 'তারপর শিবুদা, কি ব্যাপার? হঠাৎ এই সাতসকালে?'

শিবুদা নীল সুতোর লম্বা বিড়িটায় একটা টান দিয়ে সারা ঘরটা দুর্গন্ধে ভরিয়ে দিল। বললো, 'চল, একটা ইন্টারেস্টিং লোকের কাছে যাব।'

'কার কাছে?'

'আগে চল না, তারপর দেখবি।'

শিবুদার সঙ্গে তর্ক করা বৃথা। সুতরাং অযথা সময় নষ্ট না করে শিবুদার অনুসরণ করলাম। ট্রাম-বাসে উঠলাম নামলাম ক'বার মনে নেই, তবে দু'তিনবার তো হবেই। তারও পরে পদব্রজে অলিগঞ্জি দিয়ে বেশ খানিকটা। আর একটু এগিয়ে গেলে নিশ্চয়ই মহাপ্রস্থানের পথ পেতাম কিন্তু সেই মুহূর্তে শিবুদা বললো, 'দাঁড়া, দাঁড়া আর এগিয়ে যাস না।'

একটা ভাঙা পোড়াবাড়ির মধ্যে ঢুকেই শিবুদা হাঁক দিল, 'মধুদা!'

উপরের বারান্দা থেকে একটা ছোট্ট মেয়ে জবাব দিল, 'শিবুকাকু" বাবা উপরে।'

আমরা সোজা তিনতলার চিলেকোঠায় উঠে গেলাম! মধুদাকে দেখেই বুঝলাম, তিনি জ্যোতিষী কিন্তু পেশায় ঠিক সাফল্যলাভ করতে পারেন নি।

মধুদার সঙ্গে আমার পরিচয় করিয়ে দিলেন শিবুদা।

মধুদা কাগজপত্র সরাতে সরাতে বললেন, 'এর মধ্যেই একটু কষ্ট করে বসুন ভাই।'

বসলাম। শিবুদা-মধুদা প্রায় ঘণ্টাখানেক ধরে শনি-মঙ্গল-রাহু-কেতু নিয়ে এমন আলোচনা করলেন যে আমি তার এক বর্ণও বুঝলাম না।

ঘণ্টাখানেক পরে শিবুদার অনুরোধে মধুদা আমার জন্মসন-তারিখ ইত্যাদি জেনে নিয়ে চটপট একটা ছক তৈরী করে ফেললেন। একটু ভাল করে চোখ বুজিয়ে নিয়ে বললেন, 'বেশ ভাল।'

শিবুদা প্রশ্ন করেন, 'ভাল মানে?'

মধুদা মনে মনে হিসাব-নিকাশ করতে করতেই জবাব দেন, 'ভাল মানে ভাল; তবে বেশ কাঠখড় পোড়াতে হবে।'

নাকে একটু নস্য দিয়ে কর গুনতে গুনতে বলেন, 'তাছাড়া একটু বিলম্বে উন্নতির যোগ।'

শিবুদা ছকটার ওপর ঝুঁকে পড়ে বলেন, 'হ্যাঁগো মধুদা, এর যে ত্রিকোণে মঙ্গল।

'তবে নবমে নয় পঞ্চমে। তবুও বেশ ভাল ফল দেবে।'

মধুদা সেদিন অনেক কথা বলেছিলেন। আজ সবকিছু মনে নেই। তবে ভুলি নি একটি কথা। বলেছিলেন, 'তুচ্ছ স্থানটি বড় ভাল। কোন মহিলার সহায়তায় জীবনে উন্নতি হবে।'

সেদিন কথাটি বিশ্বাস করি নি কিন্তু আজ মাদ্রাজ মেলের কামরায় সে কথাটা মনে না করে পারলাম না। আগে কোনদিন কল্পনা করতে পারি নি আমার জীবনের রত্ন প্রাপ্তির মেমসাহেবের স্রোতস্বিনী ধারায় ধন্য হবে। নাটক-নভেলে এসব সম্ভব হতে পারে কিন্তু আমার জীবনে? নৈব নৈব চ।

মাদ্রাজ মেলের কামরায় বসে মনে হলো মেমসাহেব স্বপ্ন সাধনা, ভালবাসা নিশ্চয়ই একেবারে ব্যর্থ হতে পারে না। সত্যি আমার মাদ্রাজ যাওয়া ব্যর্থ হলো না। সাদার্ন এক্সপ্রেসের এডিটর বললেন, কাগজে স্পেসের বড় অভাব। কলকাতার স্পেশাল স্টোরি ছাড়া কিছু ছাপার স্পেস পাওয়াই মুশকিল। তাই তো কলকাতার ঠিক ফুলটাইম লোকের দরকার নেই।

আমি মনে মনে দশ হাত ভুলে ভগবানকে শতকোটি প্রণাম জানালাম। মাসে মাসে দেড়শ টাকা। আনন্দে প্রায় আত্মহারা হয়ে পড়লাম। দৌড়ে মাউন্ট রোড টেলিগ্রাফ অফিসে গিয়ে মেমসাহেবকে আর্জেন্ট টেলিগ্রাম করলাম, মিশন সাকসেসফুল রিমেমবারিং ইউ স্টপ স্টার্টিং টুমরো মাদ্রাজ-মেল।

হাওড়া স্টেশনে মেমসাহেব আমাকে হাসিমুখে অভ্যর্থনা জানিয়ে বললো, 'আর বেশি আড়ডা দেবে না। মন দিয়ে কাজ করবে।'

'নিশ্চয়ই; তবে-'

বাঁকা চোখে মেমসাহেব বলে, 'তবে মানে?'

'সাত দিন পরে কলকাতা ফিরেই কাজ শুরু করব?'

'তবে কি করবে?'

'একটা দিন অন্তত তোমাকে.....'

মেমসাহেব হাসতে হাসতে বলে, 'এতক্ষণে অরিন্দম কহিল.....'

তুধু আমার নয় মেমসাহেবেরও তো ইচ্ছা করে আমার কাছে আসতে, প্রাণ ভরে আমাকে আদর করতে। তাছাড়া এই ক'দিনের অদর্শনের জন্য তার মনের মধ্যে অনেক ভাব, ভাষা পুঞ্জীভূত হয়ে উঠেছিল। কলকাতার এই জেলখানার বাইরে একটু মুক্ত আকাশের তলায় আমাকে নিবিড় করে কাছে পাবার জন্য গুর মনটাও আনচান করছিল। ব্যাকুল হয়ে উঠেছিল আমার নতুন জীবনের দ্বারদেশে আমায় সাদর অভ্যর্থনা জানাবার জন্য। তাই তো আমার কাছ থেকে একটু ইঙ্গিত পেয়েই বিনা প্রতিবাদে প্রস্তাবটি মেনে নিল।

'জানি, তোমার মাথায় যখন একবার ভূত চেপেছে তখন কিছুতেই ছাড়াবার পাত্র নও মেমসাহেব মঞ্জব্য করে।

'তাই বুঝি!' আমি বলি। 'তোমার যেন কোন কামনা-বাসনা, ইচ্ছা-অনিচ্ছা বলে কোন কিছু নেই?'

একটি দিনের জন্য আমরা দু'জনে আবার হারিয়ে গেলাম। কলকাতার লক্ষ লক্ষ মানুষের কেউ জানল না। গঙ্গা যেখানে সাগরের দিকে উদ্দামবেগে ছুটে চলেছে, যেখানে সমস্ত সীমা অসীম হয়ে গেছে, বন্ধন যেখানে মুক্তি পেয়েছে, সেই কাকতালীর অন্তবিহীন মহাশূন্যে আমাদের দুটি প্রাণবিন্দু বিলীন হয়ে গেল।

মেমসাহেব আমার বুকের মধ্যে আত্মসমর্পণ করে বললো, 'আমি জানি, তুমি এমনি করে ধাপে ধাপে এগিয়ে যাবে।'

'তুমি জান?'

‘হ্যাঁ।’

‘কেমন করে জানলে?’

‘খবরের কাগজ বলতে তুমি যে পাগল সে কথাটা কি আমি জানি না?’ তারপর বেশ গর্ব করে মেমসাহেব বললো, ‘খবরের কাগজকে না ভালবাসলে এমন পাগল কেউ হতে পারে না।’

‘তাতে কি হলো?’

‘কিছু হয় নি,’ মেমসাহেব বোধ করি আর আমার প্রশংসা করা সমীচীন মনে করে না।

একটা দমকা ঝড়ো হাওয়া এলো। সামনের সমুদ্রমুখী ভাগীরথীর অনন্ত জলরাশি ফুলে ফুলে নাচানাচি শুরু করে। ভাগীরথী যেন আরো তেজে, আরো আনন্দে সমুদ্রের দিকে দৌড়াতে লাগল।

মেমসাহেব উঠে বসে বলে, ‘এই শান্ত গঙ্গা হিমালয়ের কোল থেকে প্রায় হাজার দেড়েক মাইল চলবার পর সমুদ্রের কাছাকাছি এসে কত বিরাট, কত বেশি প্রাণচঞ্চল; মানুষও ঠিক এমনি। সঙ্গীর্ণ গণ্ডি থেকে বৃহত্তর জীবনের কাছে মানুষ অনেক উদার, অনেক প্রাণচঞ্চল হয়। তাই না?’

আমি চুপ করে থাকি। কোন কথা না বলে মেমসাহেবের উদার গভীর চোখ দুটোকে দেখি।

মেমসাহেব খোপাটা খুলে আমার কাঁধের ওপর মাথাটা রেখে দেয়। সামনে বুকের ‘পর দিয়ে তার দীর্ঘ অবিন্যস্ত বিনুনি লুটিয়ে পড়ে নিচে। আমি বলি, ‘আচ্ছা মেমসাহেব, তুমি তো আমার উন্নতি জন্য এত ভাবছ, এত করছ কিন্তু আমি তো তোমার জন্য কিছু করছি না।’

আমার জন্য আবার কি করবে? আমার জন্যই তো তুমি তোমাকে তৈরি করছ।’

‘কিন্তু তনুও-’

‘এতে কোন কিন্তু নেই। হাজার হোক আমি মধ্যবিত্ত বাঙালী ঘরের মেয়ে। যতই লেখাপড়া শিখি না কেন, স্বামী-পুত্র নিয়েই তো আমার ভবিষ্যৎ।’

মেমসাহেব খামে। দৃষ্টিটা তার চলে যায় দিগন্তের অন্তিম সীমানায়। মনটাও বোধহয় হারিয়ে যায় ভবিষ্যতের অজানা পথে। আমি বেশ বুঝতে পারি বর্তমান নিয়ে মেমসাহেব একটুও চিন্তা করে না। তার সব চিন্তা-ভাবনা, ধ্যান-ধারণা আগামী দিনগুলিকে নিয়ে স্বপ্ন দেখে। স্বপ্ন? না, না, স্বপ্ন কেন হবে? সে স্থির ধারণা করে নিয়েছে, চাকরি-বাকরি ছেড়েছুঁড়ে দিয়ে সে মনপ্রাণ দিয়ে শুধু সংসার করবে, আমাকে সুখী করবে, আমার কাজে সাহায্য করবে। তারপর? তারপর, সে মা হবে।

ইদানীংকালে মেমসাহেব একবার নয়, বহুবার স্বামী-পুত্র নিয়ে সংসার করার কথা বললো। ওর ছেলে কি করবে, মেয়ে কেমন হবে সে-কথাও বলেছে বেশ কয়েকবার। শুনে ভালই লাগে। প্রথমে সারা মন আনন্দে, আত্মতৃপ্তিতে ভরে যায়, কিন্তু একটু পরে কেমন যে খটকা লাগে। হাজার হোক, মানুষের জীবন তো! কোথা দিয়ে কি হয়ে যায়, কে বলতে পারে? আমি বাস্তবের মুখোমুখি হয়েছি, দেখেছি অনেক মানুষ অনেকরকম স্বপ্ন দেখে কিন্তু ক’জনের জীবনে সে স্বপ্ন সার্থক হয়? তাইতো মেমসাহেবকে বুকের মধ্যে পেয়ে আনন্দ পাই কিন্তু তার ভবিষ্যৎ জীবনের আশা-আকাঙ্ক্ষার কথা শুনে আমার বুকের মধ্যে কেমন করতে থাকে।

সেদিন সমুদ্রের কাছাকাছি আত্মহারা ভাগীরথীর পাড়ে বসে মেমসাহেবের কাছে আবার স্বামী-পুত্র নিয়ে সুখের সংসার করার কথা শুনে আমি কিছুক্ষণ চুপ করে রইলাম। তারপর আস্তে আস্তে ওর কপালে, মুখে হাত বুলিয়ে আদর করতে করতে বললাম, ‘তুমি কি জান তুমি স্বামী-পুত্র নিয়ে সুখী হবেই?’

ঐ লম্বা ভ্র দুটো টান করে চোখ ঘুরিয়ে আমার দিকে তাকিয়ে বলে, ‘নিশ্চয়ই!’

‘নিশ্চয়ই!’

মেমসাহেবের ঠোঁটের কোণায় একটু বিদ্রূপের হাসি দেখা দেয়। বলে, ‘কেন, তুমি কি আর কাউকে নিয়ে সুখী হবার কথা ভাবছ?’

‘মাঝে মাঝে ইচ্ছা করে কিন্তু তুমি কি ঘাড় থেকে নামবে?’

‘আমি তোমার ঘাড়ে চেপেছি, না তুমি আমার ঘাড়ে চেপেছ?’

একটু খামে, আবার বলে, ‘আর কেউ এসে দেখুক না! মজা দেখিয়ে দেব।’

‘তাই বুঝি?’

‘তবে কি? তোমাকে পূজা করব?’

'আগেকার দিনে পতিব্রতা স্ত্রীরা স্বামীকে সুখী করার জন্য বহু-বিবাহে কোনদিন আপত্তি করতেন না, তা জান?'

'তুমি আগেকার দিনের কথা কেন বলছ? আরও একটু এগিয়ে ঐতিহাসিক দিনে, যখন জঙ্গলে বাস করতে তখন তো তোমরা, পুরুষেরা আরো অনেক কাণ্ড করতে। সুতরাং এখনও তাই কর না।'

একটু ঠাণ্ডা মিঠে হাওয়া বয়ে যায়। মেমসাহেব এক মুহূর্ত বদলে যায়। দু'হাত দিয়ে আমার গলা জড়িয়ে বলে, 'আমি জানি তুমি আর কাউকে কোনদিন ভালবাসতে পারবে না।'

'জান?'

'একশ'বার, হাজারবার জানি।'

'কেমন করে জানলে?'

'সে তুমি বুঝবে না।'

'বুঝব না?'

'তুমি যদি মেয়ে হতে তাহলে বুঝতে।'

'তার মানে?'

'সন্তানের মনের কথা যেমন আমরা বুঝতে পারি, তেমনি স্বামীদের মনের কথাও আমরা জানতে পারি।'

দোলাবৌদি, তুমি তো মেয়ে। তাই বুঝবে কত গভীরভাবে সারা অন্তর দিয়ে ভালবাসলে এসব কথা বলা যায়।

সার্দান এন্ড্রোসের কাজ শুরু করে দিলাম বেশ মন দিয়ে। মাঝে মাঝে মন চাইত ফাঁকি দিই, মেমসাহেবকে নিয়ে আড্ডা দিই, স্মৃতি করি কিন্তু পারতাম না। শুকে ঠকাতে বড় কষ্ট হতো। যার সমস্ত জীবন-সাধনা আমাকে কেন্দ্র করে, যে আমার মঙ্গলের মধ্যে দিয়ে নিজের কল্যাণ দেখতে পায়, তাকে মুহূর্তের জন্য বঞ্চনা করতে আমার সাহস বা সামর্থ্য হয় নি।

ঝড়ের বেগে না হলেও আমি বেশ নির্দিষ্টভাবে এগিয়ে চলেছিলাম। মেমসাহেবকে বুকের মধ্যে পেয়ে আমি আমার জীবন-নদীর মোহনার কলরব শুনতে পেতাম।

মাসকয়েক পরে আমি আবার বাইরে বেরুলাম। এবার লক্ষ্যে। কিছুকাল আগে ক্রনিকেলের এডিটরের সঙ্গে আলাপ হয়েছিল এবং সে পরিচয়ের সূত্র ধরেই তার কাছে হাজির হলাম। বললেন, 'কলকাতার করস্পন্ডেন্টের দরকার নেই তবে সত্তাছে একটা করে ওয়েস্ট বেঙ্গল নিউজ লেটার ছাপতে পারি।'

এডিটর মিঃ শ্রীবাস্তব খোলাখুলিভাবে জানালেন, 'বাট আই কান্ট পে ইউ মোর দ্যান ওয়ান হানড্রেড।'

আমি বললাম, 'দ্যাটস্ অল রাইট। লেট আস মেক এ বিগিনিং।'

আমার জীবনে এই পরম দিনগুলিতে মেমসাহেবকে স্বরণ না করে পারি নি। তার প্রতি কৃতজ্ঞতায় আমার মন ভরে যেত। আকাশে কালো মেঘ দেখা দিলেই বৃষ্টিপাত হয় না। সে কালো মেঘে জলীয় বাষ্প থাকে প্রয়োজন। একটি ছেলের জীবনে একটি মেয়ের উদয় নতুন কিছু নয়। আমার জীবনেও হয়ত আরো কেউ আসত কিন্তু আমি স্থির জানি পৃথিবীর অন্য কোন মেয়েকে দিয়ে আমার কর্মজীবনের অচলায়তনকে বদলান সম্ভব হতো না।

তাছাড়া মেয়েরা একটু আদর একটু ভালবাসা পেতে চায়। একটু সুখ, স্বাচ্ছন্দ্য, একটু বৈশিষ্ট্য প্রায় সব মেয়েরাই কামনা করে। সেই সুখ, সেই স্বাচ্ছন্দ্য পাবার জন্য প্রয়োজন হলে কোন মেয়ে আত্মত্যাগ করবে? খুব সহজ সরল চিরাচরিত প্রথায় মেমসাহেবের জীবনে এর সব কিছুই আসতে পারত কিন্তু সে তা চায় নি। সে চেয়েছিল, নিজের প্রেম-ভালবাসা, দরদ-মাধুর্য-অনুপ্রেরণা দিয়ে নিঃস্বস্ত রাষ্ট্রাধরের একটি পরাজিত যোদ্ধাকে আবার নতুন উদ্দীপনার আত্মবিশ্বাসে জড়িয়ে তুলতে।

আমি জানতাম, আমার কর্মজীবনের এই সাময়িক সাফল্যের কোন স্থায়ী মূল্য নেই, নেই কোন ভবিষ্যৎ। কিন্তু তা হোক। এই সব ছোটখাটো অস্থায়ী সাফল্যের দ্বারা আমার হারিয়ে যাওয়া আত্মবিশ্বাস আমি কিরে পেলাম, নিজের কর্মদক্ষতা সম্পর্কে একটু আস্থা এলো আমার মনে। সর্বোপরি

এ কথা আমি উপলব্ধি করলাম যে, শুধু কলকাতাকে কেন্দ্র না করেও আমার ভবিষ্যৎ সাংবাদিক-জীবন এগিয়ে যেতে পারবে। বরং একবার মাতৃনাম শ্রবণ করে ভারতবর্ষের বিস্তীর্ণ রঙ্গমঞ্চে বেরিয়ে পড়লে ফল আরো ভাল হবে।

তুমি বেশ বুঝতে পারছ, আমি কেন ও কার জন্য একদিন অকস্মাৎ কলকাতা ত্যাগ করে দিল্লী চলে এলাম। আজ আমার জীবন কত ব্যস্ত, কত বিস্তৃত। সাংবাদিক হয়েও সেই উত্তরে দার্জিলিং, পূর্বে গৌহাটি, দক্ষিণে গঙ্গাসাগর ও পশ্চিমে চিত্তরঞ্জন-সিক্কীর মধ্যে আজ আমি বন্দী নই। বাংলাদেশকে আমি ভালবাসি। বাংলাদেশের প্রতিটি মানুষকে আপনজন মনে করি। কিন্তু সমস্যাসঙ্কুল ও নিত্য নতুন চিন্তায় জর্জরিত হয়ে বাঁচার কথা ভাবতে গেলে ডয় হয়। যদি আনন্দ করে বাঁচতে না পারলাম, যদি এই পৃথিবীর রূপ-রস-গন্ধ-মাধুর্য উপভোগ করতে না পারলাম, তবে শুধু পিতৃপুরুষের স্মৃতিজড়িত মিউজিয়ামে জীবন কাটাবার মধ্যে মানসিক শক্তি পাওয়া যেতে পারে কিন্তু স্বস্তি শান্তি নিশ্চয় পাওয়া যাবে না।

আজ যত সহজে এসব কথা লিখছি ব্যাপারটি তত সহজ নয়। যে পরিবারে জন্মেছি, যে পরিবেশে মানুষ হয়েছি, কর্মজীবন শুরু করেছি, সেখানকার সবকিছু সীমিত ছিল। আজ জীবিকার তাগিদে বছরজনকে বছর দিকে ছড়িয়ে পড়তে হয়েছে, কিন্তু সেদিন জীবিকার জন্য ও জীবন ধারণের জন্য আমার পক্ষে সোনার বাংলা ত্যাগ করা অত সহজ স্বাভাবিক ছিল না। কিন্তু আমি সেদিন হাশিমুখেই হাওড়া স্টেশনে দিল্লী মেলে চড়েছিলাম।

এগারো

তুমিও জান আমিও জানি, সবাই জানে-মানুষের জীবনের গতিপথ ও গতিবেগের পরিবর্তন হয় মাঝে মাঝেই। আমার জীবনেও হয়েছে; হয়ত বা ভবিষ্যতেও হবে। আমার জীবনে মেমসাহেবের উদয় হবার আগে আমার জীবন এমন বিশী টিমোতালে চলছিল যে, তা উল্লেখ করারই প্রয়োজন নেই। মেমসাহেবকে পাবার পর বেশ কিছুকাল এমন একটা অদ্ভুত নেশায় মশগুল ছিলাম যে, নিজের ভূত-ভবিষ্যৎ নিয়ে মাথা ঘামাবার অবকাশ বা প্রয়োজন বোধ করি নি।

কিন্তু তারপর মনের আকাশ থেকে অনিশ্চয়তার মেঘ কেটে যাবার পর আমার জীবনে এক আশ্চর্য জোয়ার এলো। প্রথম প্রথম মুহূর্তের অদর্শন অসহ্য, অসম্ভব মনে হতো। মনে হতো বুঝিবা হারিয়ে গেল, বুঝিবা কিছু ঘটে গেল। আমার মত মেমসাহেবের মনেও এমনি অনেক অজানা আশঙ্কা আসত। পরে দু'জনে দু'জনকে সমস্ত মনপ্রাণ দিয়ে পেলাম এবং সে পাওয়ার আনন্দে যখন সমস্ত মনটা মাদির হারিয়ে গেল তখন আস্তে আস্তে আজোবাজে দুশ্চিন্তা বিদায় নিল।

মেমসাহেবের ঐ হাতটা নিজের হাতের মধ্যে না পেলে মেমসাহেবের বুকে কান পেতে ঐ পরিচিত স্পন্দন না শুনে প্রথম প্রথম মনে মনে বড়ই অস্বস্তি পেতাম। পরিচয়ের গতি পেরিয়ে ভালবাসার সেই প্রথম অধ্যায়ের মনটা বড়ই সংকীর্ণ হয়েছিল। শুধু মেমসাহেবকে কাছে পাওয়া ছাড়া যেন আর কোন চিন্তাই মনের মধ্যে স্থান পেত না। বিশ্ব-সংসারে আনন্দমেলায় আমাদের দু'জনের আমাদের দু'জনকে ছাড়া আর কাউকে কল্পনা করতে পারতাম না। দুনিয়ার আর সবাইকে কেমন যেন ফালতু অপ্রয়োজনীয় মনে হতো। জীবনের শুধু একটি দিক একটি অঙ্গকেই সমগ্র জীবন ভেবেছিলাম। ধীরে ধীরে আমরা যত আপন হলাম, সঙ্গে সঙ্গে এসব ভুল ধারণাও বিদায় নিল। তাছাড়া, মেমসাহেবের ভালবাসা ক্রমে ক্রমে আমার সমগ্র জীবনকে, জীবনসত্তাকে আলিঙ্গন করল। শুধু আমার ব্যক্তিগত জীবনের একান্ত প্রিয়সঙ্গিনী নয়, শুধু যৌবনের আনন্দমেলার পার্শ্ববর্তিনী নয়, মেমসাহেব আমার সামগ্রিক জীবনের অংশীদার হলো।

তুমি তো জান, আমাদের পূর্বপুরুষরা শুধু জানতেন 'পুত্রার্থে ক্রিয়তে ভার্ষা।' আমাদের দেব-দেবীর ইতিহাস পড়লে এক-একজনের শত শত সহস্র সহস্র সন্তানের জননী হওয়ার কাহিনী অতীতের ইতিহাসের পাতায় বন্দী হয়েছে। তবুও স্বামীর শয্যা আর রান্নাঘরের মধ্যেই আমাদের নিরানন্দেরই ডাগ নারীর জীবন সীমিত।

এই তো ইদানীংকালে কত ছেলেমেয়েকে ভালবাসতে দেখলাম, দেখলাম স্বপ্ন দেখতে। ভালবাসা, পেয়ে অনেক মানুষের জীবনধারাই পাশ্টে যায় সত্য কিন্তু আমার মেমসাহেব আমাকে

পাশ্চৈ দেয় নি, সে আমাকে নতুন জীবন দিল। আমাকে ভালবেসে সে অক্ষ হয়নি। রাত্রির অন্ধকারে আমার তপ্ত শব্দ্য পলাতকের মত সে আশ্রয় চায় নি, চেয়েছিল আমার সামগ্রিক জীবনের প্রতিটি অধ্যায়ে কিছু-না-কিছু ভূমিকা গ্রহণ করতে।

পুরুষের জীবনে কর্মজীবনের চাইতে বড় কিছু আর হতে পারে না। কর্ম-জীবনের ব্যর্থত, কর্মক্ষেত্রে পরাজয়, পুরুষের মৃত্যু সমান। কর্মজীবনে ব্যর্থ, পরাজিত, অপদস্থ পুরুষের জীবনে নারীর ভালবাসার কি মূল্য? কোথায় স্বীকৃতি? মেমসাহেব এই চরম বাস্তব সত্য উপলব্ধি করেছিল। আমি কিছু প্রেমের ঘোরে মশগুল ছিলাম। অতশত ভাবনা-চিন্তা আমার ছিল না। মাদ্রাজ থেকে ঘুরে এসে নতুন কাজ বেশ মন দিয়ে করছি, কিছু টাকা-পয়সারও আমদানি হচ্ছে। আমার মনটা খুশীতে ভরে গেল। তাছাড়া, কলকাতায় কছে না পেলেও সুদূর মাদ্রাজের একটি ইংরাজি দৈনিক পত্রিকায় কাজ পাবার জন্য সরকারী ও সাংবাদিক মহলে আমার কিছুটা মর্যাদা বেড়ে গেল। মেন মনে বোধহয় আমি একটু অহঙ্কারীও হলাম। আবার একদিন মেমসাহেব আমার চৈতন্যে কষাঘাত করল, 'এবার আর কিছু ভাবছ?'

তোমার কথা, না আমার কথা?'

মেমসাহেব চীৎকার করে উঠে, 'আঃ! বাজে বকো না।'

আমি আশ্চর্য হয়ে যাই। 'তুমি রাগ করছ কেন?'

মেমসাহেব দুই হাঁটুর ওপর মুখখানা রেখে কি যেন ভাবছিল। আমার প্রশ্ন শোনামাত্রই রাগ করে মুখটা অন্যদিকে ঘুরিয়ে নিল।

আমি ডাক দিলাম, 'মেমসাহেব!'

জবাব এলো না।

আবার ডাকলাম, 'মেমসাহেব, শোন না!'

তবুও কোন জবাব এলো না। একটু চিন্তিত হলাম। একটু কাছে এগিয়ে গেলাম। মাথায় হাত বুলিয়ে দিয়ে বললাম, 'রাগ করছ কেন?'

উত্তর এলো, 'একটু সরে বস। এটা তোমার নিজের ফ্ল্যাটের ড্রইংরুম নয়, কলকাতার ময়দান!'

বুঝলাম আবহাওয়া খারাপ। ফোর্সল্যাণ্ড করলে আমার প্লেনটাই ক্ষতিগ্রস্ত হবে, কোন মঙ্গল হবে না। তাই আবহাওয়ার উন্নতির আশায় আমি উপরে ঘুরপাক খেতে থাকি।

বেশ কিছুক্ষণ পরে মেমসাহেব বললো, 'নিজের ভবিষ্যৎ সম্পর্কে কোন মানুষ যে এত নির্বিকার হতে পারে, তা তোমাকে দেখার আগে কল্পনাও করতে পারি নি।'

'হঠাৎ একথা বলছ?'

'সে কথা বুঝলে কি আমার কপালে কোন দুঃখ থাকত!'

'আজ তোমার মুডটা খারাপ।'

'হ্যাঁ।' এবার আমার দিকে ঘাড় বেঁকিয়ে বলে, 'বলব, কেন?'

'বল না?'

'অধির সত্য বলব?'

'নিশ্চয়।'

'সহ্য করতে পারবে?'

আমি বীরের মত উত্তর দিলাম, 'ও-ভয়ে কম্পিত নয় বীরে হৃদয়!'

একটু ইতঃ বিদ্রূপের হাসি হাসল মেমসাহেব। বললো, 'আজ্ঞেবাজে বকতে লজ্জা করে না? কোথায় নিজেকে আরো এগিয়ে নিয়ে যাবার চেষ্টা করবে—তা নয়, শুধু...'

'এই তো সবে নতুন একটা কাজ শুরু করছি। আবার নতুন কি করব?'

'তুমি কি করবে, তুমি তা জান না?'

আমি সত্যি সত্যি ভাবনার পড়ি। ভেবে পাই না কি বলতে চায় ও। আমি ওর হাতটা চেপে ধরে বলি, 'লক্ষী মেমসাহেব, ফ্রাঙ্কলি বল না কি বলতে চাইছ? রাগারাগি করে কি লাভ আছে?'

মেমসাহেব বলে, 'এই নতুন কাজটা পাবার পর মনে হয় তুমি যেন আর কিছু চাও না। তাই

‘নিশ্চয়ই চাই কিন্তু চাইলেই যে পাওয়া যায় না, সে কথা তো তুমি জান।’

‘ওধু মেমসাহেবের কথা ভাবলে জীবনে আর কোনদিন কোন কিছুই পেতে হবে না। নতুন কিছু পেতে হলে ঘুরতে হয়, লোকজনের সঙ্গে দেখাশুনা করতে হয়, পরিশ্রম করতে হয়।’

ও কথাটা ঠিকই বলেছিল। দৈনন্দিন কাজকর্ম করে বাকি সময়টুকু মেমসাহেবের জন্য গচ্ছিত ছিল।

মেমসাহেব আবার বলে, ‘আমাকে তো অনেক পেয়েছ, প্রাণভরে পেয়েছে। এখন তো আমার পক্ষে আর কোন চুলোয় যাওয়া সম্ভব হবে না। আমি চাইলেও কেউ আমাকে নেবে না। সুতরাং তুমি তো নিশ্চিত। এবার তাই বলছিলাম তুমি নির্ভয়ে নিজের কাজ করতে পার।’

আমি নতুন কাজটা পেয়ে একটা ধাপ এগিয়েছিলাম। সঙ্গে সঙ্গে খমকে দাঁড়িয়েছিলাম। অন্তত কিছুদিন নিশ্চিন্তে থাকবার বাসনা ছিল। মেমসাহেবের তা সহ্য হলো না। মেমসাহেব চাইল কর্মজীবনের যতদিন স্থিতি, মর্যাদা না আসবে, ততদিন বিশ্রাম করার কোন প্রশ্নই উঠতে পারে না।

কাগজে তো কত লোক কত আর্টিকেল, কত ফিচার, কত গল্প লেখে, তুমিও তো লিখলে পার।’

কোনদিন তো ওসব লিখি নি। রিপোর্ট লেখা ছাড়া আর কিছুই তো লেখার সুযোগ আসে নি।

‘সুযোগ আসে না, সুযোগ করে নিতে হয়।’

তোমাকে তো আগেই লিখেছি-ও আমার মত বেশি বকবক করত না। অল্প অল্প কথা দিয়েই মেমসাহেবের মনের ভাব বেরিয়ে আসত।

দোলাবৌদি, আজকাল একদল ডাক্তার যেন পেটেন্ট ওষুধ, ক্যাপসুল, ট্যাবলেট, ইনজেকশন দিয়েই সমস্ত চিকিৎসা করে, তেমনি খবরের কাগজের প্রায় সব রিপোর্টাররাই বাঁধাধরা গদে রিপোর্ট লিখতে পারে। রোগীর জন্য একটা মিক্‌চারের প্রেসক্রিপশন করতে হলে ডাক্তারবাবুর মস্তিস্কের ব্যায়াম করতে হয়। মামুলী খবরের কাগজের রিপোর্ট লেখার বাইরে কিছু লিখতে গেলেও রিপোর্টার-বাবুদের কিছু কেরামতি থাকা দরকার। আমার সে কেরামতি কোনকালেই ছিল না, আজও নেই। কিন্তু ঠেলার নাম বাবাজী। মেমসাহেবের চোখে জল, দীর্ঘ-নিশ্বাস সহ্য করা অসম্ভব বলেই আমি বাধা হয়ে কলম নিয়ে কেরামতি শুরু করলাম।

আমার সে কি দুর্দিন, তুমি তো কল্পনা করতে পারবে না। কাগজ কলম নিয়ে বদলেই বুক ফেটে কান্না আসত তবুও থামতে পারতাম না। কিন্তু চেষ্টা করলেই কি সব কিছু সম্ভব? আমার পক্ষে সম্ভব হলো না।

শেষকালে কি করলাম জান? প্রবন্ধ লেখা শুরু করলাম। কিছু বই-পত্র আর ম্যাগাজিন পড়ে প্রবন্ধ লেখা চালু করলাম। এ-কাজে নিজের বিদ্যার প্রয়োজন ছিল না, প্রয়োজন ছিল কিছুটা বুদ্ধির। আন্তে আন্তে সেগুলো ছাপা হতে লাগল। কিঞ্চিৎ অর্থপ্রাপ্তও ঘটত।

একদিন মেমসাহেবকে বললাম, ‘দেখছ, কেমন সুন্দর ঠকিয়ে রোজগার করছি।’

‘নিজের বিদ্যা-বুদ্ধি দিয়ে রোজগার করাকে ঠকানো বলে না।’

‘তাই বুদ্ধি?’

মেমসাহেব সেদিন বলেছিল, রাম নাম জপ করে যাও। অতশত ভাবতে হবে না, হয়ত একদিন ডাকতে ডাকতেই ভগবানের দেখা পেয়ে যাবে।

মেমসাহেবের পাল্লায় পড়ে সেই যে আমি কলম নিয়ে রাম নাম জপ শুরু করেছি, আজও থামতে পারি নি। বিধাতার বিচিত্র খেলালে মেমসাহেব কোথায় যেন হারিয়ে গেছে। জানি ও হয়ত আমার লেখা পড়তে পায় না বা পারে না। মাঝে মাঝে মনে হয় কার জন্য লিখব? কিসের জন্য লিখব? ভগবানের কৃপা হলে পশুও উত্তম গিরি লঙ্ঘন করতে পারে। আমি ভগবানের কৃপা লাভ করি নি, ভবিষ্যতেও নিশ্চয়ই করব না। জীবনে যা-কিছু পেয়েছি, যা-কিছু করেছি, তা সবই ঐ পোড়াকপালীর জন্য। ভালবাসা দিয়ে মেয়েটা আমাকে পাগল করে দিয়েছে এবং সেই পাগলামি করতে করতে আমি আমার জীবনটাকে নিয়ে জুয়া খেলেছি। স্বাভাবিক অবস্থায় সুস্থ মস্তিস্কে কোন মানুষ আমার মত জীবনটাকে নিয়ে এমন খেলা করতে সাহস পাবে না। আমি পেরেছি, আজও কিছু কিছু পারছি কিন্তু আগামীকাল থেকে আর পারব না। পারব কেমন করে বল? ঐ পোড়াকপালী আমাকে গাছে চড়িয়ে দিয়ে মইটা নিয়ে পালিয়ে গেছে। ডালে ডালে, পাতায় পাতায় আমি ঘুরে বেড়াচ্ছি। কিন্তু কতকাল?

সব কিছুই তো একটা সীমা আছে.....

কি লিখতে গিয়ে কি লিখে ফেললাম। মেমসাহেবের কথা লিখতে গেলে আমার মাথা ঘুরে উঠে, বুদ্ধিশ্রংশ হয়। উচিত-অনুচিত বিচার করতে পারি না। জীবনে কোনদিন ভাবি নি মেমসাহেবের কথা লিখব কিন্তু অবস্থার দুর্বিপাকে তোমাকে বাধ্য হয়েই লিখছি। আর কাউকে এসব নিশ্চয়ই লিখতাম না। তবে কি জান, চিঠিগুলো লিখে মনটা অনেক হালকা হচ্ছে ভয়ও হচ্ছে। ডাক্তারবাবুরা যেমন নিজেদের প্রিয় স্ত্রী-পুত্রের চিকিৎসা করতে সঙ্কোচবোধ করেন, আমিও তেমনি আমার মেমসাহেবের কথা লিখতে ভয় পাচ্ছি। ভাব দিয়ে, ভাষা দিয়ে মেমসাহেবের প্রতি সুবিচার করা আমার পক্ষে নিশ্চয়ই সম্ভব নয়। রাগ, অভিমান, ভালবাসার মধ্য দিয়ে ও কি আশ্চর্যভাবে আমার জীবন-নৌকায় পাল তুলে এগিয়ে নিয়ে গিয়েছিল, তা ঠিক করে বলা বা লেখার ক্ষমতা আমার নেই।

খবরের কাগজের রিপোর্টারী করার একটা নেশা আছে। সে নেশা প্রতি-দিনের। একটি দিনের উত্তেজনা, নেশা কাটতে-না-কাটতেই নতুন উত্তেজনার জোয়ার আসে রিপোর্টারদের জীবনে। তাছাড়া, সে উত্তেজনার বৈচিত্র রিপোর্টারদের আরো বেশি মাতাল করে তোলে। সেই উত্তেজনার ঘোরেই অধিকাংশ রিপোর্টারদের জীবন কেটে যায়। ইচ্ছা বা ক্ষমতা থাকলেও বিশেষ কিছু করা করার পক্ষেই সম্ভব হয় না। মেমসাহেব চায় নি আমার জীবনটা শুধু এমনি অহেতুক উত্তেজনায় ভরে থাকুক। সে চেয়েছিল আমার কর্মক্ষেত্রে আরো ব্যাপক ও বিস্তৃত করতে।

বোটানিক্যাল গার্ডেনের মধ্যে ঘুরতে ঘুরতে মেমসাহেব আমার হাত ধরে টেনে নিয়ে বললো, 'অত দূরে দূরে যাচ্ছ কেন?'

এটা তো তোমার ড্রইংরুম নয়.....

মেমসাহেব প্রায় বিদ্যুৎবেগে আমাকে জড়িয়ে ধরে একটা গাছের আড়ালে নিয়ে গেল। দু'হাত দিয়ে আমাকে জড়িয়ে ধরে বললো, 'তুমি রাগ করেছ?'

'পাগল! রাগ করব?'

'খুব বেশি রাগ করেছ, তাই না?'

'বিন্দুমাত্র রাগ করি নি। ভাল চাকরি পেতে হলে ইউ. পি. এস. সি'র পরীক্ষা দিতে হয়, পাস করতে হয়; তেমনি তোমাকে পেতে হলেও তো আমাকে কিছু কিছু পরীক্ষা দিতে হবে, পাস করতে হবে.....

ও হাত ধরে আমার মুখটা চেপে ধরে বলে, 'বাজে কথা বলো না।'

'বাজে না, মেমসাহেব। ইচ্ছা করলে আমার চাইতে অনেক বেশি সুপ্রতিষ্ঠিত কাউকে তুমি তোমার জীবনে পেতে পারতে কিন্তু একবার যখন আমার খেয়াঘাটে পিছলে পড়ে গেছ তখন আমাকেই তৈরি করার চেষ্টা করছ।'

একটা দীর্ঘনিশ্বাস ছেড়ে মেমসাহেব বললো, 'তোমার মনটা আজ বিক্ষিপ্ত। তাই আজ বলব না, দু'চারদিন পরে বলব।'

'পরে কেন? আজই বল।'

'আজ বললে তুমি বিশ্বাস করবে না।'

'তোমার ওপর রাগ করতে পারি কিন্তু অবিশ্বাস কোনদিন করব না।'

'ঠিক?'

'ঠিক।'

মেমসাহেব আমার হাতটা টেনে নিয়ে নিজের মাথার উপর দিয়ে বলে, 'আমার মাথায় হাত দিয়ে বল তুমি অবিশ্বাস করবে না?'

অত রাগ, অত দুঃখ, অত অভিমানের মধ্যেও আমার মুখে হাসির রেখা ফুটে উঠল। আমি ওর মাথায় হাত দিয়ে বললাম, 'সত্যি বলছি, তোমাকে কোনদিন অবিশ্বাস করব না।'

দু'জনে একটু এগিয়ে একটু ছায়ায় বসলাম। মেমসাহেব বললো, 'কর্মজীবনে সুপ্রতিষ্ঠিত অন্য কোন ছেলের সঙ্গে আমার বিয়ে হতে পারত, হয়ত সে তোমার চেয়ে ঢের বেশি রোজগার করত, কিন্তু আমার মনে হয় অত সুপ্রতিষ্ঠিত পুরুষের হৃদয় স্ত্রীর প্রতিষ্ঠা পাওয়া খুব দুর্লভ।'

একটু থামে। আবার বলে, 'দ্যাখ, ঠিক পরস্পর-কড়ির প্রতি আমার খুব বেশি মোহ নেই। একটু

সুখে-স্বাস্থ্যে থাকতে ইচ্ছা করে ঠিকই কিন্তু তাই বলে বেশি পরিশ্রম-কড়ি হলে মনটা নষ্ট হয়ে যায়। আমি তা চাই না।

আমি বললাম, 'তুমি যে প্রায় উদয়ের পথের ডায়ালগ বলা শুরু করলে।'

মেমসাহেব আমার হাতটা চেপে ধরে বললে, 'তুমি আমাকে অমন করে অপমান করো না। ইচ্ছা করলে শাসন করতে পার, বকতে পার কিন্তু ভালবাসা নিয়ে তুমি ঠাট্টা করো না।'

মেমসাহেবের গলার স্বরটা বেশ ভারী হয়ে এসেছিল। আমি বেশ বুঝলাম, এর পরের ধাপেই ঝর ঝর করে নেমে আসবে শ্রাবণধারা। ওর ঐ চোখের জল আমি সহ্য করতে পারব না বলে তাড়াহুড়ি ওর গাল টিপে বললাম, 'তুমি পাগল হয়েছ? তোমার ভালবাসা নিয়ে ঠাট্টা করব?'

মেমসাহেব একটু শান্তি পায়, স্বস্তি পায়। আমার কাঁধের ওপর মাথাটা রাখে। আমি ওর মুখে মাথায় হাত দিয়ে আদর করি। মেমসাহেব আরো আমার কাছে আসে। বলে, কেন যে তোমাকে ভালবেসেছি তা জানি না। হয়ত তুমি আমাকে অমন করে চেয়েছিলে বলেই আমি তোমাকে ফিরিয়ে দিতে পারি নি। অনেকদিন রাতে একলা চুপচাপ তোমার কথা ভেবেছি।'

'তাই নাকি?'

'তবে কি? ভাবিয়ে ভাবিয়ে তো তুমি আমাকে শেষ করলে।'

'তা তো বুঝলাম। কিন্তু আমার কাজকর্ম নিয়ে অত খিটখিট কর কেন?'

মাথাটা নাড়িয়ে মেমসাহেব বলে, 'খিটখিট করব না? তোমার মত ফাঁকিবাজ আড্ডাবাজ, স্ট্রেন লোককে খিটখিট না করলে কাজ করান সম্ভব?'

'যার স্ত্রী নেই, সে আবার স্ট্রেন হবে কেমন করে?'

বাজে বকো না। বিয়ে না করেই যা করছ সে আর বলার নয়। না জানি বিয়ে করলে কি করবে?'

জান দোলাবৌদি, মেমসাহেব ভীষণ দুষ্টমি করত। আমি আদর করলে গলে পড়ত, ভালবাসলে মুগ্ধ হতো, দুষ্টমি করলে উপভোগ করত। কিন্তু পরে আমাকে টিপ্তনী কাটার বেলায় এমন একটা ভাব দেখাত যে ওর যেন কোন তাগিদ নেই, সব কিছুই যেন আমার প্রয়োজন। যাই হোক সেদিন বোটনিক্যাল গার্ডেনে বসে বসে কি বলেছিল জান? বলেছিল, আমি চাই তুমি অনেক অনেক বড় হও। কেউ যেন বলতে না পারে আমি আসায় তোমার জীবনটা নষ্ট হয়ে গেল। এই তো নিজেকে গড়ে তোলার সময়। এর পর সংসারধর্মে জড়িয়ে নষ্ট করতে দেব না। আমার সমস্ত স্বপ্ন-সাধনা, শক্তি দিয়ে তোমাকে আমি সুরক্ষিত করবই।

আমি বলি তুমি নিজের জীবন তো এগিয়ে যাবে। বিদেশ যেতে পার, রিসার্চ করতে পার.....

মেমসাহেব অবাক হয়ে গেল, 'আমি? বিয়ের পর আমি কিছু করব না। চাকরি-বাকরি সব ছেড়ে দেব।'

'তবে কি করবে?'

'কি আবার করব? ঘর-সংসার করব।'

'তাই বলে চাকরি ছাড়বে কেন?'

'চাকরি করলে আর ছেলেমেয়ে মানুষ করা যায় না। তাছাড়া তোমার যা অদ্ভুত কাজ! কাজের তো ঠিক-ঠিকানা নেই। সুতরাং দু'জনেই বাইরে বাইরে থাকলে চলবে কেন?'

আবার পরে বললো, 'ঘর-সংসারের কাজকর্ম করে তোমার কাজকর্মে একটু সাহায্য করার চেষ্টা করব। তোমার মত জার্নালিস্ট না হতে পারি অন্তত তোমার সেক্রেটারি তো হতে পারব।'

এমনি করে একদিন অকস্মাৎ পিছন ফিরে দেখি আমার কর্মজীবনে একটা বিরাট পরিবর্তন এসে গেছে। দৈনন্দিন রিপোর্ট করা ছাড়াও নতুন নতুন লেখার কাজে বেশ ব্যস্ত হয়ে পড়লাম। ক্লিপিং করা, ফাইল করা, লাইব্রেরীতে গিয়ে নোটস নেওয়া, বইপত্র পড়া, তারপর লেখা এবং সে লেখা ছাপাবার ব্যবস্থা করা নিয়ে সারাটা দিন বেশ ব্যস্ততার মধ্যে কেটে যায়। রোজ রোজ মেমসাহেবের সঙ্গে দেখা করারও সময় হয় না।

ইতিমধ্যে উত্তরবঙ্গে সর্বনাশা বন্যা দেখা দিল। ঘর-বাড়ি-রেললাইন ভেঙ্গে গেল, জমিজমা ডুবে গেল, হাজার হাজার লক্ষ লক্ষ লোক হাহাকার করে উঠল। নিউজ এডিটরের নির্দেশে আমাকে ছুটতে হলো সেই বিধ্বংসী বন্যার রিপোর্ট করতে। মেমসাহেবকে কলেজে টেলিফোন করে খবরটা দিলাম।

টেশনে এসে আমার হাতে নির্মাল্য দিয়ে বলেছিল, 'কালীঘাটের মা'র নির্মাল্য। কাছে রেখো, কোন বিপদ হবে না।'

তখন নির্মাল্য দিয়েই শান্তি পায় নি। বিকুট-জ্যাম-জেলীর একটা বিরাট প্যাকেট দিয়ে বলেছিল, 'ফ্রাড এরিয়ার নিশ্চয়ই খাওয়া-দাওয়ার মুশকিল হবে। এগুলো রেখে দাও।'

দিন পনের বাদে আমি ঘুরে এলাম। মেমসাহেব তো আমাকে দেখে চমকে উঠল, 'তোমার এ কি অবস্থা?'

'কি আবার অবস্থা?'

'কি হয়েছে তোমার শরীর?'

'অনিয়ম-অত্যাচার হলে শরীর খারাপ হবে তাতে আশ্চর্য হবার কি আছে? ক'দিন পর আবার সব ঠিক হয়ে যাবে।'

সেদিন ও আর বিশেষ কিছু বললো না। পরের দিন এক বোতল টনিক নিয়ে হাজির। হুকুম হলো, 'দু'বেলা দু'চামচ করে খাবে। ভুল হয় না যেন। আর ঘন্টার ঘন্টার চা খাওয়াটো বন্ধ কর তো।

'চা খাওয়া বন্ধ করব?'

'কথাটা শুনে যেন আকাশ থেকে পড়লে বলে মনে হচ্ছে!'

'প্রায় তাই! সাকসেসফুল জার্নালিষ্টরা হইকি আর আনসাকসেসফুল জার্নালিষ্টরা চা খেয়েই তো বেঁচে থাকে। সেই চা ছেড়ে কি এবার হইকি খরব?'

'নিশ্চয়ই! তা না হলে আমার কপাল পোড়াবে কেমন করে।'

আমি নিয়ম-কানুন ছাড়া, বন্দনহীন উন্মত্ত পদ্মার মত বেশ জীবনটা কাটাচ্ছিলাম। ছন্দছাড়া জীবনটা বেশ লাগত। কিন্তু এই মেয়েটা এসে সব ওলট-পালট করে দিল। আমাকে প্রায় ভদ্রলোক করে তুলল। সর্বোপরি আমার চোখে, আমার প্রাণে একটা সুন্দর শান্ত সংসার-জীবনের স্বপ্ন একে দিল।

বারো

বহুজনকে দীর্ঘদিন তৈলমর্দন করেও কলকাতার কোন পত্র-পত্রিকার যখন কোন চাকরি জোটাতে পারলাম না, তখন এক্সপ্রেস আর ট্রনিকেলের ঐ সামান্য অস্থায়ী কাজও বড় ভাল লেগেছিল। কিন্তু কতকাল? মেমসাহেবকে নিয়ে আমার জীবনের ভবিষ্যৎ সম্পর্কে কোন অনিশ্চয়তা ছিল না। কর্মজীবনে সে অনিশ্চয়তা আমাকে এবার ধীরে ধীরে উষ্ম করতে লাগল।

দৈনন্দিন রিপোর্টিং ছাড়া প্রবন্ধ, কিচার ইত্যাদি লেখা ঠিকই চলছিল। কখনও এ কাগজে, কখনও সে কাগজে এসব লেখা ছাপাও হচ্ছিল। কোন কোন লেখা অমনোনীতও হচ্ছিল। মাঝে মাঝে দশ-পনের-বিশ টাকার মনিঅর্ডার বা চেকও পাচ্ছিলাম। মন্দ লাগছিল না। কিন্তু সাংবাদিক ফেরিওয়াল্লা হয়ে তো জীবন কাটাতে পারি না! এই অনিশ্চয়তার মধ্যে মেমসাহেবকে তো টেনে আনতে পারি না! তাছাড়া আমাকে পাশ কাটিয়ে অনেক পরিচিত নতুন ছেলে-ছোকরার দল অলিগলি দিয়ে কর্মজীবনের রেড রোড ধরে ফেলল। নিজেকে বড়ই অপদার্থ, অকর্মণ্য মনে হল।

মেমসাহেবকে আমি কিছু বলতাম না। নিজের মনে মনে অনেক কথাই চিন্তা করতাম। একবার ভাবলুম চুলোয় যাক জার্নালিজম! যদি খেতে-পরতে না পেলাম তবে আবার জার্নালিজম-এর শখ কেন? দুর্বল মুহূর্তে অন্য চাকরি-খাকরি নেবার কথাও ভাবলাম। কিন্তু পরের মুহূর্তে নিজের মনকে শাসন করেছি। বুঝিয়েছি, না, তা হয় না। এতবড় পরাজয় আমি মেনে নিতে পারব না। যৌবনেই যদি কর্মজীবনের এত বড় পরাজয় মেনে নিই তবে ভবিষ্যতে কি করব? কি নিয়ে লড়ব?

আবার ভেবেছি কলকাতা ছেড়ে পালিয়ে যাই। দিল্লী বোম্বে বা লডানে চলে যাই। কিন্তু পালিয়ে যাওয়া বললেই তো আর পালিয়ে যাওয়া যায় না। বিলেতে যেতে অনেক টাকার প্রয়োজন। সে টাকা আমার ছিল না। তাছাড়া বিলেত গিয়ে কি করতাম। বিলেত গিয়ে কেরানীগিরি বা বাস-কন্ডাক্টর হয়ে অ্যান্টনি সাহেব শখ কোনদিনই ছিল না। কয়েকটা দেশী কাগজের কাজ নিয়ে বিলেতে যাবার পন্থিকল্পনা অনেকদিন মনের মধ্যে ঊকিঝুকি দিয়েছিল কিন্তু তার জন্যও দেশের মধ্যে অনেক ঘোরাঘুরির প্রয়োজন ছিল। আমার পক্ষে তাও সম্ভব হয় নি। রাসবিহারী এডিন্যুর পোস্ট অফিসে

মেমসাহেবের কিছু টাকা ছিল। আমার কল্যাণে ইতিমধ্যেই-তাতে দু'একবার হাত পড়েছিল। সুতরাং ওদিকে হাত বাড়ানোর কথা আর ভাবতে পারলাম না।

দু'একবার অত্যন্ত আঞ্জিবাজে চিন্তাও মাথায় এসেছে। ভেবেছি মেমসাহেবকে কিছু না জানিয়ে অকস্মাৎ একদিন যেখানে হোক উধাও হয়ে যাই। যৌবনে প্রাণবন্ত সব ছেলেমেয়েরাই প্রেমে পড়ে। ক'জন সে প্রেম আঁকড়ে ধরে থাকতে পারে?

আমিও না হয় পারলাম না। কি হয়েছে তাতে? মেমসাহেব দু'চারদিন কান্নাকাটি করবে, দু'এক বেলা হয়ত উপবাস করবে। কেউ কেউ হয়ত কয়েকদিন উপহাস করবে, কেউ বা হয়ত কিছু কিছু অপ্রিয় মন্তব্য করবে। কিন্তু তারপর? নিশ্চয়ই সবকিছু ঠিক হয়ে যাবে। ডেভেলপমেন্ট ডিপার্টমেন্টের আমেরিকা ফেরত ফিনারি একসপার্ট সুবোধবাবু নিশ্চয়ই মেমসাহেবকে অপছন্দ করবেন না। তারপর শুভরূপে বুড়ো সাজ্জাদ হোসেনের সানাই বেজে উঠলে সুবোধবাবু জামাইবেশে হাজির হবেন। কিছু পরে মেমসাহেব বধুবেশে সুবোধকে মালা পরাবে, পুরোহিত মন্ত্র পড়ে সম্পত্তি ট্রান্সফার পাকাপাকি করবেন। তারপর বাসর। একটু হাসি, একটু ঠাট্টা, একটু ভাশাশা। লোকচক্ষুর আড়ালে হয়ত একটু স্পর্শ, একটু অনুভূতি। দেহমানে হয়ত বা একটু বিদুৎপ্রবাহ!

আমার মাথাটা একটু ঝিমঝিম করল। তবে সামলে নিলাম। পরের দিনটার জন্য খুব বেশি চিন্তা হয় না। কিন্তু তার পরের দিন। ফুলশয্যার কথা ভাবতে গিয়েই মাথাটা হঠাৎ ঘুরে উঠল। রাজনীতি দিয়ে সাজ্জাদ হোসেনের শয্যায় মেমসাহেবের একচ্ছত্র অধিপতিরূপে সুবোধ! তিলে তিলে ধীরে ধীরে যে মুকুল চব্বিশ-পঁচিশ বসন্তে পল্লবিত হয়ে আমার মানসপ্রতিমা মেমসাহেব হয়েছে, যার মনের কথা, দেহের উদ্ভাপ, বুকের স্পন্দন শুধু আমি জেনেছি, পেয়েছি ও অনুভব করেছি, সেই মেমসাহেবের অপ্সে সুবোধের স্পর্শ! অসম্ভব! তাছাড়া যে মেমসাহেব তার জীবনসর্বস্ব দিয়ে নৈবেদ্য সাজিয়ে আমাকে সুখী, সার্থক করতে চেয়েছে, তাকে এভাবে বঞ্চিত করে পালিয়ে যাব? না না, তা হয় না।

তবে?

তবে কি করব, তা ভেবে কোন কূলকিনারা পাচ্ছিলাম না। মনে মনে অবশ্য ঠিক করেছিলাম কলকাতায় আর বেশিদিন থাকব না। খবরের কাগজের রিপোর্টার হবার দৌলতে বাংলাদেশে বহু প্রথিতযশা লক্ষপ্রতিষ্ঠ মানুষের সঙ্গে পরিচিত হবার দুর্ভাগ্য আমার হয়েছিল।

দুর্ভাগ!

হ্যাঁ, দুর্ভাগ্য নয়ত কি বলব বল? কলকাতার ময়দানে মনুমেন্টের নিচে লক্ষ লক্ষ মানুষ এঁদের বক্তৃতা শোনে, হাততালি দেয়, গলায় মালা পরায়। প্রথম প্রথম এঁদের কাছে এসে নিজেকে কৃতার্থ মনে করতাম। শিক্ষা-সংস্কৃতির ধ্বজা উড়িয়ে যাঁরা সিনেট হল— ইউনিভার্সিটি ইনস্টিটিউট— মহাবোধি সোসাইটি হল গরম করে তুলতেন, তাঁদের সবাইকেই ঠিক শ্রদ্ধা করে উঠতে পারলাম না। সাড়ে তিন কোটি বাঙালী নারী-পুরুষ-শিশুর দল যাঁদের মুখ চেয়ে বসে আছে, যাঁদের বক্তৃতা আমরা নিত্য খবরের কাগজের পাতায় ছাপছি, তাদের স্বরূপটা প্রকাশ হওয়ায় আমি যে কি দুঃখ, কি আঘাত পেয়েছিলাম তা ভাষায় প্রকাশ করতে পারব না। কি কি কারণে এঁদের আমি শ্রদ্ধা করতে পারি নি-সে-কথা লেখার অযোগ্য। বিদ্যাসাগরের বাংলাভাষা দিয়ে এঁদের কাহিনী লিখলে বিদ্যাসাগরের স্মৃতির অবমাননা করা হবে, বাংলাভাষার অপব্যবহার করা হবে। তবে যদি এইসব মহাপুরুষের কথা লিখতে পারতাম, যদি সে ক্ষমতা আমার থাকত, তবে বাংলাদেশের কিছু মানুষ নিশ্চয়ই বাঁচতে পারত।

তুমি ভাবছ, আমি বাচালতা করছি। তাই না? সত্যি বলছি দোলাবৌদি, আমি একটুও বাচালতা করছি না। ইংরেজিতে যাকে বলে ট্র্যাডিশন, তা তো বাঙালীর আছে। শিক্ষা-দীক্ষা-আদর্শ ও দেশপ্রেমের অভাব তো বাংলাদেশে নেই। গ্রামে গ্রামে দরিদ্র গৃহিণীরা আজও স্কুধার অনু দিয়ে অতিথির সেবা করতে কার্পণ্য করে না। উদার বাঙলা বুক পেতে সারাদেশের মানুষকে আসন বিছিয়ে দিয়েছে। ভারতবর্ষের দিগন্ত থেকে লক্ষ লক্ষ মানুষ এসেছেন বাংলাদেশে। কিন্তু কই আর কোন শ্রদেশের মানুষ তো এমনি করে সারাদেশের মানুষকে নিয়ে সংসার করবার উদারতা দেখাতে পারে নি। রাজনীতির কথা না হয় ছেড়েই দিলাম, শিক্ষা-দীক্ষায় শিল্পে-সংগীতে বাঙালীর ঐদার্য অতুলনীয়। ভারতের ইতিহাস ওঁটার কোন প্রয়োজন নেই। ইদানীংকালের ইতিহাসই ধরা যাক। প্রমথেশ

বড়ুয়া, কুম্ভনলাল সায়গল, শীলা দেশাই বাঙালী নন কিন্তু বাংলাদেশের প্রতিটি মানুষের হৃদয়ে এঁদের অকলঙ্কিত আসন চিরকালের জন্য রইবে। বড়ে গোলাম আলি বাঁ-র গান শোনার জন্য একমাত্র বাংলাদেশের অতি সাধারণ মানুষেই সারা রাস্তির রাস্তার ফুটপাথে বসে থাকে। টি রাও, আপ্লা রাও, মেওয়ালাল বা লাল অমরানাথ, মুস্তাক আলিকে বাঙালীর ছেলেরা যা ভালবাসা দিয়েছে, তার কি কোন তুলনা হয়? হয় না দোলাবৌদি। হবে না।

শিক্ষা-দীক্ষা-আদর্শ ও সর্বোপরি হৃদয়বত্তা সন্তোষ বাঙালী কেন মরতে চলেছে? বাঙালীর ঘরে ঘরে কেন হাহাকার? কান্না? সারাদেশের মানুষ যখন নতুন প্রাণ-স্পন্দনে মাতোয়ারা তখন বাঙালীর এ-দুরবস্থা কেন? সাড়ে তিন কোটি বাঙালীর মুখ থেকে হাসি কেড়ে নিল কে? কেন সারা জাতটা সর্বহারা হলো?

আগে সবকিছুর জন্য অদৃষ্টকে ধিক্কার দিতাম। কৈশোর-যৌবনের সন্ধিক্ষণে আশা করতাম ময়দানে মনুমেন্টের তলায় নেতাদের গলায় মালা পরালে, তাঁদের বক্তৃতা শুনলে হাতে তালি দিলে বাঙালীর সর্বরোগের মহৌষধ পাওয়া যাবে। রিপোর্টারী করতে গিয়ে বড় আশা নিয়ে এঁদের কাছে গিয়েছিলাম। কিন্তু হা ভগবান! মনে মনে এমন ধাক্কাই খেলাম যে তা বলবার নয়।

ব্যক্তিগত জীবনের সাফল্য-ব্যর্থতা নিশ্চয়ই খুব জরুরি ব্যাপার। কিন্তু সাংবাদিকতা করতে গিয়ে সমাজজীবন থেকে নিজেকে বিচ্ছিন্ন করে রাখা অসম্ভব। তাই তো সমাজের সর্বোচ্চস্তরে ক্ষয়রোগ দেখে আঁতকে উঠেছিলাম। তাই তো কলকাতার জীবন আমার কাছে আরো ভেতো মনে হতে লাগল।

এই সব নানা অশান্তি মনকে তোলপাড় করে তুলেছিল। মুখে কিছুই প্রকাশ করছিলাম না। বন্ধু-বান্ধব সহকর্মীদের কেউই কিছু জানতে পারছিল না। আমার মনের মধ্যে কত চিন্তা-ভাবনার যে কি বিচিত্র লড়াই চলছিল, সে খবর কেউ জানতে পারল না। তবে মেমসাহেবকে ফাঁকি দিতে পারি নি।

সেদিন দু'জনে ন্যাশনাল লাইব্রেরিতে গিয়েছিলাম। নোটস নেওয়ার কাজ শেষ করে একটা গাছতলায় এসে বসলাম দু'জনে। আমি বোধহয় দৃষ্টি একটু অন্যদিকে ঘুরিয়ে নিয়ে কি যেন দেখছিলাম। মেমসাহেব বললো, 'ওগো, চিনেবাদাম আর দুটো ম্যাগনোলিয়া আইসক্রীম কিনে আনলাম। আইসক্রীম, চিনেবাদাম খাওয়া শেষ হয়েছে। মেমসাহেব তখনও একটু একটু ঝাল-নুন খাচ্ছে। আর জিভ দিয়ে রসান্বাদনের আওয়াজ করছে। ওর কখন ঝাল-নুন খাওয়া শেষ হয়েছে, কখন আমার কাছে রুমাল চেয়েছে তা আমি খেয়াল করি নি। মেমসাহেব হঠাৎ আমাকে একটা ঝাঁকুনি দিয়ে বললো, 'ওগো, রুমালটা দাও না?'

আমি রুমাল দিলাম। রুমাল দিয়ে হাতটা, মুখটা মুছে আবার আমাকে ফেরত দিল, 'এই নাও।' রুমালটা পকেটে রাখতে রাখতে আমি জিজ্ঞাসা করলাম, 'তোমার রুমাল কি হলো?' 'সর্বমঙ্গলার নির্মাল্য বেঁধে তোমাকে দিলাম না!'

'ওঃ! তাই তো!'

মেমসাহেব প্রশ্ন করল, 'একটা কথা বলবে?'

'কেন বলব না তো?'

ও একটু হাসল। বললো, 'আমাকে ছুঁয়ে বলতে পার তুমি কিছু ভাবছ না?'

কথা শেষ হতে-না-হতেই ও আমার হাতটা টেনে নিয়ে বুকের ওপর রেখে বলে, 'বল।'

আমি হাতটা সরিয়ে নিয়ে বলি, 'কি ছেলেমানুষি করছ।'

মেমসাহেব একটু হাসে, একটু ভাবে। বোধহয় আমার কথায় একটু দুঃখ পায়। ঐ ঘন কালো দুটো চোখ যেন শ্রাবণের মেঘের মত ভারী হয়ে উঠে। আমি এক ঝলক দেখে নিয়ে দৃষ্টিটা সরিয়ে নিই।

মেমসাহেবের একটা দীর্ঘনিশ্বাস পড়ল। -আমি দৃষ্টিটা আবার ঘুরিয়ে নিয়ে আসি। জানতে চায়, 'কি এত ভাবছ?'

আমি ভেবেছিলাম সহজভাবে মেমসাহেবকে এড়িয়ে যাব, কিছু বলব না। কিন্তু গভীর ভালবাসায় ওর দৃষ্টিটা এত স্বচ্ছ হয়েছিল যে, আমার মনের গভীর প্রদেশেরও কোন কিছু লুকানো সম্ভব ছিল না। ও তির জেনেছিল আমার মনটা একটু বিক্ষিপ্ত আছে। কিন্তু কি কারণে মনটা বিক্ষিপ্ত তা জানতে না পারায় মেমসাহেবের দুঃখ হওয়া স্বাভাবিক। সে-কথা উপলব্ধি করেও ওকে ঠিক সত্য কথাটা বলতে

আমার বেশ কুষ্ঠ হলো।

দু'চার মিনিট দু'জনেই চুপচাপ রইলাম। তারপর মেমসাহেব ডাকে, 'শোব।'

'বল।'

'তুমি কি আজকাল এমন কিছু ভাবছ যা আমাকে বলা যায় না?'

'তুমি কি পাগল হয়েছ?'

'তবে বলছ না কেন?'

অনিচ্ছাসত্ত্বেও একটা দীর্ঘনিশ্বাস পড়ল। বললাম, 'কি বলব মেমসাহেব? নতুন কিছুই ভাবছি না। ভাবছি নিজের কর্মজীবনের কথা। আর কতকাল এমনি অনিশ্চয়তার মধ্যে থাকব তাই খালি ভাবছি।'

মেমসাহেব উড়িয়েই দিল আমার কথাটা। বললো, 'তা এত ভাববার কি আছে? কেউ একটু আগে, কেউ বা একটু পরে জীবনে দাঁড়ায়। তুমি না হয় দু'বছর পরেই জীবনে দাঁড়াবে, তাকে কি ক্ষতি হলো?'

'ভাবব না? হকারের মত ফিরি করে রোজগার করতে আর ভাল লাগে না। হাজার হোক বয়স তো হচ্ছে!'

মেমসাহেব তাড়াতাড়ি আমাকে কাছে টেনে নেয়। দু'হাত দিয়ে আমার মুখটা তুলে ধরে বলে, 'ছি ছি, নিজেকে এত ছোট ভাবছ কেন?'

'ছোট ভাবতাম না তবুও যদি ভদ্রলোকের মত রোজগার করতে পারতাম!'

'তোমার কি টাকার দরকার?'

'না, না, টাকার আবার কি দরকার?'

'বল না, আমি তো মরে যাইনি?'

মেমসাহেব বড়ই উতলা আমার কথায়। জানতে চাইল, 'আর কি ভাবছ?'

'বলব?'

'নিশ্চয়ই।'

'ভাবছি, আমার এই অনিশ্চয়তার জীবনে তোমাকে কেন টেনে আনলাম। একটা আধা-বেকার জার্নালিস্টের সংসারে তোমাকে এনে কেন তোমার জীবন নষ্ট করব, তাই ভাবছি।'

মেমসাহেব রেগে ওঠে, 'চমৎকার! হাততালি দেব?'

• 'কেন ঠাট্টা করছ?'

'তোমার কথা শুনে আমি অবাক না হয়ে পারছি না। তোমার টাকা না থাকলে আমি তোমার কাছে ঠাই পাব না। আমাকে এত ছোট, এত নীচ ভাব?'

'পাগল কোথাকার? তোমাকে আমার সংসারে এনে যদি সুখ, শান্তি, মর্যাদা দিতে না পারি তবে.....'

ও আর এগুতে দিল না, 'তুমি দু'পাঁচশ টাকা রোজগার করলেই আমার শান্তি? টাকা হলেই বুঝ সবাই সুখী হয়?'

'না, তা হবে কেন? তবুও ভদ্রভাবে বাঁচার জন্য কিছু তো চাই?'

'আমার বা আমার সংসারের চিন্তা তোমার করতে হবে না। তুমি নিশ্চিত মনে কাজ করে যাও তো।'

কথায় কথায় বেলা যায়। সূর্যটা আস্তে আস্তে নিচে নামতে থাকে, গাছের ছায়া দীর্ঘতর হয়। বেলভেড়িয়ারের সুবিন্দীর্ণ প্রাসঙ্গ সূর্যরশ্মির বিদায়বেলার স্নিগ্ধ মিষ্টি আলোয় ভরে যায়।

মেমসাহেব আমার কাঁধে মাথা রাখে। 'ওগো, বল তুমি এমন আজেবাজে কথা ভাববে না। আজ না হয় ভগবান নাই দিলেন কিন্তু একদিন তিনি নিশ্চয়ই ভরিয়ে দেবেন তোমাকে।'

'তুমি বুঝি সবকিছু জান?'

'একশ'বার! ওয়েলিংটন স্কোয়ার আর মনুমেন্টের মিটিং কভার করেই তোমার জীবন কাটাতে হবে না।'

'তবে কি করব?'

‘কি না করবে তাই বল। দেশদেশান্তর ঘুরবে, কত বড় বড় লোকের সঙ্গে তোমার পরিচয় হবে, তুমি কত কি লিখবে.....’

‘তারপর?’

মেমসাহেব আমার গাল টিপে বলে, ‘তারপর আর বলব না। তোমার অহংকার হবে।’

আমার হাসি পায় মেমসাহেবের প্রলাপ শুনে। ‘তুমি কি বোঝে যাচ্ছ?’

ও অবাক হয়ে বলে, ‘আমি কেন বোঝে যাব?’

‘হিন্দী ফিল্মের গৌরি লেখার জন্য।’

‘অসত্য কোথাকার।’

সেদিন আমি শুধু একটা মোটামুটি ভাল চাকরির স্বপ্ন দেখতাম। আর? আর ভাবতাম, অফিস থেকে আমাকে একটা টেলিফোন দেবে। আমি অফিসের গাড়ি করে রাইটার্স বিল্ডিং, লালাবাজার যাব, পলিটিক্যাল পার্টিগুলোর অফিসে ঘুরে বেড়াব। চীফমিনিস্টারের সঙ্গে দার্জিলিং যাব। রাইটার্স বিল্ডিং-এর সেক্রেটারি, ডেপুটি সেক্রেটারিরা আমাকে উইশ করবেন, পুলিশ কমিশনার ভিড়ের মধ্যেও আমাকে চিনতে পারবেন, শ্যামপুকুর খানার ও-সি আমাকে কাটলেট খাওয়াবেন।

স্বপ্ন দেখারও একটা সীমা আছে। তাই তো আমি আর এগুতে পারতাম না। আজ সে-সব দিনের কথা ভেবে হাসি পায়। কোনদিন কি ভেবেছি আমি নেহরু-শাস্ত্রী-ইন্দিরার সঙ্গে পৃথিবীর পঞ্চমাহাদেশ ঘুরে বেড়াব? কোন দিন কি কল্পনা করতে পেরেছি বছর বছর বিলেত যাব? কোনদিন কি ভাবতে পেরেছি প্রাইম মিনিস্টারের সঙ্গে এয়ার ফোর্সের স্পেশাল প্লেনে দমদমে নামব? রাজত্ববনে থাকব? আরো অনেক কিছু ভাবি নি। ভাবি নি ভারতবর্ষের টপ লীডাররা আমার সঙ্গে রাজনীতি নিয়ে গোপন আলোচনা করবেন, হুইকি খেতে খেতে অ্যাথলেটদের সঙ্গে ইন্টারন্যাশনাল অ্যাফেয়ার্স ডিসকাস করব।

মেমসাহেব বোধহয় এসব ভাবত। কোথা থেকে, কেমন করে এসব ভাবনার সাহস সে পেত, তা আমি জানি না। তবে আমার কর্মজীবনের কৃষ্ণপক্ষেও সে আশা হারায় নি। তাই তো যতবার আমি নিরাশায় ভেঙে পড়েছি, যতবার আমি পরাজয় মেনে নিয়ে কর্মজীবনের পথ পাল্টাতে চেয়েছি, ও ততবার আমাকে তুলে ধরেছে। আশা দিয়েছে, ভরসা দিয়েছে, ভালবাসা দিয়েছে। কখনও কখনও শাসনও করেছে।

‘সবই বুঝি মেমসাহেব, কিন্তু এই কলকাতায় পরিচিত মানুষের দ্বারে দ্বারে আর কৃপাপ্রার্থী হয়ে ঘুরে বেড়াতে পারছি না!’

মেমসাহেব স্পষ্ট বললো, ‘কলকাতাতেই যে তোমায় থাকতে হবে এমন কি কথা আছে? যেখানে গিয়ে তুমি কাজ করে শান্তি পাবে সেখানেই যাও।’

এক মুহূর্ত চুপ করে ও আবার বললো, ‘আমি তো তোমাকে আঁচলের মধ্যে থাকতে বলি না।’

মেমসাহেব জীবনে একটা লক্ষ্য স্থির করেছিল। সে-লক্ষ্য ছিল আমার কল্যাণ, আমার প্রতিষ্ঠা। আর চেয়েছিল প্রাণভরে ভালবাসতে, ভালবাসা পেতে। মধ্যবিত্ত সংসারে কুমারী যুবতীর পক্ষে এমন অদ্ভুত লক্ষ্য স্থির করে এগিয়ে যাওয়া সহজ ব্যাপার নয়। মেমসাহেবের পক্ষেও সহজ হয় নি। বাধা এসেছে, বিপত্তি এসেছি, এসেছে প্রলোভন। এই তো সুবোধবাবু আমেরিকা থেকে ফেরার পর যখন ইঙ্গিত করলেন মেমসাহেবকে তাঁর বেশ পছন্দ, তখন বাড়ির অনেকেই অনেক দূর এগিয়েছিলেন।

মেমসাহেব কি বলেছিল জান? বলেছিল-মেজদি, মা’কে একটু বুঝিয়ে বলিস, রেডিমেড জামা-কাপড় দেখতে একটু চক্চক্ করে কিন্তু বেশিদিন টেকে না, তার চাইতে ছিট কিনে মাপমত নিজের হাতে তৈরি করা জিনিস অনেক ভাল হয়, অনেক বেশি সুন্দর হয়।

মেজদি ইঙ্গিত বুঝেছিল। তবে আমার সঙ্গে ঘুরেফিরে বেড়ানো নিয়ে মেমসাহেবের আত্মীয়মহলেও গুল্লন উঠেছিল। অপ্রিয় অসংযত আলোচনাও হতো মাঝে মাঝে। ও সে-সব গ্রাহ্য করত না। দেখ খোকনদা, আমি কচি মেয়ে নই। একটু-আধটু বুদ্ধি-সুদ্ধি আমার হয়েছে। কিছু কিছু ভালমন্দও বুঝতে শিখেছি।’

সব মিলিয়ে কলকাতার আকাশটা বেশ মেঘাচ্ছন্ন হয়ে উঠল। মেমসাহেবও ধীরে ধীরে উপলব্ধি করল আমি আর বেশিদিন কলকাতায় থাকলে দু’জনেরই মাথাটা খারাপ হয়ে উঠবে।

‘ওগো, সত্যি সত্যি এবার কোথাও যাবার ব্যবস্থা কর। আশ পাশের কতগুলো অপদার্থ মানুষের ভালবাসার ঠেলায় প্রাণ কেড়ে নিয়ে যাচ্ছে।’

‘আমাকে ছেড়ে-তু কী করতে পারবে?’

‘পারব। তবে যখন খুঁদি দু’জনে মিলব, সেদিন তো আর কেউ বিরক্ত করতে পারে না।’

আত্মীয়-বন্ধুর দল কেউ জানতে পারলেন না ধীরে ধীরে আমি দিল্লী যাবার উদ্যোগ আয়োজন শুরু করলাম। গোপনে গোপনে কিছু কিছু কাগজপত্রের অফিসে গিয়ে আলোচনা করলাম। শেষে একদিন অকস্মাৎ এক অপ্রত্যাশিত মহল থেকে এক নগণ্য সাপ্তাহিকের সম্পাদক বললেন, ‘দিল্লীতে আমার একজন করস্পনডেন্টের দরকার। তবে এখন তো একশ’ টাকার বেশি দিতে পারব না।’

কুছপরোয়া নেই, একশ’ টাকাই যথেষ্ট। কথা দিলাম, ‘ঠিক আছে, আমি যাব।’

‘কবে থেকে কাজ শুরু করবেন?’

‘আপনি যেদিন বলবেন।’

‘অ্যাঙ্ক্‌ আর্লি অ্যাঙ্ক্‌ ইউ ক্যান গো।’

মেমসাহেব পরের শনিবার ভোরবেলায় আমাকে নিয়ে কালীঘাটে গিয়ে পূজা দিল, প্রসাদ দিল, নির্মাল্য দিল। ‘এই নির্মাল্যটা সব সময় কাছে রেখো।’

সন্ধ্যাবেলায় দু’জনে মিলে ডায়মন্ড হারবারের দিকে গেলাম। বেশি কথা বলতে পারলাম না কেউ।

মেমসাহেব বললো, ‘আমার মন বলছে, তোমার ভাল হবেই। আমার যদি ভালবাসার জোর থাকে, তাহলে তোমার অমঙ্গল হতে পারে না।’

আমি শুধু বললাম, ‘তোমার দেওয়া নির্মাল্য আর তোমার ভালবাসা নিয়েই তো যাচ্ছি। আমার আর কি আছে বল?’

সন্ধ্যার আবহা অন্ধকার নামতে শুরু করেছিল। আমি উঠে দাঁড়িয়ে বললাম, ‘চল, এবার যাই।’ ও উঠল না। বসে রইল। ডাকল, ‘শোন।’

‘বল।’

‘কাছে এস। কানে কানে বলব।’

কানে কানে কি বললো জান? বললো, ‘আমাকে একটু জড়িয়ে ধরে আদর করবে?’

আবহা অন্ধকার আরো একটু গাঢ় হলো। আমি দু’হাত দিয়ে মেমসাহেবকে টেনে বুকের মধ্যে। সমস্ত অন্তর দিয়ে, সমস্ত মন-প্রাণ দিয়ে অনেক আদর করলাম।

তারপর মাথায় আঁচল দিয়ে ও আমাকে প্রণাম করল। ‘আশীর্বাদ করো আমি যেন তোমাকে সুখী করতে পারি।’

যুধিষ্ঠির রাজত্ব ও দ্রৌপদীকে পণ রেখে পাশা খেলেছিলাম। আমার রাজত্ব ছিল না। তাই নিজের জীবন আর মেমসাহেবের ভালবাসা পণ রেখে আমি কর্মজীবনের পাশা খেলতে যুধিষ্ঠিরের স্মৃতি বিজড়িত অতীতের ইন্দ্রপ্রস্থ, বর্তমানের দিল্লী এলাম।

তেরো

বাঙালী ছেলেরা ঘর ছেড়ে বেরুতে চায় না বলে একদল পেশাদার অন্ধ রাজনীতিবিদ অভিযোগ করেন। অভিযোগটি সর্বৈব মিথ্যা। মহেঞ্জোদারো বা হরপ্পার যুগের কথা আমি জানি না। তবে ইংরেজ রাজত্বের প্রথম ও মধ্যযুগে লক্ষ লক্ষ বাঙালী সমগ্র উত্তর ভারতে ছড়িয়েছেন। কুজি-রোজগার করতে বাঙালী কোথাও যেতে দ্বিধা করে নি। সুদূর রাওয়ালপিন্ডি, পেশোয়ার, সিমলা পর্যন্ত বাঙালীরা গিয়েছেন, থেকেছেন, থিয়েটার করেছেন, কালীবাড়ি গড়েছেন।

এই যাওয়ার পিছনে একটা কারণ ছিল। প্রথমত, বাঙালীরাই আগে ইংরেজি শিক্ষা গ্রহণ করে সরকারী অফিসে বাবু হবার বিশেষ যোগ্যতা অর্জন করেন। সবাই যে কুইন ভিক্টোরিয়ার অ্যাপয়েন্টমেন্ট লেটার হাতে করে হাওড়া স্টেশন থেকে পাঞ্জাব মেলে চাপতেন, তা নয়। তবে রাওয়ালপিন্ডি মিলিটারী একাউন্টস অফিসে কোন-না-কোন মেসোমশাই পিসেমশাই-এর আমন্ত্রণে অনেকেই বাংলা ত্যাগ করেছেন।

পরে বাঙালী ছেলে-ছোকরারা বোমা-পটকা ছুঁড়ে ইংরেজদের ল্যাজে আপন দেবার কাজে মেতে ওঠায় সরকারী চাকরির বাজারে বাঙালীর দাম কমতে লাগল। ইতিমধ্যে ভারতবর্ষের দিকে দিকে ইংরেজি শিক্ষা প্রসার হওয়ায় সরকারী অফিসে বাবু যোগাড় করতে ইংরেজকে আর শুধু বাঙালীর দিকে চাইবার প্রয়োজন হলো না। বাঙালীর বাংলার বাইরে যাবার বাজারে তাঁটা পড়ল।

জীবনযুদ্ধে ধীরে ধীরে বাঙালীর পরাজয় যত বেশি প্রকাশ হতে লাগল, মিথ্যা আত্মসম্মানবোধ বাঙালীকে তত বেশি পেয়ে বসল। রাজনৈতিক ও অর্থনৈতিক চক্রান্তের সঙ্গে সঙ্গে বাঙালীর এই আত্মসম্মানবোধ তাকে প্রায় বাংলাদেশে বন্দী করে তুলল। বাংলাদেশের নব্য যুবসমাজ চক্রান্ত ভাঙতে পারত গড়তে পারত নিজেদের ভবিষ্যৎ আগ্রাহ্য করতে পারত অদৃষ্টের অভিশাপ। কিন্তু দুঃখের বিষয় তা সম্ভব হলো না। মোহনবাগান-ইন্সটিটিউট, সূচিন্দ্রা-উত্তম, সন্ধ্যা মুখুজ্যে, শ্যামলমিত্র, বিষ্ণু দে-সুধীন দত্ত, সত্যজিৎ-তপন সিংহ থেকে শুরু করে নানাকিছুর দৌলতে বেকার বাঙালী চরম উদ্বেজনা ও কর্মচাঞ্চল্যের মধ্যে জীবন কাটায়। এই উদ্বেজনা, কর্মচাঞ্চল্যের মোহ আছে সত্য কিন্তু সার্থকতা কতটা আছে তা ঠিক জানি না।

কলকাতায় রিপোর্টারি করতে গিয়ে বাংলাদেশের বহু মনীষীর উপদেশ পেয়েছি, পরামর্শ পেয়েছি, কিন্তু পাই নি অনুপ্রেরণা। নিজেদের আসন অটুট রেখে, নিজেদের স্বার্থ বজায় রেখে তাঁরা শুধু রিক্ত নিঃস্ব বুড়ুক বাঙালী ছেলেমেয়েদের হাততালি চান। সাড়ে তিন কোটি বাঙালীকে বিকলাঙ্গ করে সাড়ে তিন ডজন নেতা আনন্দে মশগুল।

উদার মহৎ মানুষের অভাব বাংলাদেশে নেই। প্রতিটি পাড়ায় মহান্যায়, গ্রামে-শহরে-নগরে বহু মহাপ্রাণ বাঙালী আজ রয়েছেন। কিন্তু অন্যায়, অবিচার, অসৎ-এর অরণ্যে তাঁরা হারিয়ে গেছেন।

কলকাতার এই বিচিত্র পরিবেশে থাকতে থাকতে আমার মনটা বেশ তেতো হয়েছিল। আশপাশের অসংখ্য মানুষের অবহেলা আর বেশ তেতো হয়েছিল। সবার অজান্তে, অলক্ষ্যে মন আমার বিদ্রোহ করত কিন্তু রাস্তা খুঁজে পেতাম না। এক পা এগিয়ে তিন পা পিছিয়ে যেতাম। সমাজ-সংসার-সংস্কারের জাল থেকে নিজেকে মুক্ত করে বেরতে গিয়ে ভয় করত। ঘাবড়ে যেতাম।

নিজের মনের মধ্যে যে এইসব বন্দু ছিল, তা মেমসাহেবকেও বলতাম না। কিন্তু ভিতরে ভিতরে আমি চঞ্চল হয়ে উঠেছিলাম। তাই তো নিয়তির খেলাঘরে মেমসাহেবকে নিয়ে খেলতে গিয়ে যেদিন সত্যি সত্যিই ভবিষ্যতের অন্ধকারে কাঁপ দিলাম, সেদিন মুহূর্তের জন্য পিছনে ফিরে তাকাই নি। মনের মধ্যে দাউদাউ করে আপন জ্বলে উঠেছিল। হয়ত প্রতিহিংসা আমাকে আরো কঠোর কঠিন করেছিল

আর?

মেমসাহেবকে আর দূরে রাখতে পারছিলাম না। জীবন সংগ্রামের জন্য প্রতিটি মুহূর্ত তিলে তিলে দখল হওয়ায়, দিনের শেষে রাতের অন্ধকারে মেমসাহেবের একটু কোমল স্পর্শ পাবার জন্য মনটা সত্যি বড় ব্যাকুল হতো। জীবন সংগ্রাম কঠোর থেকে কঠোরতর হতে পারে কর্মজীবনের সমস্ত উদ্বেজনা থেকে বহু দূরে মানসলোকের নির্জন সৈকতে বন্ধনহীন মন মুক্তি চাইত মেমসাহেবের অন্তরে।

স্বপ্ন দেখতাম আমি ঘরে ফিরেছি। ঘরে ঢুকতে না ঢুকতেই আমি সুইচটা 'অফ' করে দিয়ে মেমসাহেবকে অকস্মাৎ একটু আদর করে তার সর্বাত্মক ভালবাসার ঢেউ তুলেছি। দুটি বাহুর মধ্যে তাকে বন্দিনী করে নিজের মনের সব দৈন্য দূর করেছি, সারাদিনের সমস্ত গ্লানি মুছে ফেলেছি।

মেমসাহেব আমার দুটি বাহু থেকে মুক্তি পাবার কোন চেষ্টা করে না, কিন্তু বলে, 'আঃ' ছাড় না। ঐ দুটি একটি মুহূর্তের অন্ধকারেই মেমসাহেবের ভালবাসার জেনারেটরে আমার মনের সব বালবুগলো জ্বালিয়ে নিই।

তারপর মেমসাহেবকে টানতে টানতে ভিত্তানের 'পর ফেলে দিই। আমিও হুমড়ি খেয়ে পড়ি ওর ওপর। অবাক কিয়মে ওর দুটি চোখের দিকে তাকিয়ে থাকি। মেমসাহেবও স্থির দৃষ্টিতে আমার দিকে চেয়ে থাকে। অত নিবিড় করে দু'জন দু'জনকে কাছে পাওয়ায় দু'জনের চোখে নেশা লাগে। সে দেশায় দু'জনেই হয়ত একটু মাতলামি করি।

হয়ত বলি, জান মেমসাহেব, তোমার ঐ দুটো চোখের দিকে তাকিয়ে যখন আমার নেশা হয়,

যখন আমি সমস্ত সংঘম হারিয়ে মাতলামি পাগলামি করি, তখন জিগর মুরাদাবাদীর একটা 'শের' মনে পড়ে।

পাশ ফিরে আর শোয় না মেমসাহেব। চিত হয়ে গুয়ে দু'হাত দিয়ে গলাটা জড়িয়ে ধরে বলে, বল না কোন 'শের'টা তোমার মনে পড়েছে।

আমি এবার বলি, 'তেরি আঁখো কা কুছ কসুর নেহি, মুঝকো খারাব হোনা থা।'.....

বুঝলে মেমসাহেব, তোমার চোখের কোন দোষ নেই আমি খারাপ হতামই।

চোখটা ঘুরিয়ে ফিরিয়ে একটু চলচলভাবে ও বলে, তাতো একশ'বার সত্যি! আমি কেন তোমাকে খারাপ করতে যাব?

আমি কানে কানে ফিসফিস করে বলি, আমার আবার খারাপ হতে ইচ্ছে করছে।

ও তিড়িং করে একলাফে উঠে বসে আমার গালে একটা ছোট্ট গিটি চড় মেনে বলে, অসভ্য কোথাকার!

আরো কত কি ভাবতাম। ভাবতে ভাবতে আমি পাগল হবার উপক্রম হতাম। শত-সহস্র কাজকর্ম চিন্তা-ভাবনার মধ্যেও মেমসাহেবের ছবিটা সবসময় মনের পর্দায় ফুটে উঠত। তাই তো দিল্লী আসার সঙ্গে সঙ্গে ঠিক করলাম 'করেঙ্গে ইয়ে মরেঙ্গে' হয়ে অদৃষ্টির বিরুদ্ধে লড়াই করে নিজেকে প্রতিষ্ঠা করতে হবে কর্মজীবনে। আর? মেমসাহেবকে প্রতিষ্ঠা করতে হবে আমার জীবনে।

দোলাবৌদি, আমি শিবনাথ শাস্ত্রী বা বিদ্যাসাগর নই যে আত্মজীবনী লিখব। তবে বিশ্বাস কর, দিল্লীর মাটিতে পা দেবার সঙ্গে সঙ্গে আমি একেবারে পাল্টে গিয়েছিলাম। যেদিন প্রথম দিল্লী স্টেশনে নামি, সেদিন একজন নগণ্যতম মানুষও আমাকে অভ্যর্থনা জানাতে উপস্থিত ছিলেন না। এতবড় রাজধানীতে একটি বন্ধ বা পরিচিত মানুষ খুঁজে পাই নি। একটু আশ্রয়, একটু সাহায্যে আশা করতে পারি নি কোথাও। দিল্লীর প্রচণ্ড গ্রীষ্মে ও শীতে নিঃস্ব রিক্ত হয়ে আমি কিভাবে ঘুরে বেড়িয়েছি তা আজ লিখতে গেলেও পা শিউরে ওঠে। কিন্তু তবুও আমি মাথা নিচু করি নি।

একটি বছরের মধ্যে রাতকে দিন করে ফেললাম। শুধু মনের জোর করে নিষ্ঠা দিয়ে অদৃষ্টির মোড় ঘুরিয়ে দিলাম। পার্লামেন্ট হাউস বা সাউথ ব্লকের এক্সটারন্যাল অ্যাফেয়ার্স মিনিস্ট্রি থেকে বেরবার মুখে দেখা হলে স্বয়ং প্রাইম মিনিস্টার আমাকে বলতেন, 'হাউ আর ইউ?'

আমি বলতাম, 'ফাইন, থ্যান্ক ইউ স্যার!'

ভূমি ভাবছ হয়ত ওল মারছি। কিন্তু সত্যি বলছি—এমনই হতো। একদিন আমার সেই অতীতের অখ্যাত ইউকলির একটা আর্টিকেল দেখাবার জন্য তিন মূর্তি ডবনে গিয়েছিলাম। আর্টিকেলটা দেখাবার পর প্রাইম মিনিস্টার জিজ্ঞাসা করলেন, 'আর ইউ নিউ টু দেলহি?'

'ইয়েস স্যার।'

'কবে এসেছ?'

'এই তো মাস চারেক।'

তারপর যখন শুনেছেন আমি ঐ অখ্যাত ইউকলির একশ' টাকার চাকরি নিয়ে দিল্লী এসেছি তখন প্রশ্ন করলেন, 'আর ইউ টেলিফোন লাই?'

'নো স্যার।'

'এই মাইনেতে দিল্লীতে টিকতে পারবে?'

'সার্ভেনলি স্যার!'

শেষে প্রাইম মিনিস্টার বলেছিলেন, 'গুড লাক টু ইউ। সী মী ফ্রম টাইম টু টাইম।'

দেখতে দেখতে কত অসংখ্য মানুষের সঙ্গে পরিচয় হলো, ঘনিষ্ঠতা হলো। কত মানুষের ভালবাসা পেলাম। কত অফিসার, কত এম-পি কত মিনিস্টারের সঙ্গে আমার পরিচয় হলো। নিত্য-নতুন নিউজ পেতে শুরু করলাম। উইকলি থেকে ডেইলিতে চাকরি পেলাম।

আমি দিল্লীতে আসার মাস কয়েকের মধ্যেই মেমসাহেব একবার দিল্লী আসতে চেয়েছিল। আমি বলেছিলাম, না এখন নয়। একটি মুহূর্ত নষ্ট করাও এখন ঠিক হবে না আমাকে একটু দাঁড়াতে দাও, একটু নিশ্বাস ফেলার অবকাশ দাও। তারপর এসো।

ভাবতে পার মুহূর্তের জন্য যে মেমসাহেবের স্পর্শ পাবার আশায় প্রায় কাঙালের মত ঘুরেছি,

সেই মেমসাহেবকে আমি দিল্লী আসতে দিই নি। মেমসাহেব রাগ করে নি। উপলক্ষি করেছিল আমার কথা। চিঠি পেলাম— শুণো, কি আশ্চর্যভাবে তুমি আমার জীবনে এলে, সে কথা ভাবলেও অবাক লাগে, কলেজ-ইউনিভার্সিটির জীবনে, সোশ্যাল রি-ইউনিয়ন বা বরীন্দ্র জয়ন্তী-বসন্তোৎসবে কত ছেলের সঙ্গে আলাপ-পরিচয় হয়েছে। কাউকে ভাল লেগেছে, কাউকে ভাল লাগে নি। দু'একজন হয়ত আমাকে নিয়ে স্বপ্ন দেখেছে। আন্ততঃ বিস্তিৎ-এর ঐ কোণায় ঘরে গান-বাজনার রিহার্সাল দিয়ে বাড়ি কেন্নার পথে মদন চৌধুরী হঠাৎ আমার ডান হাতটা চেপে ধরে ভালবাসা জানিয়েছে। বিয়ে করতেও চেয়েছে। ভালভালার মোড়ের সেই যে ভালভোলা দেশপ্রেমিক, তিনিও একদিন আত্মনিবেদন করেছিলেন আমাকে।

মুহূর্তের জন্য চমকে গেছি কিন্তু ধমকে দাঁড়াই নি। তারপর যেদিন তুমি আমার জীবনে এলে, সেদিন কে যেন আমার সব শক্তি কেড়ে নিল। কে যেন কানে কানে ফিসফিস করে বললো, এই সেই!

তুমি তো জান আমি আর কোনদিকে ফিরে তাকাই নি। শুধু তোমার মুখের দিকে চেয়ে আছি। তোমাকে আমার জীবনদেবতার আসনে বসিয়ে পূজা করেছি, নিজের সর্বস্ব কিছু দিয়ে তোমাকে অঞ্জলি দিয়েছি। মন্ত্র পড়ে, যজ্ঞ করে সর্বসমক্ষে আমাদের বিয়ে আজও হয়নি। কিন্তু আমি জানি তুমি আমার স্বামী, তুমি আমার ভবিষ্যৎ সন্তানের পিতা।

মেমসাহেব বেশি কথা বলত না, কিন্তু খুব সন্দুর বড় বড় চিঠি লিখতে পারত। এই চিঠিটাও অনেক বড়। সবটা তোমাকে লেখার প্রয়োজন নেই। তবে শেষের দিকে কি লিখেছিল জান? লিখেছিল-'..... তুমি যে এমন করে আমাকে চমকে দেবে, আমি ভাবতে পারি নি। ভেবেছিলাম ঘুরে-ফিরে একটা কাগজে চাকরি যোগাড় করবে। কিন্তু এই সামান্য ক'মাসের মধ্যে তুমি এমন করে নিজেকে দিল্লীর মত অপরিচিত শহরে এত বড় বড় রথীমহারথীদের মধ্যে নিজেকে প্রতিষ্ঠা করতে পারবে, সত্যি আমি তা কল্পনা করতে পারি নি। তোমার মধ্যে যে এতটা আত্মন লুকিয়ে ছিল, আমি তা বুঝতে পারি নি।.....

যাই হোক, তোমার গর্বে আমার সারা বুকটা ভরে উঠেছে। মনে হচ্ছে আমার চাইতে সুখী স্ত্রী আর কেউ হতে পারবে না। আমি সত্যি বড় খুশী, বড় আনন্দিত। তোমার এই সাফল্যের জন্য তোমাকে একটা পুরস্কার দেব। কি দেব জান? যা চাইবে তাই দেব। বুঝলে? আর কোন আপত্তি করব না। আর আপত্তি করলে তুমিই বা তনবে কেন-?

দোলাবৌদি, তুমি কল্পনা করতে পার মেমসাহেবের ঐ চিঠি পড়ে আমার কি প্রতিক্রিয়া হলো? প্রথমে ভেবেছিলাম দু' একদিনের জন্য কলকাতা যাই। মেমসাহেবের পুরস্কার নিয়ে আসি। কিন্তু কাজকর্ম পরসাকড়ির হিসাব-নিকাশ করে আর যেতে পারলাম না।

তবে মনে মনে এই ভেবে শান্তি পেলাম যে, আমাকে বঞ্চিত করে কুপণের মত অনেক ঐশ্বর্য ভবিষ্যতের জন্য অন্যায়ভাবে গচ্ছিত রেখে মেমসাহেবের মনে অনুশোচনা দেখা দিয়েছে। আমি হাজার মাইল দূরে পালিয়ে এসেছিলাম। মেমসাহেব সেই আদর, ভালবাসা, সেই মজা, রসিকতা কিছুই উপভোগ করছিল না। আমাকে যতই বাধা দিক আমি জানতাম রোজ আমার একটু আদর না পেলে ও শান্তি পেত না। আমি বেশ অনুমান করছিলাম ওর কি কষ্ট হচ্ছে; উপলক্ষি করছিলাম আমাকে কাছে না পাবার অতৃপ্তি ওকে কিভাবে পীড়া দিচ্ছে।

মনে মনে অনেক কষ্ট পেলেও ওর আসাটা বন্ধ করে ভালই করেছিলাম। দিল্লীতে আসার জন্য ও যে বেশ উতলা হয়েছিল সেটা বুঝতে কষ্ট হয় নি। তাই তো আরো তাড়াতাড়ি নিজেকে প্রস্তুত করার জন্য আমি সর্বশক্তি নিয়োগ করলাম। ঠিক করলাম ওকে এনে চমকে দেবো।

ভগবান আমাকে অনেকদিন বঞ্চিত করে অনেক কষ্ট দিয়েছেন। দুঃখে অপমানে বছরের পর বছর জ্বলেপুড়ে মরেছি। কলকাতার শহরে এমন দিনও গেছে যখন মাত্র একটা পয়সার অভাবে সেকেন্ড ক্লাস ট্রামে পর্যন্ত চড়তে পারি নি। কিন্তু কি আশ্চর্য! দিল্লীতে আসার পর আগের সবকিছু ওলট-পালট হয়ে গেল। সে পরিবর্তনের বিস্তৃত ইতিহাস তোমার এই চিঠিতে লেখার নয়। সুযোগ পেলে শোনাও। তবে বিশ্বাস কর অবিশ্বাস্য পরিবর্তন এলো আমার কর্মজীবনে। সাফল্যের আকস্মিক বন্যায় আমি নিজেকে সেখাে অবাক হয়ে পেলাম।

মাস দু'রেক পরে মেমসাহেব যখন আমাকে দেখাবার জন্য দিল্লী এলো, তখন আমি সবে বোডিং

হাউসের মায়া কাটিয়ে ওয়েস্টার্ন কোর্টে এসেছি। নিশ্চিত জানতাম মেমসাহেব আমাকে দেখে, ওয়েস্টার্ন কোর্টে আমার ঘর দেখে, আমার কাজকর্ম, আমার জীবনধারা দেখে চমকে যাবে। কিন্তু আমি চমকে দেবার আগেই ও আমাকে চমকে দিল।

নিউ দিল্লী স্টেশনে গেলে ডিল্লিয়ার্স এয়ার কন্ডিশনড এক্সপ্রেস অ্যাটেন্ড করতে। মেমসাহেব আসছে। জীবনের এক অধ্যায় শেষ করে নতুন অধ্যায় শুরু করার পর ওর সঙ্গে এই প্রথম দেখা হবে।

লাউডস্পীকারে অ্যানাউন্সমেন্ট হলো এ-সি-সি এক্সপ্রেস এক্ষুনি এক নম্বর প্ল্যাটফর্মে পৌঁছবে। আমি সানগ্লাসটা খুলে রুমাল দিয়ে মুখটা আর একবার মুছে নিলাম। একটা সিগারেট ধরিয়ে দু'একটা টান দিতে না দিতেই ট্রেনটা প্ল্যাটফর্মে ঢুকে পড়ল। এদিক-ওদিক দেখতে না দেখতেই মেমসাহেব দু'নম্বর চেয়ার করার থেকে বেরিয়ে এলো। কিন্তু একি? মেমসাহেবের কি বিয়ে হয়েছে? এত সাজ-গোজ? এত গহনা? মাথায় কাপড়, কপালে এতবড় সিঁদুরের টিপ।

মেমসাহেবকে কোনদিন এত সাজগোজ করতে দেখি নি। গহনা? শুধু ডান হাতে একটা কঙ্কণ। ব্যাল, আর কিছু না। গলায় হার? না, তাও না। কোন-এক বন্ধুর বিপদে সাহায্য করার জন্য গলার হার দিয়েছে। তাছাড়া মাথায় কাপড় আর কপালে এতবড় একটা সিঁদুরের টিপ দেখে অবাক হবার চাইতে ঘাবড়ে গেলাম বেশি। মুহূর্তের জন্য পারের নিচে থেকে যেন মাটি সরে গেল। গলাটা শুকিয়ে এলো, কপালে বিন্দু বিন্দু ঘাম দেখা দিল, দুনিয়াটা ওলট-পালট হয়ে গেল। প্রথমে ভাবলাম, স্টেশন প্ল্যাটফর্মে ঐ কয়েক হাজার লোকের সামনে ওর গালে ঠাস করে চড় মারি। বলি, আমাকে অপমান করার জন্য এত দূরে না এসে শুধু ইনভিটেশন লেটারটা পাঠালেই তো হতো।

আবার ভাবলাম, না ওসব কিছু করব না, বলব না।

বিশেষ কথাবার্তা না বলে সোজা গিয়ে ট্যাক্সি চড়লাম।

ট্যাক্সিতে উঠেই মেমসাহেব আমাকে প্রণাম করল। আমার বাঁ হাতটা টেনে নিল নিজের ডান হাতের মধ্যে। জিজ্ঞাসা করল, 'কেমন আছ?'

'আমার কথা ছেড়ে দাও। এখন বল তুমি কেমন আছ? তোমার বিয়ে কেমন হলো? বর কেমন হলো? সর্বোপরি তুমি দিল্লী এলে কেন?'

মেমসাহেব গলে গেল, 'সত্যি বলছি, তুমি আমাকে ক্ষমা কর। এমন হঠাৎ সবকিছু হয়ে গেল যে কাউকেই খবর দেওয়া হয় নি.....'

'ছেলেটি কেমন?'

'বেশ গর্বের সঙ্গে উত্তর এলো 'ব্রিলিয়ান্ট।'

'কোথায় গাকেন?'

'এই তো তোমাদের দিল্লীতেই।'

আমি চমকে উঠি, 'দিল্লীতে?'

ও আমার গলাটা একটু টিপে দিয়ে বলে, 'ইয়েস্ স্যার! তবে কি আমার বর আদি সপ্তগ্রাম বা মহলান্দপুরে থাকবে?'

ট্যাক্সি কনট্রোল ঘুরে জনপথ' এ ঢুকে পড়ল। আর এক মিনিটের মধ্যেই ওয়েস্টার্ন কোর্ট এসে যাবে। জিজ্ঞাসা করলাম, 'এখন কোথায় যাবে?'

কোথায় আবার? তোমার ওখানে।'

ট্যাক্সি ওয়েস্টার্ন কোর্টে ঢুকে পড়ল। ধামল। আমরা নামলাম। ভাড়া মিটিয়ে ছোট্ট সুটকেসটা হাতে করে ভিতরে ঢুকলাম।

রিসেপশন থেকে চাবি নিয়ে লিফট-এ চড়লাম। তিনতলায় গেলাম। আমার ঘরে এলাম।

মাথায় কাপড় ফেলে দিয়ে দু'হাত দিয়ে মেমসাহেব আমাকে জড়িয়ে ধরে বললো, 'আঃ! কি শান্তি!'

আমার বুকটা জ্বলে উঠেছিল। কিন্তু সঙ্গে সঙ্গেই থেমে গেল। ওর সিঁথিতে সিঁদুর না দেখে বুঝলাম..... এবার আমিও আর স্থির থাকতে পারলাম না। দু'হাত দিয়ে টেনে নিলাম বুকের মধ্যে। আদর করে, ভালবাসা দিয়ে ওকে ক্ষতবিক্ষত করে দিলাম আমি। মেমসাহেবও তার উন্মত্ত যৌবনের নিমাই শ্রেষ্ঠ-৫

জোয়ারে অনেকদূর জাসিয়ে নিয়ে গেল। আমার দেহে মনে ওর ভালবাসা, আবেগ উচ্ছলতার পলিমাটি মাখিয়ে দিয়ে গেল। আমার মন আরো উর্বরা হলো।

এতদিন পরে দু'জনে দু'জনকে কাছে পেয়ে প্রায় উন্মাদ হয়ে উঠেছিলাম। কতক্ষণ যে ঐ জোয়ারের জলে ডুবেছিলাম, তা মনে নেই। তবে সখিত ফিরে এলো, দরজায় নক করার আওয়াজ শুনে। ডাড়াতাড়ি দু'জনে আলাদা হয়ে বসলাম। আমি বললাম, 'কৌন?'

'ছোট সাব, ম্যার।'

ও জিজ্ঞাসা করল, 'কে?'

আমি বললাম, 'গজানন।'

উঠে গিয়ে দরজা খুলে ডাক দিলাম, 'এসো ভিতরে এসো।'

মেমসাহেবকে দেখেই গজানন দু'হাত জোড় করে প্রণাম করল, 'নমস্তে বিবিজি।'

ও একটু হাসল। বললো, 'নমস্তে।'

আমি বললাম, 'গজানন, বিবিজিকে কেমন লাগছে?'

'বহুত আচ্ছা, ছোট সাব।' এক সেকেন্ড পরে আবার বললো, 'আমার ছোট-সাহেবের বিবি কখনও খারাপ হতে পারে?'

আমরা দু'জনেই হেসে ফেলি। মেমসাহেব বললো, 'গজানন, বুঝি প্রত্যেক চিঠিতে তোমার কথা লেখেন।'

গজানন দু'হাত কচলে বলে, 'ছোট সাবকা মেহেরবানী।'

আমি উঠে গিয়ে গজাননের পিঠে এক চাপড় মেরে বলি, 'জান মেমসাহেব, গজানন আমার লোকাল বস। আমার গার্ডিয়ান!'

'কেয়া করোগা বিবিজি, বাতাও। ছোট সাহেব এমন বিদ্রী কাজ করে যে কোন সময়ের ঠিক-ঠিকানা নেই। তারপর কিছু সংসারী বুদ্ধি নেই। আমি না দেখলে কে দেখবে বল? গজানন প্রায় খুনী আসামীর মত ভয়ে ভয়ে জেরার জবাব দেয়।

গজানন এবার মেমসাহেবকে জিজ্ঞাসা করে, 'বিবিজি, ট্রেনে কোন কষ্ট হয় নি তো?'

মেমসাহেব বললো, 'না, না কষ্ট হবে কেন?'

গজানন চট করে ঘর থেকে বেরিয়ে গিয়ে কয়েক মিনিটের মধ্যেই আমাদের দু'জনের ব্রেকফাস্ট নিয়ে আসে। ব্রেকফাস্টের ট্রে নামিয়ে রেখে গজানন বলে যায়, 'আমি যাচ্ছি। একটু পরেই আসছি।'

গজানন চলে যাবার পর আমি মেমসাহেবের কোলে গুয়ে পড়লাম। আর ও আমাকে ব্রেকফাস্ট খাইয়ে দিতে লাগল।

দোলাবৌদি, মেমসাহেব আর আমি অনেক কাণ্ড করেছি। বাঙালী হয়েও প্রায় হলিউড ফিল্মে অভিনয় করেছি। শেষ পর্যন্ত অবশ্য শরৎ চাট্‌জের 'হিট' বই-এর মত হয়ে গেছে। আন্তে আন্তে ধীরে ধীরে সব জানবে। বেশি ব্যস্ত হনো না।

চৌদ্দ

মেমসাহেবের দিল্লীবাসের প্রতি মুহূর্তের কাহিনী জানবার জন্য তুমি নিশ্চয়ই পাগল হয়ে উঠেছ। মেমসাহেব কি বললো, কি করল, কেমন করে আদর করল, কোথায় কোথায় ঘুরল ইত্যাদি ইত্যাদি হাজার রকমের প্রশ্ন তোমার মনে উদয় হচ্ছে। তাই না? হবেই তো। শুধু তুমি নও, সবারই হবে।

আমি সবকিছু তোমাকে জানাব। তবে প্রতিটি মুহূর্তের কাহিনী লেখা নিশ্চয়ই সম্ভব নয়। তাছাড়া আমাদের সম্পর্ক এমন একটা স্তরে পৌঁছেছিল যে, ইচ্ছা থাকলেও সবকিছু লেখা যায় না। তোমাকে কিছুটা অনুমান করে নিতে হবে। তাছাড়া মানুষের জীবনের ঐ বিচিত্র অধ্যায়ের সব কিছু কি ভাষা দিয়ে লেখা যায়?

বেলা এগারোটার সময় ব্রেকফাস্ট খেয়ে দু'ঘণ্টা ধরে বিছানায় গড়াগড়ি করতে করতে দু'জনে কত কি করেছিলাম! কখনও আমাকে কাছে টেনেছে, কখনও বা আমি ওকে টেনে নিয়েছি আমার বুকের মধ্যে। কখনও আমি ওর ওঠে বিষ ঢেলেছি, কখনও বা আমার ওঠে ও ভালবাসা ঢেলেছে। কখনও আবার দু'জনে দু'জনকে প্রাণ ভয়ে দেখেছি। সে দেখা যেন ওস্তাদটির চাইতেও অনেক মিষ্টি,

অনেক স্বর্ণীয় হয়েছিল।

আমি বললাম, 'কতদিন বাদে তোমাকে দেখলাম! সারাজীবন ধরে দেখলেও আমার সে-লোকসান পূরণ হবে না।'

আমার বুকের 'পর মাথা রেখে শুয়ে শুয়েই ও একটু হেসে শুধু বললো, 'তাই বুঝি?' 'তবে কি?' বনহরিণীর মত মুহূর্তের মধ্যে মেমসাহেবের চোখের দৃষ্টিটা একটা ঘুরপাক দিয়ে আকাশের কোলে ভেসে বেড়াল কিছুক্ষণ। একটু পরে আমার দিকে তাকিয়ে বললো, 'আমি তোমাকে রোজ দেখতে পেতাম।'

'আমি চমকে উঠলাম, 'তার মানে?'

'ও একটু হাসল! দু'হাত দিয়ে আমার গলাটা জড়িয়ে ধরে প্রায় মুখের 'পর মুখ দিয়ে বললো, 'সত্যি তোমাকে রোজ দেখেছি।'

এবার আর চমকে উঠি না। হাসলাম। বললাম, 'কেন শুধু শুধু আজীবনে বকছ?'

'আজীবনে নয় গো আজীবনে নয়। রোজ সকালে কলেজে বেরবার পথে রাসবিহারীর মোড়ে এলেই মনে হতো তুমি দাঁড়িয়ে আছ, ইশারায় ডাকছ। তারপর আমরা চলেছি এসপ্রানেড, ডালহৌসী, হাওড়া।'

এবার মেমসাহেব উবুড় হয়ে শুয়ে হুমড়ি খেয়ে পড়ল আমার মুখের ওপর। 'বিকেলবেলায় ফেরার পথে তোমাকে যেন আরো বেশি স্পষ্ট করে দেখতে পেতাম। মনে হতো তুমি রাইটার্স বিল্ডিং-এর ডিউটি শেষ করে কোনদিন ডালহৌসী স্কয়ারের ঐ কোণায়, কোনদিন লাটসাহেবের বাড়ির ওপাশে দাঁড়িয়ে আছ।'

এবার যেন মেমসাহেবের হঠাৎ কেন্দ্রে ফেলল। 'ওগো, বিশ্বাস কর, কলেজ থেকে ফেরবার পর বিকেল-সন্ধ্যা যেন আর কাটতে চাইত না.....'

আমি চট করে মন্তব্য করলাম, 'রাত্রিটা বুঝি মহাশান্তিতে কাটাতে?'

হঠাৎ যেন লজ্জায় ওকে ভাসিয়ে নিয়ে গেল। আমার মুখের পাশে মুখটা লুকাল। আমি জানতে চাইলাম, 'কি হলো?'

মুখটা তুলল না। মুখ গুঁজে রেখেই ফিসফিস করে বললো, 'কিছু বলব না।'

'কেন?'

'তোমার ডাট বেড়ে যাবে।'

'ঠিক আছে। আমার কাছ থেকেও তুমি কিছু জানতে পাবে না। তাছাড়া তোমার প্রাণের বন্ধু জয়া কি করেছিল, কি বলেছিল সে সব কিছু তোমাকে বলব না।'

মেমসাহেব আর স্থির থাকতে পারে না। উঠে বসল। আমার হাত দুটো ধরে বললো, 'ওগো, বল না, কি হয়েছিল?'

আমি মাথা নেড়ে গাইলাম, 'কিছু বলব বলে এসেছিলাম, রইনু চেয়ে না বলে।'

প্রথমে খুব বীরত্ব দেখিয়ে মেমসাহেব গাইল, 'আমি তোমার সঙ্গে বেঁধেছি আমার প্রাণ সুরের বাঁধনে—তুমি জান না, আমি তোমারে পেয়েছি অজানা সাধনে।'

আমি হাসতে হাসতে বললাম, 'খুব ভাল কথা। অত যখন বীরত্ব তখন জয়ার কথা শুনে কি হবে?'

আমার নোল প্রোপাইটার কাম-ম্যানেজিং ডাইরেক্টর ঘাবড়ে গেল। বোধহয় ডাবল, জয়া এই উঠতি বাজারে শেয়ার কিনে ভবিষ্যতে বেশ কিছু মুনাফা লুটতে চায়। হয়ত আরো শেয়ার কিনে শেষ পর্যন্ত অংশীদার থেকে-

ও প্রায় আমার বুকের 'পর লুটিয়ে পড়ল। 'বল না গো, জয়া কি করেছে?' এক সেকেন্ড চূপ করে থেকে আবার বললো, 'জয়া আমার বন্ধু হলে কি হয়! আমি জানি ও সুবিধের মেয়ে নয়, ও সব কিছু করতে পারে।'

জান দোলাবৌদি, জয়া আমাকে কিছুই করে নি। তবে ও একটু বেশি স্মার্ট, বেশি মডার্ন। তাছাড়া বড়লোকের আদুরে মেয়ে বলে বেশ ঢলঢল ভাব আছে। আমার মত ছোকরাদের সঙ্গে আজড়া দিতে বসলে জয়ার কোন কাণ্ডজ্ঞান থাকে না। হাসতে হাসতে দু'হাত দিয়ে জড়িয়ে ধরল, হয়ত কাঁধে

মাথা রেখেই হিঃ হিঃ করতে লাগল। মেমসাহেব এসব জানে।

একবার আমি, মেমসাহেব আর জয়া ব্যারাকপুর গান্ধীঘাট বেড়াতে গিয়ে কি কাণ্টাই না হলো। হি-হি-হা-হা করে হাসতে হাসতে জয়ার বুকের কাপড়টা পাশে পড়ে গিয়েছিল। মেমসাহেব দু'একবার শুকে ইশারা করলেও ও কিছু গ্রাহ্য করল না। রাগে গজগজ করছিল মেমসাহেব। কিন্তু কিছু বলতে পারল না। আমি অবস্থা বুঝে চট করে উঠে একটু পায়চারি করতে করতে জয়ার পিছন দিকে চলে গেলাম। তারপর দেখি মেমসাহেব জয়ার আঁচল ঠিক করে দিল।

কলকাতা ফিরে মেমসাহেব আমাকে বলেছিল, এমন অসভ্য মেয়ে আর দেখি নি। দিল্লীতে জয়ার ছোটকাকা হোম মিনিষ্ট্রিতে ডেপুটি সেক্রেটারি ছিলেন। তাই তো মাঝে মাঝেই দিল্লী বেড়াতে আসত। মেমসাহেব হয়ত ভাবল না জানি ওর অনুপস্থিতিতে জয়া আরো কি করেছে।

জয়ারা এর মধ্যে দু'বার দিল্লী এলেও আমার সঙ্গে একবারই দেখা হয়েছিল। তাও বেশিক্ষণের জন্য নয়। আর সেই স্বল্প সময়ের মধ্যে জয়া আমার পবিত্রতা নষ্ট করবার কোন চেষ্টাও করে নি।

শুধু শুধু মেমসাহেবকে ঘাবড়ে দেবার জন্য জয়ার কথা বললাম। রিপোর্টার হলেও হঠাৎ পলিটিসিয়ান হয়ে মেমসাহেবের সঙ্গে একটু পলিটিক্‌স্ করলাম। কাজ হলো।

শর্ত হলো মেমসাহেব আগে সবকিছু বলবে, পরে আমি জয়ার কথা বলব।

বেল বাজিয়ে গজাননকে ডলব করে হুকুম দিলাম, 'হাফ-সেট চায় লেয়াও।'

গজানন মেমসাহেবের কাছে আর্জি জানাল, 'বিবিজি, ছোটসাবকা চায় পিনা খোড়ি কমতি হোনা চাহিয়ে।'

মেমসাহেব একবার আমাকে দেখে নিয়ে গজাননকে বললো, 'তোমার ছোট সাব আমার কিছু কথা শোনে না।'

ওর কথা শুনে স্নেহাতুর বৃদ্ধ গজাননও হেসে ফেলল। 'এ কথা ঠিক না বিবিজি। ছোট সাব চব্বিশ ঘন্টা শুধু তোমার কথাই বলে।'

'গজানন জিভ কেটে বললো, 'ভগবান কা কসম বিবিজি, খুট আমি কখনো বলব না।'

মেমসাহেব হাসল, আমি হাসলাম।

গজানন বললে, 'যদি তোমার গুসুসা না হয়, তাহলে তোমাকে একটা কথা বলতাম।'

মেমসাহেব বললো, 'তোমার কথায় আমি রাগ করব?'

'ছোট সাব তোমাকে ভীষণ প্যার করে।'

'কি করে বুঝলে?' মেমসাহেব জেরা করে।

গজানন হাসল। বললো, 'বিবিজি, আমি তোমাদের আংরেজি পড়ি নি। তোমাদের মত আমার দিমাগ নেই। এই দিল্লীতে প্রায় পঁয়ত্রিশ বছর হয়ে গেল। অনেক বড় বড় লোক দেখলাম কিন্তু হামারা ছোট সাব-এর মত লোক খুব বেশি হয় না।'

আমি গজাননকে একটা দাবড় দিয়ে বলি, 'যা ভাগ। চা নিয়ে আয়।'

গজানন চা আনল। চলে যাবার সময় আমি বললাম, 'গজানন, কিছু টাকা রেখে যেও।'

গজানন চোখ দিয়ে মেমসাহেবকে ইশারা করে বললো, 'ই্যাগো বিবিজি, টাকা দেব নাকি?'

আমি উঠে গজাননকে একটা থাপ্পড় মারতে গেলেই ও দৌড় দিল।

চা খেতে খেতে মেমসাহেব কি বললো জান? বললো অনেক কিছু।

একদিন সকালে উঠে মেজদি শুকে বললো, 'আর আমি পারছি না।'

মেমসাহেব জানতে চাইল, 'কি পারহিস না রে?'

'থক্‌সি দিতে।'

'কিসের থক্‌সি? কার থক্‌সি?'

'কার আবার? রিপোর্টারের।'

মেমসাহেব বললো, 'অসভ্যতা করবি না মেজদি।' মনে মনে কিন্তু সখি একটু চিন্তা হলো।

একটু পরে একটু ফাঁকা পেয়ে মেমসাহেব মেজদিকে ধরল। 'ইয়ারে, কি হয়েছে রে?'

মেজদি দর কষাকষি করে, 'যা চাইব তাই দিবি বল।'

জিভ দিয়ে ঠোঁটটা একটু ভিজিয়ে নিল মেমসাহেব। দাঁত দিয়ে ঠোঁটটা একটু কামড়ে জ কুঁচকে

এক মুহূর্তের জন্য ভেবে নিল। 'ঠিক আছে, যা চাইবি তাই দেবো।'

মেজদি ওস্তাদ মেয়ে। কাঁচা কাজ করবার পাত্রী সে নয়। তাই গ্যারান্টি চাইল। 'মা কালীর ফটো ছুঁয়ে প্রতিজ্ঞা কর, মোমি যা চাইব তাই দিবি।'

ও ঘাবড়ে যায়। একবার ভাবে মেজদি ঠকিয়ে কিছু আদায় করবে। আবার ভাবে, না, না, কিছু দিয়েও খবরটা জানা-দেখা মেমসাহেবের দোটারানা মন শেষ পর্যন্ত মেজদির ফাঁদে আটকে যায়। মা কালীর ফটো ছুঁয়ে প্রতিজ্ঞা করল, আমাকে সবকিছু খুলে বললে তুই যা চাইবি তাই দেব।

মেজদি ওকে টানতে টানতে ঐ কোণের ছোট বসাবার ঘরে নিয়ে দরজা আটকে দেয়। মেমসাহেবের বুকটা টিপটিপ করে। গোল টেবিলে পাশ থেকে দুটো চেয়ার টেনে দু'জনে পাশাপাশি বসল।

মেজদি শুরু করল, 'রাস্তিরে তুই কি করিস, কি বকবক করিস তা জানিস?'

'কি করি রে মেজদি?'

'কি আর করবি? আমাকে রিপোর্টার ভেবে আদর করিস তা জানিস?'

লজ্জায় আমার কালো মেমসাহেবের মুখ লাল হয়েছিল। 'যা যা বাজে বকিস না।'

মেজদি সঙ্গে সঙ্গে চেয়ার ছেড়ে উঠে দাঁড়িয়ে বলে, 'ঠিক আছে না ওনতে চাস, ভাল কথা।'

ও তাড়াতাড়ি মেজদির হাত ধরে বসিয়ে দেয়, 'আচ্ছা যা বলবি বল।'

'তোমার আদরের চোটে তো আমার প্রাণ বেরবার দায় হয়।'

'কেন মিছে কথা বলছিস?'

মেজদি মুচকি হাসতে হাসতে বললো, 'মা কালীর ফটো ছুঁয়ে বলব?'

'না, না, আর মা কালীর ফটো ছুঁয়ে বলতে হবে না।'

'তুধু কি আদর? কত কথা বলিস।'

'ঘুমিয়ে-ঘুমিয়ে?'

মেজদি মুচকি হেসে বললো, 'আজ্ঞে হ্যাঁ।, বিশ্বাস না হয় মাকে জিজ্ঞাসা কর।'

'মা ওনেছে?' মেমসাহেব চমকে ওঠে।'

একদিন তো ডেফিনিট ওনেছে, হয়তো রোজই শোনে।'

ও তাড়াতাড়ি মেজদির হাতটা চেপে ধরে জিজ্ঞাসা করল, 'কি কথা বলেছি রে?'

নির্লিপ্তভাবে মেজদি উত্তর দিল, 'তুই ওকে যা যা বলে আদর করিস, তাই বলেছিস। আবার কি বলব?'

সোফায় বসে সেন্টার টেবিলের ওপর পা তুলে দিয়ে আমরা গল্প করছিলাম। মেমসাহেব ডান হাত দিয়ে আমার মাথাটা কাছে টেনে নিয়ে কানে কানে বললো, 'দেখছ, ঘুমিয়েও তোমাকে ভুলতে পারি না।'

একটু চূপ করে ফিসফিস করে বললো, 'দেখেছ, তোমাকে কত ভালবাসি।'

আমি একটা সিগারেট ধরিয়ে এক গাল ধোঁয়া ছেড়ে বললাম, 'ঘোড়ার ডিম ভালবাস। যদি সত্যি সত্যিই ভালবাসতে, তাহলে আজও মেজদি তোমার পাশে শোবার সাহস পায়?'

মেমসাহেব আমাকে ভেংচি কেটে বললো, 'ওতে দিচ্ছি আর কি!'

এবার আমি ওর কানে কানে বললাম, 'আজ তো আমার হাতে লাটাই। আজ কোথায় উড়ে যাবে? তাছাড়া আজ তো তুমি আমাকে পুরস্কার দেবে।'

'পুরস্কার?'

'সেই যে যা চাইবে, তাই পাবে। পুরস্কার।'

মেমসাহেব আমার পাশ থেকে প্রায় দৌড়ে পালিয়ে যেতে যেতে বললো, 'আমি আজই কলকাতা পালাচ্ছি।'

নাটকের এই এক চরম গুরুত্বপূর্ণ মুহূর্তে আবার গজাননের আবির্ভাব হলো। বেশ মেজাজের সঙ্গে বললো, 'দুটো বেজে গেছে। তোমরা কি সারাদিনই গল্পগুজব করবে? খাওয়া-দাওয়া করবে না?'

'দুটো বেজে গেছে?' দু'জনেই একসঙ্গে ঘড়ি দেখে ভীষণ লজ্জিত বোধ করলাম। গজাননকে বললাম, 'লাঞ্চ নিয়ে এস। দশ মিনিটে আমরা স্নান করে নিচ্ছি।'

দিল্লীতে তোমাদের বৈভব জীবনের উদ্বোধন সংগীত কেমন লাগল? মনে হয় খারাপ লাগে নি। আমারও বেশ লেগেছিল। অনেক দুঃখ কষ্ট, সংগ্রামের পরে এই আনন্দের অধিকার অর্জন করেছিলাম। তাই তো বড় মিষ্টি লেগেছিল এই আনন্দের আত্মতৃপ্তির আনন্দ!

মেজদিকে ম্যানেজ করে কলেজ থেকে সাত দিনের ছুটি নিয়ে ও আমার কাছে এসেছিল। এসেছিল অনেক কারণে, অনেক প্রয়োজনে। সমাজ-সংস্কারের অট্টোপাশ থেকে মুক্ত হয়ে একটু মিশতে চেয়েছিলাম আমরা দু'জনেই। মেমসাহেবের দিল্লী আসার কারণ ছিল সেই মুক্তির স্বাদ, আনন্দ উপভোগ করা।

আরো অনেক কারণ ছিল। শূন্যতার মধ্যে দু'জনেই অনেকদিন ভেসে বেড়িয়েছিলাম। দু'জনেরই মন চাইছিল একটু নিরাপদ আশ্রয়। সেই আশ্রয়, সেই সংসার বাঁধার জন্য অনেক কথা বলবার ছিল। দু'জনেরই মনে মনে অনেক কল্পনা আর পরিকল্পনা ছিল। সে-সব সম্পর্কেও কথাবার্তা বলে একটা পাকা সিদ্ধান্ত নেবার সময় হয়েছিল।

যাই হোক এক সপ্তাহ কোন কাজকর্ম করব না বলে আমিও ছুটি নিয়েছিলাম। প্রতিজ্ঞা করেছিলাম মেমসাহেবকে ট্রেনে চড়িয়ে না দেওয়া পর্যন্ত টাইপরাইটার আর পার্লামেন্ট হাউস স্পর্শ করব না। চেয়েছিলাম প্রতিটি মুহূর্ত মেমসাহেবের সান্নিধ্য উপভোগ করব।

সত্যি বলছি দোলাবৌদি, একটি মুহূর্তও নষ্ট করি নি। উগখান আমাদের বিধিনির্দিষ্ট ভবিষ্যৎ জানতেন বলে একটি মুহূর্তও অপব্যয় করতে দেন নি। কথায়, গল্পে, গানে, হাসিতে ভরিয়ে তুলেছিলাম ঐ ক'টি দিন।

লাঞ্চ খেতে খেতে অনেক বেলা হয়েছিল। চব্বিশ ঘন্টা ট্রেনে জার্নি করে নামবার পর থেকে মেমসাহেব একটুও বিশ্রাম করতে পারে নি। আমি বললাম, 'মেমসাহেব, তুমি একটু বিশ্রাম কর, একটু ঘুমিয়ে নাও।'

'এই ক'মাসে কলকাতায় অনেক ঘুমিয়েছি, অনেক বিশ্রাম করেছি। তুমি আর আমাকে ঘুমতে বলো না।'

এক মিনিট পরেই বললো, 'তার চাইতে তুমি বরং একটু শোও। আমি তোমার গায়ে একটু হাত বুলিয়ে দিচ্ছি।'

'আমি কেন শোব?'

'শোও না। আমি তোমার পাশে বসে গল্প করব।'

শোবার ইচ্ছা ছিল না কিন্তু লোভ সামলাতে পারলাম না। দিল্লীর কাব্যহীন জীবনে অনেক দিন এমনি পরম দিনের স্বপ্ন দেখেছি। মেমসাহেব বিশ্রাম করল না কিন্তু আমি সত্যি সত্যিই শুয়ে পড়লাম। ও আমার পাশে বসে মাথায় হাত বুলিয়ে দিতে দিতে গুনগুন করে গান গাইছিল। কখনও কখনও আবার একটু আদর করছিল। কি আশ্চর্য আনন্দে যে আমার সারা মন ভরে গিয়েছিল তা তোমাকে বোঝাতে পারব না। স্বপ্ন যে এমন করে বাস্তবে দেখা দিতে পারে তা ভেবে আমি অতুল সাফল্য, সার্থকতার স্বাদ উপভোগ করলাম।

বাকি দুটোকে ডিভোর্স করে মেমসাহেবের কোলে মাথা রেখ দু'হাত দিয়ে ওর কোমর জড়িয়ে ধরে চোখ বুজলাম।

ও জিজ্ঞাসা করল, 'ঘুম পাচ্ছে?'

কথা বললাম না, শুধু মাথা নেড়ে জানালাম, না।

'ক্রান্ত লাগছে?'

'না।'

তবে

'স্বপ্ন দেখছি।'

'স্বপ্ন?'

মাথা নেড়ে বললাম, 'হ্যাঁ স্বপ্ন দেখছি।' মুখটা আমার মুখের কাছে এনে ও জানতে চাইল, 'কি স্বপ্ন দেখছ?'

'তোমাকে স্বপ্ন দেখছি।'

'আমাকে?'

'হ্যা, তোমাকে।'

'আমি তো তোমার পাশেই রয়েছি। আমাকে আবার কি স্বপ্ন দেখছ?'

ওর কোলের' পর মাথা রেখেই চিত হয়ে শুলাম। দু'হাত দিয়ে ওর গলাটা জড়িয়ে ধরে বললাম, 'হ্যা তোমাকেই স্বপ্ন দেখছি। স্বপ্ন দেখছি, জন্ম-জন্মান্তর ধরে আমি এমনি করে তোমার কোলে নিশ্চিন্ত আশ্রয় পাচ্ছি, ভরসা পাচ্ছি।'

মুহূর্তের জন্য গর্বের বিদ্যুৎ চমকে উঠে মেমসাহেবের সারা মুখটা উজ্জ্বল করে তুললো। পরের মুহূর্তেই ওর ঘন কালো গভীর উজ্জ্বল দুটো চোখ কোথায় যেন তলিয়ে গেল। আমাকে বললো, 'ওগো তুমি আমাকে অমন করে চাইবে না, তুমি আমাকে এত ভালবাসবে না।'

'কেন বল তো?'

'যদি কোনদিন কোন কিছু দুর্ঘটনা ঘটে, যদি কোনদিন আমি তোমার আশা-আকাঙ্ক্ষার সঙ্গে হৃদয় মিলিয়ে চলতে না পারি, সেদিন তুমি সে দুঃখ, আঘাত সহ্য করতে পারবে না।'

আমি মাথা নাড়তে নাড়তে বললাম, 'তা হতে পারে না মেমসাহেব। আমার স্বপ্ন ভেঙে দেবার সাহস তোমারও নেই, ভগবানেরও নেই।'

আমার কথা শুনে বোধহয় ওর একটু গর্ব হলো। বললো, 'আমি জানি তুমি আমাকে ছাড়া তোমার জীবন কল্পনা করতে পার না কিন্তু তাই বলে অমন করে বলো না।'

'কেন বলব না মেমসাহেব?' তোমার মনে কি আজ্ঞা কোন সন্দেহ আছে?'

'সন্দেহ থাকলে কেউ এমনি করে ছুটে আসে!'

মেমসাহেব আবার ধামে। আবার বললো, 'তোমার দিক থেকে যে আমি কোন আঘাত পাব না, তা আমি জানি। ভয় হয় নিজেকে নিয়েই। আমি কি পারব তোমার আশা পূর্ণ করতে? পারব কি সুখী করতে?'

'তুমি না পারলে আর কেউ তো পারবে না মেমসাহেব। তুমি না পারলে স্বয়ং ভগবানও আমাকে সুখী করতে পারবে না।'

আরো কত কথা হলো। কথায় কথায় বেলা গড়িয়ে যায়, বিকেল ঘুরে সন্ধ্যা হলো। ঘর-বাড়ি রাস্তাঘাটে আলো জ্বলে উঠল।

মেমসাহেব বললো, 'ছাড়। আলোটা জ্বলে দিই।'

'না, না, আলো জ্বেলো না। এই অন্ধকারেই তোমাকে বেশ স্পষ্ট দেখতে পাচ্ছি। আলো জ্বাললেই আরো অনেক কিছু দেখতে হবে।'

'পাগল কোথাকার!'

'এমন পাগল আর পাবে না।'

ও আমাকে চেপে জড়িয়ে ধরে বললো, 'এমন পাগলীও আর পাবে না।'

'ভগবান অনেক হিসাব করেই পাগলার কপালে পাগলী জুটিয়েছেন। তা না হলে কি এত মিল, এত ভালবাসা হয়?'

ঐ অন্ধকারের মধ্যেই আরো, কিছু সময় কেটে গেল।

মেমসাহেব বললো, 'একটু ঘুরে আসি।'

'তোমার কি বেড়াতে ইচ্ছে করছে?'

'কলকাতায় তো কোনদিন শান্তিতে বেড়াতে পারি নি। এখানে অন্তত কোন দূর্ভিক্ষ নিয়ে ঘুরতে হবে না।'

মেমসাহেব আলো জ্বালাল। 'বেল টিপে বেয়ারা ডাকল। চা আনাল। চা তৈরি করল। আমি শুয়ে শুয়েই এক কাপ চা খেলাম।

এবার মেমসাহেব তাড়া দেয়, 'নাও, চটপট তৈরি হয়ে নাও।'

আমি শুয়ে শুয়ে বললাম, 'ওয়াদ্জবটা খোল। আমাকে একটা প্যান্ট আর বুশশার্ট দাও।'

মেমসাহেব লম্বা বেণী দুলিয়ে বেশ হেলেন্দুলে এগিয়ে গিয়ে ওয়াদ্জব খুলেই প্রায় চীৎকার করে উঠল, 'একি তোমার ওয়াদ্জবে শাড়ি?'

এবার শাড়িগুলো নেড়ে বললো, 'এ যে অনেক রকমের শাড়ি। ঘুরে ঘুরে কালেকশান করেছ বুঝি?'

ও আমার প্যান্ট বুশশার্ট না দিয়ে হ্যান্ডার থেকে একটা কটকি শাড়ি এনে আদার করল, 'আমি শাড়িটা পরব?'

'তবে কি আমি পরব?'

শাড়িটার দু' একটা ভাঁজ খুলে একটু জড়িয়ে নিয়ে ড্রেসিং টেবিলের সামনে দাঁড়িয়ে বললো, 'লাভলি!'

'কি লাভলি? শাড়ি না আমি?'

শাড়িটা গায়ে জড়িয়েই আয়নার সামনে একটু ঘুরে গেল মেমসাহেব। বললো, 'ইউ আর নটোরিয়াস বাট শাড়ি ইজ লাভলি।'

আমি বিছানা ছেড়ে উঠে গিয়ে মেমসাহেবকে জড়িয়ে ধরতেই ও বকে উঠল, 'সব সময় জড়াবে না। শাড়িটার ভাঁজ নষ্ট করো না।'

চট করে ও এবার আমার দিকে ঘুরে আমার মুখের দিকে ব্যাকুল হয়ে চেয়ে বললো, 'ওগো, ব্লাউজের কি হবে? তুমি নিশ্চয়ই ব্লাউজ পিস কেন নি?'

আমি ওর কানটা ধরে হিড়হিড় করে টানতে টানতে ঘরের কোণায় নিষ্কে গিয়ে একটা ছোট সূটকেস খুলে দিলাম। 'নটি গার্ল! হ্যাভ এ লুক।'

হাসতে হাসতে বললো, 'ব্লাউজ তৈরি করিয়েছ?'

'আজ্ঞে হ্যাঁ।'

'মাপ পেলে কোথায়?'

'তোমার ব্লাউজের মাপ আমি জানি না।'

আমার মাথায় দুইমির বুদ্ধি আসে। কানে কানে বলি, 'সুড আই টেল ইউ ইয়োর ভাইট্যাল স্টিটিসটিকস?'

মেমসাহেব আমার পাশ থেকে পালিয়ে যেতে যেতে বললো, 'কেবল অসত্যতা। জার্নালিষ্টগুলো বড় অসত্য হয়, তাই না?'

'তোমাদের মত ইয়ং আনম্যারেড প্রফেসরগুলো বড় ধার্মিক হয়, তাই না?'

'কি করব? তোমাদের মত এক-একটা দস্যু-ডাকাতির হাতে পড়লে কি আর নিস্তার আছে?'

আমি যে আরো কি বলতে গিয়েছিলাম, ও বাধা দিয়ে বললো, 'এবার তর্ক বন্ধ করে বেরুবে কি?'

মেমসাহেব শাড়িটা সোফার 'পর রেখে নিজের সূটকেস থেকে ধুতি-পাঞ্জাবি বের করে বললো, 'এই নাও পর।'

'এবারও জড়িপাড় ধুতি দিলে না?'

'জরিপাড় ধুতি না পাবার জন্য তোমার কিছু অসুবিধা বা ক্ষতি হচ্ছে?'

দোলাবৌদি, আমার জীবনের সেসব স্বর্ণীয় দিনের কথা স্মৃতিতে অমর অক্ষয় হয়ে আছে। আজ আমি রিক্ত, নিঃস্ব। ভিখারী। আজ আমার বুকের ভিতরটা জ্বলেপুড়ে ছাড়খার হয়ে যাচ্ছে। মনের মধ্যে অহরহ রাবণের চিতা জ্বলছে। গঙ্গা-যমুনা নর্মদা-গোদাবরীর সমস্ত জল দিয়েও এ আগুন নিভবে না, মেতান্তে পারে না।

বাইরে থেকে আমার চাকচিক্য দেখে, আমার পার্শ্ব সাফল্য দেখে, আমার মুখের হাসি দেখে সবাই আমাকে কত সুখী ভাবে। কত মানুষ আরো কত কি ভাবে। আমার ব্যক্তিগত জীবন সম্পর্কে কতজনের কত বিচিত্র ধারণা! মনে মনে আমার হাসি পায়। একবার যদি চিৎকার করে কাঁদতে পারতাম, যদি তারস্বরে চিৎকার করে সবকিছু বলতে পারতাম, যদি হনুমানের মত বুক চিরে আমার অন্তরটা সবাইকে দেখাতে পারতাম তবে হয়ত-

সেখেন, আবার কি আজ্ঞেবাজে বকতে শুরু করেছি? তোমাকে তো আগেই লিখেছি ঐ পোড়াকপালীর কথা লিখতে গেলে, ভাবতে গেলে, মাঝে মাঝেই আমার মাথাটা কেমন করে ওঠে। আরো একটু ধৈর্য ধর। তুমি হয়ত বুঝবে আমার মনের অবস্থা।

দোলাবৌদি, আমাদের দু'জনের কাহিনী নিয়ে ভলিউম ভলিউম বই লেখা যায়। সেই সাত দিনের দিল্লীবাসের কাহিনী নিয়েই হয়ত একটা চমৎকার উপন্যাস লেখা হতে পারে। তাছাড়া তিন দিনের জন্য জয়পুর আর সিলিসের ঘোরা? আহাছা! সেই তিনটে দিন যদি তিনটি বছর হতো। যদি সেই তিনটি দিন কোন দিনইনা ফুরাত?

দিল্লীতে সেই প্রথম রাত্রিতে আমরা এক মিনিটের জন্যও ঘুমুলাম না। সারা রাত্রি বলে ও ভোরবেলায় মনে হয়েছিল যেন কিছুই বলা হলো না। মনে হয়েছিল যেন বিধাতাপুরুষের রসিকতায় রাত্রিটা হঠাৎ ছোট হয়েছিল। সকালবেলায় সূর্যকে অসহ্য মনে হয়েছিল।

মোট পর্দার ফাক দিয়ে সূর্যরশ্মি চুরি করে করে আমাদের ঘরে ঢুকে বেশ উৎপাত শুরু করেছিল। কিন্তু তবুও ও আমার গলা জড়িয়ে গিয়েছিল আর গুনগুন করে গাইছিল, 'আমার পরাণ যাহা চায় তুমি তাই, তুমি তাই গো।...'

আমি প্রশ্ন করলাম, 'সত্যি?'

ও বললো, তোমা ছাড়া আর এ জগতে মোর কেহ নাই, কিছু নাই গো। তুমি সুখ যদি নাই পাও, যাও সুখের সন্ধানে যাও-'

'আমি আবার কোথায় যাব?'

মেমসাহেব মাথা নেড়ে আমাকে ধন্যবাদ জানিয়ে আবার গাইতে থাকে, 'আমি তোমাকে পেয়েছি হৃদয় মাঝে, আর কিছু নাহি চাই গো।'

'সিওর।'

'সিওর।' ও এবার কনুই-এ ডর দিয়ে ডান হাতে মাথাটা রেখে বাঁ হাত দিয়ে আমার মুখে হাত বুলিয়ে দিতে দিতে গাইল-

'আমি তোমার বিরহে রহিব বিলীন,

তোমাতে করিব বাস-

দীর্ঘ দিবস, দীর্ঘ রজনী,

দীর্ঘ বরষ-মাস।

যদি আর কারে ভালবাস....'

আমি বললাম, তুমি পারমিশন দেবে?

মেমসাহেব হেসে ফেলল। হাসতে হাসতেই আবার গাইল

'যদি আর ফিরে নাহি আস,

তবে তুমি যাহা চাও তাই যেন পাও

আমি যত দুঃখ পাই গো।'

বললাম, 'আমি আর কিছু চাইছি না, তুমিও দুঃখ পাবে না।'

ও আমাকে দু' হাত দিয়ে জড়িয়ে চেপে ধরে ঠোটে একটু ভালবাসা দিয়ে বললো আমি জানি গো, জানি।'

সকালবেলায় চা খেতে খেতে মেমসাহেব বললো, 'ওগো, চলো না দুদিনের জন্য জয়পুর ঘুরে আসি।'

আইডিয়াটা মন্দ লাগল না। ঐ চা খেতে খেতেই প্ল্যান হয়ে গেল। একদিন জয়পুর, একদিন জয়পুর, একদিন সিলিসের ফ্লেক্সট বাংলোয় থাকব। তারপর দিল্লী ফিরে এসে কিছু ঘোরাঘুরি, দেখাশুনা আর সংসার পাতার বিধিব্যবস্থা করা হবে বলেও ঠিক করলাম।

পনের

আমাকে কিছু করতে হলো না, মেমসাহেব আমার একটা অ্যাটারি'র মধ্যে দু'দিনের প্রয়োজনীয় সব কিছু ভরে নিয়েছিল। আমি দু'একবার এটা গুটা নেবার কথা বলেছিলাম। ও বলেছিল, 'তুমি চূপ করো তো।'

আমি চূপ করেছিলাম। রাত্রে আমেনাবাদ মেল ধরে পরদিন ভোরবেলায় জয়পুর পৌঁছলাম।

ট্রেনে?

ট্রেনের কথা কি লিখব? সেকেন্ড ক্লাসে গিয়েছিলাম। কম্পার্টমেন্টে আরো প্যাসেঞ্জার ছিলেন। অনেক কিছুই তো ইচ্ছা করছিল, কিন্তু.....। তবে দু'জনে এক কোণায় বসে অনেক রাত পর্যন্ত গল্প করেছিলাম। মেমসাহেবকে শুভে বলেছিলাম, কিন্তু রাগী হয় নি। ও বলেছিল, 'তুমি শোও। আমি তোমাকে ঘুম পাড়িয়ে দিচ্ছি।'

'না, না, তা হয় না।'

'তুমি জেগে থাকবে আর আমি ঘুমাব।'

'আগে তুমি একটু ঘুমিয়ে নাও। পরে আমি ঘুমাব।'

আমার ঘুমুতে ইচ্ছা করছিল না। তাই বললাম, 'তাছাড়া এইটুকু জায়গায় কি ঘুমানো যায়?'

'এই তো আমি সরে বসছি। তুমি আমার কোলে মাথা দিয়ে শুয়ে পড়।'

আমার হাসি পেল।

'হাসছ কেন?'

হাসতে হাসতে আমি জবাব দিলাম, 'রেলের এই কম্পার্টমেন্টেও কি তুমি আমাকে আদর করবে?'

ও রেগে গেল। 'বেশ করব। আমি কি পরপুরুষকে আদর করছি?'

মেমসাহেব একটু সরে বসল। আমি ওর কোলে মাথা রেখে শুয়ে পড়লাম।

ও আমার মাথায় মুখে হাত দিয়ে আদর করে ঘুম পাড়াবার চেষ্টা শুরু করল। কয়েক মিনিট বাদে মুখটা আমার মুখের 'পর এনে জিজ্ঞাসা করল, 'কি ঘুমুচ্ছ?'

'না।'

'ঘুমুবে না?'

'না।'

'কেন?'

'এত সুখে, এত আনন্দে ঘুম আসে না।'

এবার মেমসাহেব হাসল। জিজ্ঞাসা করল, 'সত্যি ভাল লাগছে?'

'খুব ভাল লাগছে।'

ও চুপ করে যার। কিন্তু পরে ও আবার হুমড়ি খেয়ে আমার মুখের ওপর পড়ল। বললো, 'একটা কথা বলব?'

'বল।'

'তুমি রোজ এমনি করে আমার কোলের 'পর মাথা রেখে শোবে, আর আমি তোমাকে ঘুম পাড়িয়ে দেব।'

'কেন?'

'কেন আবার? আমার ইচ্ছা করে, ভাল লাগে।'

আমি কোন উত্তর দিলাম না। ওর কোলের মধ্যে মুখ গুঁজে দিয়ে হাসছিলাম।

মেমসাহেব দু'হাত দিয়ে আমার মুখটা নিজের দিকে ঘুরিয়ে নিয়ে বললো, 'হাসছ কেন?'

'এমনি।'

'না, তুমি অমন করে হাসবে না।'

'বেশ।'

মেমসাহেব আবার আমার মাথায় মুখে হাত বুলিয়ে দিতে লাগল। আমার এত ভীষণ ভাল লাগছিল যে সত্যি সত্যিই আমি ঘুমিয়ে পড়েছিলাম।

ঘুম ভেঙেছিল একেবারে ভোরবেলায়। ঘড়িতে দেখলাম, সাড়ে চারটে। মেমসাহেব ঘুমুচ্ছিল। দু'হাতে আমার মুখটা জড়িয়ে ধরে মাথাটা হেলান দিয়ে বসে বসে ঘুমুচ্ছিল ভীষণ লজ্জা, ভীষণ কষ্ট লাগল। আমি উঠে বসতেই ওর ঘুম ভেঙে গেল। আমি কিছু বলবার আগেই ও জিজ্ঞাসা করল, 'উঠলে যে?'

আমি ওর প্রশ্নের জবাব না দিয়ে জিজ্ঞাসা করলাম, 'কটা বাজে জান?'

'ক' টা?'

'সাড়ে চারটে'!

'তাই বুঝি।'

'তুমি সারা রাত্রি এইভাবে বসে বসে কাটালে?'

ঐ আবছা আলোতেই আমি দেখতে পেলাম একটু হাসিতে মেমসাহেবের মুখটা উজ্জ্বল হয়েছিল। বললো, 'তাতে কি হলো।'

আমি রেগে বললাম, 'তাতে কি হলো?' সারা রাত্রি আমি মজা করে শুয়ে রইলাম আর তুমি বসে বসে কাটিয়ে দিলে?'

শান্ত স্নিগ্ধ মেমসাহেব আমার মুখে হাত বুলিয়ে দিতে দিতে বললো, 'রাগ করছ কেন? বিশ্বাস কর, আমার একটুও কষ্ট হয় নি।'

আমি উপহাস করে বললাম, 'না, না, কষ্ট হবে কেন? বড্ড আরামে ঘুমিয়েছ।'

আবার সেই মিষ্টি হাসি, স্নিগ্ধ শান্ত কণ্ঠ 'আরাম না হলেও আনন্দ তো পেয়েছি।'

জান দোঙ্গাবৌদি, পোড়াকপালী এগনি করে ভালবেসে আমার সর্বনাশ করেছে। জয়পুরে গিয়ে কি করেছিল জান? হোটেল গিয়ে স্নান করে ব্রেকফাস্ট খাবার পর আমি বললাম, 'কাপড়-চোপড় পালটে নাও।'

'কেন?'

'কেন আবার? ঘুরতে বেরুব।'

'কোথায় আবার ঘুরবে?'

'জয়পুর এসে সবাই যেখানে ঘুরতে যায়।'

ও বললো, 'আমি তো অম্বর প্যালেস বা হাওয়া মহল দেখতে আসি নি।'

'তবে জয়পুর এলে কেন?'

'কেন আবার? তোমাকে নিয়ে বেড়াতে এলাম। এতদিন ধরে পরিশ্রম করছ তাই একটু বিশ্রাম পাবে বলে জয়পুর এলাম।'

আমি বললাম, 'দিল্লীতে তো বিশ্রাম করতে পারতাম।'

'ভাবলাম আমার সঙ্গে একটু বাইরে গেলে আরও ভাল লাগবে, তাই এলাম।'

লনের এক কোণায় একটা গাছের ছায়ায় বসে সারা সকাল কাটিয়ে দিলাম আমরা।

'ওগো, তুমি যখন গাড়ি কিনবে তখন প্রত্যেক উইক-এন্ডে আমরা বাইরে বেরুব। কেমন?'

আঙুল দিয়ে ঠিকের দিকে দেখিয়ে বললাম, 'আমি গাড়ি কিনব?'

'তবে কি আমি কিনব?'

'তুমি কি পাগল?'

'কেন তুমি বুঝি গাড়ি কিনবে না?'

'দূর পাগল! আমি গাড়ি কেনার টাকা পাব কোথায়?'

ও যেন সত্যি একটু রেগে গেল। 'তুমি কথায় কথায় আমায় পাগল পাগল বলবে না তো!'

'পাগলের মত কথা বললেও পাগল বলব না!'

ব্র কুঁচকে ও প্রায় চীৎকার করে বললো, 'না!'

একটু পরে আবার বললো, 'গাড়ি কেনবার কথা বলায় পাগলামি কি হল?'

আমি একটা সিগারেট ধরিয়ে ওর মুখ ধোঁয়া ছেড়ে বললাম, 'কিছু না!'

আশ্চর্য আত্মবিশ্বাসের সঙ্গে ও বললো, 'দেখ না এক বছরের মধ্যে তোমার গাড়ি হবে।'

'তুমি জান?'

'একশ'বার জানি।'

একটু পরে আবার কি বললো জান? মেমসাহেব আবার গা ঘেঁষে বসে আমার কাঁধের 'পর মাথা রেখে আধো-আধো সুরে বললো, 'ওগো, তুমি আমাকে ড্রাইভিং শিখিয়ে দেবে?'

ও তখন বোয়িং সেন্ডেন-জিরো-সেভেনের চাইতেও অনেক বেশি গতিতে ওপরে উঠছিল। সুতরাং আমি অযথা বাধা দেবার ব্যর্থ চেষ্টা না করে বললাম, 'নিশ্চয়ই।'

মনে মনে আমার হাসি পাচ্ছিল কিন্তু অনেক চেষ্টায় সে-হাসি চেপে রেখে বেশ স্বাভাবিক হয়ে

জানতে চাইলাম, 'কি গাড়ি কিনতে চাও?'

আমার প্রশ্ন ও খুব খুশি হল। হাসিতে মুখটা ভরে গেল। টানা টানা চোখ দুটি যেন আরো বড় হল। বললো, 'তোমার কোন গাড়ি পছন্দ?'

ওকে সবুট করবার জন্য বললাম, 'গাড়ি কিনলে তো তোমার পছন্দ মতই কিনব।'

ও মনে মনে আগে থেকেই সিদ্ধান্ত করে রেখেছিল। তাই তো মুহূর্তের মধ্যে উত্তর দিল 'স্ট্যান্ডার্ড হেরল্ড!'

'তোমার বুঝি স্ট্যান্ডার্ড হেরল্ড খুব পছন্দ', আমি জানতে চাইলাম।

'গাড়িটা দেখতেও ভাল, তাছাড়া....'

মেমসাহেব এততে গিয়ে একটু থামল। তাই আমি জিজ্ঞাসা করলাম, 'তাছাড়া কি?'

হাসি হাসি মুখে ও উত্তর দিল, 'ঐ গাড়িটা যে টু-ডোর।'

'তাতে কি হল?'

যেন মহা বোকামি করেই ঐ প্রশ্নটা করেছিলাম। ও বললো, 'বাঃ! তাতে কি হল?'

খুব সিরিয়াস হলে বললো, 'বাক্সাদের নিয়ে ঐ গাড়িতে যাওয়ার কত সুবিধা জান? হঠাৎ দরজা খুলে পড়ে যাবার কোন ভয় নেই, তা জান?'

মেমসাহেবের কল্পনার বোরিং সেভেন-জিরো-সেভেন তখন চল্লিশ হাজার ফুট ওপরে উড়ছে। তাছাড়া প্রায় সাড়ে পাঁচশ ছ'শো মাইল স্পীডে ছুটে চলেছিল। আমি সেই উড়োজাহাজের কো-পাইলট হয়েও ওকে পালামের মাটিতে নামাতে পারলাম না। মনে মনে কষ্ট হল। তাছাড়া আগামী দিনের স্বপ্ন হয়ত আমারও ভাল লেগেছিল। মুখে শুধু বললাম, 'হ্যাঁ, হ্যাঁ, ঠিক বলেছ।'

দুপুরবেলা লাঞ্চার পর দু'জনে গুরে গুরে আরো কত গল্প করলাম।.....

'ওগো, খোকনের খুব ইচ্ছা একবার তোমার কাছে আসে।'

আমি বললাম, 'পাঠিয়ে দিও না।'

'না, না, এখন না। আগে আমাদের সংসার হোক, তারপর আসবে।'

আমি জানতে চাইলাম, 'আচ্ছা মেমসাহেব, তুমি খোকনকে খুব ভালবাস, তাই না?'

মেমসাহেব বললো, 'কি করব বল? কাকাবাবুকে তো আমরা কোনদিনই ডাড়াটে ভাবি না। কাকীমা বেঁচে থাকলে হয়ত অত মেলামেশা ভাব হত না। তাছাড়া কাকাবাবু অফিস আর টিউশনি নিয়ে প্রায় সারাদিনই বাড়ির বাইরে। তাই আমরা ছাড়া খোকনকে কে দেখবে বল?' আমি বললাম, 'তাতে বুঝলাম, কিন্তু তুমি খোকনকে একটু বেশি ভালবাস।'

পাশ ফিরে গুরে আমাকে আর একটু কাছে টেনে নিয়ে বললো, 'কেন তোমার হিংসা হয়?'

আমি উত্তর দিলাম, 'আমার হিংসা হবে কেন?'

আমিও একটু পাশ ফিরে গুলাম। বললাম, 'গতবার খোকন যখন ম্যাট্রিক পরীক্ষা দিল, তখন তুমি কি কান্ডটাই না করলে?'

'করব না? আমরা ছাড়া ওর কে আছে বল?'

'আমরা-আমরা বলছ কেন? শুধু হাসল। একটু পরে আমার মুখে হাত বুলিয়ে দিতে দিতে বললো, 'আমি বাড়ির মধ্যে সব চাইতে ছোট। কেউ আমাকে দিদি বলে ডাকে না।'

ছোটবেলা থেকেই আমার একটা ভাই-এর শখ।.....'

'তাই বুঝি?'

কি যেন ভেবে ও হাসল। জিজ্ঞাসা করলাম, 'হাসছ কেন?'

'ছোটবেলার একটা কথা মনে হল।'

'কি কথা?'

মেমসাহেব আবার হাসল। বললো, 'ছোটবেলার একটা ভাই দেবার জন্য আমি মাকে খুব বিরক্ত করতাম।'

আমি হাসলাম।

হাসতে হাসতে ও বললো, 'সত্যি বলছি, অনেকদিন পর্যন্ত একটা ভাই দেবার জন্য মাকে বিরক্ত করেছি। আর আমি যেই ভাই-এর কথা বলতাম সঙ্গে সঙ্গে দিদিরা চলে যেত আর মা আমাকে বকুনি

দিয়ে ভাগিয়ে দিতেন।

'তাই বুঝি খোকনকে এত ভালবাসে?'

'অনেকটা তাই। তাছাড়া খোকন ছেলেটাও ভাল আর আমাকে ও ভীষণ ভালবাসে।'

'সে কথা সত্যি।'

ও চট করে আমার ঠোঁটে একটু ভালবাসার স্পর্শ দিয়ে বললো, 'থ্যাঙ্ক ইউ।'

পরে আবার মেমসাহেব বলেছিল, 'সকালবেলায় ধুতি-পাঞ্জাবি পরে খোকন যখন কলোজে যায় তখন আমার ভীষণ ভাল লাগে।'

'লাগবেই তো। নিজে হাতে নিজের স্নেহ দিয়ে যাকে এত বড় করেছ, সে ছেলে বড় হলে নিশ্চয়ই ভাল লাগবে।'

একটু থামি, একটু হাসি। ও জিজ্ঞাসা করল, 'আবার হাসছ কেন?'

'এমনি।'

'এমনি কেন?'

আবার হাসলাম। আবার বললাম, 'এমনি।'

মেমসাহেব পীড়াপীড়ি শুরু করে দিল। 'এমনি কেন হাসছ বল না!'

হাসতে হাসতেই আমি বললাম, 'বলব?'

'বল।'

আবার হাসলাম। বললাম, 'সত্যি বলব?'

মেমসাহেব কনুই-এর ওপর ভর দিয়ে আমার মুখের ওপর হুমড়ি খেয়ে বললো, 'বলছি তো বল না।'

দু'হাত দিয়ে ওর মুখটা টেনে নিয়ে কানে কানে জিজ্ঞাসা করলাম, 'আমাদের খোকন কবে হবে?'

মেমসাহেব আমার কানে কানে বললো, 'তুমি যেদিন চাইবে!'

'সিওর?'

'সিওর।'

ওকে জড়িয়ে ধরে আদর করে বললাম, 'থ্যাঙ্ক ইউ ভেরী মাচ।'

ও হাসতে হাসতে উত্তর দিল, 'নট অ্যাট অল!' ইট উইল বী মাই প্রেজার।' আর ইউ সিওর ম্যাডাম।'

ইয়েস স্যার আই অ্যাম সিওর। এই কথার পর দু'জনেরই যেন কি হল। কি যেন সব দুট্টমি বুদ্ধির ঝড় উঠল দু'জনেরই মাথায়। সেদিন দুপুরে ঐ শান্ত স্নিদ্ধ মেমসাহেব যে কি কাণ্ডটাই করল! পরে আমি বলেছিলাম, 'জান মেমসাহেব, তোমাকে দেখে বোঝা যায় না তোমার মধ্যে এত দুট্টমি বুদ্ধি লুকিয়ে আছে!'

ও পাশ ফিরে মুখ ঘুরিয়ে বললো, 'বাজে বকো না।'

পরের দিন ভোরবেলায় এলাম সিলিসের লেকের ধারে। পাহাড়ের উপর এককালের রাজপ্রাসাদ এখন সরকারী পাহাড়া। দোতলায় ম্যানেজারের খাতায় নামধাম লিখে ঘরের চাবি নিয়ে তিনতলার ছাদে এসে দাঁড়াতেই মেমসাহেব লেক আর পাহাড় দেখে মুগ্ধ হল। বললো, 'চমৎকার।'

মাথায় খোমটা, কপালে বিরাট সিঁদুরের টিপ, চোখে সানগ্লাস দিয়ে মেমসাহেবকে এই পরিবেশে আমার যেন আরো হাজার হাজার গুণ ভাল লাগল। আমি বললাম, 'সত্যি চমৎকার!'

'তা আমার দিকে তাকিয়ে বলছ কেন?'

'এই লেক, পাহাড় আর এই রাজপ্রাসাদের চাইতেও তোমাকে বেশি ভাল লাগছে।'

আমার প্রশংসা গ্রাহ্য না করে ও ছাদের চারপাশ ঘুরে ঘুরে লেক আর পাহাড় দেখছিল। ইতিমধ্যে ছাদের ওপাশ থেকে অকস্মাৎ এক সদ্য বিবাহিতা মহিলা মেমসাহেবের কাছে এসে জিজ্ঞাসা করলেন, 'আপনারা বাঙালী?'

ও একবার ঘাড় বেঁকিয়ে সানগ্লাসের মধ্যে দিয়ে আমাকে দেখে নিয়ে বললো, 'হ্যাঁ।' একটু খেমে জানতে চাইল, 'আপনি?'

অদ্ভুতমহিলা বত্রিশ পাঁচ দাঁত বের করে বললেন, 'আমরাও বাঙালী।'

আমি মনে মনে বললাম, 'এখানেও কি একটু নিশ্চিন্তে থাকতে পারব না? উদ্ভ্রমহিলা ধামলেন না। আবার প্রশ্ন করলেন, 'কোথায় থাকেন আপনারা?' মেমসাহেব অস্বস্তিবোধ করলেও উদ্ভ্রমহিলার অগ্রহের তৃষ্ণা না মিটিয়ে আসতে পারছিল না। বললো, 'দিল্লী।'

'দিল্লীতে? কোথায়? লোদী কোলোনী?'

'না, ওয়েস্টার্ন কোর্টে।'

'আপনার স্বামী কি গভর্নমেন্টে আছেন?'

'না, উনি জার্নালিস্ট।'

বেয়ারা ঘরের দরজা খুলে অ্যাটাচিটা রেখে দিল। আমি এবার ডাক দিলাম, 'শোন।'

মেমসাহেব মাথার ঘোমটাটা একটু টেনে বললো, 'এখন আসি। পরে দেখা হবে।'

'আমরা আজ বিকেলেই আজমীর চলে যাব।'

'আজই?' মেমসাহেব মনে মনে দুঃখ পাবার ডান করল।

ও ঘরের দরজায় আসতেই আমি বললাম, 'তুমি শুকে বলো একুনি বিদায় নিতে।'

স্নানগ্রাসটা খুলতে খুলতে ও বললো বসল। আঃ স্নতে পাবেন আমি বাথরুমে ঢুকলাম। স্নান সেরে বেরিয়ে আসতেই 'ও আমাকে মেমসাহেব চুল খুলতে বসল বললো, 'তুমি সাবান, তোয়ালে নিয়ে যাও নি?'

'বাথরুমেরই তো ছিল।'

'তাভো হোটেলের।'

'তাতে কি হল? কাচানো তোয়ালে নতুন সাবান ব্যবহার করলে কি হয়েছে?'

'কিছু হোক আর নাই হোক, আমার তোয়ালে-সাবান থাকতে তুমি কেন হোটেলের জিনিস ব্যবহার করবে?'

মেমসাহেবও স্নান সেরে নিল। বেয়ারাকে ডেকে বললাম, 'নাস্তা লে আও!'

ব্রেকফাস্ট খেয়ে সোফায় এসে বসলাম দু'জনে। মেমসাহেবকে বললাম, 'একটা গান শোনাও।'

'চারিদিকে লোকজন ঘোরাঘুরি করছে। এখন নয়, সন্ধ্যাবেলায় পাহাড়ের পাশ দিয়ে লেকের ধারে বেড়াতে বেড়াতে তোমাকে অনেক গান শোনাব।'

সেদিন সারাদিন মেমসাহেবের গলায় রবীন্দ্রসংগীতে শোনা হয় নি সত্য। কিন্তু ভবিষ্যৎ জীবনের সংগীত রচনা করেছিলাম দু'জনে।.....

'ওগো, এর পর তোমার আর কিছু আর বাড়লেই তুমি একটা প্রী-রুম ফ্ল্যাট নেবে।'

'এখনই ফ্ল্যাট নিয়ে কি হবে?'

'দু'জনেই আন্তে আন্তে সংসারের সবকিছু সাজিয়ে-ওছিয়ে নেব।'

'তাছাড়া প্রী-রুম ফ্ল্যাট নিয়ে কি হবে? একটা ঘরের একটা ছোট ইউনিট হলেই তো যথেষ্ট।'

'না, না, তা হয় না। একটা ঘরের ফ্ল্যাটে আমাদের দু'জনেরই তো হাত-পা ছড়িয়ে থাকা অসম্ভব।'

'দু'জন ছাড়া তিনজন পাছ কোথায়?'

এবার মেমসাহেবের সব গাধীর্ষ উধাও হয়ে গেল। হাসতে হাসতে বললো, 'তোমার মত ডাকাতের সঙ্গে সংসার করতে শুরু করলে দু'জন থেকে তিনজন, তিনজন থেকে চারজন, পাঁচজন হতেও সময় লাগবে না।'

ওর কথা শুনে আমি স্তম্ভিত না হয়ে পারলাম না। অবাক বিশ্বয়ে আমি ওর দিকে চেয়ে রইলাম।

'অমন হাঁ করে কি দেখছ?'

'তোমাকে।'

'আমাকে?'

মাথা নেড়ে বললাম, 'হঁ, তোমাকে।'

'আমাকে কোনদিন দেখ নি?'

ওর দিকে চেয়ে বললাম, 'দেখেছি।'

এবার মেমসাহেবও একটু অবাক হয়ে আমার দিকে চাইল। 'তবে ভয় করে আমার দিকে চেয়ে চেয়ে কি দেখছ?'

আমি দু'হাত দিয়ে ওর মুখখানা তুলে ধরে বললাম, 'জান মেমসাহেব, তুমি নিশ্চয়ই সুখী সার্থক স্ত্রী হবে। কিন্তু সন্তানের জননী হিসাবে বোধহয় তোমার তুলনা হবে না।'

মেমসাহেব প্রথমে ধীরে ধীরে দৃষ্টিটা নামিয়ে নিল। তারপর আশতো করে মাথাটা আমার বুকের পর রাখল। দুটো আঙুল দিয়ে পাঞ্জাবির বোতামটা ঘোরাতে ঘোরাতে বললো, 'আমার যে ছেলেমেয়ের ভীষণ শখ। রাস্তা-ঘাটে ফুটফুটে সুন্দর বাচ্চা দেখলেই মনে হয়....'

'যদি তোমার হতো, তাই না?'

মেমসাহেব আমার কথায় সম্মতি জানিয়ে মাথা নেড়ে হাসল। তারপর আশ্তে আশ্তে ওর মুখটা আমার কোলের মধ্যে লুকিয়ে ফেলল। আমার মনে হলো কি যেন লজ্জায় বলতে পারছে না। জিজ্ঞাসা করলাম, 'কিছু বলবে?'

মুখটা লুকিয়ে রেখেই আশ্তে আশ্তে বলল, 'তোমার ইচ্ছে করে না?'

আমি হেসে কেললাম। 'জান মেমসাহেব, স্বপ্ন দেখতে বড় ভয় হয়।'

আমার কোলের মধ্যে লুকিয়ে রাখা মুখটা ঘুরিয়ে আমার দিকে চাইল। বললো, 'কেন ভয় হয়?'

'জীবনে চলতে গিয়ে বার বার পিছনে পড়ে গেছি। তাই তো ভবিষ্যতের কথা ভাবতে, ভবিষ্যৎ জীবনের স্বপ্ন দেখতে ভয় হয়!'

ও হাত দিয়ে আমার মুখটা চেপে ধরে বললো, 'না, না, ভয়ের কথা বলো না। ভয় কি?' একটু আশস্তে, একটু বিধাশস্ত হয়ে জানতে চাইল, 'আমি কি তোমার হবো না?'

এবার আমি ওর মুখটা চেপে ধরে বললাম, 'ছি, ছি, ওসব আজেবাজে কথা ভাবছ কেন? তুমি তো আমারই।'

ওর মুখে তখনও বেশ চিন্তায় ছাপ। বললো, 'সে তো জানি! কিন্তু তবুও তুমি ভয় পাচ্ছ কেন?'

আমি দু'হাত দিয়ে এক বুকের মধ্যে তুলে নিলাম। সান্ত্বনা জানালাম, 'কিছু ভয় করো না। তোমার স্বপ্ন, তোমার স্বপ্ন, কোনদিন ব্যর্থ হতে পারে না।'

একটু ব্যাকুলতা নেশানো হয়ে বললো, 'সত্যি বলছ?'

'একশ'বার বলছি। যদি বিধাতার ইচ্ছা না হতো তাহলে কি ঐ আশ্চর্যভাবে আমাদের দেখা হতো? নাকি এমনি করে আজ আমরা সিলিসের লেকের পাড়ে মিলতে পারতাম?'

'আমারও তো তাই মনে হয়। যদি ভগবানের কোন নির্দেশ, কোন ইঙ্গিত না থাকত তাহলে সত্যি আমরা কোনদিন মিলতে পারতাম না।'

'তবে এত ঘাবড়ে যাচ্ছ কেন?'

অনুযোগের সুরে মেমসাহেব বললো, 'তুমিই তো ঘাবড়ে দিচ্ছ।'

'ঘাবড়ে দিচ্ছি না, সতর্ক করে দিচ্ছি।'

দু'আঙুল দিয়ে আমার গলাটা চেপে ধরে বললো, 'কি আমার সতর্ক করার ছিঁরি!'

দোলাবৌদি, সেই অরণ্যে আর পর্বতের কোলে যে দুটি দিন কাটিয়েছিলাম, তা আমার জীবনের মহা স্মরণীয় দিন। এত আপন করে, এত নিবিড় করে মেমসাহেবের এত ভালবাসা আমি এর আগে কোনদিন পাই নি। ঐ দুটি দিন প্রতিটি মুহূর্তে মেমসাহেবের ভালবাসা আর উষ্ণ সান্নিধ্য উপভোগ করেছিলাম আমি। তাই তো তৃতীয় কোন ব্যক্তির সাহচর্যে আসতে মন চায় নি।

মেমসাহেব বলেছিল, 'অনেক বেলা হলো। চলো লাঞ্চ খেয়ে আসি।'

আমি সোজা জানিয়ে দিয়েছিলাম, 'আমি ঘর হেঁড়ে বেরুচ্ছি না।'

'তবে?'

'তবে আবার কি? বেয়ারাকে ডেকে বল ঘরে দিয়ে যেতে।'

আমি অতীত দিনের রাজপ্রাসাদের রাজকুমারের শয়নকক্ষে মহারাজার মত শুয়ে রইলাম। ও বেল বাজিয়ে বেয়ারাকে ডেকে বললো, 'সাহাবকা তবিরত আচ্ছা নেই হ্যায়, মেহেরবানি করকে খানা ইধারই লে-জানা।'

'জো হুকুম মেমসাহেব।'

ঘরে খাবার এসেছিল। সেটার টেবিলে খাবার-সাবার সাজিয়ে ও ডাক দিয়েছিল, 'এসো খেতে এসো।'

বড় সোফায় দু'জন পাশাপাশি বসে খেয়েছিলাম। খেতে খেতে এক টুকরো নরম মাংস আমার মুখে ভুলে দিয়ে বলেছিল 'এই নাও খেয়ে নাও।'

'তুমি খাও না।'

মাংসের টুকরোটা খাবার সময় ওর দুটো আঙুল কামড় দিয়ে বললাম, 'তোমাকেও খেয়ে ফেলি।'

হাসতে হাসতে বললো, 'আমাকে কি খেতে বাকি রেখেছ?'

খেয়েদেয়ে ও একটা চাদর গায়ে দিয়ে পাশ ফিরে শুয়ে পড়ল। সতর্ক করে দিল, 'এখন চুপটি করে ঘুমোও, একটুও বিরক্ত করবে না।'

'সত্যি?'

'সত্যি নয়ত কি মিথ্যা?'

আমি একটু ওর কাছে এগিয়ে গিয়ে বললাম, 'বিরক্ত না করে যদি তোমাকে সুখী করি?'

আমাকে হাত দিয়ে একটা ধাক্কা দিয়ে হেসে বললো, 'দূর থেকে সুখী করো।'

'অনেক দূরে সরে যাব?'

'হ্যাঁ, যাও।'

'তাই কি হয়। তোমার কষ্ট হবে।'

বুড়ো আঙুলটা দেখিয়ে বললো, 'কলা হবে। দেখি কেমন যেতে পার!'

মেমসাহেব জানত ও পাশ ফিরে শুয়ে থাকতে পারবে না, আমিও দূরে সরে থাকব না। ওর মনের কথা আমি জানতাম, আমার মনের কথাও ও জানত। তবুও হয়ত একটু বেশি আদর, একটু বেশি ভালবাসা পাবার জন্য ও এমনি দুইমি করতে ভালবাসত। আমারও মন্দ লাগত না।

পরের দিন সারা গেষ্ট হাউস ফাঁকা হয়েছিল। শুধু আমরা দু'জন। আর দোতলায় এক বৃদ্ধ দম্পতি ছাড়া আর কোন গেষ্ট ছিল না।

সক্কেবেলায় আমরা দু'জনে লেকের ধার দিয়ে পাহাড় আর অরণ্যের মধ্যে কত ঘুরে বেড়িয়েছিলাম। মেমসাহেব কত গান গুনিয়েছিল। রাতে ফিরে এসে ছাদের কোণে লেকের মিষ্টি হাওয়ার বসে বসে দু'জনে ডিনার খেলাম। তারপর লাইটগুলো অফ করে দিয়ে বিরাট মুক্ত আকাশের তলায় বসে রইলাম আমরা দু'জনে। আকাশের তারাগুলো মিটমিট করে জ্বললেও সেদিন ঐ আবছা অন্ধকারে আমাদের দু'জনের মনের আকাশ পূর্ণিমার আলোয় ভরে গিয়েছিল।

আশপাশে দুনিয়ার আর কোন জনপ্রাণী ছিল না। মনে হয়েছিল শুধু আমরা দু'জনেই যেন এই বিশ্বব্রহ্মাণ্ডের মালিক। ভগবান যেন আমাদের মুখ চেয়ে, আমাদের শান্তির জন্য আর সবাইকে ছুটি দিয়েছিলেন এই পৃথিবী থেকে অন্য কোথাও একটু ঘুরে আসতে।

জনারণ্যের বাইরেও এর আগে কয়েকবার মেমসাহেবকে কাছে পেয়েছি কিন্তু এমন করে কাছে পাই নি। এত পূর্ণ পরিপূর্ণ, সম্পূর্ণভাবে আগে পাই নি।

'মেমসাহেব, ভুলে যাবে না তো এই রাত্রি কথা?'

বোতল বোতল ভালবাসার হুইকি খেয়ে মেমসাহেবের নেশা হয়েছিল যে কথা বলার ক্ষমতাও ছিল না। তাই তো শুধু মাথা নেড়ে বললো, 'না।'

'কোনওদিন না?'

'না।'

'যদি কোনদিন তুমি আমার থেকে অনেক দূরে চলে যাও।—'

'তোমার এই ভালবাসা আর এই স্মৃতি বুকে নিয়ে কোথায় যাব বল?'

'তবুও মানুষের অদৃষ্টের কথা তো বলা যায় না।'

জিভ দেয়ে ঠোঁটটা একটু ডিজিয়ে নিল, দুটো দাঁত দিয়ে ঠোঁটের কোণটা একটু কামড়ে নিল মেমসাহেব। তারপর বললো, 'তোমার এই ভালবাসা পাবার পর আর একজনের সঙ্গে সারাজীবন ধরে ভালবাসার অভিনয় করতে আমি পারব না।'

একটু থামল। আমাকে আর একটু কাছে টেনে নিল। একটু বেশি শক্ত করে জড়িয়ে ধরে বললো, 'তাছাড়া তোমার জীবনটার সর্বনাশ করে আর একজনকে আবার ঠকাব কেন?' একটু জোর গলায় বলে উঠল, 'না, না, আমি তা কোনদিন পারব না।'

আমিও যেন কেমন হয়ে গিয়েছিলাম। আমিও বেশ জোর করে ওকে জড়িয়ে ধরলাম।

একটু যেন ভেজা গলায় বলেছিলাম, 'সত্যি বলছি মেমসাহেব, ভগবানের কাছে কায়মনোবাক্যে প্রার্থনা করি সে দুর্দিন যেন কোন দিন না আসে। কিন্তু যদি কোনদিন আসে,

সেদিন আমি আর বাঁচব না। হয় উন্মাদ হবো নয়তো তোমার স্মৃতি বুকে নিয়েই এক লেকের জলে চিরকালের জন্য ডুব দেব।'

ও তাড়াতাড়ি আমার মুখটা চেপে ধরল। বললো, 'ছি, ছি, ও কথা মুখে আনে না। এই তোমার বুকে হাত দিয়ে বলছি, আমি তোমাকে ছেড়ে কোথাও যাব না।'

একটু থেমে, আমাকে একটু আদর করে মেমসাহেব আবার বলেছিল, 'আমি যেতে চাইলেও তুমি আমাকে যেতে দেবে কেন? আমি না তোমার স্ত্রী? তোমার মনে কোন দ্বিধা, কোন চিন্তা থাকলে আজ এই রাতিরেই তুমি আমার সিঁধিতে সিঁদুর পরিয়ে দাও, হাতে শাঁখা পরিয়ে দাও। আমি সেই শাঁখা-সিঁদুর পরেই কলকাতা ফিরে যাব।'

মেমসাহেবের কথায় মন থেকে অবিশ্বাসের ছোট ছোট টুকরো টুকরো মেঘগুলো পর্যন্ত কোথায় যেন মিলিয়ে গেল। আমার মুখটা হাসিতে ঝলমল করে উঠল। বললাম, 'না, না, আমার মনে কোন দ্বিধা নেই। তুমি যদি আমার না হতে তাহলে কি অমন হাসিমুখে তোমার সমস্ত সম্পদ, সব ঐশ্বর্য আর ভালবাসা এমন করে দিতে?'

কথায় কথায় অনেক রাত হয়ে গিয়েছিল। হাতে ঘড়ি ছিল কিন্তু দেখার মনোবৃত্তি কারুরই ছিল না। ঘরে এসে আর মেমসাহেব পাশ ফিরে শুয়ে থাকে নি। এত আপন, এত নিবিড়, এত ঘনিষ্ঠ হয়েছিল সে রাতে যে কাহিনী লেখা সম্ভব নয়। শুধু জেনে রাখ আমাদের দুটি মন, দুটি প্রাণ, দুটি আত্মা আর আশা-আকাঙ্ক্ষা, স্বপ্ন-সাধনা সব একাকার হয়ে মিশে গিয়েছিল সেই চিরস্মরণীয় রাতে।

ষোল

পরের দিন ঘুম ভাঙতে অনেক বেলা হয়েছিল। হয়ত আরো অনেক বেলা হতো। কিন্তু সূর্যের আলো চোখে পড়ায় আমার ঘুম ভেঙে গেল। পাশের খাটে মেমসাহেব আমার দিকে ফিরে শুয়েছিল। সূর্যের আলো ওর চোখে পড়ছিল না। মনে হলো মহানন্দে স্বপ্নে বিভোর হয়ে আছে।

ওর ঘুম ভাঙতে আমার মন চাইল না। ও এত নিশ্চিন্তে, শান্তিতে ঘুমুচ্ছিল যে দেখতে বেশ লাগছিল। তহফন ধরে শুধু চেয়ে চেয়ে দেখলাম। তারপর উঠে বসে আরো ভাল করে দেখলাম। ওর সর্বাস্থের 'পর দিয়ে বার বার চোখ বুলিয়ে নিলাম। একটু হয়ত হাত বুলিয়ে দিয়েছিলাম ওর গায়ে।

মনে মনে কত কি ভাবলাম। ভাবলাম, এই মেমসাহেব! এই আমার জীবননাট্যের নায়িকা। এই চপলা-চঞ্চলা লালা যে আমার জীবন ইতিহাসের মোড় ঘুরিয়েছে? এই সেই শিল্পী যে আমার জীবনে নুর দিয়েছে, চোখে স্বপ্ন দিয়েছে। ভাবলাম, এই সেই মেয়ে যে আমার জীবনে না এলে আমি কোথায় সবার অঙ্গক্যে হারিয়ে যেতাম, শুকনো পাতার মত কালবৈশাখীর মাতাল হাওয়ায় অজানা ভবিষ্যতের কোলে চিরকালের জন্য লুকিয়ে পড়তাম।

ভাবতে ভাবতে ভারী ভাল লাগল। ওর কপালের 'পর থেকে চুলগুলো সরিয়ে দিয়ে একটু আদর করলাম।

মেমসাহেব কাত হয়ে শুয়েছিল। ওর দীর্ঘ মোটা খিনুনিটা কাঁধের পাশ, বুকের 'পর দিয়ে বিছানায় লুটিয়ে পড়েছিল। আমি মুগ্ধ হয়ে আরও কিছুক্ষণ চেয়ে রইলাম। ওর ছন্দোবদ্ধ দেহের চড়াই-উতরাই দেখে যেন মনে হলো প্রাক্সিটিমিস -এর ভেনাস বা সাঁটার যক্ষী টর্সো! নাকি খাজুরাহোর নায়িকা, অজন্তার মারকন্যা।

মনে পড়ল ঈভার প্রতি মিলটনের কথা—'O' fairest of creation last and best, of all God's work's.'

ঈভার মত মেমসাহেব হয়ই অত সুন্দরী ছিল না কিন্তু আমার চোখ আমার মনে সে তো



অন্য। আমার শ্যামা মেমসাহেবকে মুগ্ধ হয়ে দেখলাম। অনেকক্ষণ। অবশ্য বাইবেলের মতে তো নারীই ভগবানের শেষ কীর্তি, শ্রেষ্ঠ কীর্তি। কিন্তু সবাই কি মেমসাহেব হয়? এই দেহের মাধুর্য, চোখে এমনি স্বপ্ন, চরিত্রে এই দৃঢ়তা, মনের এই প্রসারতা তো আর কোথাও পেলাম না।

ঘুমিয়ে ঘুমিয়েও যেন ও আমাকে ইশারা করল। মনে হলো যেন ডকন দিল—ওগো, কাছে এসো না, দূরে কেন? তুমি কি আমাকে তোমার বুকের মধ্যে তুলে নেবে না?

আমি হাসলাম। মনে মনে বললাম, পোড়ামুখী তুই তো জানিস না, তোকে বেশি আদর করতেও আমার ভয় হয়। তোকে বেশিক্ষণ বুকের মধ্যে ধরে রাখলে জ্বালা করে, ভয় ধরে।

ভয়?

হ্যাঁ, হ্যাঁ, ভয়। ভয় তবে না? যদি কোনদিন কোন কারণে কোন দৈব-দুর্বিপাকে আমার বুকটা খালি হয়ে যায়? তখন?

ঘুমিয়ে ঘুমিয়েই মেমসাহেব গুর ডান হাতটা আমার কোলের 'পর ফেলে একটু জড়িয়ে ধরবার চেষ্টা করল। যেন বললো, না গো, না, আমি তোমাকে ছেড়ে কোথাও যাব না।

আমি মেমসাহেবকে একটু কাছে টেনে নিলাম, একটু আদর করলাম।

ঐ সকালবেলার মিষ্টি সূর্যের আলোয় মেমসাহেবকে আদর করে বড় ভাল লাগল। কিন্তু আনন্দের ঐ পরম মুহূর্তেও একবার মনে হলো সন্ধ্যায় তো সূর্য অস্ত যায়, পৃথিবীতে তো আন্ধকার নেমে আসে।

জান দোলাবৌদি, ঐ হতচ্ছাড়া মেয়েটাকে যখনই বেশি করে কাছে পেয়েছি তখনই আমার মনের মধ্যে ভয় করত। কেন করত তা জানি না কিন্তু আজ মনে হয়—

ধাকগে। ওসব কথা বলতে শুরু করলে আবার সব কিছু গুলিয়ে যাবে। যত তাড়াতাড়ি সম্ভব তোমাকে আমার মেমসাহেবের কাহিনী শোনাতে হবে। সময় ঝড়ের বেগে এগিয়ে চলেছে। যত তাড়াতাড়ি সম্ভব একটা শুভলগ্নে আমাকে তো তোমায় পত্রীস্থ করতে হবে। তাই না? তাছাড়া আমারও তো বয়স বাড়ছে। বয়স বেশি হয়ে গেলে কি আমার কপালে কিছু জুটবে?

ঐ অরণ্য-পর্বত-লেকের ধারের রাজপ্রাসাদে দুটি দিন, দুই রাত্রি স্বপ্ন দেখে আমরা দিল্লী ফিরে এলাম। ফিরে এলাম ঠিকই কিন্তু যে মেমসাহেব আর-আমি গিয়েছিলাম সেই আমরা ফিরে এলাম না। ফিরে এলাম সম্পূর্ণ নতুন হয়ে।

দিল্লীতে ফিরে এসে মেমসাহেব একটি মুহূর্তও নষ্ট করে নি। সংসার পাতার কাজে মেতেছিল। একটা স্কটার রিক্সা নিয়ে দু'জনে মিলে দিল্লীর পাড়ায় পাড়ায় ঘুরেছিলাম ভবিষ্যতের আশ্রয়না পছন্দ করবার আশায়। কয়েলবাগ, ওয়েস্টার্ন এক্সটেনশন, নিউ রাজেন্দ্রনগর, ইস্ট প্যাটেল নগর থেকে দক্ষিণে নিজামুদ্দিন, জংপুরা, ডিফেন্স কলোনী, সাউথ এক্সটেনশন, কৈলাস, হাউসখাস, গ্রীনপার্ক পর্যন্ত ঘুরেছিলাম। সব দেখেওনে ও বলেছিল, 'গ্রীনপার্কই একটা ছোট্ট কটেজ নেব আমরা।'

'এত জায়গা থাকতে গ্রীনপার্ক?'

'শহর থেকে বেশ একটু দূরে আর বেশ ফাঁকা ফাঁকা আছে।'

'বড় দূর।'

'তা হোক। তবু থেকে শান্তি পাওয়া যাবে।'

'তা ঠিক।'

পরে আবার বলেছিল, 'দু'তিন মাসের মধ্যেই বাড়ি ঠিক করবে। তারপর একটু গোছগাছ করে নিয়েই সংসার পাতব।'

হাত দিয়ে আমার মুখটা নিজের দিকে ঘুরিয়ে নিয়ে মেমসাহেব জিজ্ঞাসা করল, 'কেমন? তোমার আপত্তি নেই তো?'

আমি মাথা নেড়ে বলেছিলাম, 'না।'

আরো দু'চারটে কি যেন কথাবার্তা বলার পর আমার গলাটা জড়িয়ে ধরে বললো, 'দেখ না, বিয়ের পর তোমাকে কেমন জন্ম করি।'

'কি জন্ম করবে?'

'আজ্ঞেবাজ্ঞে খাওয়া-দাওয়া ফালতু আজ্ঞা দেওয়া সব বন্ধ করে দেব।'

'তাই বুঝি?'

‘তবে কি?’

এবার আমিও হাত দিয়ে ওর গলাটা জড়িয়ে ধরে বললাম, ‘আর কি করবে মেমসাহেব?’

আধো আধো গলায় উত্তর দিল, ‘সব কথা বলব কেন?’

‘তাই বুঝি?’

‘তবে কি? বাট ইউ ইউল সী আই ইউল মেক ইউ হ্যাপি।’

‘তা আমি জানি’ তবে মাঝে মাঝে আমার ভয় হয়।’

‘কি ভয় হয়?’

আমি ওর কানে কানে ফিসফিস করে বললাম, ‘আমি বোধহয় জেগে হবো।’

মেমসাহেব আমাকে একটা ধাক্কা দিয়ে বললো, ‘বাজে বকো না।’

একটু মুচকি হাসলেও বেশ সিরিয়াসলি বললাম, ‘বাজে না মেমসাহেব! বিয়ের পর বোধহয় তোমাকে ছেড়ে আমি পার্লামেন্ট বা অফিসেও যেতে পারব না।’

এবার মেমসাহেব একটু মুচকি হাসে। বললো, ‘চব্বিশ ঘন্টা বাড়ি বসে কি করবে?’

আবার কানে কানে ফিসফিস করে বললাম, ‘তোমাকে নিয়ে গুয়ে থাকব।’

ও হেসে বললো, ‘অসভ্য কোথাকার!’ একটু খেমে বললো, ‘সুতে দিলে তো?’

আমি বললাম, ‘সুতে না দিলে আমি চীৎকার করে কান্নাকাটি করে সারা পাড়ায় জানানিয়ে দেব।’

মেমসাহেব এবার আমার পাশ থেকে উঠে পড়ে। মুখ টিপে হাসতে হাসতে বললো, ‘বাপরে বাপ! কি অসভ্য!’

আমি দৌড়ে ওকে ধরতে গেলাম। ও ছুটে বারান্দায় বেরিয়ে যাবার চেষ্টা করল, পারল না। আঁচল ধরে টানতে টানতে নিয়ে এলাম সোফার ওপর। ‘যদি বলি এখনই..... হাতে ঘুষি পাকিয়ে বললো, ‘নাক ফাটিয়ে দেব।’

‘সত্যি?’

এমন করে মেমসাহেবের দিল্লীবাসের মেয়াদ ধীরে ধীরে শেষ হয়ে গেল। রবিবার বিকেলে ডিলাক্স এয়ার কন্ডিশনড এক্সপ্রেসে কলকাতা চলে গেল। ওয়েস্টার্ন কোর্ট থেকে স্টেশন রওনা হবার আগে মেমসাহেব আমাকে প্রণাম করল, আমার বুকে মাথা রেখে জড়িয়ে ধরে একটু কাঁদল।

আমি ওকে আশীর্বাদ করলাম, আদর কললাম, চোখের জল মুছিয়ে দিলাম।

এক সপ্তাহ ধরে দু’জনে কত কথা বলেছি কিন্তু সেদিন ওর বিদায় মুহূর্তে দু’জনের কেউই বিশেষ কথা বলতে পারি নি। আমি শুধু বলেছিলাম, ‘সাবধানে থেকো। ঠিকমত চিঠিপত্র দিও।’

ও বলেছিল, ‘ঠিকমত খাওয়া-দাওয়া করো। তোমার শরীর কিন্তু ভাল না।’

শেষে নিউ দিল্লী স্টেশনে ট্রেন ছাড়ার ঠিক আগে বলেছিল, ‘তুমি কিন্তু আমাকে বেশিদিন একলা রেখো না। কলকাতায় আমি একলা থাকতে পারি না।’

মেমসাহেব চলে গেল। আমি আবার ওয়েস্টার্ন কোর্টের শূন্যঘরে ফিরে এলাম। মনটা ভীষণ খারাপ লাগল। খেতে গেলাম না। ডাইনিং হলে আমাকে দেখতে না পেয়ে গজানন এলো আমার ঘরে খবর নিতে। আমাকে অনেক অনুরোধ করল কিন্তু তবুও আমি খেতে গেলাম না। বললাম, শরীর খারাপ।

গজানন আমার মনের অবস্থা নিশ্চয়ই উপলব্ধি করেছিল। সেজন্য সেও আর দ্বিতীয়বার অনুরোধ না করে বিদায় নিল।

কলকাতা থেকে মেমসাহেবের পৌছান সংবাদ আসতে না আসতেই আমি আবার কাজকর্ম শুরু করেছিলাম। পুরো একটা সপ্তাহ পার্লামেন্টে যাই নি, সাউথ-ব্লক নর্থ-ব্লক যাইনি, মন্ত্রী-এম-পি-অফিসার ডিপ্লোম্যাট দর্শন করি নি। এমন কি টাইপ রাইটার পর্যন্ত স্পর্শ করি নি।

দু’একদিন এদিক-ওদিক ঘোরাঘুরি করলাম, কিন্তু বিশেষ উল্লেখযোগ্য কোন খবর-টবর পেলাম না। পার্লামেন্টে তখন আকাশাই চীন সড়ক নিয়ে ঝড় বইছিল প্রায়ই। প্রাইম মিনিষ্টারও বেশ গরম কথা বলছিলেন মাঝে মাঝেই। দু’চারজন পলিটিসিয়ান যুদ্ধ করবার পরামর্শ দিলেও প্রাইম মিনিষ্টার তা মানতে রাজি হলেন না। অথচ এইভাবে বক্তৃতার লড়াই কতদিন চলতে পারে? অল ইন্ডিয়া রেডিও আর পিকিং বেতারের রাজনৈতিক মন্তব্য তেতো হয়ে উঠেছিল। লড়াই করার কোন উদ্যোগ

আয়োজন বা মনোবৃত্তি সরকারী মহলে না দেখায় আমার মনে স্থির বিশ্বাস হলো আলোচনা হতে বাধ্য।

দু'চারজন সিনিয়র ক্যাবিনেট মিনিষ্টারের বাড়িতে আর অফিসে কয়েকদিন ঘোরাঘুরি করে কোন কিছু হৃদিস পেলাম না। শেষে সাউথ ব্লকে ঘোরাঘুরি শুরু করলাম। পররাষ্ট্র মন্ত্রণালয়ের সেক্রেটারি ও স্পেশাল সেক্রেটারিকেও তেল দিয়ে কিছু ফল হলো না।

শেষে আশা প্রায় ছেড়ে দিয়েছি এমন সময়.....

আফ্রিকা ডেকের মিঃ চোপরার সঙ্গে আড্ডা দিয়ে বেরুতে প্রায় সাড়ে ছ'টা হয়ে গেল। বেরুবার সময় প্রাইম মিনিষ্টারের ঘরের সামনে উঁকি দিতে গিয়ে দেখলাম, প্রাইম মিনিষ্টার লিফট-এ চুকেছেন। আমি ভাড়াভাড়া ছড়মুড় করে লাফাতে লাফাতে সিঁড়ি দিয়ে নেমে গেলাম।

প্রাইম মিনিষ্টার গাড়ির দরজার সামনে এসে গিয়েছেন, পাইলট তার মোটর সাইকেল টার্ট দিয়েছেন কিন্তু চলতে শুরু করে নি, এমন সময় ফরেন সেক্রেটারি প্রায় দৌড়াতে দৌড়াতে এসে হাজির হলেন। কানে কানে প্রাইম মিনিষ্টারের সঙ্গে কি যেন কথা বললেন। প্রাইম মিনিষ্টার আর ফরেন সেক্রেটারি আবার লিফট-এ চড়ে উপরে চলে গেলেন।

আমি একটু পাশে দাঁড়িয়ে সব কিছু দেখলাম। বুঝলাম, সামথিং ভেরি সিরিয়ান অথবা সামথিং ভেরি আর্জেন্ট। তা নয়তো ঐভাবে ফরেন সেক্রেটারি প্রাইম মিনিষ্টারকে অফিসে ফেরত নিয়ে যেতেন না।

আমি প্রাইম মিনিষ্টারের অফিসের পাশে ডিজিটার্স রুমে বসে বইলাম। দেখলাম, বিশ-পঁচিশ মিনিট পরে প্রাইম মিনিষ্টার আবার বেরিয়ে গেলেন। প্রাইম মিনিষ্টারকে এবার দেখে মনে হলো একটু যেন স্বস্তি পেয়েছেন মনে মনে।

আমি আরো কয়েক মিনিট অপেক্ষা করলাম। দেখলাম, প্রাইম মিনিষ্টার চলে যাবার পর পরই চায়না ডিভিশনের জয়েন্ট সেক্রেটারি মিঃ মালিক ফরেন সেক্রেটারির ঘর থেকে বেরিয়ে এলেন।

আমার আর বুঝতে বাকি রইল না চীন সম্পর্কেই কিছু জরুরি খবর এসেছে।

সেদিনকার মত আমি বিদায় নিলাম। পরের দিন থেকে মিঃ মালিকের বাড়ি আর অফিস ঘুরঘুর করা শুরু করলাম। তবুও কিছু সুবিধা হলো না।

শেষে ইউনাইটেড নেশন্স ডিভিশনের একজন সিনিয়র অফিসারের কাছে খবর পেলাম সীমান্ত বিরোধ আলোচনার জন্য চীনা প্রধানমন্ত্রী চৌ-এন-লাই'কে দিল্লী আসার আমন্ত্রণ জানানো হয়েছে এবং তিনি তা গ্রহণ করেছেন।

খবরটি সে বাজারে প্রায় অবিশ্বাস্য হলোও যাচাই করে দেখলাম, ঠিকই। দিল্লীর বাজার তখন অত্যন্ত গরম কিন্তু তবুও আমি খবরটা পাঠিয়ে দিলাম। ট্রান্সকল করে নিউজ এডিটরকে ব্রিফ করে দিলাম। পরের দিন ডবল কলাম হেডিং দিয়ে কেসেভ লীড হয়ে ছাপা হলো— চৌ-এন-লাই দিল্লী আসছেন। আমি বললাম, একটু ধৈর্য ধরুন।

এক সপ্তাহ ঘুরতে-না-ঘুরতেই লোকসভায় কোচেন-আওয়ারের পর স্বয়ং প্রাইম মিনিষ্টার ঘোষণা করলেন, প্রিমিয়ার চৌ-এন-লাই তাঁর আমন্ত্রণ গ্রহণ করে সীমান্ত বিরোধ আলোচনার জন্য দিল্লী আসছেন।

বিনা মেঘে বজ্রাঘাত হলো অনেকের মাথায়। আমি কিন্তু আনন্দে ধেই ধেই করে নাচতে শুরু করলাম। রাতে এডিটরের টেলিগ্রাম পেলাম, কনগ্রাচুলেশন্স, স্পেশ্যাল ইনক্রিমেন্ট টু-ফিফটি উইথ ইমিডিয়েট এক্সেক্ট। দু'হাত তুলে ভগবানকে প্রণাম করলাম।

সেই রাতেই মেমসাহেবকে একটা টেলিগ্রাম করে সুখবরটা জানিয়ে দিলাম।

পরের দিন মেমসাহেবেরও একটা টেলিগ্রাম পেলাম-অ্যাকসেন্ট কনগ্রাচুলেশন্স অ্যান্ড প্রণাম স্টপ লেটার ফলোজ।

মেমসাহেবের চিঠি পাবার পরও ভাবতে পারি না ভবিষ্যতে আরো কোন অপ্রত্যাশিত ঘটনা ঘটবে আমার জীবনে। কিন্তু সত্যি সত্যিই ঘটল। প্রাইম মিনিষ্টারের সঙ্গে ইউরোপে যাবার দুর্লভ সুযোগ এলো আমার জীবনে কয়েক মাসের মধ্যেই। বিদায় জানাবার জন্যে মেমসাহেব দিল্লী ছুটে এসেছিল। আমি আশ্চর্য হয়েছিলাম। বলেছিলাম, 'আমাকে সী-অফ করার জন্য তুমি কলকাতা থেকে

দিবী এলে?’

দুটি হাত দিয়ে আমার দুটি হাত দোলাতে দোলাতে বললেন, ‘তুমি প্রথম বারের জন্য ইউরোপ যাচ্ছ আর আমি চুপ করে বসে থাকব কলকাতায়?’

ঐ কালো হরিণ চোখ ঘুরিয়ে-ফিরিয়ে বললো, ‘তাও আবার প্রাইম মিনিষ্টারের সঙ্গে চলছ! আমি না এসে থাকতে পারি?’

পাগলীর কথাবার্তা শুনে আমার হাসি পেতো। কত হাজার হাজার লোক বিদেশ যাচ্ছে তার জন্য এক হাজার মাইল দূর থেকে ছুটে এসে বিদায় জানাতে হবে?

দু’হাত দিয়ে আমার মুখখানা তুলে ধরে মেমসাহেব বললো, এসেছি, বেশ করেছি তোমাকে কৈফিয়ত দিয়ে আসব?’

বল দোলাবৌদি, অমন পাগলীর সঙ্গে কি তর্ক করা যায়? যায় না। তাই আমিও আর তর্ক করিনি।

পাসপোর্ট-ভিসা ফিরেন একচেঞ্জ আগেই ঠিক ছিল। এয়ার-প্যাসেঞ্জ আগের থেকেই বুক করা ছিল। দু’জনে মিলে এয়ার ইন্ডিয়া অফিসে গিয়ে টিকিটটা নেবার পর কনট্রোল কয়েকটা ছোটখাট জিনিসপত্র কিনলাম, তাঁরপর লিফট হাউসে গিয়ে কফি খেয়ে ফিরে এলাম ওয়েস্টার্ন কোর্টে।

ফেরার পথে মেমসাহেব বললো, ‘দেখ, তোমার কাজকর্ম আজই শেষ করবে। কালকে কোন কাজ করতে পারবে না।’

‘কেন? কাল কি হবে?’ আমি জানতে চাইলাম, ঘাড় ঠেকিয়ে চোখ ঘুরিয়ে ও বললো বাঃ! পরও ভোরেই চলে যাবে! কালকের দিনটাও আমি পেতে পারি না?’

লাঞ্ছের পর একটু বিশ্রাম করে বেরিয়েছিলাম বাকি কাজগুলো শেষ করার জন্য। তারপর এক্সটারনাল অ্যাফেয়ার্স মিনিষ্ট্রিতে গিয়ে দেখাতনা করে ফিরে এলাম সন্ধ্যার পরই।

এসে দেখি মেমসাহেব একটা চমৎকার বালুচরী শাড়ি পরেছে, বেশ চেপে কান ঢেকে চুল বেঁধেছে, বিরাট খোঁপায় রূপার কাঁটা গুঁজেছে। রূপার চেন-এ টিবেটিয়ান লকেট লাগানো একটা হার ছাড়া আরো কয়েকটা রূপার গহনা পরেছে। কপালে টকটকে একটা বিরাট টিপ ছাড়াও চোখে বোধহয় একটু সুরমার টান লাগিয়েছিল।

আমি ঘরে ঢুকে মেমসাহেবকে দেখেই থমকে দাঁড়লাম। ও মুখটা একটু নীচু করে চোখটা একটু ঘুরিয়ে আমার দিকে তাকাল। একটু হাসল।

আমি হাসলাম না, হাসতে পারলাম না। আগের মতই স্থির দৃষ্টিতে ওর দিকে চেয়ে রইলাম। ও আবার আমার দিকে তাকিয়ে একটু মুচকি হাসল। জিজ্ঞাসা করল, ‘অমন স্থির হয়ে কি দেখছ?’

‘তোমাকে।’

ন্যাকামি করে ও আবার বললো, ‘আমাকে?’

‘বুঝতে পারছ না?’

একটু হাসল। বললো, ‘তা তো বুঝতে পেরেছি কিন্তু অমন করে দেখবার কি আছে?’

‘কেন দেখছি তা বুঝতে পারছ না? দেখবার কি কোন কারণ নেই?’

মেমসাহেব এবার তর্ক না করে ধীর পদক্ষেপে দেহটাকে একটু দুলিয়ে দুলিয়ে আমার সামনে এসে দাঁড়াল। আমার হাত দুটো ধরে মুখটা একটু বেঁকিয়ে আমার দিকে তাকিয়ে বললো, ‘খুব খারাপ লাগছে?’

আমি প্রায় চীৎকার করে উঠলাম, ‘অসহ্য, অসহ্য!’

‘সত্যি খারাপ লাগছে?’

‘অত খারাপ কি না তা জানি না, তবে তোমাকে সহ্য করতে পারছি না।’

ও এবার সত্যি একটু চিন্তিত হয়ে প্রশ্ন করল, ‘এসব খুলে ফেলব?’

এতক্ষণ ও আমার সামনে দাঁড়িয়ে কথা বলছিল। এবার ওকে পাশে টেনে নিয়ে বললাম, ‘হে নিরুপমা, চপলতা আজি যদি ঘটে তবে করিয়ো ক্ষমা।..... আর হে নিরুপমা, আঁখি যদি আজ করে অপরাধ, করিয়ো ক্ষমা।’

দোলাবৌদি, মেমসাহেবও কোন কথা বললো না। দুটি হাত দিয়ে আমার হাতটা জড়িয়ে ধরে মাথাটা হেলান দিয়ে খুব মিহিসুরে গাইল, 'আমি রূপে তোমায় ভোলাব না, ভালবাসায় ভোলাব।'

আমি প্রশ্ন করলাম, 'আর কি করবে?'

মেমসাহেব গাইতে গাইতে বললো, 'ভরাব না ভূষণভারে, সাজাব না ফুল হারে— সোহাগ আমার মালা করে গলায় তোমার দোলাব।'

আমি বললাম, 'সত্যি।'

মেমসাহেব গজ্ঞাননকে ডেকে চায়ের অর্ডার দিল। চা এলো। চা খেতে খেতে জিজ্ঞেস করলাম, 'তুমি কি এয়ার ইন্ডিয়া বা টুরিস্ট ব্যুরোয় চাকরির ইন্টারভিউ দিতে যাচ্ছ?'

'কেন বল তো?'

'তা নয়ত এত রূপোর গহনা চাপিয়েছ কেন?'

'আমার খুব ভাল লাগে। কেন, তোমার খারাপ লাগছে?'

'পাগল হয়েছে? খারাপ লাগবে কেন? খুব ভাল লাগছে।'

'সত্যি?'

'সত্যি ছাড়া কি মিথ্যা বলছি?'

'যাই হোক, এত সাজলে কেন?'

'তোমার ভাল লাগবে বলে।'

একটু থেমে আবার বললো, 'তাছাড়া.....'

'তাছাড়া কি?'

মুখটা একটু লুকিয়ে বললো, 'ইউরোপ যাচ্ছ—না জানি কত মেয়ের সঙ্গে আলাপ হবে। তাই যাতে চট করে ভুলে না যাও.....'

'আমাকে নিয়ে আঞ্জো তোমার এত ভয়?'

'আমাকে একটু আদর করে মেমসাহেব বললো, 'না গো, না। এমনি সেজেছি।' সেদিন সন্ধ্যা-রাত্রি আর পরের দিনটা পুরোপুরি মেমসাহেবকে দিয়েছিলাম।

তারপর বিদায়ের দিন এয়ারপোর্ট রওনা হবার আগে মেমসাহেব আমাকে প্রণাম করেছিল, আমি ওকে আশীর্বাদ করেছিলাম। কিন্তু তবুও চুপ করে দাঁড়িয়ে রইল। মনে হলো যেন কিছু বলবে। জানতে চাইলাম, 'কিছু বলবে?'

কিছু কথা না বলে মাথা নিচু করে ঠোট কামড়াতে কামড়াতে মুচকি হাসছিল।

আমি ওর মুখটা আলতো করে তুলে ধরে আবার জানতে চাইলাম, 'কি, কিছু বলবে?'

অনেকক্ষণ ধরে অনেকবার জিজ্ঞাসা করার পর হতচ্ছাড়ী আমার কানে কানে কি বলেছিল জান দোলাবৌদি? বলেছিল, আমাকে আর একটু ভাল করে আদর কর।

কি করব? বিদায়বেলায় এই অনুরোধ না রেখে আমি পারি নি। সত্যি একটু ভাল করেই আদর করলাম আর ওর দেহে একটা চিহ্ন রেখে গেলাম। এই চিহ্ন শুধু মেমসাহেবই দেখেছিল কিন্তু দুনিয়ার আর কেউ দেখতে পারে নি।

পালামের মাটি ছেড়ে আমি চলে গেলাম।

ঘুরতে ঘুরতে শেষে লন্ডন পৌঁছে মেমসাহেবের চার-পাঁচটা চিঠি একসঙ্গে পেলাম। বার বার করে লিখেছিল, ফেরার সময় তুমি দিল্লীতে না গিয়ে যদি সোজা কলকাতায় আস, তবে খুব ভাল হয়। কলেজে টেস্ট শুরু হয়েছে; সুতরাং এখন ছুটি নেওয়া যাবে না। অথচ তুমি ফিরবে আর আমি তোমাকে এয়ারপোর্টে রিসিভ করব না, তা হতে পারে না।

শেষে লিখেছিল, তুমি কবে, কোন ফ্লাইটে, কখন দমদম পৌঁছবে সে খবর আর কাউকে জানাবে না। দমদমে যেন ভিড় না হয়। শুধু আমি তোমাকে রিসিভ করব আর কোন তৃতীয় ব্যক্তি যেন এয়ারপোর্টে না থাকে।

মেমসাহেব আমাকে বিদায় জানাবার জন্য কলকাতা থেকে দিল্লী ছুটে এসেছিল। সুতরাং আমি ওর এই অনুরোধ উপেক্ষা করতে পারলাম না। বস্ট ছুটে এয়ার ইন্ডিয়ার অফিসে গিয়ে আরো কিছু পেমেন্ট করে টিকিটটা চেঞ্জ করে আনলাম। তারপর রওনা হবার আগে মেমসাহেবকে একটা 'কেবল'

করলাম, রিচিং ডামডাম, এয়ার ইন্ডিয়া, স্যাটারডে মর্নিং। মজা করার জন্যে শেষে উপদেশ দিলাম ডেন্ট ইনফর্ম এনিবডি।

সেদিন দমদমে অরেঞ্জ পাড়ের একটা তাঁতের শাড়ি আর অরেঞ্জ রংয়ের একটা ব্লাউজ পরে রোদুরের মধ্যে মাথায় ঘোমটা দিয়ে মেমসাহেব রেলিং-এর ধারে দাঁড়িয়েছিল আমার আগমন প্রত্যাশায়। আমার দু'হাতে ব্রিফকেস, টাইপরাইটার, কেবিনব্যাগ আর ওভারকোট থাকায় হাত নাড়তে পারলাম না। শুধু একটু মুখের হাসি দিয়ে ওকে জানিয়ে দিলাম; ফিরে এসেছি।

কাস্টমস্-ইমিগ্রেশন কাউন্টার পার হয়ে বাইরে বেরিয়ে আসতেই ও আমার হাত থেকে টাইপরাইটার আর কেবিনব্যাগটা নিয়ে নিল। টার্মিনাল বিল্ডিং থেকে বেরুবার সময় জিজ্ঞাসা করল, 'ভাল আছ তো?'

মাথা নেড়ে বললাম, 'হ্যাঁ।' তারপর জিজ্ঞাসা করলাম, 'তুমি?'

'ভাল আছি।'

তারপর ট্রান্সিটে উঠে মেমসাহেব আমাকে প্রণাম করল। আমি ওর মাথায় হাত দিয়ে বললাম, 'সুখে থাক মেমসাহেব।'

'নিশ্চয়ই সুখে থাকব।'

তারপর আমি বলেছিলাম, 'জান এই শাড়ি আর ব্লাউজ পরে তোমাকে ভারি ভাল লাগছে।'

খুব খুশি হয়ে হাসিমুখে ও বললো, 'সত্যি বলছ?'

'সত্যি বলছি। তোমাকে বড় শান্ত-স্নিদ্ধ মিস্ট্রি লাগছে।'

একটু পরে আবার বলেছিলাম, 'ইচ্ছা করছে তোমাকে জড়িয়ে ধরে একটু আদর করি।'

মেমসাহেব দু'হাত জোড় করে বলেছিল, 'দোহাই তোমার, এই ট্রান্সির মধ্যে আদর করো না।'

দোলাবৌদি, এমনি করে এগিয়ে চলেছিলাম আমি আর মেমসাহেব। আমি দিল্লীতে থাকতাম ও কলকাতায় থাকত। কখনও লুকিয়ে-চুরিয়ে মেজদিকে হাত করে ও দিল্লী আসত, কখনও বা আমি কলকাতা যেতাম। মাঝে মাঝেই আমাদের দেখা হতো। বেশিদিন দেখা না হলে আমরা শাস্তি পেতাম না।

ইতিমধ্যে একজন ন্যাভাল অফিসারের সঙ্গে মেমসাহেবের মেজদির বিয়ে হলো। বিয়ের নিমন্ত্রণ রক্ষা করতে আমি কলকাতা গিয়েছিলাম। একটা ভাল প্রেজেন্টেশনও দিয়েছিলাম।

মেজদির বিয়েতে গিয়ে ভালই করেছিলাম। এই উপলক্ষ্যে আমার সঙ্গে ওদের পরিবারের অনেকের আলাপ-পরিচয় হলো। তাছাড়া ঐ বিয়েতেই মেজদি আমাদের ব্যাপারটা পাকাপাকি করে দিয়েছিলেন। আমার হাত ধরে টানতে টানতে মেজদি ওর মা'র সামনে হাজির করে বলেছিলেন, 'হ্যাঁ মা, এই রিপোর্টারের সঙ্গে তোমার ঐ ছোটমেয়ের বিয়ে দিলে কেমন হয়?'

এমন অপ্রত্যাশিত ঘটনার জন্য আমি মোটেই প্রস্তুত ছিলাম না। লজ্জায় আমার চোখ-মুখ-কান লাল হয়ে উঠেছিল। তবুও আমি অনেক কষ্টে ভণিতা করে বললাম, 'আঃ মেজদি! কি যা তা বলছেন?'

মেজদি আমাকে এক দাবড় দিয়ে বললো, 'আর চং করবেন না। চূপ করুন।'

তারপর মেজদি আবার বললেন, 'কি মা? তোমার পছন্দ হয়?'

এত সহজে ঐ কালো-কুচ্ছিত হতচ্ছাড়ী মেয়েটাকে যে আমার মত সুপাত্রের হাতে সমর্পণ করতে পারবেন, মেমসাহেবের মা তা স্বপ্নেও ভাবেন নি। তাই বললেন, 'তোদের যদি পছন্দ হয় তাহলে আর আমার কি আপত্তি থাকবে বল?'

বিয়ে বাড়ি। ঘরে আরো অনেক লোকজনে ভর্তি ছিল। এদের সবার সামনেই মেজদি আমার ঘাড়ে একটা ধাক্কা দিয়ে বললেন, 'নিম, মাকে প্রণাম করুন।'

লজ্জায় আমার মাথা কাটা গেল। কিন্তু কি করব। প্রণাম করলাম।

এবার মেজদি আমার মাথাটা চেপে ধরে বললেন, 'নিম, এবার আমাকে প্রণাম করুন।'

আমি প্রতিবাদ করলাম, 'আপনাকে কেন প্রণাম করব?'

মেজদি চোখ বাঙিয়ে বললেন, 'আঃ। যা বলছি তাই করুন। তা নয়ত সবকিছু ফাঁস করে দেব।'

আশেপাশে গিলে গিলে মেজদির কথা গুনছিলেন আর হাঁ করে আমাকে দেখছিলেন।

আমি এদিক-সেদিক বাঁচিয়ে অনেক কষ্টে মেজদিকে চোখ টিপে ইশারা করলাম।

ন্যাভাল অফিসারকে পেয়ে মেজদির প্রাণে তখন আনন্দের বন্যা। আমার ইশারাকে সে তখন গ্রাহ্য করবে কেন? তাই সবার সামনেই বলে ফেললেন, 'ওসব ইশারা-টিশারা ছাড়ুন'। আগে প্রণাম করুন—তা নয়ত.....

দোলাবৌদি, তুমি আমার অবস্থাটা একবার অনুমান কর। বিয়ে বাড়ি। চারদিকে লোকজন গিজগিজ করছে। তারপর ঐ রণমূর্তিধারী বধুবেশী মেজদি! বীরত্ব দেখিয়ে বেশি তর্ক করলে না জানি হাটের মধ্যে হাঁড়ি ভেঙে মেজদি কি সর্বনাশই করত! টিপ করে একটা প্রণাম করেই পালিয়ে যাচ্ছিলাম কিন্তু মেজদি আবার টেনে ধরে বললেন 'আহা-হ্য! একটু দাঁড়ান।'

হুঙ্কার ছেড়ে বললেন, 'ঐ যে দিদি দাঁড়িয়ে আছে। দিদিকে প্রণাম করুন।'

আমি একটু ইতস্তত করতেই মেজদি আবার ডয় দেখালেন, খবরদার রিপোর্টার। অবাধ্য হলোই.....

দিদিকেও প্রণাম করলাম।

দিব্বী আসার দিন মেমসাহেব স্টেশনে এসে বলেছিল, 'জানি তোমাকে সবার খুব পছন্দ হয়েছে।' স্টেশনে প্রাটফর্মের সবার সামনেই ও আমাকে প্রণাম করল, আমি ওকে আশীর্বাদ করলাম। দিব্বী মেল ছেড়ে দিল।

সত্তর

মেজদি যে এত তাড়াতাড়ি আমাদের এত বড় উপকার করবেন তা কোনদিন ভাবি নি। শুধু ভাবি নি নয়, কল্পনাও করি নি। মেমসাহেব আমাকে ভালবাসত, আমি মেমসাহেবকে ভালবাসতাম। সে ভালবাসায় কোন ফাঁকি, কোন ডেজাল ছিল না। আমরা নিশ্চিত জানতাম আমরা মিলনই। শত বাধা-বিপত্তি আগ্রাহ্য করেও আমরা মিলতাম।

কিন্তু তবুও মেজদির ঐ সাহায্য ও উপকারটুকুরও একান্ত প্রয়োজন ছিল এবং মেজদির প্রতি আমরা দু'জনেই কৃতজ্ঞ ছিলাম।

আসলে মেজদি বরাবরই আমাকে ভালবাসতেন, স্নেহ করতেন। আমারও মেজদিকে বড় ভাল লাগত। প্রথম দিন থেকেই মেজদিরও আমাকে ভাল লেগেছিল। কিছুদিনের মধ্যেই মেজদি আমাদের দু'জনের ভালবাসার গভীরতা উপলব্ধি করেছিলেন। তাই মনে মনে ছোট বোনকে তুলে দিয়েছিলেন, আমার হাতে।

এবার তো সারা দুনিয়াকে জানিয়ে দিলেন, মেমসাহেব আমার, আমি মেমসাহেবের। লক্ষ লক্ষ কোটি কোটি টাকা মূল্যের সম্পত্তি হস্তান্তরের সবকিছু পাকা-পাকি হয়ে গেল। শুধু এক সাবরেজিস্ট্রারের সই আর সীলমোহর লাগানো বাকি রইল। এই কাজটুকুর জন্য আমি বিশেষ চিন্তিত ছিলাম না।


মেমসাহেব অনেকদিন আগে বললেও আমি এতদিন বাড়ি ভাড়া নেবার কথা খুব সিরিয়াসলি ভাবি নি। সেবার কলকাতা থেকে ফিরে সত্যি সত্যি গ্রীন পার্কে ঘোরাঘুরি শুরু করলাম, দু'চারজন বন্ধু-বান্ধবকেও বললাম।

দু'চারটে বাড়ি দেখলাম কিন্তু ঠিক পছন্দ হলো না। আরো কিছু দিন অপেক্ষা করলাম। আরো কিছু দিন বাড়ি দেখলাম। বন্ধু-বান্ধবদের সঙ্গে আরো কিছু পরামর্শ করলাম। কয়েকটা বাড়ির জন্য দরদস্তুরও করলাম।

এমনি করে আরো মাস দুই কেটে যাবার পর সত্যি সত্যিই তিনখানা ঘরের একটা ছোট কটেজ পেলাম তিনশ'টাকায়। বাড়িটা আমার বেশ পছন্দ হলো। মেহেরলী রোড থেকে বড় জোড় দু'শো গজ হবে। গ্রীন পার্ক মার্কেট বেশ কাছে, মিনিট তিন-চারের রাস্তা। বাজার দূরে হলে মেমসাহেবের পক্ষে কষ্টকর হতো। তাছাড়া বাড়িটাও বেশ ভাল। কর্নার প্লট। সামনে আর পাশে মাঝারি সাইজের লন। গেটের ভিতরে দিয়ে বাড়ির ভিতরে গাড়ি রাখার ব্যবস্থা। ড্রইং-ডাইনিং রুমটা তো বেশ বড়। কুড়ি বাই পনের। একটা বেডরুম বড়, একটা ছোট। দুটো বেডরুমেই লফ্ট আর ওয়ারড্রব। বড় বেডরুম আর ড্রইং-ডাইনিং রুমের মাঝে একটা গ্যারেন্টার্ন স্টাইলের বাথরুম। বাড়ির ভিতরে একটা ইন্ডিয়ান স্টাইলের খিতি। সামনের বারান্দাটা অনেকটা লম্বা থাকলেও বিশেষ চওড়া ছিল না। ভিতরের বারান্দাটা কোয়ার সাইজের বেশ বড় ছিল। রান্নাঘর? দিব্বীর নতুন বাড়িতে যেমন হয়, তেমনই ছিল।

আলমারি-মিটসেফ-সিঙ্ক-কাপবোর্ড সবই ছিল। লফট, আলমারি ওয়ারড্রুব থাকার জন্য আলাদা কোন টোর ছিল না কিন্তু ছাদে একটা দরজাবিহীন ঘর ছিল। লন দুটো বেশ ভাল ছিল সত্যি কিন্তু দিল্লীর অন্যান্য বাড়ির মত এই বাড়িটার কোন ফুলগাছ ছিল না। আগে যিনি ভাড়া ছিলেন, তাঁর নিশ্চয়ই ফুলের শখ ছিল না। তবে সামনের বারান্দার এক পাশ দিয়ে একটা বিরাট মাধবী লতা উঠেছিল।

মোটকথা সব মিলিয়ে বাড়িটা আমার বেশ ভাল লেগেছিল। তাছাড়া আমার মত ডাকাতের হাতে পড়ে মেমসাহেব ফ্যামিলি প্র্যানিং অ্যাসোসিয়েশনের সভানেত্রী হলেও এ বাড়িতে থাকতে অসুবিধা হবে না বলে বাড়িটা আরো ভালো লেগেছিল।

ঝড়িটা নেবার পর মেমসাহেবকে কিছু জানালাম না। ঠিক করলাম, দিল্লী আসার আগেই বেশ কিছুটা সাজিয়ে-গুছিয়ে নিয়ে চমকে দেব। আবার ভাবলাম, ওয়েস্টার্ন কোর্ট ছেড়ে এই বাড়িতেই চলে আসি। পরে ভাবলাম,  একলা একলা থাকব এই বাড়িতে? অসম্ভব। ঠিক করলাম ওকে নিয়েই এই বাড়ি চুকব।

গজাননকে আমার এই নতুন বাড়িতে থাকতে দিলাম। আমি ওকে বললাম, 'গজানন, তুমি আমার বাড়িটা দেখাশুনা কর। আমি এর জন্য তোমাকে মাসে মাসে কিছু দেব।'

গজানন সাফ জবাব দিয়েছিল, 'নেই নেই, ছোটসাব, তুমি আমার হিসেব-টিসেব করতে পারবে না। আমি বিবিজির কাছ থেকে যা নেবার তাই নেব।'

গজানন বানে যাতায়াত করত। ডিউটি শেষ হবার পর এক মিনিটও অপেক্ষা করত না। সোজা চলে যেত গ্রীন পার্ক।

আমি আনার বাড়তি আড়ইশ'টাকা দিয়ে কেনাকাটা শুরু করে দিলাম। একটা সোফা সেট কিনলাম, একটা ডবল বেডের খাট কিনলাম। ওয়েস্টার্ন কোর্ট থেকে আমার বই-পত্রের ঐ বাড়িতে নিয়ে গেলাম। বিদেশ থেকে কিনে আনা ডেকোরেশন পিসগুলোও সাজালাম।

তারপর একমাসে সমস্ত ঘরের জন্য পর্দা করলাম। তাছাড়া যখন যে রকম বাস্তবিক আর সামর্থ্য হয়েছে, তখন কটেজ ইন্সট্রিউজ এম্পোরিয়াম বা অন্য কোন স্টেট এম্পোরিয়াম থেকে কিছু কিছু জিনিসপত্র কিনে ঘর-দোর সাজাচ্ছিলাম।

গজানন বড় দরদ দিয়ে বাড়িটার দেখাশুনা করছিল। দীর্ঘদিন ওয়েস্টার্ন কোর্টে কাজ করার ফলস্বরূপ ওর বেশ একটা রুচিবোধ হয়েছিল। মানি প্র্যান্ট, ক্যাকটাস্ ফার্ন দিয়ে বাড়িটা চমৎকার সাজাল।

আমি যখন দিল্লীর বাইরে গেছি, গজানন তখনই ফরমায়েশ করে ছোটখাট সুন্দর সুন্দর জিনিস আনিয়েছে। হায়দ্রাবাদ থেকে দশ-পনের টাকা দামের ছোট ছোট সুন্দর সুন্দর উড্কার্ভি এনেছি, বেনারস থেকে পাথরের জিনিস এনেছি, কলকাতা থেকে বাঁকুড়ার টেরাকোটা ঘোড়া আর কৃষ্ণনগরের ডল্‌স এনেছি। উড়িষ্যা থেকে স্যান্ডস্টোনের কোনারক মূর্তি, কালীঘাট আর কটক থেকে পটও এনেছিলাম আমাদের ড্রইংরুমের জন্য।

বুক-সেল্ফ-এর উপর দুকোণায় দুটো ফটো রেখেছিলাম। একটা প্রাইম মিনিষ্টারের সঙ্গে আমার ছবি আর একটা মেমসাহেবের পোর্ট্রেট।

এদিকে যে এত কাণ্ড করছিলাম, সেসব কিছুই মেমসাহেবকে জানালাম না। ইচ্ছা করেই জানালাম না। ইতিমধ্যে বোম্বে থেকে মেজদির চিঠি পেলাম—ভাই রিপোর্টার,

যুদ্ধ না করেও যারা যোদ্ধা, ইন্ডিয়ান নেভীর তেমনি এক অফিসারকে বিয়ে করে কি বিপদেই পড়েছি। সংসার করতে গিয়ে রোজ আমার সঙ্গে যুদ্ধ করছে, রোজ হেরে যাচ্ছে। রোজ বন্দী করছি, মুক্তি দিচ্ছি! তবে বার বার যুদ্ধ-বন্দীর প্রতি এত উদার ব্যবহার করা যায় না।

এবার তাই শান্তি দিয়েছি ঘুরিয়ে আনতে হবে। তবে ভাই, একথা স্বীকার করব, বন্দী এক কথায় বিনা প্রতিবাদে শান্তি হাসিমুখে মেনে নিয়েছে।

আর কিছুদিনের মধ্যেই তুমিও বন্দী হতে চলেছ। শান্তি তোমাকেও পেতে হবে। তবে তুমি তোমার মেমসাহেবের কাছ থেকে শান্তি পাবার আগেই আমরা দু'জনে তোমাকে শান্তি দেবার জন্য দিল্লী আসছি।

প্রেসিডেন্টের খুব ইচ্ছা যে আমরা রাষ্ট্রপতি ভবনে ওঁর অতিথি হই। কিন্তু ভাই, তোমাকে ছেড়ে কি রাষ্ট্রপতি ভবনে থাকা ভাল দেখায়? তোমার মনে কষ্ট দিয়ে রাষ্ট্রপতি ভবনে থাকতে আমি পারব

না ! আমাকে ক্ষমা করো ।

আগামী বুধবার ক্রিষ্টিয়ান মেল অ্যাটেন্ড করতে ভুলে যেও না । তুমি স্টেশনে না এলে অনিচ্ছাসঙ্গেও বাধ্য হয়েই আবার সেই রাষ্ট্রপতি ভবনে যেতে হবে ।

তোমার মেজদি ।

বুধবার আমি ক্রিষ্টিয়ান মেল অ্যাটেন্ড করেছিলাম । মেজদিদের নিয়ে এসেছিলাম আমার গ্রীন পার্কের নতুন আড্ডানায় । সারা জীবন কলকাতায় ঐ চারখানা ঘরের তিনতলার ফ্ল্যাটে কাটিয়ে আমার গ্রীন পার্কের বাড়ি মেজদির ভীষণ পছন্দ হয়েছিল ।

যুদ্ধ না করেও যিনি যোদ্ধা, মেজদির সেই ভাগ্যবান বন্দী ঘর, বাড়ি দেখে মস্তব্য করেছিলেন, দেখে শুনে মনে হচ্ছে ম্যাডাম সপিং করতে গিয়েছেন । এক্ষুনি এসে ড্রইংরুমে বসে এককম্প কফি খেয়েই বেডরুমে লুটিয়ে পড়বেন ।

ভারপর জিজ্ঞাসা করেছিলেন, 'ম্যাডাম-এর জন্য এত আয়োজন করার পর এ বাড়িতে আপনার একলা থাকতে কষ্ট হয় না?'

আমি বলেছিলাম, 'আমি তো এখানে থাকি না, আমি ওয়েস্টার্ন কোর্টের থাকি'

আমার কথায় ওরা দু'জনেই অবাক হয়েছিলেন । বোধহয় খুশিও হয়েছিলেন । খুশি হয়েছিলেন এই কথা শুনে যে, একলা ভোগ করার জন্য আমি এত উদ্যোগ আয়োজন করি নি ।

মেজদিরা তিনদিন ছিলেন । কখনো ওরা দু'জনে কখনও বা আমরা তিনজনে ঘুরে বেড়িয়েছি । ওদের দিল্লী ত্যাগের আগের তিন সন্ধ্যায় গ্রীন পার্কের বাড়ির ড্রইংরুমে বসে অনেক রাত্রি পর্যন্ত আমরা আড্ডা দিয়েছিলাম । কথায় কথায় মেজদি একবার বললেন, 'সংসার করার প্রায় সব কিছুই তো আপনি যোগাড় করে ফেলেছেন । বিয়েতে আপনাদের কি দেব বলুন তো?'

আমি উত্তর দেবার আগেই বন্দী উত্তর দিলেন, 'আজ্ঞেবাজে কিছু না দিয়ে ফোমুড স্নাবরের গদি দিও । শুয়ে আরাম পাবে আর প্রতিদিন তোমাকে ধন্যবাদ জানাবে ।'

এইসব আজ্ঞেবাজে আলতু-ফালতু কথাবার্তা বলতে বলতে অনেক রাত হয়েছিল । মেজদি বললেন, 'আজ আর ওয়েস্টার্ন কোর্ট যাবেন না, এইখানেই থেকে যান ।'

আমি হেসে বলেছিলাম, 'না, না, তা হয় না ।'

'কেন হয় না?'

'ওখানে নিশ্চয়ই জরুরি চিঠিপত্র এসেছে.....'

মেজদি মাঝপথে বাধা দিয়ে বললেন, 'এত রাত্তিতে আর চিঠিপত্র দেখে কি করবেন? কাল সকালে দেখবেন ।'

আবার বললাম, 'না না, মেজদি, আমি এখন এ-বাড়িতে থাকব না ।'

এবার মেজদি হাসলেন । বললেন, 'কেন? প্রতিজ্ঞা করেছেন বুঝি যে, একলা-একলা এই বাড়িতে থাকবেন না?'

আমি কোন উত্তর না দিয়ে শুধু একটু হাসলাম । একটু পরে বিদায় নিয়ে চলে এলাম ওয়েস্টার্ন কোর্ট ।

পরের দিন স্টেশনে বিদায় জানাতে গেলে মেজদি আমাকে একটু আড়ালে ডেকে নিলেন । বললেন, 'আপনার মেমসাহেব বোধে দেখে নি । তাই সামনের ছুটিতে আমাদের কাছে আসবে । ক'দিনের জন্য দিল্লী পাঠিয়ে দেব, কেমন?'

আমি হাসতে হাসতে বললাম, 'আপকা মেহেরবানি!'

মেজদি বললেন, 'মেহেরবানির আবার কি আছে? বিয়ের আগে একবার সবকিছু দেখে শুনে যাক ।'

আমি এ-কথারও কোন জবাব দিলাম না । মাথা নিচু করে চুপটি করে দাঁড়িয়ে রইলাম । ট্রেন ছাড়ার মুখে মেজদি বললেন, 'ফালুনে বিয়ে হলে আপনার কোন আপত্তি নেই তো?'

আমি মাথা নিচু করেই বললাম 'সে-সময় যে পার্লামেন্টের বাজেট সেশন চলবে!'

'তা চলুক গে । বেশি দেরি করা আর ভাল লাগছে না ।'

মেজদি চলে যাবার পর মনটা সত্যি বড় খারাপ লাগল । পরমাষ্ট্রীয়দের বিদায় ব্যথা অনুভব করলাম মনে মনে ।

ক'দিন বাদে মেমসাহেবের চিঠি পেলাম।

তুমি কি কোন তুক-তাক বা কবচ মাদুলী দিয়ে মেজদিকে বশ করেছ? ও মার কাছে ছ'পাতা আর আমার কাছে চার পাতা চিঠি লিখেছে। সারা চিঠি ভর্তি শুধু তোমার কথা, তোমার প্রশংসা। তোমার মত ছেলে নাকি আজকাল পাওয়া মুশকিল। তুমি নাকি ওদের খুব যত্ন করেছ। ওরা নাকি খুব আরামে ছিল।

তারপর মা'র চিঠিতে ফাল্গুন মাসে বিয়ে দেবার কথা লিখেছে। তোমারও নাকি তাই মত? মা'র কোন আপত্তি নেই। আজ চিঠিটা মা'র দিদির কাছে পাঠিয়ে দিলেন।

আর ক'দিন পরেই আমাদের কলেজ বন্ধ হবে। ছুটিতে মেজদির কাছে যাব। যদি মেজদিকে ম্যানেজ করতে পারি তবে ওদের কাছে দু'সপ্তাহে থেকে এক সপ্তাহের জন্য তোমার কাছে যাব।

আমাদের এখানকার আর সব খবর মোটামুটি ভাল। তবে ইদানীং খোকনকে নিয়ে একটু চিন্তিত হয়ে পড়েছি। আমার মনে হচ্ছে ও রাজনীতিতে মেতে উঠেছে। পড়াশুনা এখনও অবশ্য ঠিকই করছে কিন্তু ভয় হয় একবার যদি রাজনীতি নিয়ে বেশি মেতে ওঠে তবে পড়াশুনার ক্ষতি হতে বাধ্য। খোকন যদি কোন কারণে খারাপ হয়ে যায়, তাহলে তার জন্যে আমাকেও কিছুটা দায়ী হতে হবে। সর্বোপরি, বৃদ্ধ বিপত্নীক কাকাবাবু বড় আঘাত পাবেন।.....

আমি মেমসাহেবকে লিখলাম, মেজদি যা লিখেছে তা বর্ণে বর্ণে সত্য। ফাল্গুন মাসে পার্লামেন্টের সেশন চলবে। কিন্তু তা চলুক গে। চুলোর দুয়ারে যাক পার্লামেন্ট! ফাল্গুন মাসে আমি বিয়ে করবই। আমার দেরি সহ্য হচ্ছে না। তুমি যে আমার চাইতেও অধৈর্য হয়েছ, তা আমি জানি।

আরো অনেক কিছু লিখেছিলাম। শেষের দিকে খোকনের সম্পর্কে লিখেছিলাম, তুমি ওকে নিয়ে অত চিন্তা করবে না। বাঙালীর ছেলেরা যৌবনে হয় রাজনীতি না হয় কাব্য-সাহিত্য চর্চা করবেই। শরৎ-হেমন্ত-শীত-বসন্ত ঋতুর মত এসব চিরস্থায়ী নয়। দু'চারদিন ইন্কিলাব বা বন্দেমাতরম্ চিৎকার করে ডালহৌসী স্কোয়ারের স্টীম রোলারের তলায় পড়লে সব পাল্টে যাবে। খোকনও পাল্টে যাবে।

এ-কথাও লিখলাম, তুমি খোকনের জন্য অত ভাববে না। হাজার হোক আজ সে বেশ বড় হয়েছে, কলেজে পড়ছে। তাছাড়া তার বাবা তো আছেন। ছেলে-মেয়েদের এই বয়সে তাদের স্বাধীনতায় হস্তক্ষেপ করতে গেলে অনেক সময়েই হিতে বিপরীত হয়। তোমারও হতে পারে। সুতরাং একটু খেয়াল করে চলবে।

শেষে লিখলাম, খোকন যখন ছোট ছিল, যখন তাকে মাতুলের হাতে দিয়ে দিদির ডালবাসা দিয়ে অভাবিত বিপদের হাত থেকে রক্ষা করার প্রয়োজন ছিল, তুমি ও মেজদি তা করেছ। তোমাদের স্নেহশ্রমায় যে একটা মাতৃহারা শিশু আজ যৌবনে পদার্পণ করে মাথা উঁচু করে দাঁড়িয়েছে, সেইটুকুই তোমাদের যথেষ্ট পুরস্কার। এর চাইতে বেশি আশা করলে দুঃখ পেতে পার।

জান দোলাবৌদি, খোকন সম্পর্কে এত কথা আমি লিখতাম না। কিন্তু ইদানীংকালে মেমসাহেব খোকনকে নিয়ে এত বেশি মাতামাতি, এত বেশি চিন্তা করা শুরু করেছিল যে এসব না লিখে পারলাম না। আজকাল ওর প্রত্যেকটা চিঠিতে খোকনের কথা থাকত। লিখত, খোকনের এই হয়েছে, ঐ হয়েছে। খোকনের কি হলো, কি হবে? খোকন কি মানুষ হবে না? ইত্যাদি ইত্যাদি হাজার কথা লিখত। তুমি তো জান, আজকালকার দিনে নিজেদের খোকনকেই মানুষ করতে মানুষ পাগল হয়ে উঠেছে, তাছাড়া স্নেহ-ডালবাসা দেওয়া সহজ কিন্তু বিনিময়ে তার মর্যাদা পাওয়া দুর্লভ।

খোকনের প্রতি ওর স্নেহ-ডালবাসার জন্য সত্যি আমার ভয় করত। ভয় হতো যদি কোনদিন খোকন ওর এই স্নেহ-ডালবাসার মূল্য না দেয়, মর্যাদা না দেয়, তখন সে দুঃখ, সে আঘাত সহ্য করা অত্যন্ত কষ্টকর হবে। তাই না?

এই চিঠির উত্তরে মেমসাহেব কি লিখল জান? লিখল, তুমি যত সহজে খোকন সম্পর্কে যেসব উপদেশ পরামর্শ দিয়েছ, আমার পক্ষে অত সহজে সেসব গ্রহণ করা বা মেনে নেওয়া সম্ভব নয়। তার কারণ খুব সহজ। মাতৃহারা ছ'বছরের শিশু খোকনকে নিয়ে কাকাবাবু ছিল না কিন্তু দিদি, মেজদি আর আমি ওকে বড় করেছি, ওকে খাইয়েছি, পরিয়েছি। সুর করে ছুড়া বলতে বলতে কোলের মধ্যে নিয়ে ঘুমিয়েছি। একদিন নয়, দু'দিন নয়, বছরের পর বছর খোকনকে বুকের মধ্যে জড়িয়ে নিয়ে শুয়েছি আমরা তিন বোন।

কয়েক বছর পর দিদির বিয়ে হয়ে গেলে আমি আর মেজদি ওকে দেখেছি। ওর অসুখ হলে মেজদি ছুটি নিয়েছে, আমি কলেজ কামাই করেছি, মা মানত করেছেন। মেজদিরও বিয়ে হয়ে গেল। আজ খোকনকে দেখবার জন্য শুধু আমি পড়ে রয়েছি। তুমিও কলকাতা ছেড়ে চলে গেলে। মা-বাবার কথা বাদ দিলে খোকন ছাড়া এখন আমার আর কি আকর্ষণ আছে বল? হাতেও প্রচুর সময়। তাই তো খোকনের কথা না ভেবে উপায় কি?

এই চিঠির উত্তরে আমি আর খোকন সম্পর্কে বিশেষ কিছু লিখলাম না। ভাবলাম মেমসাহেব ছুটিতে দিল্লী এলেই কথাবার্তা বলব।

ছুটিতে মেমসাহেব বোধে গিয়েছিল। একবার ভেবেছিলাম দু'তিনদিনের জন্য বোধে ঘুরে আসি। খুব মজা হতো। কিন্তু শেষ পর্যন্ত গেলাম না। মেজদির ওখানে সতেরো-আঠারো দিন কাটিয়ে মেমসাহেব কলকাতায় যাবার পথে দিল্লী এসেছিল। কলকাতায় সবাই জানত ও বোধেতেই আছে। মেমসাহেব আমার কাছে মাত্র চার-পাঁচদিন ছিল।

মেমসাহেবকে গ্রীন পার্কের বাড়িতে নিয়ে গিয়েছিলাম। ওর খুব পছন্দ হয়েছিল। বলেছিল, 'লাভলি।'

তারপর বলেছিল, 'তুমি যে এর মধ্যে এত সুন্দর করে সাজিয়ে-গুছিয়ে নেবে, তা ভাবতে পারি নি।'

আমি বলেছিলাম, 'তোমাকে বিয়ে করে তো যেখানে-সেখানে তুলতে পারি না!'

ঐ লম্বা সফ্রু কালো স্রু দুটো টান করে উপরে তুলে ও বলেছিল, 'ইজ ইট?'

'তবে কি?'

মেমসাহেব গজ্ঞাননকে অশেষ ধন্যবাদ জানাল অত সুন্দর করে বাগান করবার জন্য জিজ্ঞাসা করল, 'গজ্ঞানন, তোমার কি চাই বল?'

গজ্ঞানন বলেছিল, 'বিবিজি আভি নেই। আগে তুমি এসো, সবকিছু বুঝে-টুঝে নাও, তারপর হিসাব-টিসাব করা যাবে।'

বিকেল হয়ে এসেছিল। গজ্ঞাননকে কিছু খাবার-দাবার আর কফি আনতে মার্কেটে পাঠিয়ে দিলাম। মেমসাহেব ওপাশের সোফাটা ছেড়ে আমার পাশে এসে বসল। আমার একটা হাত নিজের হাতের মধ্যে তুলে নিয়ে মাথা নিচু করে কি যেন দেখছিল, কি যেন ভাবছিল। আমি কিছু বললাম না, চুপ করেই বসে রইলাম। কয়েক মিনিট ঐভাবেই কেটে গেল। তারপর ঐ মাথা নিচু করেই নরম গলায় ও বললো, 'সত্যি, তুমি আমাকে সুখী করার জন্য কত কি করেছ!'

'কেন? আমি বুঝি সুখী হবো না?'

'নিশ্চয়ই হবে। তবুও এত বড় বাড়ি, এত সব আয়োজন তো আমার জন্যই করেছ।'

আমি ঠাট্টা করে বললাম, 'সেজন্য কিছু পুরস্কার দাও না!'

মেমসাহেব হেসে বললো, 'তোমার মাথায় শুধু ঐ এক চিন্তা!'

'তোমার মাথায় বুঝি সে চিন্তা আসে না?'

ও চিৎকার করে বললো, 'নো, নো, নো!'

এক মুহূর্তের জন্য আমিও চুপ করে গেলাম। একটু পরে বললাম, 'এদিকে তো গলাবাজি করে খুব-নো-নো বলছ আর ওদিকে বিয়ের আগেই ছেলেমেয়ের ঘর ঠিক করছ।'

মেমসাহেব এইভাবে ফাস্ট ওভারের ফাস্ট বলে বোল্ড হবে ভাবতে পারি নি। আমার কথার কোন জবাব ছিল না ওর কাছে। শুধু বললো, 'তোমার মত ডাকাতের সঙ্গে ঘর করতে হলে একটু ভৃত-ভবিষ্যৎ চিন্তা না করে উপায় আছে?'

গ্রীন পার্ক থেকে ওয়েস্টার্ন কোর্টে ফিরে আসার পর মেমসাহেব বললো, 'জ্ঞান, মেজদি বলেছিল বিয়েতে তোমার কি চাই তাই জেনে নিতে।'

আমি স্রু কুঁচকে অবাক হয়ে বললাম, 'সে কি? মেজদি জানে না?'

'তুমি বলেছ নাকি?'

'একবার? হাজারবার বলেছি!'

আমার রাগ দেখে ও যেন একটু ঘাবড়ে গেল। বললো, 'হয়ত কোন কারণে.....?'

'এর মধ্যে কারণ-টারণ কিছু নেই।'

মেমসাহেবের মুখটা চিন্তায় কালো হয়ে গেল! মুখ নিচু করে বললো, 'মেজদি হয়ত ভেবেছে তুমি ফ্রান্সলি আমাকে সবকিছু খুলে বলতে পার.....'

'তোমাকে যা বলব, মেজদিও তা জানে।'

মেমসাহেব নিশ্চল পাথরের মত মাথা নিচু করে বসে রইল। আমি চুরি করে ওর দিকে চাইলাম আর হাসছিলাম।

একটু পরে ও আমার কাছে এসে হাত দুটো ধরে বললো, 'ওগো বল না, বিয়েতে তোমার কি চাই?'

আমি প্রায় চিৎকার করে বললাম, 'তোমার মেজদি জানেন না যে আমি তোমাকে চাই?'

একটা বিরাট দীর্ঘনিশ্বাস ছেড়ে হাসতে হাসতে ও বললো, 'বাপ রে বাপ! কি অসভ্য ছেলেরে বাবা!'

আমি অত্যন্ত স্বাভাবিকভাবে বললাম, 'এতে অসভ্যতার কি করলাম?'

মেমসাহেব আমাকে এক দাবড় দিয়ে বললো, 'বাজে বকো না। ছি, এমন করে কেউ ভাবিয়ে তোলে?' পরে ও আবার আমাকে জিজ্ঞাসা করেছিল, 'বল না, বিয়েতে তুমি কি চাও?'

আমি বললাম, 'তোমার এসব কথা জিজ্ঞেস করতে লজ্জা করছে না? তুমি কি ভেবেছ আমি সেই ভদ্রবেশী অসভ্য ছোটলোকগুলো দলে, যে লুকিয়ে লুকিয়ে নগদ টাকা দিয়ে পরে চালিয়াতি করব?'

পরে মেজদিকে একটা চিঠি জানিয়েছিলাম, আপনারা আমাকে ঠিক চিন্তে পারেন নি। বিয়েতে যৌতুক বা উপটৌকন তো দূরের কথা, অন্য কোন মানুষের দয়া বা কৃপা নিয়ে আমি জীবনে দাঁড়াতে চাইনা! সে মনোবৃত্তি বেহালায় সরকারী জমিতে সরকারী অর্থে একটা বাড়ি বা কলকাতা শহরে বেনামীতে দুটো একটা ট্যাক্সি অনেক আগেই করতাম। আর শ্বশুরের পয়সায়, শ্বশুরের কৃপায়, সমাজ-সংসারে প্রতিষ্ঠা? ছিঃ ছিঃ, মেরুদণ্ডহীন হীনবীর্য পুরুষ ছাড়া এ কাজ কেউ পারবে না। খিড়কির দরজা দিয়ে 'আয় করে সম্পত্তি করে চালিয়াতি করতে আমি শিখি নি। নিজের কর্মক্ষমতা ও কলামের জোরে যেটুকু পাব তাতেই আমি সুখী ও সন্তুষ্ট থাকব।

এই চিঠির উত্তরে মেজদি লিখেছিলেন, ভাই রিপোর্টার, তোমার চিঠি পড়ে মনে হলো তুমি আমাদের ভুল বুঝেছ। তোমার সঙ্গে আমাদের সব চাইতে ছোট বোনের বিয়ে হচ্ছে। তাই তো তোমরা দু'জনে আমাদের কত প্রিয়, কত আদরের। তোমাদের বিয়েতে আমরা কিছু দেব না তাই কি হয়? তোমাদের কিছু কিছু দিলে কি বাবা-মা শান্তি পাবেন?

আমি আবার লিখেছিলাম, সেন্টিমেন্টের লড়াই লড়াবার ক্ষমতা আমার নেই। তবে আমি স্পষ্ট জানিয়ে দিচ্ছি আমার কিছু চাই না। যদি নিতান্তই কিছু দিতে চান, তাহলে কন্টেম্পোরারি হিট্রির কিছু বই দেবেন। দয়া করে আর কিছু দিয়ে আমাকে বিব্রত করবেন না।

যাক্গে ওসব কথা। মেমসাহেবের কলকাতা যাবার আগের দিন দু'জনে বেড়াতে বেরিয়েছিলাম। ঘুরতে ঘুরতে ক্লান্ত হয়ে শেষে বুদ্ধজয়ন্তী পার্কে বসেছিলাম অনেকক্ষণ। কথায় কথায় মেমসাহেব খোকনের কথা বলেছিল, 'তুমি কলকাতা ছেড়ে চলে আসার পর বুঝলাম তোমাকে কত ভালবাসি। এমন একটা অদ্ভুত নিঃসঙ্গতা আমাকে ঘিরে ধরল যে তোমাকে কি বলব! কোনমতে সেই লেডিজ ট্রামে চেপে কলেজে যেতাম আর আসতাম। আর কোথাও যেতাম না। আত্মীয়-স্বজন, বন্ধু-বান্ধব, সিনেমা-টিনেমা কিছুই ভাল লাগত না।'

'তাই তো সন্ধ্যার পর খোকনকে পড়াতে বসতাম। পড়াশুনা হয়ে গেলে খাওয়া-দাওয়ার পর ছাদে গিয়ে দু'জনে বসে বেস গল্প করে কাটাতাম। কোন কোনদিন মা-আসতেন। গান গাইতে বলতেন কিন্তু আমি গাইতে পারতাম না। গান গাইবার মত গান আমি হারিয়ে ফেলেছিলাম।'

একটু পরে আবার বললো, 'গরমকালে কলকাতার সন্ধ্যাবেলা যে কি সুন্দর তা তো তুমি জান। তোমার সঙ্গে কত ঘুরে বেড়িয়েছি ঐ সন্ধ্যাবেলায় কিন্তু তুমি চলে আসার পর আমি কলেজ থেকে ফিরে চূপচাপ হয়ে থাকতাম আমার গাটে।'

'তাই বুঝি?'

'সত্যি বলছি, জানালা দিয়ে পাশের শিউলি গাছটা আর এক টুকরো আকাশ দেখতে পেতাম।

ভয়ে ভয়ে ভাবতাম শুধু তোমার কথা।’

আমি ওর হাতটা আমার হাতের মধ্যে টেনে নিলাম। বললাম, ‘তুমি যে আমাকে ছেড়ে শান্তিতে থাকতে পার না, তা আমি জানি মেমসাহেব।’

ওর চোখ দুটো কেমন যেন ছলছল করছিল। গলার স্বরটাও স্বাভাবিক ছিল না। ভেজা ভেজা গলার বললো, ‘এখন শুধু খোকন ছাড়া কলকাতায় আমার আর কোন আকর্ষণ নেই। কিন্তু ছেলেটা আজকাল যে কি লাগিয়েছে তা ও-ই জানে।’

‘কি আবার লাগাল?’

মনে হচ্ছে খুব জোর পলিটিক্‌স্‌ করছে।

তার জন্য ভয় পাবার বা চিন্তা করাবার কি আছে?’ ‘তুমি কলকাতায় রিপোর্টারি করেছ, অনেক রাজনৈতিক আন্দোলন দেখেছ। সুতরাং তুমি দেখলে বুঝতে পারতে কিন্তু আমি ঠিক বুঝতে পারি না ও কি করছে। সেই জন্যই বেশি ভয় হয়।’

‘চুরি-জোচ্চুরি তো করছে না সুতরাং তুমি ঘাবড়ে যাচ্ছ কেন?’

মেমসাহেব দুইটা একটু ঘুরিয়ে নিয়ে কেমন যেন অসহায়ের মত আমার দিকে তাকাল। বললো, ‘জান এই তো কিছুদিন আগে হাতে ব্যান্ডেজ বেঁধে ফিরল। প্রথমে কিছুই বলছিল না। বারবার জিজ্ঞাসা করার পর বললো, পুলিশের লাঠি লেগেছে। এবার মেমসাহেব আমার হাত দুটো চেপে ধরে বললো, ‘আচ্ছা বল তো ঐ লাঠিটাই যদি মাথায় লাগত তাহলে কি সর্বনাশ হতো?’

আমি বেশ বুঝতে পারলাম খোকন রাজনীতিতে খুব বেশি মেতে উঠেছে। সভা-সমিতি মিছিল-বিক্ষোভ করছে সে এবং আজ হাতে লাঠি পড়েছে, কাল মাথায় পড়বে, পরও হয়ত গুলির আঘাতে আহত হয়ে মেডিক্যাল কলেজের অপারেশন থিয়েটারে যাবে। চিন্তার নিশ্চয়ই কারণ আছে কিন্তু একথাও জানি ছেলেরা একবার মেতে উঠলে ফিরিয়ে আনা খুব সহজ নয়। খবরের কাগজের রিপোর্টারি করতে গিয়ে কলকাতার রাজপথে বহুজনকে পুলিশের লাঠিতে আহত, গুলিতে নিহত হতে দেখেছি। সব রিপোর্টারিই এসব দেখে থাকেন, নিশ্চল নিচুপ পাথরের মূর্তির মত দাঁড়িয়ে দাঁড়িয়ে দেখেন। চুপ করে দাঁড়িয়ে দাঁড়িয়ে আমিও সবকিছু দেখেছি, একফোঁটাও চোখের জল ফেলি নি।

আজ মেমসাহেব খোকনের কথা বলায় হঠাৎ মুহূর্তের জন্য এইসব দৃশ্যের বাড় বয়ে গেল মনের পর্দায়। কেন, তা বুঝতে পারলাম না। মনে মনে বেশ একটু চিন্তিতও হলাম। শুকে সেসব কথা বুঝতে দিলাম না। সাদুনা জানিয়ে বললাম, ‘হাতে একটু লাঠি লেগেছে বলে অত ঘাবড়ে যাচ্ছ কেন? কলকাতায় বাস করে যে পুলিশের এক ঘা লাঠি খায় নি, সে খাটি বাঙালীই নয়।’

দু’ফোঁটা চোখের জল ইতিমধ্যেই গড়িয়ে পড়েছিল মেমসাহেবের গালের ‘পর। আমার কাছ থেকে লুকোবার জন্য তাড়াতাড়ি আঁচল দিয়ে সারা মুখটা মুছে নিয়ে বললো, ‘হয়ত তোমার কথাই ঠিক কিন্তু যদি কোনদিন কিছু হয়.....’

মেমসাহেব আর বলতে পারল না। দুই হাঁটুর ‘পর মাথাটা রাখল। আমি ওর মাথায় হাত বুন্ডিয়ে দিতে দিতে বললাম, ‘অত ভয় পাচ্ছ কেন মেমসাহেব?’ আবার বললাম, ‘অত চিন্তা করলে কি বাঁচা যায়?’

মেমসাহেব রাজনীতি করতে না কিন্তু কলকাতাতে জন্মেছে, স্কুল-কলেজ ইউনিভার্সিটিতে পড়েছে। সুতরাং ইচ্ছায় হোক অনিচ্ছায় হোক অনেক কিছু দেখেছে। হয়ত গুলিতে মরতে দেখে নি কিন্তু লাঠি বা টিয়ার গ্যাস বা ইট-পাটকেলের লড়াই নিশ্চয়ই অনেকবার দেখেছে। তাছাড়া খবরের কাগজ পড়ে, ছবি দেখে। সেই সামান্য অভিজ্ঞতার ভিত্তিতেই খোকন সম্পর্কে মেমসাহেব একটু অস্থির না হয়ে পারে নি।

ওয়েস্টার্ন কোর্টে ফিরে আসার পর মেমসাহেবকে বলেছিলাম, ‘তুমি বরং খোকনকে আমার কাছে পাঠিয়ে দাও। এখানে গড়াওনা করবে আর আমাকেও একটু-আধটু সাহায্য করবে।’

আমার প্রস্তাবে ও আনন্দে উঠেছিল। বলেছিল, ‘সত্যি শুকে পাঠিয়ে দেব?’

‘হ্যাঁ হ্যাঁ, দাও।’

‘কিছু.....’

‘কিন্তু কি?’

'ক'মাস পরেই তো গুণ ফাইন্যাল ।'

আমি বললাম, 'ঠিক আছে । পরীক্ষা দেবার পরই পাঠিয়ে দিও এখানে বি-এ পড়বে ।'

মেমনাহেব একটু হাসল, আমাকে একটু জড়িয়ে ধরল ।

'ততদিনে আমিও তোমার কাছে এসে যাব, তাই না?'

ও আমার বুকের 'পর মাথা রেখে বললো, 'সত্যি খুব মজা হবে ।'

আঠারো

ভারতবর্ষের রাজনৈতিক দুনিয়ায় আস্তে আস্তে বেশ জল ঘোলা হতে শুরু করল । সীমান্ত নিয়ে মাঝে মাঝেই অস্থিতিকর খবর ছাপা হতে লাগল পত্র-পত্রিকায় । সঙ্গে সঙ্গে পার্লামেন্টে বড় বড় বয়ে যেত-শর্ট নোটিশ, কলিং অ্যাটেনশন, অ্যাডজর্নমেন্ট মোশান । সরকার আর বিরোধী পক্ষের লড়াই নিত্য-নৈমিত্তিক ঘটনা হয়ে দাঁড়াল । শুধু তাই নয়, কংগ্রেস পার্টির মধ্যেও সরকারী নীতির সমালোচনা শুরু হল গোপনে গোপনে । তাই সরকারী নীতির গোপন সমালোচনার এসব খবর কংগ্রেসীরাই নেমস্তল্ল করে আমাদের পরিবেশন করতেন । তবে সবাইকে নয় । অনেককে । যমুনার জল আরো গড়িয়ে গেল । কংগ্রেস পার্লামেন্টারী পার্টির সাধারণ সভায় সরকারী নীতির সমালোচনার গুঞ্জন শোনা যেতে লাগল মাঝে মাঝে । তবে নিয়মিত নয়, সমষ্টিগতভাবেও নয়—পাঁচশ-সাত্বে পাঁচশ জন কংগ্রেসী এম-পি'র মধ্যে মাত্র দু'চারজন সরকারী নীতির প্রশংসা করতে করতে শেষের দিকে যেন ভুল করে সরকারের সমালোচনা করছিলেন ।

রাজনৈতিক দুনিয়ার জল আরো ঘোলা হল । যমুনার জল আরো গড়িয়ে গেল । কংগ্রেসী পার্লামেন্টারী পার্টিতে সরকারী নীতির সমালোচকদের সংখ্যা বাড়ল, সমালোচনা তীক্ষ্ণ থেকে তীক্ষ্ণতর হল । মাঝে মাঝে নয়, প্রতি মিটিংয়েই সমালোচনা শুরু হল । এখন আর গোপনে নয়, প্রকাশ্যে সর্বজনসমক্ষে ঢাক-ঢোল বাজিয়ে কংগ্রেস পার্লামেন্টারী পার্টির সেক্রেটারিয়ারীয়া এই সব সমালোচনার খবর দিতেন করস্পনডেন্টদের । ভারতবর্ষের প্রতিটি সংবাদপত্রের প্রথম পাতায় মোট মোটা 'বড় বড় হরফে এসব খবর ছাপা হতো ।

ওদিকে উত্তর সীমান্তের নানা দিক থেকে নানা খবর আসছিল মাঝে মাঝেই । কখনো নেপাল জঙ্গল থেকে, কখনও লাডাকের পার্বত্য-মরুভূমি থেকে, কখনো ওয়ালাং থেকে, কখনো দৌলত, বেগওয়ালডি বা চুঙ্গল, মাগার, ডেমচক থেকে গুলির আওয়াজ শোনা যাচ্ছিল । ঐসব গুলির আওয়াজ নিউজ এজেন্সীর টেলিপ্রিন্টার মারফত দিল্লী পৌঁছবার সঙ্গে সঙ্গেই 'মিষ্টার স্পীকার, স্যার'-এর টেবিলে জমা হতো কলিং অ্যাটেনশন-অ্যাডজর্নমেন্ট মোশানের নোটিশ । এয়ার-কন্ডিশন্ড লোক-সভা চেম্বার রাজনৈতিক উত্তেজনায় দাউদাউ করে জ্বলত সারাদিন ।

ডিফেন্স মিনিষ্ট্রি এক্সটারন্যাল অ্যাফেয়ার্স মিনিষ্ট্রিতেও চাঞ্চল্য বেড়ে গেল অনেক । মিটিং-করফারেন্স প্রেসনোট-প্রোটেষ্ট নোটের ঠেলায় আমাদের কাজের চাপ সহস্রগুণ বেড়ে গেল ।

ভারতবর্ষের ইতিহাসে সে এক ঐতিহাসিক অধ্যায় । তখন ভারতবর্ষের ইতিহাস আর একবার মোড় ঘুরছিল । আমরা দিল্লী প্রবাসী করস্পনডেন্টের দল প্রতিদিন সেই ইতিহাসের টুকরো টুকরো সংগ্রহ করে পরিবেশন করছিলাম অসংখ্য পাঠক-পাঠিকার জন্য ।

এই বাজারে দিল্লীর গুরুত্ব আরো বেশি বেড়ে গেল । একদল ফরেন করস্পনডেন্ট আগেও ছিলেন কিন্তু এই বাজারে আরো অনেক এলেন সানফ্রান্সিসকো-নিউইয়র্ক-ওয়াশিংটন-আটোয়া-লন্ডন-প্যারিস-ব্রাসেলস-মস্কো-প্রাগ-কারবো-করাচী-সিডনি-টোকিও থেকে । ভারতবর্ষের বিভিন্ন স্থান থেকেও আরো অনেক অনেক করস্পনডেন্ট এলেন দিল্লী ।

ইউনাইটেড নেশন্স-লন্ডন-প্যারিস-মস্কো-কারবো টোকিওর সঙ্গে সঙ্গে দিল্লী ও পৃথিবীর অন্যতম প্রধান নিউজ সেন্টার হল ।

আমার কাগজের ডাইরেক্টর ও সম্পাদক এবার উপলব্ধি করলেন আমাকে শুধু মাইনে দিলেই চলবে না, দিল্লী থেকে গরম গরম খবর পাবার জন্য আরো কিছু করতে হবে । সাধারণত দিল্লীর বিষয়ে আলাপ-আলোচনার জন্য এতদিন আমাকেই কর্তারা ডেকে পাঠাতেন । এবার সম্পাদক স্বয়ং দিল্লী এলেন আমার সঙ্গে আলাপ-আলোচনার জন্য । বন্ধু-বান্ধবদের সঙ্গে দেখা করার অছিলায় সম্পাদক সাহেব আরো কয়েকটি অফিসে ঘুরেফিরে তাদের কাজকর্ম ও অফিসের বিধিব্যবস্থা দেখে নিলেন ।

তারপর আর আমাকে বলতে হল না, নিজেই উপলব্ধি করলেন আমার কাছ থেকে আরো বেশি ও ভাল কাজ গেতে হলে আমাকে অনেক সুযোগ-সুবিধা দিতে হবে।

এডিটর সাহেব নিজেই বললেন, 'বাবু, সব চাইতে-আগে তোমার একটা গাড়ি চাই। গাড়ি ছাড়া এখানে কাজ করা রিয়েলি মুশকিল।'

আমি বললাম, 'এখানে প্রায় সব করস্পনডেন্টদেরই গাড়ি আছে। গাড়ি না হলে ঠিক স্বাধীনভাবে ইচ্ছামত ঘোরাঘুরি করা অসম্ভব।'

এডিটর সাহেব বললেন, 'তাছাড়া আমাদের একটা অফিস দরকার।'

শেষে বললেন, 'তুমি এবার গুয়েটার্ন কোর্ট ছেড়ে গ্রীন পার্কে চলে যাও। বাড়িতে একটা টেলিফোন নাও। গাড়ি আর টেলিফোন থাকলে বিশেষ কোন অসুবিধা হবে না।'

আমি মাথা চুলকাতে চুলকাতে বললাম, 'তা ঠিক, তবে ভাবছিলাম ফায়ুন মাসের পরেই গ্রীন পার্ক যাব।'

'কেন তুমি কি কালুনে বিয়ে করছ?'

আমি মাথা নিচু করে বললাম, 'তাই তো ঠিক হয়েছে।'

'দুটো এসট্যাবলিসমেন্ট মেনটেন করতে অথবা তোমার কিছু খরচ হচ্ছে। যাই হোক এই ক'মাস তাহলে এখানেই থেকে যাও। কিন্তু গেট এ টেলিফোন ইমিডিয়েটলি।'

একটু পরে বললেন, 'আমাদের নিউজ পেপার সোসাইটি বিল্ডিং-এ হয়ত একটা ঘর পাব কিছুকালের মধ্যেই। যতদিন না পাওয়া যায় ততদিন তুমি একটা পার্ট-টাইম স্টেনোগ্রাফার রেখে দাও।'

একটা মাস ঘুরতে-না ঘুরতেই সত্যি অফিসের পয়সায় আমি একটা গাড়ি কিনলাম। স্ট্যান্ডার্ড হেরল্ড! টু ডোর। টেলিফোন হল। একশ'টাকা দিয়ে একজন পার্ট-টাইম মাদ্রাজী স্টেনোগ্রাফার রাখলাম।

ভারতবর্ষের ইতিহাসে এক চরম সঙ্কটের দিনে আমার ভাগ্যাকাশে এমনভাবে সৌভাগ্যের সূর্যোদয় কোনদিন কল্পনাও করতে পারি নি। দিল্লীর যদি এতটা গুরুত্ব না বাড়ত, যদি কাগজে কাগজে প্রতিযোগিতা এত জীবন না হতো, তাহলে আমার ইতিহাসও অন্যরকম হতো। কিন্তু বিধাতাপুরুষের নির্দেশ কি ব্যর্থ হতে পারে?

ভিলে ভিলে বিন্দু বিন্দু রক্ত দিয়ে অল্প দিনের পরিশ্রম দিয়ে, অসংখ্য দিনের অনাহার আর অনিদ্রার বিনিময়ে যখন আমি কর্মজীবনে এতবড় স্বীকৃতি, এত বড় মর্যাদা, এতবড় সাফল্য অর্জন করলাম, তখন আমি নিজেই চমকে গিয়েছিলাম। কলকাতায় যে আমি দিনের পর দিন, মাসের পর মাস এক আনার ছোলার ছাতু আর দু'পয়সার ভেঙ্গী গুড় খেয়ে কাটিয়েছি, সে আমি শুধু একমুষ্টি অনু আর জুড়ভাবে বাঁচার দাবি নিয়ে কলকাতার পথে ভিখারীর মত অসংখ্য মানুষের দ্বারে দ্বারে ঘুরেছি, সেই আমি গাড়ি চড়ব? বিধাতাপুরুষের কি যে বিচিত্র খামখেয়ালি! আগে বিশ্বাস করতাম না কিন্তু অসংখ্য পরীক্ষার মধ্যে দিয়ে বিচিত্র অভিজ্ঞতা সঞ্চয়ের পর আজ বিশ্বাস করি এই দুনিয়ায় সব কিছু সম্ভব। ভগবানের আশীর্বাদ পেলে পশু সত্যি সত্যি গিরি-পর্বত লঙ্ঘন করতে পারে।

দোলাবৌদি, আজ বুঝেছি ভগবান বড় বিচিত্র। কখনো নিমর্ম, কখনো কল্পনাময়। তিনি সবাইকে সবকিছু দেন না। যে কর্মজীবনে সাফল্য অর্জন করবে, বৃহত্তর সমাজে প্রতিষ্ঠা পাবে, অগণিত মানুষের হৃদয়ে যার আসন, সে ব্যক্তিগত জীবনে কিছুতেই সুখী হতে পারে না। নিজের জীবনের চরম অভিজ্ঞতা দিয়ে আমি এই সত্য উপলব্ধি করেছি।

আমার এই মেমসাহেবের কাহিনী শেষ হতে আর বেশি বাকি নেই। তুমি আর একটু পরেই বুঝবে আমার এই সাফল্য-সাধকতার মধ্যেও বেদনা কোথায়। বুঝবে কেন আমি এত পেয়েও আঞ্জি লুকিয়ে লুকিয়ে চোখের জল ফেলি। বুঝবে এত মানুষের সংস্পর্শ থেকেও কেন আমি নিঃসঙ্গ। আর একটু জানালেই বুঝবে কেন আমি ক্লান্ত।

যাই হোক ভারতবর্ষের বিচিত্র রাজনৈতিক পরিস্থিতি ও আমার সম্পাদকের দয়ায় আমার এই অভাবনীয় সাফল্যের পর মেমসাহেবকে লিখলাম, তুমি কি তত্ত্বসাধনা করেছিলে? তুমি যদি জ্যোতিষী হতে তাহলে আমার সাহায্য ও সহযোগিতা ছাড়া তোমার পক্ষে আমার ভূত-ভবিষ্যৎ জানা সম্ভব ছিল না। একমাত্র তত্ত্বসাধনা করলেই কিছু না জেনেও অপরের ভবিষ্যৎ বলা যায়। আমার সম্পর্কে তুমি যা যা বলেছিলে, যা যা আলা করেছিল তা প্রায় সবই সত্য হয়ে গেল। তাই আজ আমার মনে সন্দেহ

দেখা দিয়েছে, তুমি হয়ত তত্ত্বসাধনা করেছ।

গজানন রোজ গাড়িটাকে দু-দু'বার করে পরিকার করে। ড্রাইভারের গাড়ি চালানো ওর একটুও পছন্দ ছিল না। বলত, না না ছোটসাব, ড্রাইভারকে গাড়ি চালাতে দেবেন না। ওরা যা তা করে গাড়ি চালায়। আদার ব্যাপারী হয়ে জাহাজের খবর রাখতে হবে, কোনদিন ভাবি নি। তাই গাড়ি চালানো আগে শিখি নি। তোমাকে নিয়ে এই গাড়িতে ঘুরে বেড়াবার আগে নিশ্চয়ই ড্রাইভিং শিখতাম না কিন্তু তবুও পিছনে বসে গজানন আমাকে বলে, ছোটসাব আস্তে আস্তে গিয়ার দাও।

পরশু দিন সন্ধ্যাবেলায় গ্রীন পার্কে তোমার বাড়িতে গিয়েছিলাম। কথায় কথায় গজানন হতচ্ছাড়া কি বললো জান? বললো, বিবিজির কিসমত-এর জন্যই তো আপনার সবকিছু হচ্ছে। আমি ওকে দাবড় দিয়ে বললাম, বাজে বকিস না। হতচ্ছাড়া বললো, ছোটসাব, বিবিজি না থাকলে তোমার কিছুই হত না। ওর কথাটা আমার ভালই লেগেছিল কিন্তু মুখে বললাম, তুই তোর বিবিজির কাছে যা আমার কাছে থাকতে হবে না।

ভাল কথা, সেদিন তোমার কলেজে ট্রান্সকল করলে ঐ রকম চমকে উঠলে কেন? তুমি যত অদৃষ্টি বোধ করছিলে আমার তত মজা লাগছিল। ঠিক করেছি প্রতি সপ্তাহেই তোমাকে ট্রান্সকল করব।

শেষে কি লিখেছিলাম জান দোলাবৌদি? লিখেছিলাম, ফাল্গুন মাস তো প্রায় এসে গেল। এবার বল বিয়েতে তোমার কি চাই? লজ্জা করো না। তোমার যা ইচ্ছা আমাকে লিখো। আমি নিশ্চয়ই তোমার আশা পূর্ণ করব।

মেমসাহেব লিখল, তোমার প্রত্যেকটা চিঠির মত এই চিঠিটাও অনেকবার পড়লাম। পড়তে ভারি মজা লাগল। তোমার এডিটর যে এমন অপ্রত্যাশিতভাবে স্বপ্ন বাস্তব করে তুলবেন, আমি সত্যি ভাবতে পারি নি। ভগবানকে শত-কোটি প্রণাম না জানিয়ে পারছি না। তারই ইচ্ছায় সবকিছু হচ্ছে, ভবিষ্যতেও হবে। ইঙ্গিত দেখে মনে হয় ভগবান নিশ্চয়ই আমাদের সুখী করবেন।

তুমি আমার গাড়ি নিয়ে খুব মজা করে ঘুরে বেড়াচ্ছ। ভাবতেও আমার হিংসা হচ্ছে। আমার ভীষণ দেখতে ইচ্ছা করছে, তুমি গাড়ি চালিয়ে ঘুরে বেড়াচ্ছ। তুমি যখন গাড়ি চালাও তখন তোমাকে দেখতে খুব ভাল লাগে। খুব স্মার্ট? খুব হ্যাণ্ডসাম? খুব সাবধানে গাড়ি চালাবে। তোমাদের দিল্লীতে বড় বেশি অ্যাকসিডেন্ট হয়। তুমি গাড়ি চালাচ্ছ জানার পর আর একটু নতুন চিন্তা বাড়ল। সব সময় মনে রেখো আক্র আর তুমি একলা নও। মেন রেখো, তোমার জীবনের সঙ্গে আমার জীবনও ওতপ্রোতভাবে জড়িয়ে গেছে। সুতরাং তোমার ক্ষতি হওয়া মানে আমারও সর্বনাম। ভুলে যেও না যেন, কেমন?

আচ্ছ! সেদিন তুমি কলেজে ট্রান্সকল করলে কেন, বল তো? কলেজের অফিসে তখন লোকজনে ভর্তি ছিল। প্রথমে প্রিন্সিপাল টেলিফোন ধরেন। তারপর যেই গুনলেন দিল্লী থেকে আমার ট্রান্সকল এনেছে তখন তাঁর আর মুখে বাকি রইল না যে তুমিই ট্রান্সকল করছ। কারণ তোমার সঙ্গে যে আমার বিয়ে হবে, একথা কলেজের সবাই জানেন। প্রিন্সিপাল লাইনটা অফিসে দিয়েছিলেন এই ভেবে যে, আমি ওঁর সামনে তোমার সঙ্গে ঠিকমত কথা বলতে পারব না। কিন্তু কলেজের অফিস কি ফাঁকা থাকে? আমি তোমার কোন কথারই জবাব দিতে পারছিলাম না। তাছাড়া ওসব কি যা তা প্রশ্ন করছিলে? কলেজের অফিসে বসে কি ঐসব প্রশ্নের জবাব দেওয়া যায়? তাছাড়া আমার এই সব একান্ত ব্যক্তিগত ও গোপনীয় খবর জানার যদি এতই গরজ হয় তাহলে একবার চলে এসো। আসবে দু'একদিনের জন্য? এলে খুব খুশি হব।

বিয়ের সময় তুমি আমাকে কিছু উপহার দিতে চেয়েছ। শাড়ি গহনার কথা? ওসব কিচ্ছু আমার চাই না। আজ আমার শুধু একটাই কামনা, সে কামনা তোমাকে পাওয়ার। মনপ্রাণ দিয়ে তোমাকেই আমি পেতে চাই। তাহলেই আমি খুশি। স্ত্রী হয়ে আর কি কামনা, আর কি প্রত্যাশা থাকতে পারে? সত্যি বলছি, তুমি আমাকে কিছু উপহার দিও না। আমি শুধু তোমাকেই উপহার চাই। দেবে তো?

মেজদি থাকতে ওকে ম্যানেজ করে নানারকম ধোঁকা দিয়ে তোমার কাছে গেছি ক'বার। এখন আর তা সম্ভব নয়। তাই বলছিলাম, তুমি যদি আসতে তবে ভাল হতো। তোমাকে না দেখে থাকতে পারি না। তুমি কি আমার সে কষ্ট উপলব্ধি করতে পার? যদি পার তবে দয়া করে অন্তত একটি দিনের নিমাই শ্রেষ্ঠ-৭

জন্য দেখা দিয়ে যেও।

ভাল কথা, মেমসাহেবের বাচ্চা হবে। এই তো ক'মাস আগে বিয়ে হলো! এর মধ্যেই বাচ্চা? না জানি আমার অদৃষ্টে কি আছে!

মেমসাহেবের এই চিঠির উত্তর তো পোস্টকার্ডে দেওয়া যায় না। কর্মব্যস্ততার জন্য তাই ক'দিন চিঠি দিতে পারি নি। তাছাড়া ক'দিনের জন্য সৌরাষ্ট্র গিয়েছিলাম। এমন করে উত্তর দিতে বেশ দেরি হয়ে গেল। ইতিমধ্যে মেমসাহেবের আবার একটা চিঠি পেলাম। জানলাম ইতিমধ্যে একদিন ভোর পাঁচটার সময় পুলিশ এসে খোকনদের ফ্ল্যাট সার্চ করে গেছে। খোকনকেও ধরে নিয়ে গিয়েছিল। বিকেলবেলা ছেড়ে দিয়েছিল।

কলকাতার কাগজগুলো পড়ে বেশ বুঝতে পারছিলাম বাংলাদেশের রাজনৈতিক সভা-সমিতির পালা এবার শেষ হবে, শুরু হবে মিছিল, বিক্ষোভ, ১৪৪ ধারা ভঙ্গ। তারপর লাঠি, কাঁদুনে গ্যাস, গুলি। আবার বিক্ষোভ, আবার মিছিল হবে। আবার চলবে লাঠি, গুলি। কিছু মানুষ হারাবে তাদের প্রিয়জনকে। তারা কাঁদবে, সারাজীবন ধরে কাঁদবে।

খোকন যে বেশ অনেক দূর এগিয়ে গেছে, সে কথা বুঝতে আমার কষ্ট হল না। এ নেশার ঘোর ওর কাটবে না। খেসারাত না দিলে এ নেশা কাটে না। অনেকের কোনকালেই কাটে না। খোকনেরও কাটবে কিনা ঠিক নেই।

মেমসাহেব অবশ্য ভাবছিল আমি কলকাতা গিয়ে খোকনকে বুঝিয়ে-সুঝিয়ে একটা কিছু করি। কিন্তু কি করি? কি বোঝাব খোকনকে? বোঝাতে চাইলেই কি সে বুঝবে? আমারও মেমসাহেবকে দেখতে খুব ইচ্ছা করছিল। ভেবেছিলাম দু'তিন দিনের জন্য ঘুরে আসব। কিন্তু মেমসাহেবের পরের চিঠিতে খোকনের খবর পাবার পর ঠিক করলাম—না, যাব না। মেমসাহেবকে লিখে দিলাম, সত্যি ভীষণ ব্যস্ত। কোনমতেই যেতে পারছি না। যদি এর মধ্যে সময় পাই তাহলে নিশ্চয়ই তোমাকে দেখে আসব। শেষে লিখলাম, রাজনীতি অনেকেই করে, খোকনও করছে। তার জন্য অত চিন্তা বা ঘাবড়াবার কি কারণ আছে? তাছাড়া খোকন তো আর শিশু নয়। সুতরাং তুমি অত ভাববে না।

খোকন সম্পর্কে আমার এই ধরনের মন্তব্য মেমসাহেব ঠিক পছন্দ করত না তা আমি জানতাম। কিন্তু কি করব? আমি স্থির জানতাম খোকন আমার কথা গুনবে না। মেমসাহেবের কথাও তার পক্ষে শোনা তখন সম্ভব ছিল না। সুতরাং আমি আর কি লিখব?

আমার চিঠি পাবার সঙ্গে সঙ্গেই মেমসাহেব উত্তর দিল যে কোন কারণেই হোক তুমি খোকন সম্পর্কে বেশ উদাসীন। হয়ত ওকে ঠিক পছন্দ কর না। জানি না কি ব্যাপার। তোমার সঙ্গে এ বিষয়ে তর্ক করব না। তবে জেনে রাখ খোকন সম্পর্কে আমার ও আমাদের পরিবারের ভীষণ দুর্বলতা।

আমি সত্যি কোন তর্ক করি নি। তর্ক করব কেন? মানুষের স্নেহ-ভালবাসা নিয়ে কি তর্ক করা উচিত? কখনই নয়। তাছাড়া যুক্তি-তর্ক, ন্যায়-অন্যায়, বাছ-বিচার করে কি মানুষ খোকনকেই একটা চিঠি দিলাম। লিখলাম তোমার মত ভাগ্যবান ছেলে এই পৃথিবীতে খুব কমই পাওয়া যাবে। তার কারণ এই পৃথিবীটা বড় নিষ্ঠুর, বড় কৃপণ। আপনজনের কাছ থেকেই ভালবাসা পাওয়া এই পৃথিবীতে একটা দুর্লভ ব্যাপার। সুতরাং অন্যের কাছ থেকে স্নেহ-ভালবাসা সত্যি সৌভাগ্যের কথা! তুমি সেই অনন্য ভাগ্যবানের অন্যতম। অনেক সুখ, অনেক আনন্দ ত্যাগ করে, অনেক কষ্ট, অনেক দুঃখ সহ্য করে, অনেক আত্মত্যাগ স্বীকার করে তোমার বড়মা ও দিদিরা তোমাকে মানুষ করেছেন। তোমাকে নিয়ে ওঁদের অনেক আশা, অনেক স্বপ্ন। তোমার গায়ে—একটু আঁচড় লাগলে ওঁদের পাজরার একটা হাড় ভেঙে যায়। হয়ত এতটা স্নেহ-ভালবাসার কোন অর্থ হয় না। কিন্তু তুমি তো জান ডাই, স্নেহ-ভালবাসা মানুষকে অন্ধ করে দেয়। তোমার বড়মাও দিদিদেরও তাই অন্ধ করে দিয়েছে। তুমি ওঁদের এই অমূল্য স্নেহ-ভালবাসার অমর্যাদা কোনদিন করবে না, তা আমি জানি। কিন্তু তোমার জন্য আজকাল ওরা বড় চিন্তিত, বড় উদ্বেগ। তুমি কি এর থেকে ওঁদের মুক্তি দিতে পার না? আমার মনে হয় তুমি ইচ্ছা করলেই পার। যারা তোমার জন্য দিনের পর দিন, মাসের পর মাস, বছরের পর বছর রাত্রি জেগে কাটিয়েছেন, যারা তোমার কল্যাণে ব্রত-উপবাস করেছেন, কাশীঘাটে পূজা দিয়েছেন, তারকেশ্বরে ছুটে গিয়েছেন তুমি কি তাঁদের উৎকর্ষা দূর করতে পার না? পার না ওঁদের চোখের জল বন্ধ করতে? একটু স্থির হয়ে ভেবে দেখ।

আমি একজন সাংবাদিক হয়ে তোমাকে রাজনীতি করতে মানা করব না। তবে আগে লেখাপড়াটা শেষ কর। ভাল হয় না? লেখাপড়া শিখে সমাজের মধ্যে মাথা উঁচু করে দাঁড়িয়ে দশজনের একজন হয়ে রাজনীতি করা ভাল না? রাজনীতি নিশ্চয়ই করবে, একশ বার করবে। স্বাধীন দেশের নাগরিকরা নিশ্চয়ই রাজনীতি করবে। কিন্তু তার আগে নিজে প্রস্তুত হও তৈরি হও, উপযুক্ত হও।

তোমার ফাইন্যাল পরিক্ষা এসে গেছে। তুমি বুদ্ধিমান ছেলে। একটু মন দিয়ে লেখাপড়া করলেই চমৎকার রেজাল্ট করবে। তুমি তো জান, তোমার বড়মার শরীর ভাল না, ছোড়দিও বড় একলা। ওদের একটু দেখো। আর ভুলে যেও না তোমার বাবার কথা—যিনি শুধু তোমারই মুখ চেয়ে উদয়-অস্ত পরিশ্রম করছেন। একটু তাড়াতাড়ি মানুষ হয়ে বৃদ্ধ মানুষটাকে একটু শান্তি দেবার চেষ্টা করো।

শেষে জানালাম, এ চিঠির উত্তর না দিলেও চলবে। তোমার বক্তব্য তোমার ছোড়দিকে জানিও। সেই আমাকে সবকিছু জানাবে। আর হ্যাঁ, তুমি যদি চাও তাহলে দিল্লী আসতে পার। সেদিন ইচ্ছা, সেদিনই এসো এবং এখানে এলে তোমার পড়াশুনা ভালই হবে। তাছাড়া আমিও তোমার সাহচর্য পেতাম।

এই চিঠি লেখার পরই আমি আবার বাইরে গেলাম। উত্তর প্রদেশ কংগ্রেসের ঘরোয়া কোন্দল প্রায় চরমে উঠেছিল। প্রদেশ কংগ্রেস কমিটির নির্বাচন নিয়ে দুই দলে প্রায় কুরুক্ষেত্রের লড়াই শুরু করেছিলেন। এডিটরের নির্দেশে সেই কুরুক্ষেত্রের লড়াই কভার করতে আমি লক্ষ্মী পৌঁছেই প্রথম দু'দিন সময় পাই নি। তার পরদিন ওকে জানালাম যে, আমি দিল্লীতে নেই, লক্ষ্মী এসেছি।

এক সপ্তাহ লক্ষ্মী থাকার পর লক্ষ্মীবাসী এক সাংবাদিক বন্ধু ও একজন এম-পি'র পাল্লায় পড়ে দিল্লী আসার পরিবর্তে চলে গেলাম নৈনীতাল। ঠিক ছিল দু'দিন থাকব। কিন্তু ওদের পড়ে দিল্লী ফিরলাম এক সপ্তাহ পরে।

দিল্লী ফিরে অনেকগুলো চিঠি পেলাম। মেজদির চিঠিতে জানলাম ন্যাভাল অফিসার কোচিনে বদলী হয়েছেন। ওখানে এখন কোয়ার্টার পাওয়া যাবে না। তাই মেজদি কলকাতা যাচ্ছেন। ইতিমধ্যে কোয়ার্টার পেলেও কোচিন যাবেন না। একেবারে আমাদের বিয়ে দেখে ফিরবেন। মনে মনে ভাবলাম চমৎকার! আমি মেজদিকে লিখলাম, ছিঃ ছিঃ, অত তাড়াতাড়ি কেউ কোচিন যায়? আর এই আকশাই টীনের বাজারে? একেবারে খোকনকে পেরানুলেটারে চড়িয়ে বঙ্গোপসাগরের ধার দিয়ে বেড়াতে বেড়াতে ভুবনেশ্বরে চা খেয়ে, কোনারকে কফি খেয়ে ওয়ালটের-এ কাজু খেয়ে, মাদ্রাজে দোসা খেয়ে, কন্যাকুমারিকায় ভারত মহাসাগরের জলে সাঁতার কেটে, ত্রিবান্দ্রমে নারকেল খেয়ে কোচিন যাবেন। কেমন? দরকার হয় আমিই পেরানুলেটার দেব। কারণ পরে ওটা তো আমাদেরও কাজে লাগবে, তাই না?

খোকনকে চিঠি লেখার জন্য মেমসাহেব খুব খুশি হয়েছিল। এ-কথাও জানিয়েছিল যে খোকনের একটু পরিবর্তন দেখা দিয়েছে।

এবার ঠিক করলাম দু'তিন দিনের জন্য কলকাতা যাব। এডিটরকে চিঠি লিখে এক সপ্তাহের ছুটি নিলাম। কলকাতা যাবার কথা মেমসাহেবকে কিছু লিখলাম না। মেজদিকে লিখলাম, কতকাল আপনাকে দেখি নি মনে হচ্ছে যেন কত যুগ আগে আপনার সঙ্গে দেখা হয়েছিল। আমি আপনাকে না দেখে আর থাকতে পারছি না। কাজকর্মে মন বসছে না। রিপোর্ট লিখতে গিয়ে বার বার ভুল করছি। মুখে কিছু ভাল লাগছে না। এমন কি মধুবালা-সোফিয়া লারনের ফিল্ম দেখতেও ইচ্ছা করছে না, আমাকে মাপ করবেন। তাই আমি আগামী সোমবার সকালে দিল্লী মেলে কলকাতা যাচ্ছি আপনাকে দেখার জন্য।

উনিশ

সেবার কলকাতা যাওয়া আমার জীবনে কোনদিন ভুলতে পারব না। না, না, কোনদিন ভুলব না। সেবারের কলকাতার স্মৃতির আমার জীবনের সব চাইতে মূল্যবান স্মৃতি। আজ আমার পার্শ্বব সম্পদ অনেক, ভবিষ্যতে হয়ত আরও হবে। লক্ষ লক্ষ মানুষের স্মৃতি আজ আমার পরিচয়। কত ডি-আই-পি'র সঙ্গে ঘুরে বেড়িয়েছি দেশ-দেশান্তর। তাদের কত মিষ্টি, কত সুন্দর, কত চমকপ্রদ স্মৃতির সঙ্গে অন্য কোন স্মৃতির তুলনাই হয় না। একদিন হয়ত আমার সবকিছু হারিয়ে যাবে, হয়ত আমি

অতীত দিনের মত একমুষ্টি অন্নের জন্য, একটা লেখা ছাপিয়ে দশ টাকা পাবার জন্য আবার কলকাতার রাজপথে ঘুরে বেড়াব। হারাবো না শুধু আমার স্মৃতি মেমসাহেবের স্মৃতি, সেবারের কলকাতার স্মৃতি।

হাওড়া স্টেশনে মেজদি এসেছিলেন। মেমসাহেবকে না দেখে আমি একটু অবাক হলাম। মেজদিকে কিছু বললাম না। শুধু এদিক-ওদিক চাইলাম। ভাবছিলাম বোধহয় লুকিয়ে আছে। একটু মুচকি হেসে মেজদি বললেন, 'এদিক ওদিক দেখে লাভ নেই। আসে নি।'

আমি একটু জোরে হেসে বললাম, 'আরে না, না!, ওকে কে খুঁজবে? আমার এক বন্ধুর আসার কথা ছিল তাই দেখিছি এসেছে কিনা।'

মেজদি একটু দুই হাসি হেসে বললো, 'ও আই সী!'

গ্যাটফর্ম থেকে ট্যাকসি স্ট্যাণ্ডে যাবার পথে মেজদি বললেন, 'আজ রাত্রিতে আপনি আমার ওখানে খাবেন।'

আমি ধমকে দাঁড়িয়ে বললাম, 'সে কি?'

'মা'র হুকুম।'

'রিয়েলি?'

'তবে কি আপনার সঙ্গে ঠাটা করছি?'

মেমসাহেব সেদিন সত্যি স্টেশনে আসে নি; চীফ অফ প্রোটোকল হয়ে মেজদি এসেছিলেন আমাকে অভ্যর্থনা জানাবার জন্য। মেমসাহেবকে না দেখে মনে মনে একটু হতাশাবোধ করলেও আমার সামাজিক মর্যাদায় বেশ গর্ববোধ করেছিলাম।

রাতে নেমস্তন্ন খেতে গিয়েছিলাম মেমসাহেবের দেওয়া খুতি-পাঞ্জাবি পরে। সত্যি প্রায় জামাই সেজে স্বত্বরবাড়ি গিয়েছিলাম। মেমসাহেব আমারই অপেক্ষায় বসেছিল ড্রইংরুমে। কিন্তু যেই আমি 'বাজার' বাজালাম ও সঙ্গে সঙ্গে চিৎকার করে বললো, 'মেজদি! দেখ তো, কে এসেছে।' আমি বাইরে দাঁড়িয়ে দাঁড়িয়ে ওর কথা শুনেতে পেলাম। এমন একটা ভাব দেখাল যেন ওর কোন বাইরে গরজ নেই। আসল কথা লজ্জা করছিল।

মেজদি দরজা খুলেই চিৎকার করলেন, 'মা! তোমার ছোট জামাই এসেছেন।'

ভিতর থেকে মেমসাহেবের মার গলা শুনেতে পেলাম, 'আঃ, চিৎকার করিস না।'

মেজদি ঘর ছেড়ে ভিতরে যাবার সময় হুকুম করে গেলেন, 'চুপটি করে বসুন দীর্ঘনিশ্বাস ফেলার প্রয়োজন নেই এক্ষুনি পাঠিয়ে দিচ্ছি।'

মেজদি বিদায়ের প্রায় সঙ্গে সঙ্গে মেমসাহেব এলো। একটু এদিক-ওদিক দেখে নিয়ে আমার পাশ এসে দাঁড়াল। আমি ওর হাত ধরে পাশ থেকে সামনে নিয়ে এলাম। তারপর দু'হাত দিয়ে ওর কোমরটা জড়িয়ে ধরে বুকের কাছে আলতো করে মাথাটা রাখলাম।

ও আমার মাথায় একটু হাত বুলিয়ে দিতে দিতে বললো, 'আঃ, ছেড়ে দাও। কেউ এসে পড়বে।'

আমি ওর কথার কোন জবাব দিলাম না। অমনি করেই ওকে জড়িয়ে ধরে রইলাম।

ও আন্তে আন্তে আমার হাত দুটো ছাড়িয়ে দিতে দিতে বললো, 'লক্ষীটি ছেড়ে দাও, কেউ দেখে ফেলবে।'

আমি এবার ওর হাত দুটো ধরে মুখের দিকে চাইলাম। বললাম, 'দেখুক না, কি হয়েছে?'

ও একটা হাত ছাড়িয়ে নিয়ে আমার মুখে, কপালে, মাথায় হাত বুলিয়ে দিতে দিতে বললো, 'কেমন আছ?'

'ভাল।'

একটু খেমে জিজ্ঞাসা করলাম, 'তুমি কেমন আছ?'

'ভাল না।'

'কেন?'

'কেন আবার? আমার আর একলা একলা থাকতে একটুও ভাল লাগছে না।'

আমি ওর ফোলা ফোলা গাল দুটো একটু টিপে ধরে বললাম, 'এই তো এসে গেছে। আর তো দু'মাসও বাকি নেই।'

সেদিন রাত্রে মেমসাহেবের মা সত্যি জামাই-আদর করে খাওয়ালেন। ছোটবেলায় মাকে হারিয়ে অত আদর-যত্ন পাওয়া কোনদিন অভ্যাস নেই। অত ভালমন্দ খাওয়া-দাওয়ার অভ্যাসও কোনদিন ছিল না। আমি কোনটা খেলায় কোনটা খেলায় না।

খাওয়া-দাওয়া শেষে ড্রইংরুমে বসে বসে মেজদি আর মেমসাহেবের সঙ্গে অনেকক্ষণ গল্প করলাম। শেষে মেমসাহেবের মাকে প্রণাম করে বিদায় নেবার সময় উনি আমার হাতে একটা পাথর সেট করা আংটি পরিয়ে দিলেন। আমি বললাম, 'একি করছেন?'

বিয়ের আগে তো আর তুমি আসছ না। আশীর্বাদ তো বিয়ের আসরেই হবে। তাই এটা থাক।

আমি আবার আপত্তি করলাম। উনি বললেন, 'মায়ের আশীর্বাদ না করতে নেই।'

আর আপত্তি করলাম না।

পরের দিন মেমসাহেব আর আমি দক্ষিণেশ্বর গিয়েছিলাম। সন্ধ্যার পর আরাতি দেখে নৌকায় চড়ে গিয়েছিলাম বেলেড়। পৌষ মাসের সন্ধ্যায় মিষ্টি ঠাণ্ডা হাওয়া বইছিল গঙ্গার ওপর দিয়ে। মেমসাহেব আমার পাশ ঘেঁষে বসে আমার কাঁধে মাথা রাখল।

সেদিন সন্ধ্যায় বিশেষ কথাবার্তা হয় নি আমাদের। আনন্দ-তৃপ্তিতে দু'জনেরই মনটা পূর্ণ হয়েছিল। বেশি কথাবার্তা বলতে কারুরই মন চায় নি।

মেমসাহেব জিজ্ঞাসা করেছিল, 'তুমি আর এর মধ্যে কলকাতা আসবে না?'

'না।'

'একেবারে সেই বিয়ের সময়?'

'হ্যাঁ।'

একটু পরে আবার বললেন, 'বিয়ের পর তুমি কিন্তু আমাকে তোমার মনের মতন করে গড়ে নিও। আমি যেন তোমার সব প্রয়োজন মেটাতে পারি।'

'আমার সব প্রয়োজনের কথাই তো তুমি জানো। তাছাড়া তুমিই তো আমাকে গড়ে তুলেছ। সুতরাং আমি আর তোমাকে কি গড়ে তুলব?'

'আমি তো নিমিত্ত মাত্র। তোমার নিজের মধ্যে গুণ ছিল বলেই তুমি জীবনে দাঁড়াতে পেরেছ। গুণ না থাকলে কি কেউ কাউকে কিছু করতে পারে?'

আমি বললাম, 'পারে বৈকি মেমসাহেব! শুধু ইট-কাঠ-সিমেন্ট হলেই তো একটা সুন্দর বাড়ি হয় না, আর্কিটেক্ট চাই, ইঞ্জিনিয়ার চাই, মিস্ত্রি চাই। সোনার তালের দাম থাকতে পারে কিন্তু তার সৌন্দর্য নেই, স্বর্ণকারের হাতে নেই সোনা পড়লে কত সুন্দর গহনা হয়।'

ওর মুখের ওপর মুখ রেখে বললাম, 'মেমসাহেব, তুমি আমার এই আর্কিটেক্ট, ইঞ্জিনিয়ার, শিল্পী।'

ও আমার সব কথা জবাব না দিয়ে বললো, 'তুমি আমাকে বড্ড বেশি ভালবাস। তাই তো তুমি আমাকে অকৃপণভাবে মর্যাদা দিতে চাও।' মুখটা ঘুরিয়ে নিয়ে বললো, 'তাই না।'

মেমসাহেব এবার যেন একটু অভিমান করে বললো, 'ওসব আজেবাজে কথা বলবে না তো! হাজার হোক তুমি আমার স্বামী। আর তাছাড়া এম-এ, পড়লেই কি সবাই পণ্ডিত হয়ে যায়?'

ও নিজেই প্রশ্নের জবাব দিল, 'মোটাই না। তোমার জ্ঞান, বুদ্ধি, অভিজ্ঞতার কাছে কি আমি দাঁড়াতে পারি?'

দোলাবৌদি, মেমসাহেব শুধু আমাকে ভালবাসত না, শ্রদ্ধা করত, ভক্তি করত। সোনায় যেমন একটু পান মিশিয়ে গহনা মজবুত হয় না, সেই রকম ভালবাসার সঙ্গে একটু শ্রদ্ধা, ভক্তি না মিশালে সে ভালবাসাও দীর্ঘস্থায়ী হয় না। মেমসাহেব আজ অনেক-অনেক দূরে চলে গেছে। কিন্তু যত দূরেই যাক, যেখানেই থাকুক আমি নিশ্চিত জানি সে আজও আমাকে ভুলতে পারে নি। আমি জানি, সে আজও আমাকে ভালবাসে। প্রতিটি মুহূর্তের আজও তার মনে আছে।

কলকাতায় আরো ক'দিন ছিলাম। এবার সবাইকে বলে দিলাম, আসছে ফাল্গুনে মেমসাহেবের সঙ্গে বিয়ে হচ্ছে। কেউ অবাক হলেন, কেউ কেউ আবার বললো, আমরা আগেই জানতাম।

আমি কারুর কোন মন্তব্য গ্রাহ্য করলাম না। গ্রাহ্য করব কেন? তোমরা কি কেউ আমাকে ভালবেসেছ? কেউ কি আমার বিপদের দিনে পাশে এসে দাঁড়িয়েছে? কেউ তো একটা পরামা দিয়ে না

এক কাপ চা খাইয়ে উপকার কর নি! সুতরাং তোমাদের আমি খোড়াই কেয়ার করি। যখন যেখানে যার সঙ্গে দেখা হয়েছে তাকেই বলেছি, আমার বিয়ে। মেমসাহেবের সঙ্গে। কবে? এই তো ফাগুনেই। বহুজনকে নেমস্তন্নও করেছিলাম, আসতে হবে কিন্তু। বন্ধু-বান্ধবদের বললাম, এবার যদি জোরা দিল্লী না আসিস তবে কাটাফাটি হয়ে যাবে।

বিয়ের আগে আর কলকাতা আসা হবে না। ভেবে বিয়ের কিছু কাজও করলাম কলকাতায়। দিল্লীতে ভাল পাঞ্জাবি তৈরি হয় না; ভাবানীপুরের একটা দোকান থেকে তিন গজ ভাল সিল্কের কাপড় কিনে শ্যামবাজারের মনুভাবুর দোকানে পাঞ্জাবি তৈরি করতে দিলাম। দিল্লীতে ভালো বাংলা কার্ড পাওয়া যায় না; সুতরাং কয়েকশ' কার্ড কিনলাম আর? আর কিনেছিলাম ইন্ডিয়ান সিল্ক হাউস থেকে মেমসাহেবের জন্য দুটো বেনারসী শাড়ি। দিল্লীতে বেনারসী পাওয়া যায় কিন্তু বড় বেশি দাম। তাছাড়া ঠিক রুচিসমত পাওয়া প্রায় অসম্ভব। শাড়ি দুটো কেনার সময় মেমসাহেবকে সঙ্গে নিয়ে গিয়েছিলাম পছন্দ করবার জন্য। ক্বাই কালারের বেনারসীটা আমার খুব পছন্দ হয়েছিল। ওরও খুব ভালো লেগেছিল কিন্তু বার বার বলেছিল, 'কেন এত দামী কিনছ?'

আমি বলেছিলাম, 'এর চাইতে কম দামের শাড়িতে তোমাকে মানাবে না।'

ও জু কুঁচকে একটু হাসতে হাসতে বলেছিল, 'তাই নাকি?'

'তবে কি?'

শাড়ি কিনে দোকান থেকে বেরবার সময় মেমসাহেব বললো, 'তুমি আমার দেওয়া ধুতি-পাঞ্জাবি পরে বিয়ে করতে আসবে।'

'সে কি? আমি তো কাপড় কিনে পাঞ্জাবি তৈরি করতে দিয়ে দিয়েছি।'

'তা হোক। তুমি আমার দেওয়া ধুতি-পাঞ্জাবি পরে বিয়ে করবে।'

সেন্ট্রাল এভিনিউর খাদি গ্রামোদ্যোগ থেকে মেমসাহেব আমার পাঞ্জাবির কাপড় কিনে বললো, 'চল, এবার ধুতিটা কিনতে যাই।'

ধুতি কিনতে গিয়ে আমি ওর কানে কানে ফিসফিস করে বললাম, 'প্লেন পাড় দেবে, না জরিপাড় দেবে?'

আগে কতবার জরিপাড় ধুতি চেয়েছি, পাই নি। এবার পেলাম। একটা নয়, এক জোড়া।

আমি জানতে চাইলাম, 'একজোড়া ধুতি পরে বিয়ে করতে যাব?'

'অসম্ভবতা করো না।' একটু থেমে বললো, 'তোমার তো মোটে দুটো ধুতি? তাই একজোড়াই থাক।'

ধুতি কিনে রাস্তা দিয়ে হাঁটতে হাঁটতে আমি জিজ্ঞাসা করলাম, 'তুমি তো আমার বিয়ের কাপড় দিলে, ফুলশয্যার জন্য তো কিছু দিলে না?'

ও আমার কথা জবাব না দিয়ে বললো, 'সেদিন যে তুমি কি করবে তা ভাবতেই আমার গায়ে জ্বর আসছে।'

'তাই নাকি?' একটু থেমে আবার বললাম, 'বেশ তাহলে শুধু বিয়েই হোক, ফুলশয্যার আর দরকার নেই।'

ও বাঁকা চোখে হাসি হাসি মুখে বললো, 'ভূতের মুখে রাম নাম?'

কলকাতায় এমনি করে ক'টা দিন বেশ কেটে গেল। আমার কলকাতা-বাসের মেয়াদ শেষ হলো দেহটাকে আবার চাপিয়ে দিলাম দিল্লী মেলের কামরায়। কিন্তু মন? সে পড়ে রইল কলকাতায়। মেমসাহেবের কাছে।

দিল্লীতে ফিরে এসে আবার বেশ কাজকর্মের চাপ পড়ল। দশ-বারো দিন প্রায় নিশ্বাস ফেলার অবকাশ পেলাম না। সমাগত কংগ্রেস অধিবেশনের জন্য কংগ্রেস পার্টিতে দলদলি চরম পর্যায়ে পৌঁছল। কংগ্রেসের ঘরোয়া বিবাদ যত তীব্র থেকে তীব্রতর হলো আমাদের কাজের চাপও তত বেশি বাড়ল।

এদিকে কলকাতার কাগজ পড়ে বেশ বুঝতে পারছিলাম অবস্থা সুবিধের নয়। গড়গোল গুরু হলো বলে।

মাদ্রাজে কংগ্রেস অধিবেশন করার করতে গিয়েই খবর পেলাম, কলকাতায় গুলি চলছে, দু'জন

মারা গেছে ; বাংলাদেশে বিশেষ করে কলকাতা শহরে এই ধরনের রাজনৈতিক নাটক প্রায়ই অভিনীত হয় ।

দিল্লী ফিরে এসে খবর পেলাম ডুয়ার্সে, কৃষ্ণনগরে, দুর্গাপুরে আর বসির হাটেও গুলি চলেছে । কিছু আহত কিছু নিহত হয়েছে । বেশ চিন্তিত হয়ে পড়লাম । না জানি খোকন আবার কি করে ! গতবার কলকাতায় গিয়ে তো কত বুকিয়ে এলাম কিন্তু সন্দেহ হলো ওসব কিছুই হয়ত ওর কানে ঢোকে নি । উপদেশ আর পরামর্শ দিয়ে যদি কাজ হতো তাহলে বাংলাদেশের ঘরে ঘরে বিদ্যাসাগর বিরেকানন্দ-নেতাজী পাওয়া যেত ।

ইতিমধ্যে ভারতবর্ষের শান্ত হিমালয় সীমান্ত আরো অশান্ত হয়ে উঠেছিল । সীমান্ত নিয়ে অনেক আজগুবি কাহিনী ছাপা হচ্ছিল নানা পত্রপত্রিকায় । স্বাভাবিক-ভাবেই সরকার উদ্ভিগ্ন হয়েছিলেন এসব খবরে । ভাড়াড়া পার্লামেন্টের বাজেট অধিবেশন এসে গিয়েছিল । এই সময়ে এই ধরনের খবর নিয়ামিত ছাপা হলে পার্লামেন্টের অযথা ঝড় বয়ে যায় । অনেক ভাবনা-চিন্তার পর সরকার একদল জার্নালিস্টকে লাডাকে নিয়ে যাবার সিদ্ধান্ত নিলেন । আর্বি হেড কোয়ার্টার্নের ঠিক মত ছিল না; কারণ এই তাঁবু ঠান্ডায় জার্নালিস্টদের লাডাকে নিতে হলে অনেক ঝগড়াট । কিন্তু শেষ পর্যন্ত তারাও রাজী হলেন । দশজন দেশী-বিদেশী সাংবাদিক দলে আমিও স্থান পেলাম ।

এক সপ্তাহের প্রোগ্রাম । মেমসাহেবকে জানালাম, এক সপ্তাহের জন্য লাডাকে যাচ্ছি । আমরা রওনা হবো ২রা ফেব্রুয়ারি । এখান থেকে জম্মু যাব । সেখান থেকে উধমপুর কোর কামাওয়ারের হেড কোয়ার্টার্স । একদিন উধমপুর থেকে যাব লে'তে । সেখানে একদিন থেকে যাব অপারেশন্যাল এরিয়া ভিজিট করতে । ফিরে এসে আবার একদিন লে'তে থেকে ফিরব দিল্লী ।

১৪ই ফেব্রুয়ারি বাজেট অধিবেশন শুরু হবে । ২৮ শে ফেব্রুয়ারি বাজেট পেশ করা হবে । আমি ৪ঠা মার্চ কলকাতা রওনা হবো । বাবা বেনারস থেকে ২রা কি ৩রা কলকাতা পৌঁছবেন । ৬ই মার্চ বিয়ে হবার পর ৮ই মার্চ ডিল্ল্যাব্র এক্সপ্রেসে তোমাকে নিয়ে আবার দিল্লী ফিরব । ১৪ই মার্চ আমার ছুটি শেষ হবে । সুতরাং যদি কোথাও বাইরে বেড়াতে চাও তাহলে ঐ ক'দিনের মধ্যেই ঘুরে আসতে হবে । পার্লামেন্ট শেষ হলে তোমাকে নিয়ে নিশ্চয়ই কোথাও বেড়াতে যাব । কেমন? মত আছে তো?

মেমসাহেব লিখল, তোমার চিঠিতে জানলাম, তুমি লাডাক যাচ্ছ । তুমি যখন সাংবাদিক তখন তোমাকে তো সর্বত্রই যেতে হবে । অনেক সময় বিপদের মুখোমুখি হতে হবে তোমাকে । আমার মুখ চেয়ে নিশ্চয়ই তুমি সাবধানে থাকবে । তবে আমি জানি তোমাকে কোন বিপদ স্পর্শ করতে পারবে না ।

তুমি লিখেছ, লাডাকে এখন মাইনাস ১০-১২ ডিগ্রী টেম্পারেচার । কলকাতার বাঙালী হয়ে আমাদের কল্পনাভীত । আমার তো ভাবতেও ভয় লাগছে । উলের আঙুরউয়ান, গ্রাডস, ক্যাপ ইত্যাদি নিতে ভুলো না । তুমি বার্লিন থেকে যে ওভারকোটটা এনেছ সেটা অবশ্য নেবে । আমি জানি, তুমি ভাল থাকবে কিন্তু তবুও চিন্তা তো হবেই । যদি পার লে'তে পৌঁছবার পর টেলিগ্রাম করো ।

শেষে লিখেছিল, ৮ই মার্চ তোমার সঙ্গে দিল্লী যবার পর খুব বেশি বেড়াবার সময় থাকবে কি? তুমি তো প্রায় সব কিছুই গুছিয়ে রেখেছ কিন্তু তবুও নতুন সংসার করবার কিছু ঝামেলা তো থাকবেই । তাছাড়া তোমার তো ক'দিন বিশ্রাম চাই । এই তো কংগ্রেস কভার করে ফিরলে । এখন যাচ্ছ লাডাক । ফিরে এসেই পার্লামেন্ট! তারপর কলকাতা আসা-যাওয়া, বিয়ে-থার জন্য তোমার কি কম পরিশ্রম হবে! সেজন্য দিল্লী গিয়ে আর কোথাও যাবার ইচ্ছে নেই । তোমাকে আর এর মধ্যে দেখতে পাব না । সেই ২০শে ফাল্গুন রাতে একেবারে শুভমুহুর্তে তোমাকে দেখব । ভাবতেও ভারী মজা লাগছে । তোমার ভাবতে ভাল লাগছে না?

মেমসাহেবের চিঠি পাবার পরদিনই ভোরবেলায় পালামের এয়ার ফোর্স স্টেশন থেকে এয়ার ফোর্সের এক স্পেশ্যাল প্রেনে আমরা চলে গেলাম জম্মু । সেখান থেকে মোটরে উধমপুর । এক রাত্রি উধমপুর কাটিয়ে পরদিন ভোরবেলায় জম্মু এয়ারপোর্টে এসে গনলাম লে'তে ভীষণ খারাপ আবহাওয়া । প্রভিং ফ্লাইটে একটা প্রেন গিয়েছে । যদি ঐ প্রেনটা ল্যাও করতে পারে তাহলে সেই মেসেজ পাবার পর আমাদের প্রেন ছাড়বে । বেলা আটটা-সাতটা আটটার মধ্যে আবহাওয়ার উন্নতি না হলে আউট আর হবে না ।

সাড়ে আটটা পর্যন্ত কোন মেসেজ এলো না। প্রতিং ফ্লাইটে যে প্রেনটি গিয়েছিল সেটি ফেরত এলো ন'টা নাগাদ। কোর হেড কোয়ার্টার্স থেকে আর্মি হেড কোয়ার্টার্সে মেসেজ চলে গেল, ব্যাড ওয়েদার অ্যারাইভ লে স্টপ প্রডিং ফ্লাইট ফেল্ড স্টপ থ্রেস পার্টি হেল্ড-আপ। আমিও আমার হেড কোয়ার্টার্সে একটা টেলিগ্রাম করলাম, লে আন্ডার ব্যাড ওয়েদার নো ফ্লাইট টু-ডে স্টপ।

উধমপুরে একটা অতিরিক্ত রাত্রিবাস ভাল কেটেছিল। দুপুরে একটা চমৎকার লাঞ্চ ছাড়াও সন্ধ্যায় আমাদের সমানে একটা ককটেল দিলেন কোর কমাণ্ডার নিজে। পরের দিন ভোরে রওনা হবার আগে আমরা ওয়েদার রিপোর্ট চেক-আপ করে জানলাম, লে'র আবহাওয়া ভালই, সুতরাং ফার্স্ট পাটির ফাট এয়ারক্রাফটেই আমরা রওনা হয়ে জম্মু থেকে লে এলাম।

লে'তে পৌঁছে একটু বিশ্রাম করে শহরে গিয়েছিলাম। সেখান থেকে মেমসাহেবকে একটা আর্জেন্ট টেলিগ্রাম করলাম রিচড সেকলি।

লাডাকে আসার পর কলকাতার কোন খবর পেলাম না। সময়ও হতো না, সুযোগও হতো না। কলকাতার স্টেশন অভ্যন্তর উইক। ভাছাড়া এত ঠান্ডায় ব্যাটারীও ঠিক কাজ করে না। সুতরাং রেডিওতে কলকাতার কোন খবর পেলাম না।

লে'তে একদিন কাটাবার পর আমরা ফরোয়ার্ড এরিয়া দেখতে রওনা হলাম। কোথাও জীপ কোথাও হেলিকপ্টার। সারাদিন ঘুরে বেড়াতাম চোদ্দ-পনের হাজার ফুট উপরে হিমালয়ের মরু অঞ্চলে। বিকেল থেকে মধ্য রাত্রি পর্যন্ত কাটাতাম আমাদের বা অফিসারদের কোন-না-কোন মঙ্গোলিয়ান টেন্টে বোখারীর পাশে।

ফরোয়ার্ড এরিয়া ঘুরে লে'তে ফেরার পর জানলাম, গত পাঁচদিন ধরে কো ন প্রেন ল্যান্ড করে নি। ব্যাড ওয়েদার। আবহাওয়া কবে ভাল হবে সে-কথা কেউ জানে না। পরের দিনও ভাল হতে পারে আবার আট দশ দিনের মধ্যে নাও হতে পারে। শীতকালে লাডাকের আবহাওয়া এমনই হয়। চিন্তিত না হয়ে পারলাম না, কিন্তু চিন্তা করেও কোন উপায় ছিল না।

শহরে গিয়ে পোস্ট-অফিস থেকে মেমসাহেবকে একটা টেলিগ্রাম করে দিলাম, রিটার্নড ফ্রম ফরোয়ার্ড এরিয়ায় স্টপ ব্যাড ওয়েদার প্রোগ্রাম অনসার্টেন।

শেষ পর্যন্ত এক সপ্তাহের পরিবর্তে বারোদিন পর আবার পালামের মাটি স্পর্শ করলাম। এয়ারপোর্ট থেকে সোজা এলাম ওয়েস্টার্ন কোর্ট। রিসেপশন কাউন্টারে আমার ঘরের চাবি চাইতেই বললো, 'ইওর সিটার-ইন-ল-ইজ দেয়ার।'

সিটার-ইন-ল?

অবাক হয়ে গেলাম। দিদি? মেজদি? কিন্তু ওঁরা এখন আসবেন কেন? বেড়াতে? একটা খবর জো পাওয়া উচিত ছিল। জরুরি কোন কাজে? লিফটে উঠতে উঠতে অনেক কিছু ভাবছিলাম। আবার ভাবলাম বিয়ে নিয়ে কোন গুণ্গোল হলো নাকি? না, না, তা কেমন করে সম্ভব।

ঘরে ঢুকতে গিয়ে মেজদিকে দেখে ধমকে গেলাম। হঠাৎ মেজদিকে এমন বিশ্রীভাবে দেখে মনে হলো বোধহয় মেজদিরই চরম সর্বনাশ হয়ে গেছে। মনটা ব্যথায় ভরে গেল। এইতো ক'মাস আগে বিয়ে হয়েছে। এরই মধ্যে.....

মেজদি আমাকে দেখেই হাউহাউ করে কেঁধে আমাকে জড়িয়ে ধরলেন। ওর অপ্রত্যাশিত আগমন এবং ততোধিক অপ্রত্যাশিত কান্নায় আমি এমন ঘাবড়ে গেলাম যে আমার গলা দিয়ে একটিও শব্দ বেরতে চাইল না। মেজদি আমাকে ঐভাবে জড়িয়ে ধরে কতক্ষণ কেঁদেছিল তা আমার মনে নেই। তবে মনে আছে বেশ কিছুক্ষণ বাদে মেজদি হঠাৎ বলে উঠলেন, 'তুমি কিভাবে একলা একলা বাঁচবে ভাই?'

একলা? একলা? আমি?

আমি এবার মেজদির হাত ছাড়িয়ে নিজেই ওর দুটো হাত চেপে ধরে জিজ্ঞাসা করলাম, 'মেমসাহেব কেমন আছে?'

মেমসাহেব নাম তনে মেজদি আর থাকতে পারলেন না। আবার আমাকে দু'হাত দিয়ে বুকের মধ্যে জড়িয়ে ধরে হাউহাউ করে কাঁসতে লাগলেন।

আমি আর সহ্য করতে পারলাম না। বেশ কড়া করে দাবড় দিয়ে বললাম, 'কি হয়েছে

মেমসাহেবের?’

অস্পষ্ট স্বরে মেজদি জবাব দিলেন, ‘সে আর নেই ভাই।’

মুহূর্তের মধ্যে মনে হলো সারা পৃথিবীটা অন্ধকারে ভরে গেল। কার যেন অকল্যাণ হাতের ছোঁয়ায় পৃথিবী থেকে সবার প্রাণ শক্তি হারিয়ে গেল। মনে হলো পায়ের নিচের মাটি সরে যাচ্ছে আর আমি পাতালের অতল গহ্বরে ডুবে যাচ্ছি।

দোলাবৌদি, আমি আর দাঁড়াতে পারলাম না। পাঁড় মাতালের মত টলে পড়ে গেলাম সোফার ওপর। অত বড় একটা মহা সর্বনাশের খবর শোনার পরও আমার কিছু হলো না। মহা আরামে ঘুমিয়ে পড়লাম। যখন ঘুম ভাঙল তখন দেখি রাত হয়ে গেছে আর আমার চারপাশে অনেকে ভিড় করে দাঁড়িয়ে আছেন। প্রথমে আমি কাউকে চিনতে পারছিলাম না। খানিকক্ষণ পরে চিনতে পারলাম ডাঃ সেন আমার পাশে বসে আছেন।

আমার মাথায় হাত বুলিয়ে দিয়ে ডাঃ সেন জিজ্ঞাসা করলেন, ‘কেমন আছেন?’

ঘুম ভাঙার পর ডাঃ সেনকে দেখে অবাক হয়ে গেলাম। ভাবলাম বোধহয় বেড়াতে এসেছেন। তাই আমি পাল্টা প্রশ্ন করলাম, ‘আপনি কেমন আছেন?’

‘আমি ভাল আছি। আপনি ভাল তো?’

‘বড্ড ঘুম পাচ্ছে। কাল আসবেন?’ আবার আমি ঘুমিয়ে পড়লাম। পরের দিন অনেক বেলায় আমার ঘুম ভাঙল। গজানন চা নিয়ে এলো, ফিরিয়ে দিলাম। স্নান করতে বললো, করলাম না। গজানন আবার কিছুক্ষণ পরে এসে অনুরোধ করল, আবার ওকে ফিরিয়ে দিলাম। আমি চুপচাপ বসে রইলাম।

এর পর মেজদি আমায় অনুরোধ করলেন, ‘নাও ভাই স্নান করে একটু কিছু মুখে দাও।’

আমি কিছু খাবার খাম না। আরো কিছুদিন এমনি করে বসে থাকার পর মনে হলো গ্রীন পার্কে মেমসাহেবের সংসারটা দেখে আসি। গজাননকে ডাক দিয়ে বললাম, গাড়ী তৈয়ার করো।

‘কাহা যানা ছোটসাব?’ খুব মিহি গলায় গজানন জানতে চাইল।

‘গ্রীন পার্ক!’

কিছুক্ষণ বাদে গজানন খবর দিল, ‘গাড়ি তৈয়ার হ্যায় ছোটসাব।’

আমি সঙ্গে সঙ্গে উঠে পড়লাম।

গজানন বললো, ‘এই নোংরা জামা-কাপড় পরে বেরুবেন?’

‘তবে কি সিন্ধের পাণ্ডাবি চাপিয়ে বেরুব?’

একটা চটি পায় দিয়ে হন্থন করে বেরিয়ে গেলাম। গজানন দৌড়ে গিয়ে দরজা খুলে দিয়ে পিছনের সীটে বসে পড়ল। মেজদিও নিঃশব্দে আমার পাশে এসে বসল।

সেদিন গাড়ি চালিয়েছিলাম বিদ্যুৎবেগে। কোন স্টপ সিগন্যাল পর্যন্ত মানি নি। গজানন বললো, ‘এত না তেজ মাত চালাইয়ে।’

আমি ওর কথাই কোন জবাবই দিলাম না। মেজদি বললেন, ‘একটু আস্তে চালাও ভাই, বড় ভয় করে।’

‘কিছু ভয় নেই মেজদি। আমরা মরব না।’

সেদিন গ্রীন পার্কের বাসায় গিয়ে প্রথমে থমকে দাঁড়িয়েছিলাম। চোখে জল এসেছিল। মুছে নিলাম। সমস্ত বাড়িটা ঘুরে ঘুরে দেখলাম, খুব ভাল করে দেখলাম। তারপর ড্রইংরুমে এসে বুক সেল্ফ-এর ‘পর থেকে মেমসাহেবের পোর্টেটটা তুলে নিলাম।

ব্যাস? আর আমি নিজেকে সংযত রাখতে পারি নি? হাউহাউ করে, চিৎকার করে কাঁদতে লাগলাম। এত ছোটবেলায় মা’কে হারিয়েছিলাম যে চোখের জল ফেলতে পারি নি। পরবর্তীকালে জীবনে অনেক দুঃখ, অনেক আঘাত পেয়েছি কিন্তু কখনও চোখের জল ফেলার অবকাশ পাই নি। তাইতো সেদিন গ্রীন পার্কের বাসায় আমার জমিয়ে রাখা সমস্ত চোখের জল বেরিয়ে এলো বিনা বাধায়।

মেমসাহেব আমার কাছে ছিল না, কিন্তু আমি স্থির জানি সে আমার কান্না না শুনে থাকতে পারে নি। আমার সমস্ত জীবনের চোখের জলের সব সঙ্গম সেদিন ঠিক পোশাকগীর কান্না থেকে দ্বিগুণিত

ভবিষ্যতের জন্য একটা ফোঁটাও লুকিয়ে রাখি নি।

মেজদি চুপ করে পাশের সোফায় বসে কেঁদেছিলেন। গজানন দরজার ধারে দাঁড়িয়ে কেঁদেছিল।
চোখের জল থামলে মেজদিকে জিজ্ঞাসা করলাম, 'মেমসাহেবের কি হয়েছিল মেজদি?'
'আর কি হবে? সেই কলকাতার চিরন্তন ঝামেলা আর খোকনের বিপ্লব।'

পাঁচই ফেব্রুয়ারি সওয়া-তিনটায় ক্লাস শেষ হবার পর মেমসাহেব কলেজ থেকে বেরিয়ে
বেরুতে প্রায় পৌনে চারটে হলো। হাওড়ায় এসে পাঁচ নম্বর বাস ধরল যাবার জন্য। আগের
কয়েকদিনের মত সেদিনও বাস ডালহৌসী হয়ে গেল না। যাই হোক, বাসায় পৌঁছাবার পরই
খোকনের এক ক্লাসফ্রেন্ড বলাই হাঁপাতে হাঁপাতে এসে খবর দিল, 'ছোড়দি, খোকনের বৃকে গুলি
লেগেছে।'

মেমসাহেব শুধু চিৎকার করে জিজ্ঞাসা করেছিল, 'কোথায়?'

'এসপ্লানেড ইস্ট-এ।'

একমুহূর্ত নষ্ট করে নি মেমসাহেব। ট্যাক্সি নিয়ে ছুটেছিল এসপ্লানেডে। গ্রান্ড হোটেলের সামনে
ট্যাক্সি থামল। পুলিশ আর এগুতে দিল না। মেমসাহেব ঐখানে থেকে দৌড়ে গিয়েছিল এসপ্লানেড
ইস্টে। তখন সেখানে কুরুক্ষেত্রের যুদ্ধ চলছে। মেমসাহেবও দৌড়ে দৌড়ে ঘুরে বেড়াচ্ছিল খোকনকে
পাবার জন্য। খোকনকে কি পাওয়া যায়! সে তো তখন মেডিক্যাল কলেজ হাসপাতালে। মেমসাহেব
খোকনকে না পেয়ে পাগল হয়ে উঠেছিল, কিন্তু বেশিফণ তার পাগলামি করতে হয় নি। ঐ চরম
বিশৃঙ্খল অবস্থার মধ্যে টিয়ার গ্যাসের ধোঁয়ার অন্ধকারের মধ্যে ছোট একটা রাইফেলের বুলেট এসে
লেগেছিল বৃকের মধ্যে।

আর খোকন? তার বৃকে বুলেট লাগে নি, পায়ে লেগেছিল। ছোড়দির মৃত্যু সংবাদে সেও যেন
উন্মাদ হয়ে উঠেছিল। মেডিক্যাল কলেজের সমস্ত রোগীর আর্তনাদ ছাপিয়ে খোকনের কান্না শোনা
গিয়েছিল।

দু'দিন পরে কলকাতার কাগজগুলো মেমসাহেবের মৃত্যু নিয়ে চমৎকার হিউম্যান স্টোরি লিখেছিল।
একটা কাগজে মেমসাহেব আর খোকনের ছবি পাশাপাশি ছেপেছিল।

রিপোর্টটা পড়ে সবার মন খারাপ হয়েছিল। স্কুল-কলেজে, অফিসে-রেস্তোরাঁয়, ট্রাম-বাসে,
লোক্যাল ট্রেনে সবাই এই স্টোরিটা নিয়ে আলোচনা করেছিলেন।

মনে পড়ল অনেকদিন আগে আমি যখন কলকাতায় রিপোর্টারি করতাম, তখন আমিও এমন
কত হিউম্যান স্টোরি লিখেছি, পড়েছি। কিন্তু যেদিন আমার মেমসাহেবকে নিয়ে কলকাতার সব
কাগজে এত বড় আর এত সুন্দর রিপোর্টটা ছাপা হলো সেদিন অনেক চেষ্টা করেও আমি সে রিপোর্টটা
পড়তে পারলাম না।

বৃকের মধ্যে খবরের কাগজগুলো চেপে জড়িয়ে ধরে শুধু নীরবে চোখের জল ফেলেছিলাম।

কুড়ি

তারপরের ইতিহাস আর কি বলব? আমার জীবন মধ্যাহ্নেই এমন অপ্রত্যাশিতভাবে আমার
জীবন-সূর্য চিরকালের জন্য ঘন কালো মেঘে ঢাকা পড়বে, কোনদিন কল্পনাও করতে পারি নি। কিন্তু
কি করব? শুগবান বোধ হয় আমার জীবনটাকে নিয়ে লটারী খেলবার জন্যই আমাকে এই দুনিয়ায়
পাঠিয়েছেন। জীবনে যা কোনদিন কল্পনা করি নি, যা আমার মত অতি সাধারণ ছেলের জীবনে হওয়া
উচিত ছিল না, আমার জীবনে সেই সব অসম্ভব সম্ভব হয়েছে। যা বহুজনের জীবনে সম্ভব হয়েছে ও
হবে, যা আমার জীবনেও ঘটতে পারত, ঠিক তাই হলো না।

কেন, কেন আমার এমন হলো বলতে পার? কে চেয়েছিল জীবনে এই প্রতিষ্ঠা, অর্থ-যশ-
প্রতিপত্তি? কে চেয়েছিল স্ট্যান্ডার্ড হেরল্ড? বছর বছর বিদেশ ভ্রমণ? আমি তো এসব কিছুই চাই নি।
তিন-চারশ' টাকা মাইনের সাধারণ রিপোর্টার হয়ে মীর্জাপুর বা বৈঠকখানাতেই তো আমি বেশ সুখে
থাকতে পারতাম? লক্ষ লক্ষ কোটি কোটি অন্যান্য লোকের মতই আমিও তো পেতে পারতাম আমার
আশা-আকাঙ্ক্ষা বপু-সাধনার মানসীকে, আমার প্রেয়সীকে আমার জীবনদেবতাকে, আমার সেই এক
অধিভীয়া অনন্যাকে। ঐ পোড়ামুখী হতভাগী মেয়েটা আমার জীবনে এলে কি পৃথিবীর চলা থেমে
যেত? চন্দ্র-সূর্য গুটা বন্ধ হতো?

মাঝে মাঝে মনে হয় কালাপাহাড়ের মত ভাগবানের সংসারে আগুন জ্বালিয়ে দিই। মনে হয়ে মন্দির-মসজিদ-গীর্জাগুলো ভেঙে চূরনার করে দিই! আমাদের মত অসহায় মানুষের জীবন নিয়ে ছিনিমিনি খেলার অধিকার ভগবানকে কে দিল? মায়ের কোল থেকে একমাত্র সন্তানকে কেড়ে নেবার অধিকার কে দিয়েছে ভগবানকে। লক্ষ লক্ষ কোটি কোটি মানুষের পাকা ধানে মই দেবার সাহস ভগবানের এলো কোথা থেকে?

বিশে ফাগুন, ৬ই মার্চ বিয়ের দিন আমি মেমসাহেবের দেওয়া ধুতি-পাঞ্জাবি পরে গ্রীন পার্কের বাড়িতে গিয়েছিলাম। ওর ঐ পোট্টেটটা কোলে নিয়ে এইসব আজেনাজে কথা ভাবতে ভাবতে চোখের জল ফেলেছিলাম সারারাত। চোখের জল মুছতে মুছতে ঐ ফটোর মালা পরিয়েছিলাম, সিঁদুর দিয়েছিলাম। আর? আর আদর করেছিলাম বুকের মধ্যে জড়িয়ে ধরে আদর করেছিলাম।

ওধু সেই শুভদিনে নয়, তারপর থেকে রোজই আমি গ্রীন পার্কে যাই। কাজকর্ম শেষ করে রোজ লক্ষ্যার পর ওখানে গিয়ে মেমসাহেবের সংসারের তদারকি করি, মেমসাহেবকে আদর করি, সুখ-দুঃখের কথা বলি। রোজ অন্তত একবার মেমসাহেবের কাছে না গিয়ে থাকতে পারি না। কোন কোনদিন কাজকর্ম শেষ করতে করতে অনেক রাত হয়, ক্লান্ত-শ্রান্ত হয়ে চোখ দুটো ঘুমে ডরে আসে। মনে হয় ওয়েস্টার্ন কোর্টে চলে যাই, শুয়ে পড়ি। কিন্তু কি আশ্চর্য! গাড়ির টিয়ারিংটা ঠিক হেষ্টিংস-তুঘলক রোডের দিকে ঘুরে সফদারজং এয়ারপোর্টের পাশ দিয়ে মোহরলী রোড ধরে শেষ পর্যন্ত গ্রীন পার্কে এসে হাজির হয়।

লাডাক থেকে ফিরে এসে মেজদির কাছে যখন আমার চরম সর্বনাশের খবর শুনেছিলাম তখন মনে হয়েছিল আর বাঁচব না।

প্রিয়জনের বিয়োগ-ব্যথায় সব মানুষের মনেই এই প্রতিক্রিয়া হয়। আমারও হয়েছিল। সময়ের সঙ্গে সঙ্গে আমারও পরিবর্তন হয়েছে। মেমসাহেব নেই কিন্তু আমি আছি। আমি 'মরি নি, মরতে পারি নি'। আমি সুস্থ স্বাভাবিক মানুষের মতই বেঁচে আছি। আমাকে দেখে বাইরের কেউ জানতে পারবে না, বুঝতে পারবে না যে আমার বুকের মধ্যে ব্যথা-বেদনা, দুঃখ-আক্ষেপের হিমালয় লুকিয়ে আছে। আমার হাসি-ঠাট্টা হৈ-হুল্লোড় দেখে কেউ অনুমান পর্যন্ত করতে পারবে না এতবড় একটা বিয়োগান্ত নাটকের আমি হিরো। আমার মুখে হাসি আছে কিন্তু মনের বিদ্যুৎ প্রাণের উচ্ছ্বাস, চোখের স্বপ্ন চলে গেছে, চিরকালের জন্য চিরদিনের জন্য চলে গেছে।

জান দোলাবৌদি, যতক্ষণ কাজকর্ম নিয়ে থাকি ততক্ষণ বেশ থাকি। বুকের ভিতরের যন্ত্রণা ঠিক অনুভব করার অবকাশ পাই নি। কিন্তু রাত্রিবেলা? যখন আমি সমস্ত দুনিয়ার মানুষ থেকে বহুদূরে চলে আসি, যখন আমি ওধু আমার স্মৃতির মখোসুখি হই তখন আর স্থির থাকতে পারি না। নিজেকে হারিয়ে ফেলি। সমস্ত শাসন অমান্য করে চোখের জল গড়িয়ে পড়ে। মেমসাহেবের ফটোটাকে নিয়ে আদর করি, ভালবাসি, কথা বলি। ঘন্টার পর ঘন্টা কথা বলি। কত রাত হয়ে যায় তবু ঘুম আসে না। আর ঘুম এলেও কি শান্তি আছে? ঐ হতচ্ছাড়ী পোড়ামুখী আমাকে একলা একলা ঘুমুতে দেখলে বোধহয় হিংসায় জ্বলেপুড়ে মরে। আমার ঘুম না ভাঙিয়ে যেন শান্ত হয় না।

ফীরাক গোরখপুরীর একটা 'শের' মনে পড়ছে-

'নিদ আয়ে তো খোয়াব আয়ে,
খোয়াব আয়ে তো তুম আয়ে,
পর তুমহারি ইয়াদ মে
ন নিদ আয়ে ন খোয়াব আয়ে।'

চমৎকার! তাই না! ঘুম এলেই স্বপ্ন আসে, স্বপ্ন এলেই তুমি আস কিন্তু যেই তুমি আস, তখন না আসে ঘুম, না আসে স্বপ্ন।

ফীরাক গোরখপুরীর জীবনেও বোধহয় আমারই মত কোন বিপর্যয় এসেছিল। তা না হলে এত কল্পণ, এত সত্য কথা, এত মিষ্টি করে লিখলেন কেমন করে? ফীরাক যা লিখেছেন তা বর্ণে বর্ণে সত্য। যেই চোখের পাতা দুটো ভারী ভারী হয়ে বুজে আসে সঙ্গে সঙ্গে ও পা টিপে টিপে আমার ঘরে ঢুকবে। আমি বুঝতে পেরেও পাশ ফিরে শুয়ে থাকি। ও আমার কাছে এসে হুমড়ি খেয়ে পড়বে কিন্তু তবুও আমি ওর দিকে ফিরেই তাকাই না। হতচ্ছাড়ী আমাকে আদর করে ভালবাসে ঠোট দোটাকে

শেষ করে দেয়। তারপর কিছুক্ষণ আমার বুকের ওপর মাথা রেখে শোবে, হয়তো বা আমার মুখটাকে নিজের বুকের মধ্যে রেখে আমাকে জড়িয়ে শোবে। আর চুপ করে থাকতে পারে না। ডাক দেবে, 'ওনছ?' আমি ওনতে পাই কিন্তু জবাব দিই না। আবার ডাকে, 'ওগো, ওনছ?'

আমি হয়ত ছোট জবাব দিই, 'উ।'

হাত দিয়ে আমাকে টানতে টানতে বলবে, 'এদিকে ফিরবে না?'

অক্ষুট করে একটা বিচিত্র আওয়াজ করে আমি এবার চিত হয়ে ওই। ও একটানে আমাকে ওর দিকে ঘুরিয়ে নেয়। আমি চুপ করে থাকতে পারি না। ওকে জড়িয়ে ধরি আর যেই দু'চোখ ভরে ওকে দেখতে চাই, সঙ্গে সঙ্গে আমার ঘুম ভেঙে যায়।

দিনের পর দিন মাসের পর মাস বছরের পর বছর ধরে মেমসাহেব রোজ রাতে আমার কাছে এসে ঘুমটা কেড়ে নিচ্ছে। আগে আমার কি বিশ্রী ঘুম ছিল! বিশ্বব্রহ্মাণ্ড গুলট-পালট হয়ে গেলেও আমার ঘুম ভাঙত না। ঘুমের জন্য মেমসাহেব নিজেই কি আমাকে কম বকাবকি করেছে? আর আজকাল? ঘণ্টার পর ঘণ্টা বিছানায় গড়াগড়ি করি কিন্তু ঘুম আসে না। একেবারে শেষ রাতের দিকে ভোরবেলায় মাত্র দু'তিন ঘণ্টার জন্য ঘুমাই।

জীবনটা যেন কেমন ফ্যাকাশে হয়ে গেছে। সবকিছু থেকেও আমার কিছু নেই। ঘর-সংসার থেকেও সংসারী হতে পারলাম না। ভাছাড়া সংসারের জন্য তো কম করলাম না সুন্দরী সুখী পরিবারের জন্য যা কিছু মরকার, তা সবই আমার গ্রীণ পার্কের বাড়িতে আছে যখন যেখানে গিয়েছি, যখন যেখানে গিয়েছি, সেখান থেকেই মেমসাহেবের জন্য কিছু না কিছু এসে গ্রীণ পার্কের বাড়িতে জমা করেছে। সোফা-কার্পেট-ফ্রিজ থেকে শুরু করে রেডিও ট্রানজিস্টার টেপেরেকর্ডার পর্যন্ত আছে। মেমসাহেবের তো খুব চুল ছিল, তাই একবার ওকে বলেছিলাম, তোমাকে একটা হেয়ার-ড্রায়ারও এনেছি। ওর খুব ইচ্ছে ছিল ও অর্গ্যান বাজিয়ে গান গাইবে। বছর-দুই আগে জার্মান অ্যান্ডাসীর ফাস্ট সেক্রেটারি দিল্লী থেকে বদলী হবার সময় ওদের অর্গ্যানটা আমি কিনে নিই। ড্রইংরুমের ডানদিকের কোণায় অর্গ্যানটা রেখেছি। অর্গ্যানের একপাশে মেমসাহেবের একটা ছবি আর গীতবিতান। ডান দিকে চেক্ কাটগ্লাসের একটা ফ্লগওয়ার-ভাস-এ ফুল রেখে দিই।

মেমসাহেবের স্বপ্ন দেখার কোন সীমা ছিল না। ... 'ওগো, তুমি আমাকে একটা রকিং চেয়ার কিনে দেবে? শীতকালের দুপুরবেলায় খাওয়া-দাওয়া করে বারান্দায় রোদুরের মধ্যে রকিং চেয়ারে বসে দুলাতে দুলাতে আমি তোমার লেখা বই পড়ব।' কবে আমি বই লিখব আর কবে ও আমার বই পড়বে, তা জানি না। তবে গ্রীণ পার্কের বাড়ির সামনের বারান্দায় রকিং চেয়ার রেখেছি। শীতকালের দুপুরবেলায় গ্রীণ পার্ক গেলে আমি স্পষ্ট দেখতে পাই মেমসাহেব ওর লম্বা লম্বা চুলগুলো খুলে দিয়ে রকিং চেয়ারে দুলে দুলে আমার লেখা বই পড়ছে। ড্রইংরুমে ঢুকলে মনে হয় অর্গ্যান বাজিয়ে মেমসাহেব গান গাইছে জীবন-মরণের সীমানা ছাড়ায়ে, বন্ধ হে আমার রয়েছে দাঁড়ায়ে।

আর কি লিখব দোলাবৌদি, আমি আর পারছি না। এসব কথা লিখতে আমার হাতটা পর্যন্ত অবশ হয়ে আসে। আমি আর ভাবতে পারি না-মেমসাহেব নেই। রাস্তাঘাটে চলতে-ফিরতে গিয়ে দূরে থেকে একটু ময়লা, একটু টানা-টানা চোখের বিরাট খোঁপাওয়ালা মেয়ে দেখলেই মনে হয় ঐ বুকি মেমসাহেব। প্রায় ছুটে যাই তার পাশে। কোথায় পাব মেমসাহেবকে? ও এমন আড়াল দিয়ে নিজেকে লুকিয়ে রেখেছে যে সারাজীবন আমি চোর হয়ে ওকে খুঁজে বেড়াব কিন্তু পাব না। আমি খালি অবাক হয়ে ভাবি আমাকে এত কষ্ট দিয়ে ওর কি লাভ? ওর কি একটুও দুঃখ হয় না? আমাকে একটু দেখা দিলে কি আমি ওকে গিলে খেতাম? আজ আর আমি কিছুই চাই না, শুধু মাঝে মাঝে ওকে একটু দেখতে চাই, দেখতে চাই ওর সেই ঘন কালো টানা টানা গভীর দুটো চোখ, বিরাট খোঁপাটা আর একটু হাসি। আর? আর কি চাইব? চাইলেই কি পাব? পাব কি আমার কপালে ওর একটু হাতের ছোঁয়া? আমি ভাবতে পারি না ওকে আর কোনদিন দেখতেও পাব না!

একসঙ্গে বেশিদিন আমি দিল্লীতে টিকতে পারি না। বছরে আটবার-দশবার ছুটে যাই কলকাতায়। ওর-আমার স্মৃতি জড়ান রাস্তায় রাস্তায় ঘুরে বেড়াই। সকালবেলায় রাসবিহারীর মোড়ে লেডিজ ট্রামটার জন্য আর বিকেলবেলা অ্যাসেমব্লী হাউসের কোণে বা হাইকোর্টের ঐ ধারের রৌরুয়েটে ঘুরে বেড়াই। ওকে দেখতে পাই না কিন্তু ওর ছায়া দেখতে পাই।

আরো কত কি করি! যেখানে যেখানে মেমসাহেবের স্মৃতি লুকিয়ে আছে, আমি সময় পেলেই সেখানে ছুটে যাই। ডায়মন্ড হারবার-কাঁকরীপ থেকে শুরু করে দার্জিলিং-এর পাহাড়ে, পুরীর সমুদ্রপারে, জয়পুরের রাস্তায়, সিলিসেরের লেকের ধারে ছুটে যাই! বিনিময়ে! বিনিময়ে শুধু চোখের জল আর পাঞ্জর কাঁপানো দীর্ঘশ্বাস! ব্যস, আবার কি?

মাঝে মাঝে মনে হয় আমি ভুল, আমি মিথ্যা, আমি ছায়া অব্যয়! মনে হয় এমন করে নিজেকে বঞ্চনা করে কি লাভ? মেমসাহেব যদি আমাকে ঠকিয়ে লুকিয়ে থাকতে পারে, তবে আমিই বা তাকে মনে রাখব কেন। হতভাগ্যীকে ভুলব বলে হোয়াইট হর্স বা ড্যাট-সিক্সটিনাইনের বোতল নিয়ে বসে টকটক করে গিলেছি। গিলতে গিলতে বুক পেট জ্বলে উঠেছে, আমি স্বাভাবিক থাকতে পারি নি কিন্তু তবুও ওর হাসি, ওর ঐ দুটো চোখ আমার সামনে থেকে সরে যায় নি। আবার মাঝে মাঝে মনে হয়েছে আমি লম্পট, বদমাইশ, দুশক্রিয় হবো; যেখানে যে ময়ে পাব তখন তাকে নিয়ে স্কুর্তি করব, মজা করব, আনন্দ উপভোগ করব। মনে করেছি রক্তমাংসের এই দেহটাকে নিয়ে ছিনিমিনি খেলব। পারি নি দোলাবৌদি, পারি নি। সুযোগ সুবিধা পেলেও পারি নি। সফিসটিকেটেড সোসাইটির কত মেয়ের সঙ্গে আমার পরিচয়। কতজনের সঙ্গে আমি ঘুরে বেড়াই, সিনেমায় যাই, হোটেলে যাই, ফ্লোর শো'তে যাই। কখনো কখনো বাইরেও বেড়াতে যাই। রক্তমাংসের একটু আধটু ছোঁয়া-ছুঁইতে ওদের অনেকেরই জ্ঞাত হয় না, তা আমি জানি, কিন্তু পারি না। মনে হয় মেমসাহেব পাশে দাঁড়িয়ে মুচকি মুচকি হাসছে।

মেমসাহেবকে ভুলি কি করে? ওকে ভুলতে হলে নিজেকেও ভুলতে হয়, ভুলতে হয় আমার অতীত, বর্তমান ও ভবিষ্যৎ। কিন্তু সে কি সম্ভব? আমি যদি উন্মাদ না হই, তাহলে কি করে হবে? আমার জীবনে অমাবস্যার অন্ধকারে ওর দেখা পেয়েছিলাম। কৃষ্ণপক্ষের দীর্ঘ পথযাত্রায় আমার একমাত্র সঙ্গিনী ছিল। কিন্তু পূর্ণিমার আলোয় ওকে পাবার আগেই ও পালিয়ে গেল। ও আমাকে সবকিছু দিয়েছে-কর্মজীবনে সাফল্য, সমাজজীবনে প্রতিষ্ঠা, প্রাণভরা ভালবাসা-সবকিছু দিয়েছে। নিজে কিছুই ভোগ করল না, কিছুই ভাগ নিল না। সবকিছু রেখে গেল, নিয়ে গেছে শুধু আমার হৃৎপিণ্ডটা।

এই বিরাট দুনিয়ায় কত বিচিত্র আকর্ষণ ছড়িয়ে রয়েছে। মানুষের মনকে প্রলুব্ধ করার জন্য সম্পদ সম্ভোগের বন্যা বয়ে মাচ্ছে দেশে দেশে। কত নারী, কত পুরুষ তা উপভোগ করছে। আমার জীবনেও ও সে সুযোগ এসেছে বারবার, বহুবার। স্বদেশে, বিদেশে সর্বত্র। কিন্তু পারি নি। মনের মধ্যে এমন জমাট-বাঁধা কাল্পনা জমে আছে যে আনন্দ-বাসরের কাছে গেলে আমি আঁতকে উঠি। দিষ্টী, বোম্বে, কলকাতায় কত রসের মেলা বসে রোজ সন্ধ্যাবেলায়। কত বন্ধু-বান্ধব ও বান্ধবী সাদর আমন্ত্রণ জানান সে উৎসবে, সে রসের মেলায় অংশ নিতে। হয়ত সেসব উৎসবে উপস্থিত থাকি, হয়ত ঠোঁটের কোণায় একটু শুকনো রেখা ফুটিয়ে কাকলী রায় বা অনিমা মৈত্রাকে আর এক গেলাস শ্যাম্পেন বা হুইস্কি এগিয়ে দিই কিন্তু মেতে উঠতে পারি না ওদের মত। শুধু এখানে কেন? লন্ডন, প্যারিস, নিউইয়র্ক! ওখানে তো সন্ধ্যার পর মানুষ মাটতে থেকেও অমরাবতী-অলকানন্দায় বিচরণ করে। পরিচিতা-অপরিচিতার দল আমাকে হোটেল থেকে টেনে নিয়ে যায়, একলা থাকতে দেয় না। কিন্তু পারি কি ওদের মত অমরাবতী-অলকানন্দায় উড়ে যেতে? পারি কি নিজেকে ভুলে যেতে? পারি না দোলাবৌদি, পারি না। সব সময় মনে হয় মেমসাহেব থাকলে কত মজা হতো।

ওর কত ইচ্ছা ছিল আমার সঙ্গে দেশ-বিদেশ ঘুরবে। যখন ও আমার কাছে ছিল তখন ওকে নিয়ে ঘুরে বেড়াবার সামর্থ্য আমার ছিল না! অকর্মণ্য বেকার সাংবাদিক হয়ে ওকে নিয়ে কলকাতার রাস্তায় বেরুতেও ভয় পেতাম, লোকলজ্জায় পিহিয়ে যেতাম। আজ? আজ অবস্থার পরিবর্তন হয়েছে! আজ ঐ চিরপরিচিত কলকাতার রাজপথে আমি যে কোন মেয়েকে নিয়ে ঘুরে বেড়াতে পারি। আমি জানি কেউ আমার সমালোচনা করবে না বা করলেও সে বিশ্ববিন্দুকের ভয় আমি করি না। কিন্তু আজ কোথায় পাব আমার মেমসাহেবকে? যে কলকাতার রাজপথ দিয়ে হাঁটতে হাঁটতে স্বপ্ন দেখেছি ভবিষ্যৎ জীবনের, আজ আমি সেই পথ দিয়েই একা একা ঘুরে বেড়াই। সকাল থেকে সন্ধ্যা, সন্ধ্যা থেকে গভীর রাত পর্যন্ত ঘুরে বেড়াই। ক্লান্ত হয়ে এক কাপ চা বা এক পেগ হুইস্কি নিয়ে বসে পড়ি, কিন্তু মেমসাহেবের স্মৃতি বিজড়িত পথের আকর্ষণ কাটিয়ে ঘরে ফিরতে পারি না। ভাবি, নিঃসঙ্গভাবে

পথ চলতে গিয়েই একদিন মেমসাহেবের দেখা পেয়েছিলাম। ভিড়ের মধ্যে ওকে হারিয়ে ফেলেছি। হয়ত পথে পথে ছুরতে ছুরতেই আবার ওর দেখা পাব। আমি জানি এই পৃথিবীতে আর একটা মেমসাহেব পাওয়া অসম্ভব। যদিও বা সবকিছুর মিল খুঁজে পাই, ওর ঐ অপারেশনের চিহ্ন তো পাব না।

মেমসাহেবকে পেয়ে বোধহয় মনে মনে বড় বেশি অহঙ্কার হয়েছিল। বোধহয় সেই তরুণ প্রেমিকের মত ভেবেছিলাম।

‘জিস্ত, পার ইনকিলাব আনে দে
কমসিনী পর শরাব্ আনে দে
এ খুদা, তেরী খুদাই পলট্ দুগ্গা।
জরা লব্ তক্ শরাব্ আনে দে।
মরণে আর জিনে কা ফয়সালা হোগা।
জরা উনকা জবাব আনে দে।’

হয়ত সেই তরুণ প্রেমিকের মত ভেবেছিলাম, আমার হৃদয়ে বিপ্লব আসুক, আমার ঐ প্রাপক-যুবতীর যৌবন আসুক, ওর ঠোটে ভালবাসা আসুক, তারপর ভগবানের ভগবানত্ব ঘুচিয়ে দেব। এর দেহে এই বিবর্তন আসার পর একবার বাঁচা-মরার ফয়সালা করে ছাড়ব। আমি বোধ হয় এমনি স্বপ্ন দেখেছিলাম যে, মেমসাহেবকে পাবার পর সারা দুনিয়াটাকে একবার মজা দেখাব। আজ আমার পাশে মেমসাহেব থাকলে দু’জনে মিলে হয়ত সত্যি অনেক অসম্ভবকে সম্ভব করতাম। ভগবান নিজের মাতব্বরী বজায় রাখবার জন্য আমাদের সে সুযোগ দিলেন না। হিংসুটে ভগবান কেড়ে নিলেন মেমসাহেবকে। হতচ্ছাড়া ভগবান যদি আমাদের মত রক্ত-মাংসের তৈরি হতেন তাহলে অনুভব করতেন আমাদের জ্বালা-যন্ত্রণা। কিন্তু নিশ্চয় পাথরের ঐ মূর্তিগুলো কি করে অনুভব করবে আমাদের সুখ-দুঃখ, হাসি-কান্না, জ্বালা-যন্ত্রণার কথা! মানুষের মনের কথা বুঝবে না বলেই তো ও পাথরের মূর্তি হয়ে আমাদের উপহাস করছে, বিদ্রোপ করছে।

কাজকর্ম, দায়িত্ব কর্তব্য থেকে একটু মুক্তি পেয়ে একটু একলা হলেই এই সব আবেগনাজে চিন্তা করি। মাঝে মাঝে সন্দেহ হয়, হয়ত মেমসাহেবকে নিয়ে অত আনন্দ করা আমার উচিত হয় নি। ভগবানের ব্যাভে আমার অদৃষ্টের যে পরিমাণ আনন্দ জমা ছিল, আমি বোধহয় তার চাইতে অনেক, অনেক বেশি আনন্দের চেক কেটেছিলাম। তাই বোধহয় এখন সারাজীবন ধরে চোখের জলের ইন্সুলমেন্ট দিয়ে সে দেনা শোধ করতে হবে। আবার এখনও কখনও মনে মনে সন্দেহ হয় যে, শ্যামবাজারের মোড়ে যেমন ফিরপো বা গ্রান্ড-গ্রেট ইস্টার্ন হোটেল মানায় না এসপ্লানেডের মোড়ে যেমন ছানার দোকান বেমানান হয়, তেমনি আমার পাশেও বোধহয় মেমসাহেবকে মানাত না। আই, এফ, এস. বা আই. এ. এস. বা টপ মার্কেটাইল এক্সিকিউটিভের পাশে ওকে যেমন মানাত, তেমনি কি আমার পাশে সম্ভব হতো? কিন্তু তাই যদি হয় তাহলে ভগবান আমার জীবনে ওকে আনলেন কেন? কি প্রয়োজন ছিল এই রসিকতার?

এসব কথা ভাবতে গেলে আমি আর নিজেকে সামলাতে পারি নি। মাথাটা ঝিমঝিম করে বুকের মধ্যে অসহ্য ব্যথা করে, হাত-পা অবশ হয়ে আসে। মাঝে মাঝে ভাবি ও হতচ্ছাড়া পোড়ামুখীর কথা আর ভাবব না, আর কোনদিন মনে করব না ওর স্মৃতি। ওর স্মৃতিকে ভুলবার জন্যই হয়ত দুই-একটি বাস্তবীর সঙ্গে একটু বেশি মেলামেশা, একটু বেশি মাতামাতি করেছি কখনও কখনও। কিন্তু এক পা এগিয়ে তিন পা পিছিয়ে এসেছি। অন্য কোন মেয়ের সঙ্গে আমার ঘনিষ্ঠতা মেমসাহেব সহ্য করতে পারত না। বলত, ‘ওগো, তুমি অন্য কোন মেয়ের সঙ্গে বিশেষ মেলামেশা করো না।’

আমি জিজ্ঞাসা করতাম, ‘কেন? আমি কি হারিয়ে যাচ্ছি?’

‘তা জানি না, তবে আমার বড় কষ্ট হয়।’

সেই স্মৃতি, সেই কথা, মেমসাহেবের সেই মুখখানা যেই মনে পড়ে, সঙ্গে সঙ্গে আমি পালিয়ে আসি এসব বাস্তবীর কাছ থেকে। তাছাড়া ও যদি অন্য ছেলের সঙ্গে একটু হাসি-ঠাট্টা বা গল্প-গুজব করত তাহলে আমিও তো সহ্য করতে পারতাম না। সেবার দার্জিলিং-এ গিয়ে ও যখন আধ ঘন্টার কথা বলে ঘন্টা-দুই ধরে ইউনিভার্সিটির পুরনো বন্ধু-বান্ধবদের সঙ্গে আড্ডা দিয়ে হোটেলে ফিরে

একলা তখন ওকে আমি ভীষণ বকেছিলাম। সুতরাং আজ আমার কি অধিকার আছে বনানী, চন্দ্রাবলী বা অন্য কোন সনাতন সঙ্গীত যত্রতত্র বিচরণ করবার? আমি যে অধিকার ওকে দিতে পারি নি সে অধিকার আমি উদ্ধার করি কোন মুখে?

তাই তো ওদের সবার কাছ থেকে পালিয়ে আসি। পালিয়ে আসি গ্রীন পার্কে, মেমসাহেবের সংসারে। ওর নিজের হাতে লাগানো কাঠচাঁপা গাছে একটু জল দিই, বারান্দায় ডেক চেয়ারটাকে ঠিক করে রাখি। ড্রইংরুমে গিয়ে অর্গ্যানটাকে একটু পরিষ্কার করি, মেমসাহেবের পোর্ট্রেট একটু বাঁকা করে ঘুরিয়ে রেখে ওর মুখোমুখি বসে থাকি।

আগে ভাবতাম কাজকর্ম শেষ করে বাড়িতে ফিরে এসে ঘন্টার পর ঘন্টা গান শুনব। ভাবতাম, দুটো একটা গান শোনার পর ও বলবে সারাদিন বাদে বাড়ি ফিরলে আগে স্নান করে খাওয়া-দাওয়া সেরে নাও তারপর আবার গান শোনার।

‘আগে তুমি গান শোনাও। পরে স্নান করব।’

‘লক্ষীটি, আগে খাওয়া-দাওয়া সেরে নাও পরে গান শুনো। খাওয়া-দাওয়া এত অনিয়ম করো না।’

মেমসাহেবের কঠোর চিরদিনের মত শুরু হয়ে গেছে। আজ আমি যদি অনিয়মই করি কেউ নেই আমাকে শাসন করবার কেউ নেই আমাকে বাধা দেবার। আর গান? চিরকালের জন্য আমার জীবন থেকে সর আর ছন্দ বিদায় নিয়েছে।

টেপ-রেকর্ডারে কত বড় বড় শিল্পীর কত অসংখ্য গান তুলে রেখেছি। কোন কোনদিন ঘন্টার পর ঘন্টা ড্রইংরুমে বসে ঐসব গান শুনি। গান শুনতে শুনতে হারিয়ে ফেলি নিজেকে। কোনদিন হয়ত ঘুমিয়েই পড়ি। গজানন আসে ডাক দেয়, ‘ছোটসাব, অনেক রাত হয়ে গেছে! খাওয়া-দাওয়া করবে তো?’

আমি একটু মুচকি হেসে বলি, ‘গজানন, খাওয়া-দাওয়া করে যদি শান্তিতেই ঘুমান তাহলে তোমার বিবিজিরে হারাব কেন?’

গজানন লুকিয়ে কাপড়ের কোণা দিয়ে চোখের জল মুছে নেয়, ‘ছোটসাব, তুমি এমন করে নিজেকে কষ্ট দিলে বিবিজিরও কষ্ট হবে।’

গজাননের কথায় আমি পাগল হয়ে উঠি। হঠাৎ দপ করে জুলে উঠি। যা-তা বলে গজাননকে গালাগালি দিই, ‘ফালতু বাত্ মাত্ কহো। ননসেন্স, ইডিয়েট, রাসকেল। বিবিজির কষ্ট হবে? তোমার বিবিজির ছাই হবে। আমাকে জ্বালিয়ে-পুড়িয়ে ছাই করে দিল যে-মেয়ে তার আবার কষ্ট হবে?’

কি আশ্চর্য! গজানন আমার কথায় রাগে না, কাঁদে?

এই হতচ্ছাড়া গজাননটা হয়েছে আমার আর এক জ্বালা। ও হতভাগার কোন চুলোয় যাবার জায়গা নেই। বৌটাকে তো বহুকাল আগেই খেয়ে বসে আছে। মেয়েটার বিয়ে হয়ে গেছে বহুকাল। রিটার্ন করার পর নেই যে আমার ঘাড় চেপেছে আর নামছে না। কত বকা, কত গালাগালি দিই। কতবার বলি দূর হয়ে যা। কিন্তু হতভাগা নড়বে না। জগদ্বল পাথরের মত আমার ঘাড় চেপে বসে আছে। বেশি কিছু বললে হাউমাউ করে এমন কান্নাকাটি লাগাবে যে আমি আর কিছু বলতে পারি না, মাঝে মাঝে মন-মেজাজ ভাল থাকলে জিজ্ঞাসা করি গজানন, ‘মাইনে নেবে না?’

গজানন অবাক হয়ে বলে, ‘মাইনে? আমি টাকা নিয়ে কি করব ছোটসাব? তুমি খেতে-পরতে দিলে, আমার আবার কি চাই?’

একটু পরে একটা দীর্ঘনিশ্বাস ছেড়ে বলে, ‘তাছাড়া তোমার সঙ্গে আমি কি হিসাব-নিকাশ করব? যার সঙ্গে হিসাব-নিকাশ করব ভেবেছিলাম, সেইতো সব হিসাব-নিকাশ মিটিয়ে চলে গেল।’

ওর এই কথার বলা পর কি আর কিছু বলা যায়? আমি চূপ করে যাই।

এতবড় বাড়িতে একলা থাকে বলে গজাননকে মাঝে মাঝে নানা রকমের ঝগড়াট পোহাতে হয়। অনেকেই অনেক রকম প্রশ্ন করে। ও কাউকে বলে বিবিজি বিলেতে পড়তে গেছে, ক’বছর পর ফিরবে। গ্রীন পার্কের অধিকাংশ লোকই জানে মেমসাহেব বিলেতে পড়তে গেছে। কাউকে কাউকে বলে বিবিজি ব্যাপের বাড়ি গেছে, কয়েক মাস পর ফিরবে। দু’একজনকে নাকি বলেছে, বিবিজির বাচ্চা